


清代傳記叢刊·綜錄類⑦
周 駿 富 輯

國朝耆獻類徵初編

(三九)

卷二六〇至
卷二六九

(清)李 桓 輯



明文書局印行

國朝耆獻類徵初編卷二百六十目錄

僚佐十二

汪萊

周盤洲

車酉

陳松

張宜尊

馮德岫

王宣

鄧文炳

汪注
楊章

李之梓
熊廷燮

吉彥英
方春

徐大綸

陳大琮

陳寶儉

錢允濟

劉瀆

徐豫吉

周銘恩

龍甸

孫葆恬

趙紹祖

石家

黎愷

楊瑀

國朝才具姓名不詳

楊積煦

汪時育

俸常榮

彭鼎

岑應麒

補錄

陳炳極

方鈺

高翫映

國朝耆獻類徵初編卷二百六十

通奉大夫前署江西巡撫江西布政使司布政使湘陰李桓輯
僚佐十二

汪萊

吾友汪君孝嬰嘉慶丁卯以優貢生赴朝考京師戊辰入國
史館纂修天文時憲志既成天子嘉其通曉數學授教諭選石
埭教諭癸酉冬十一月卒於官明年甲戌冬十二月其弟子績溪
縣舉人胡君培輦移書於循曰國史館修儒林傳館內諸公徵
先師事蹟竊思先師六經子史罔不通貫而天文算術是其專門
非得精通九數者不能道且先師所學與自來各家異同出入未

易悉其涂徑伏唯先生於數學著有成書先師寓揚時惟與先生往來商榷不吝惠施俯從所請爲撰別傳一篇將先師心得詳悉揭出以便上之史館感且不朽嗚呼孝嬰信沒矣自丁卯與孝嬰別去秋省試後孝嬰與舍弟同舟至揚信宿遠去循村居以足疾未獲一晤近者傳聞其沒猶未敢信得胡君書而孝嬰信沒矣孝嬰少余五歲自訂交於秦淮旅舍至今二十餘年雖遠隔數千里有所得必郵寄相與論訂歲丙寅余館城中與孝嬰館相去數武尤朝夕聚然孝嬰之學深妙入微恐不足以盡其蘊姑述所知質之胡君惟大人先生採摘焉孝嬰姓汪氏諱萊號衡齋徽州歙縣人也徽州之學自江文學永倡其先戴庶常震金殿撰榜程孝

廉方正瑤田踵而興焉江氏精西人法戴氏飾以古九章割圓故
天文術算與宣城梅氏相伯仲東吳錢少詹事大昕教授塘遙相
應和然孝嬰生於歛其學實自得不由師授弱冠後讀書於吳葑
門外數年苦心冥索盡得中西之祕亦未嘗與吳中師友相接天
資敏絕性能攻堅極繁蹟幽祕他人翻覆再三未能理其緒而孝
嬰目一二過默識靜會已洞悉其本原而貫通其條目是非隱隙
毫髮莫遁人所言不復言所言皆人所未言與人所不能言故其
著述無多卷而簡奧似周秦古書八綫之制終於三分取一用益
實歸除法求之孝嬰以一表之真數僅得十之二因悟得五分之
一通弦與五分之三通弦交錯爲三角形比例立法以取五分之

一之通弦而弦切之數益密梅氏環中黍尺有以量代算之術惟求倚平儀外周之兩角而縮於內半周之角未詳孝嬰以爲易更立新法量取不倚外周之角度而三角之量法乃全堆垛有求平三角立三角尖堆積法不及三乘方以上孝嬰推而補之自三乘四乘以上之尖堆皆可由根知積因及諸物遞兼之法以補古九章所未備凡此引伸觸類無不探幽索隱條疏層解所尤獨得者爲糾正梅文穆公句股知積之術及指識天元一正負開方之可知不可知文穆赤水遺珍稱有句股積及股弦和較求句股向無其法苦思力索立法四條其門生丁維烈又造減從翻積開三乘方法文穆許之孝嬰曰句股形等積等弦和帶從立方形等積等

高闊和皆有兩形互易如句二十股二十一弦二十九句弦和四十九句股積二百一十句十二股三十五弦三十七句弦和亦四十九句股積亦二百一十若問者暗執一形則對者交盲兩數梅丁諸公法成而不可用遂剗立有兩積相等兩句弦和相等求兩句股形之法其法四倍句股積自乘句股和除之爲帶從長立方積以句弦和爲從開得數爲兩句弦較之中率自乘爲帶從平方積又以中率與句弦和相減爲長闊和求得長闊兩根爲兩句弦較用句弦較與句股和求得兩句股形各數蓋悟得兩句弦較及兩句弦較減一句弦和之餘必爲連比例之三率兩句弦較必爲首末二率兩較減一和之餘必爲中率句弦和必爲三率併故求

得首末兩率卽得兩句弦較之數又悟得同積之邊彼此可互三
次之乘先後可通故四倍句股積自乘卽兩形之倍句相乘爲底
兩形之股相乘爲高又以股自乘同於句弦和乘句弦較則以句
弦和除股自乘原可得句弦較今之兩倍句不同數相乘之兩股
亦不同數則句弦和乘之不得句弦較而得兩句弦較之中率蓋
句弦和旣爲三率併則此一句弦較爲首率者用減此一句弦和
所餘倍句卽中末二率彼一句弦較爲末率者用減彼一句弦和
所餘倍句卽首中二率故兩倍句相乘卽猶以中末乘首中而兩
倍句相乘爲底兩股相乘爲高者化爲中率再乘爲立方三率併
爲帶從故以句弦和爲從開立方卽得中率又以中率自乘與首

末二率相乘等故以中率自乘爲平方積以首末二率爲長闊和
得長闊卽得首末得首末卽得兩句弦較之數是術也窮消息之
原整旁通之徑所謂成變化而行鬼神者矣元李治傳洞淵九容
之術撰測圓海鏡益古演段以明天元一如積相消其究必用正
負開方互詳於宋秦九韶數學九章 本朝梅文穆公雖指天元
一爲西人借根所由來而正負開方則未有闡明者元和李銳尙
之特爲讐校謂少廣一章得此始貫於一好古之士翕然相從孝
嬰獨推其有可知有不可知如測圓海鏡邊股第五問圓城求徑
二百四十步與五百七十六步共數而李仁卿專以二百四十爲
答數學九章田域第二題尖田求積二百四十步與八百四十步

其數而秦道古專以八百四十爲荅乃自二乘方以下縷析推之
得九十五條凡幾根數爲帶從長闊較則可知爲帶從長闊和則
不可知又推得幾真數少幾根數又多幾平方與一立方積等多
少糝雜和較莫定立法以審之以幾平方數用幾立方數除之得
數乘幾根數以較幾真數若少於真數則以幾平方爲高闊較是
爲可知若多於真數則或幾平方數爲通分法三母總數幾真數
爲三母維乘之其數幾根數爲通分之其子如二如六如十二設
真數一百四十四少二百零八根積多二十平方積與一立方積
相等則三數皆同是爲不可知也孝嬰於六經務在熟習本文博
通注疏原始要終以一知半解爲陋儀禮士虞禮記虞沐浴不櫛

注云今文曰沐浴歷來校者不言其所謂或以今文曰沐浴則古文不曰沐浴今本作沐浴宜有譌孝嬰曰否注謂古文作沐浴不櫛今文作沐浴無不櫛二字所異在不櫛之有無不在沐浴之增減也史記太初元年年名闕逢攝提格是爲甲寅漢書述三統推太初元年歲名丙子說者不能決孝嬰曰三統劉歆所作王莽以火德消盡土德當代太初元年甲寅數至建國元年則爲丙午莽急欲卽眞萬不能待戊己之年故更元年爲己巳則冠土於火之上遂改太初甲寅爲丙子又僞爲超次之法遠託諸十四萬三千二百三十九年之前以爲太極上元起於丙子超若干法至建國元年恰爲己巳此與卽位之日用戊辰令天下以戊子代甲子意

同歆以之欺莽莽以之欺天下凡說經史不苟同於人類此熟於許氏說文工篆餘事亦爲詩歌性淵穆和易與人接無厓岸有以所著撰相質必首尾研究再三否者直乙之是者爲之疏通證明程氏瑤田撰磬折古義以明一矩有半之句倨謂設縣於股在鼓上稍右股橫於上所以壓之使正泥成說者或疑之孝嬰覈以重心比例之法而磬鼓直縣之制以定或得舊井闌石有字磨滅眾傳會爲蜀延熙時物孝嬰細審力闢其誣或勸其周旋世故終崛強不少假借其官石埭也公事依例獨行不爲利疚威惕故食貧茹苦無異諸生時嘗雨中步遊黃山作遊記一卷石埭東南郭柳家梁有媪廟田得銅器二甌相附有古篆文孝嬰量得大者口徑

今尺八寸十分寸之九邊侈一寸十分寸之一腹寬底殺容積寸二百三十六辨其當下篆爲蜀郡成都楊旦造傳子孫十字小者容積一百一十寸形與大者同辨其當下篆爲陵陽子明受王孫釜作融用沸十二字劉向列仙傳紀子明上黃山采五石脂沸水而服此其沸石之器且爲楊王孫名可補班氏漢書急分俸錢購得之日手摩挲以爲娛樂而甌中生塵不計也春秋四十有六所著衡齋算學七卷行於世

論曰今世精九數之學者惟孝嬰及李尚之銳尙之善言古人所已言而闡發得其真孝嬰善言古人所未言而引伸得其間尙之精實如詩之有少陵也孝嬰超異如詩之有太白也秦李之學爲

郭太史授時草開其先有明三百年莫有能知者唐順之顧應祥自謂知算而於測圓海鏡授時術不知立天元爲何事竟刪細草去之本朝重實學盡收兩家之書於四庫全書中而天下好學深思之士乃得從而彰顯焉正負開方發明於尙之俾古學微而復著而可知不可知則自孝嬰啟其端尙之亦深歎爲窮幽極微爲算氏之最撰開方三例以證明之所云一荅卽可知者也所云不止一荅卽不可知者也所爲三例以隅實同名者不可知隅實異名而從廉正負不雜者可知隅實異名而從廉正負相雜其從翻而與隅同名者可知否則不可知隅實異名卽帶從之長闊較也隅實同名卽帶從之長闊和也尙之以隅實同名異名明一荅

與不止一答孝嬰以長闔和較明可知與不可知其義一也至孝
嬰謂幾真數少幾根積多幾平方與一立方等卽尙之所謂實負
從正廉負隅正爲隅實異名而正負相雜者以商數乘隅與廉相
減隅數多於廉則減去廉之負而存隅之正隅從兩正當一實負
仍從爲隅實之較隅數少於廉則減去隅之正而存廉之負廉實
兩負當一從正仍從爲隅實之和以立方除平方猶以隅廉相減
以根數乘減餘而少於真數則真數爲和卽從爲較矣以根數乘
減餘而多於真數則真數爲較卽從爲和矣尙之言多少在廉隅
孝嬰言多少在從實隅多於廉斯從少於實故尙之以多爲一答
孝嬰以少爲可知廉多於隅斯實少於從故尙之以少爲不止一

荅孝嬰以多爲不可知尙之究乎旣商之後孝嬰審於未商之先
言若殊趨義實互證親此者或斥彼邇彼者或詆此故相傳其齟
齟焉然而絕學之顯端由兩君實關乎 盛朝文治之盛謹備述
之而他從略云

右別傳焦循撰

汪萊者字孝嬰藩之密友也優貢生大學士祿康薦修 國史天
文志議敘以教官用選石埭縣訓導深於經學十三經注疏皆能
背誦如流水而又能心通其義人有以疑義問者觸類旁通略無
窒礙尤善麻算通中西之術著有衡齋算學刊行於世與元和李
尙之銳論開方題解及秦九韶立天元一法不合遂如寇仇終身

不相見噫過矣然今之學者大江以南惟顧君千里與孝嬰二人而已烏可多得哉

右漢學師承記江藩撰

三
國
志
卷
之
第
一
冊
第
一
冊
第
一
冊
第
一
冊

周盤洲

嗚呼是惟盤洲先生之墓先生之在浦陽山中實惟閒氣之所鍾何者遭前修不作之會抱絕世之資分濟以過人之精力攝以無外慕之心思用專其志於詩書易禮史漢三唐之闡奧擇焉而得其精微於以作文稱詩於以傳經授讀其大者在君臣父子之間而細至於日用交遊之際無不以所得於古人者稱心斟酌而不肯稍處於掩冉依違之習故其用心專以摯其處己剛以嚴其與人方以正其居家也和順性成未嘗有所師承而能大開風氣力挽頽波其立身制行於潘默成先生所謂矯范香溪先生所謂恥者有默契焉是殆直接金華前輩之風而無愧者已先生浦江盤

洲人祖某父嵩年翁太學生有隱德爲世所宗先生生而岐嶷讀書不肯尋行數句務透其精意而後止弱冠游庠輒屈其儕輩年二十四薦於鄉謂有羅萬藻徐思曠之風願自是累舉不售以廩膳生出貢成均嘗三遊萬松書院省會多知名士浙東西英俊雲集擇交必其桀者如西安江維新餘姚周栗臨安印申錫慶元姚梁皆敦道義交稱莫逆游蹤所到浦邑如合溪黃氏深溪王氏他縣則金華蘭江暨桐廬建德皆棲遲依止畸行逸事人爭稱道焉於馬建戴氏尤稔習始游庠名相聯者爲予兄殿江遂相訂爲忘形交至殿泗甫知向學遂從游焉或授館九靈山房或請業盤溪精舍或從之武林習業書院或游息湖濱野寺中計殿泗十六七

齡以後十餘年間無日不追從也其所披抉指示類非尋常舉業之道於凡所謂執經之心服古之蘊罔勿周至惜殿泗資質愚鈍未竟其百一爲可汗也晚年需次得海鹽縣儒學訓導始得少酬績學之志既至任閱年卒於官所子蘭生奉柩歸葬大園之原先生生雍正十二年甲寅九月十五日卒嘉慶十三年戊辰三月十四日享年七十有五兄弟三人居長次元珍次石琮娶平湖陳氏適嘉興張氏子一蘭生孫五人某某女一所著有盤洲詩文集若干卷藏於家先生之卒也殿泗備員編修弗得與執紼奉柩之事既葬告假旋里惟銘墓宜有文遂忘其謫陋而爲之辭且言曰先生孝弟人也殿泗服從先生久克知庭闈行事父嵩年翁承繼母

國朝通志卷之二
嚴甚評之無虛日先生稍長曲體祖母心得以豫順終身人無閒
言是孝也撫二弟友愛備至乃至從昆弟族昆弟以及異姓昆弟
盡友愛之誼化訟息爭竟先生之世無違言是弟也孝弟之至通
神明光四海先生以之銘曰

瑤峰矗矗鐵嶺崑崙盤溪滌繞碧波鏡清是生哲人曩山水之英
撥棄常習力追古程文宗兩漢詩杜韓并砥行立名惟孝弟克成
懿此孝弟罔渝堅貞植躬矯矯恥德惟正鴛湖司鐸篤行是宏大
園之原粹氣縱橫韞玉藏金億年青青

右墓誌銘戴殿泗撰

車酉

車酉字雙嵐溫江人嘉慶庚午副榜官河南光州州判雙嵐少日才氣縱橫屢困場屋勉就微官權某縣令大府稱其能遽卒於任同鄉劉甫田刺史收其遺棄得詩二千餘首古文三百餘篇付梓無錫鄒鍾泉中丞序其古文以爲才氣馳騁極似大蘇史論十餘篇破空立論尤爲筆力嶄嶄覓全集不得姑就王雪嶠明府聽雨樓隨筆中所選者錄之以存其人他日覓得全集再爲補錄庶不負作者一生苦志云

右 國朝全蜀詩鈔小傳孫桐生撰

陳松

余少與秋濤從兄南洲先生昆仲遊得悉秋濤之爲人及聞官粵西有政聲益心重之後遷秩甯夏公從兄霽堂舉所治甯夏政績爲余言余聞之色動曰此循吏也登仕版者如公足爲吾淮生色矣今霽堂忽以公之歿來告並示以行狀曰吾弟政行子素所心契者願一言以垂諸後余悲吾鄉故人之凋謝且善人君子難得而易失也於邑者久之爰濡筆而紀其略公姓陳氏諱松字茂庭秋濤其號也先世自徽州遷淮高祖諱美典順治戊戌進士官沂水令有清吏稱祖諱寅太學生 地贈奉政大夫行誼載縣志父諱履泰考授州判才略雄特聲望著於一鄉以姪貴 地封朝議

大夫公質性明達甫弱冠已能諳習世故於事理得失人世情偽無不洞悉於胸而渾然不見圭角處已行事一以謹厚爲主其爲治也不矜才不任氣惟期循理盡職處已實心於事物自有所濟初任思恩府別駕地瘠民貧多盜乃嚴立條約力行保甲之法一郡肅然及調任龍州接壤交阯管轄三關九隘夷民雜處撫馭爲難公一處以寬靜遠近畏懷乾隆戊申安南內訌黎氏母妻臣眾破關求救時僚屬及夷土官民咸驚怖無所措公毅然自任曰國家柔遠有經此而不納非國體也卽輕騎馳赴關口迎之入隘壽其居處飲食俾無失所大吏入奏天語許以能事御製戲定安南功成聯句內有出奔眷屬流離極守土吏因收以入之句

註並詳載其事深蒙 嘉獎 命卽行送部引見會大兵出關以
畱辦軍務未果方是時制憲補山孫公督師雲集關內夫馬糧餉
駱驛轉輸公適司總局部署有方無纖毫遺誤心力俱殫寢食不
遑者凡十八晝夜大吏重其賢勞達諸薦牘然君素壯健積勞過
甚未老已衰頭童而齒豁矣其任甯夏也有清惠漢唐諸渠支流
萬派緜亙千里民田咸資灌溉公方莅任時值歲旱渠工多壞公
親往督修凡三閱月始一回署道府同僚悉其過勤或勸之少息
則曰今久不雨民資水甚急某敢自逸乎遂卽日赴工是歲田水
大足十數年未得水處皆得暢治嗣後凡遇需水時必躬歷河干
晝夜督視或蓄或洩各協其宜雖酷暑烈日不恤也前此渠塘啟

閉狡黠者或借以抑民牟利且倍徵修渠工料或罰出夫值以希
需潤公洞悉諸弊政一切擴而清之且爲定章程以垂永久曰吾
非不需錢但思廉俸外皆萬不可得吾甘自窘乏而已故其時大
吏以下無不信其廉能而德澤所敷歡聲載道吾淮老成耆舊凡
平時不輕許人者聞之率作歌以紀其美嗣後歷署慶陽鞏昌甯
夏府篆並攝秦州肅州靈州甯州州牧事代理安肅道事皆所至
有聲公氣質醇樸處事一以誠心嘗謂其子曰吾才具自信不甚
優而往往見信於人者如署秦州時有委審階州囚某一案他人
屢審屢控案牘滋繁我平心聽訟兩造歡呼息訟無他自問無欲
心相感以誠意耳又初至甯州時久旱不雨吾虔心以禱次日卽

獲甘霖百姓以爲神異知誠之必有應也誠不易言唯在勉之而已又曰讀書行己當思不足作事接物要畱有餘皆篤論也抑又聞諸壽堂公之親知有無端待以橫逆者公雖自反無過然卒恬然受之不與校其德量過人更足愧褊衷而風涼俗若其化睦媿周急分財施濟之事多爲人所不能爲蓋不可枚舉云公天資穎慧童年作詩文韶秀可觀以尊甫拙修先生春秋高需之助理家政故未竟舉子業以援例需次入官歷任廣西思恩太平府通判甘肅甯夏府水利同知 誥授奉政大夫年六十有一歿以嘉慶庚午五月十九日配秦氏 誥贈宜人先卒子二長燦郡庠生早歿次熒郡增生孫一在德尙幼

論曰士君子爲德患不卒爲善病不終如公自少至老數十年醇謹勤懇家國內外識者察之無一閒言語云身歿然後論定今公之典型具在其容有遺議否況天之所以佑善人者未嘗不善始善終也人益宜知所擇矣

右傳略汪廷珍撰

張宜尊

少伯姓張名宜尊湖南澧州人山人其自號也早年以畫名於京師達官某贈以妾爲謀官嘉慶中選安徽巢縣柘臯巡檢時百文敏公總督兩江行部過柘臯聞山人名召至行館使畫大悅飲以酒載歸金陵從官無不辟易山人名由此起後吾楚陶文毅公來撫皖特重山人自道府上下無不欲得山人畫爲榮縑素堆案山人應之以暇落筆輒盡數紙無不如意去有所迫則終歲不可得某方伯旗員也欲山人畫檄至省時山人方辦賑舍之來方伯曰無他欲君來爲吾畫耳山人作色曰某辦賑日夕不暇食恐公有要事故星夜泝舟逆流而上若公欲某畫某雖微甯有以檄致者

卽趨出方伯謝之轉加敬故大府皆呼之曰先生無以屬吏視者
嘗暑日入大府門外吏束冠帶汗流被面屏息俟闔者通報山人
科頭衣白葛衫直排闥入畱飲談輒深夜戟轅將弁皆僵立以待
譙鼓數下聞啟閣子聲兩紗鐙導前則大府送山人出矣人有以
他事干者卻之默不發或地方弊病與民間疾苦則知無不言時
江南北多被水黍麥皆無收高者又爲蝗所食有司多匿不報民
無以爲生大府卒廉得奏免賦給賑賴以安全人咸謂山人之力
居多柘人某以爭葬地致訟山人知其情先往圖其地召兩造俱
前指示之無毫釐差訟乃已或以小事角山人每排解之有所餽
不取一錢故柘人至今愛戴無少衰遷貴池縣丞署婺源縣事年

七十餘卒於官妾數人無子以姪孫某爲嗣山人畫山水以枯淡
勝好用皴法少著色其臨古必變化不欲僅得其形貌故其品與
倪雲林爲近詩閒遠無煙火氣字得顛谷遺意近時三絕罕見倫
比然皆爲畫所掩惟於題跋見之他皆不傳晚年以歲入潤筆資
買山於柘臯爲菟裘手植松數萬株號曰十萬松園未及歸而歿
今又十餘年松皆成林殆逾十萬數里外青蒼蔽日遠近皆知爲
張氏山云

舒燾曰山人蓋隱於官者也當是時有以技藝受當途知擢至監
司者山人以末吏跌宕督撫閒卒以丞尉終不稍屈非心別有所
樂而能若是乎昔吾父宰巢與山人善約爲昆弟後遷州府山人

常以事往來故得所畫較多當時不甚愛惜皆爲人持去今所存冊葉數幀耳憶予兒時山人每置膝上伸筆畫墨鴨爲戲十餘年來如前日事屢過其十萬松園輒低徊不能卽去云

右傳舒燾撰

馮德岫

君諱德岫字如堂姓馮氏先世自順治時移黃陂籍於商城祖朝
綱考應純皆以君官遇 覃恩贈奉政大夫祖妣彭氏妣潘氏皆
贈宜人君以嘉慶十六年援例得直隸通判年甚少而開敏冠
其曹時吉林兵進關捕林清黨大吏以良鄉首過兵而令怯弱須
強佐即使君往兵以不諱權真定及天津同知補河間府泊頭通
判領四縣隄工道光二年河決東光君煮兩飯不去隄所夜分時出
驗工物測水勢消長役人感其誠不以督責嗟怨總督那文毅公
設捕盜局君主之乘閒言曰自設局來奉檄者尋躡四出盜不加
少人務見功捉搦疑似真盜未獲誣罔已多夫州縣捕盜時近地

真局員捕盜事遠形變其難易較然可知且州縣玩盜非本心財不足也若以設局虛耗之財加州縣捕緝之費庶收實效而少冤民公然其言局旋輟而州縣得請緝捕費自君發之後權宣化府知府興起士類是科舉一人王生卽觀風首取士其權知藁城也孫有蒙藥婦死婦家怯訟君廉治之及權知祁州屢折疑獄二十四年補永定河北岸同知改南岸在北岸時三角淀潰君冒雨越界防遏其通判得無坐而君隄亦全二十六年三月卒年六十二君久習民事政不蹉跌以賢見勞不自難阻至非道求進則夷然不屑故官直隸四十年權知府同知通判州縣任凡十六七未嘗得一息休暇而僅以是官終論者皆推其勞而惜其遇配陳宜人

生子詔前金鄉縣知縣文孫三以某年月日葬君於某鄉某原銘
曰

君才恢恢兮上所倚其惠愉愉兮民所喜宜絕轡於長途兮而稅
駕於此雖仕不盡其才兮而譽在民者崇不可圯銘以徵其後社

右墓誌銘梅曾亮撰

王宣

先生與哲兄蓬心太守早年有二難之目爾準弟齡太守壻也太
守與先君子同官內閣每來過邸舍值先君子他出卽坐齋中索
酒獨酌輒就紙筆作畫爾準時年七八歲進酒伸紙效使令於前
太守喜輒賞以畫故爾準甚習太守而獨未一識先生後三十餘
年官閩中適先生子應授來遊能詩工畫盛年儻葛稱其家風館
之解中數月忽垂泣告歸營葬事出劉太史嗣綰所爲傳求銘其
幽爾準於姻黨爲後進又稔知先生其曷敢辭先生諱宣字遐穀
別號嶰谷次三豐頤多髯人呼爲三鬍子故自號三壺世居嘉定
之南鄉寺溝明宏治中割地屬太倉州遂爲州人七世祖文肅公

相神宗贈太子少保一傳爲編修公衡再傳爲太常公時敏又再傳爲司農公原祁又一傳爲中丞公鼐卽先生祖也父述濬雍正丙午舉人官和州州同門第烜赫爲過江甲族先生性瀟灑與人坦不以世胄自標異能文嗜飲兼通彈碁角射醫卜諸藝與蓬心太守俱善談諧傾倒一時江左士夫相謂曰與二王處清言標映如見右軍諸郎可以想其風槩尤善畫王氏自太常以來咸以畫名爲國朝大家先生淵源家學幼隨中丞公撫廣東又從父官和州弱冠資於陳外舅牧濱州定省輒歸往來名山大川擴其見聞故其渲染煙墨踐逕變化雖授受有自尤能心師造化軼於規萬之外非尋常輩流所及旣屢試於鄉不售遂赴都下以畫備

王公爭相招致詩畫外絕不干以私久之以方略館議敘分發江西補南昌丞年五十五矣前後凡九攝縣事善聽訟不設鉤距以誠感輒得其情有構訟數年者聞先生至則曰吾輩安可以險健欺長者哉則求息每去官邑人手香跪送恆以千百計先生逆知之輒閒道逃去攜所藏琴曰隴首孫枝者明廊湛若舊物也遇佳山水名藍精舍則按軫操縵自鼓一曲洋洋乎有憑虛御風之思徜徉動至旬日以失期屢忤上官率不介意願皆重先生畫索之力至以官職歆動之先生嘆曰吾固以官隱也豈早歲不肖自媒而易節於暮歲哉萬載邑令某以盜案削職畱緝先生攝其篆獲盜馬璜旗等十餘人以屬某使爲自獲者或疑之先生曰吾非樂

仕進而某貧且老非是將流落不得歸何廛焉是時青浦王司寇
昶方官按察使雅知先生欲援之先生卒堅辭竟以縣丞終生乾
隆甲寅三月十六日歿嘉慶辛未十二月十七日年七十七所爲
詩文皆隨手散失惟畫爲人藏弄頗有藏者子三望十一歲而夭
配張孺人出應組亦早卒應綬庠生側室張出茲以某年月日葬
於某原銘曰

秫田彭澤耽泉明訟庭日有哦松聲治獄陰德如耳鳴三槐世澤
宗其興一鑑視此滕公城

右墓誌銘孫爾準撰

鄧文炳 汪注 李之梓 吉彥英 徐大綸 楊章 熊廷

鄧文炳新城人嘉慶中任寶慶府同知駐城步之長安營以廉介敏慎稱理徭訓兵勤於其職又雅有文譽郡人士多從之游同時有汪注浮梁人任寶慶府同知生平以經術爲治術著有詳刑經解爲牧民楷法李之梓河陽人前巡撫發甲曾孫知新化縣以清介著聞爲政能持大體事治而民不擾後擢永順同知卒於官吉彥英丹陽人任衡陽縣丞駐查江在官六年謝絕苞苴不受民一牒大事移縣令小事諭遣之俸不足則躬率妻子種瓜蔬以自給胥役皆歸力農查江民至今稱頌勿衰徐大綸山陰人任零陵縣丞駐冷水市估貨駢集大綸不一染指工詩畫嘗率僮僕浚池壘

石爲諸勝蹟自品題之人稱吏隱楊章山陰人署甯鄉典史性廉
介勤於捕盜暇卽作真草書去官日惟敝筆盈束舊硯數方而已
熊廷燮進賢人任益陽典史邃儒術治事必求其心之所安使反
己無愧凡累年宿弊悉汰之方春漢川人署新化典史善治盜嘗
捕得猾賊數十人寘之法賊風頓息邑中不被賊者二十餘年道
光初巡撫康紹鏞聞其能將試而拔之春已前卒新化人至今稱
之

右傳李元度撰

按鄧公由進士嘉慶十七年任寶慶府同知又附傳之徐公有鄧氏枝麟書事見是

編僚
佐十

陳大琮

陳大琮字汝璧號江洲福建同安人諸生官甯波同知

君生而岐嶷八歲能詩浙江提督李忠毅公一見有國士之目妻以女十八補博士弟子員戊午鄉試報罷忠毅公招赴任所延師課讀君於詩文之外繙閱三略七書及樓船陳法公又以素所心得者親爲指授壬戌丁外艱居喪守墓服闋公再招至浙文檄多出君手旋遵銜工例捐同知籤掣安徽署太平府同知十三年忠毅公戰歿君矢志雪仇呈請投效海疆巡撫阮公具奏奉 旨據阮元奏李長庚之婿候補同知陳大琮具呈投效一摺候補同知陳大琮在安徽試用有年將屆補缺聞伊妻父李長庚勦捕蔡逆

陣亡該員半子之誼情願在浙投效代爲報仇旣據阮元驗明人
尙明白諳曉捕務著加恩准其畱於浙江效力如果奮勉遇有同
知缺出卽予補用欽此是年八月帶領丁勇出洋邀蔡逆當先奮
擊追至三沙洋十月署台州府同知十一月補甯波府同知十二
月擊盜漁山洋府君挾短兵過船眾隨之斬首五級生擒黃温等
二十八名獲其船二奉 旨交部議敘十四年四月會定海鎮盡
山外洋獲盜船二生擒陳阿榮等十五名七月率雇募商船同閩
浙舟師勦蔡逆八月奉浙江提督邱札飭同定海鎮在北洋堵截
數日蔡逆竄南洋敗死十六年署嘉興海防同知十八年督造戰
船工竣請制府汪公委驗公曰他人督造須驗至陳君無庸也其

信於大吏類如此君事親孝訓子嚴御下寬好爲詩著有客中吟
忠毅公之殉難也君徧徵碑銘哀誄成爲上石鏤板君體素壯健
以祁寒暑雨冒險海洋積勞成疾卒年三十九子四人榮春今名
渭揚廣東候補通判榮杓邑增生榮杖丁酉拔貢四川知縣加同
知銜榮植邑增生候選訓導

忠毅公一代偉人見君於未冠卽妙選東牀則君之器宇不凡可
知也公旣歿於王事君誼敦半子名達 九重奮身濤浪之間冒
險蛟鯨之側卒能以死勤事不負忠毅之知以視昔之冰清玉潤
尤爲事處其難矣

右聽松廬文鈔張維屏撰

陳寶儉

君姓陳氏諱寶儉字師吾其高祖自徽州遷居江甯祖步瀛官貴州巡撫生二子廷碩宗人府主事廷頤國學生以 今上登極恩贈所當得者受六品封配冷安人生君及弟寶仁寶俊嘉慶十八年君中順天鄉試舉人次年成進士甲第甚高然以中書用君亦勤於其職以 實錄會典館勞績應升君不樂外任而同官有欲得同知者吏部以兩人同班當一例同官者曰吾年老矣若不得外任衣食子孫當一以累君君不得已就武黃同知大吏以爲勤改武昌同知道光十一年正月卒於署君之任武昌也當押運有阻之大吏者曰押糧船至京重任也率巧宦得之今得一誠樸者

敢以薦大吏心知所謂卽曰君言善吾更得樸誠百於君所薦者
故君常以事往來江甯數相見余與君居相近也其西爲冶城山
而北多野塘葭葦幼時每同塾歸日暮矣必循水渚穿菜畦籬落
閒野徑窮見官道乃返或登山望炊煙起指驗某姓竈突以爲笑
樂時同游者冷公調周石生君從兄叔和余弟仲卿凡六七人君
後過里獨余家居時尋故幼時經行地不盡意輒返余曰昔童時
游畏長者曠今無長者曠顧不樂耶君笑曰是不可解也君性篤
厚不能爲美言諛詞謹於擇交而與人有終始屬以事力所能必
竭其誠嘗與友人書曰建樹吾不能求繫援則吾不敢吾之宦境
如是而已其得甲科時年甚少父母兄弟無恙人以君當無不自

得者而君常抑抑余固病君之確而亦不意其遽至乎死也悲夫
卒時年四十六配汪氏女一嫁李氏早卒子尙幼以道光某年月
日葬君於聚寶門外之某鄉某原銘曰

謂伏則飛謂昌則微君憂滯行而竟永歸無知已矣有知曷悲

右墓誌銘梅曾亮撰

錢允濟

士不幸負伉爽之才抱潔清之志內之不獲爲天子近侍臣外之不能膺封疆重寄建非常功立不世名而屈首下吏溷跡汗身既已病廢老死不悔而又以官卑秩末不及與太常典禮特書史冊此亦可爲感歎唏噓者矣若復不略次生平使里氏表著中外奕禩尙知有如是之君子而不遇豈非後死者之責哉余是以傳

錢芷汀

芷汀錢氏初名允湘易名允濟字雲口芷汀號也昆明人先世多達者至芷汀而弱由內館議敘銓授湖北襄陽呂堰驛巡檢歷任三年而引疾歸蓋嘉慶八年也十九年又二月卒於家年六十有

一芷汀之巡檢呂堰也值教匪蹂躪之後井里蕭條農桑未遑無
良之徒借波助燄日謀不靖則召鄉好義者精器械嚴守望禁格
之於是民有攸居流亡皆歸苦乏食則力請當道出常平倉穀改
糶爲借補助之天雨雪斷炊者數十家則印券借米振卹之呂堰
人皆以爲錢君生我也旣又念兵燹之後或鮮禮讓則時時爲詩
歌諷諭之冀丕變適寺僧犯律則罰其田百畝於驛之西北及南
設義學二皆因佛寺爲之呂堰人且以爲錢君不惟生我而成我
也有誼傳活神仙者蓄妖書邪劍日可行數百里治病不用藥餌
扇扇之卽愈眾爲之惑則痛懲之不緩須臾惑以解蓋芷汀生平
恪遵孔孟家法有昌黎韓氏詆排異端攘斥佛老之遺此固其小

試者耳均州民上訟其官長某芷汀奉大吏命往察之未至其境某使人以數百金賂於道卻不受歸以實告均州民得直棗陽縣諸生爭訟久不決太守怒詰之曰汝謂我不能聽汝訟誰能聽汝訟者生曰惟呂堰驛巡檢可耳遂以付芷汀訟乃息凡芷汀巡檢呂堰時政事類如此然是皆非巡檢官所得爲者而芷汀願爲之襄樊閒官何限僅一巡檢官耶芷汀雖欲不引疾歸也得乎哉芷汀少讀書未成乃學畫及冠歷遊吳越幽燕兩河間而學大進乃爲詩旣歸惟以詩畫自娛閉門恥干謁富貴人罕見其面吾黨以爲昆明高士第一云性孝友善事父母與其弟怡怡終身素嗜飲酒弟以飲酒得疾死芷汀痛之由是不復近酒

劉大紳曰芷汀高潔名在昆華間余見其詩如其人畫如其詩重之然不悉其居官時事既得見所爲楚析編益重之而惜其未遇也今年春輯其詩三百餘首授子論定既竣事抱以歸芷汀及門而芷汀死矣吾友蒙化張小東登瀛爲芷汀傳有未備故復傳之小東以王文成之於龍場楊忠愍之於狄道方芷汀然忠愍固嘗官於朝而文成其後大功既立拜爵廕嗣芷汀烏能有此遭逢耶昔韓淮陰不爲大將則亡龐士元非治中別駕不足展其驥足若芷汀者當何所屬耶古有儀封人石門晨門近之矣然且不得以封人晨門終也惜哉

右傳劉大紳撰

錢允濟昆明縣人負才清拔由圖畫館議敘授呂堰司巡檢時呂堰方爲賊破至則撫瘡療賑飢寒練鄉勇立義學皆州縣所不敢爲者獨毅然爲之八里之民恃同保障光化縣有積案數控督撫多年不結兩造皆詣府請曰必得委呂堰司方得明白雜職故無勘審例不得已從之平反以上讞乃定後於境內查獲教首赴郡密稟府縣置不理卽請疾居郡城未二十日妖餒四出當事者忌其言之中益思有以困之徑策馬歸夫其言果用不過十捕快了之矣何至勞師糜餉哉曲突徙薪宜其與焦頭爛額者異也

右滇繫小傳師範撰

四ノ三ノ一ノ二ノ三ノ四ノ五ノ六ノ七ノ八ノ九ノ十ノ十一ノ十二ノ十三ノ十四ノ十五ノ十六ノ十七ノ十八ノ十九ノ二十ノ二十一ノ二十二ノ二十三ノ二十四ノ二十五ノ二十六ノ二十七ノ二十八ノ二十九ノ三十ノ三十一ノ三十二ノ三十三ノ三十四ノ三十五ノ三十六ノ三十七ノ三十八ノ三十九ノ四十ノ四十一ノ四十二ノ四十三ノ四十四ノ四十五ノ四十六ノ四十七ノ四十八ノ四十九ノ五十ノ五十一ノ五十二ノ五十三ノ五十四ノ五十五ノ五十六ノ五十七ノ五十八ノ五十九ノ六十ノ六十一ノ六十二ノ六十三ノ六十四ノ六十五ノ六十六ノ六十七ノ六十八ノ六十九ノ七十ノ七十一ノ七十二ノ七十三ノ七十四ノ七十五ノ七十六ノ七十七ノ七十八ノ七十九ノ八十ノ八十一ノ八十二ノ八十三ノ八十四ノ八十五ノ八十六ノ八十七ノ八十八ノ八十九ノ九十ノ九十一ノ九十二ノ九十三ノ九十四ノ九十五ノ九十六ノ九十七ノ九十八ノ九十九ノ百ノ百一ノ百二ノ百三ノ百四ノ百五ノ百六ノ百七ノ百八ノ百九ノ百十ノ百十一ノ百十二ノ百十三ノ百十四ノ百十五ノ百十六ノ百十七ノ百十八ノ百十九ノ百二十ノ百二十一ノ百二十二ノ百二十三ノ百二十四ノ百二十五ノ百二十六ノ百二十七ノ百二十八ノ百二十九ノ百三十ノ百三十一ノ百三十二ノ百三十三ノ百三十四ノ百三十五ノ百三十六ノ百三十七ノ百三十八ノ百三十九ノ百四十ノ百四十一ノ百四十二ノ百四十三ノ百四十四ノ百四十五ノ百四十六ノ百四十七ノ百四十八ノ百四十九ノ百五十ノ百五十一ノ百五十二ノ百五十三ノ百五十四ノ百五十五ノ百五十六ノ百五十七ノ百五十八ノ百五十九ノ百六十ノ百六十一ノ百六十二ノ百六十三ノ百六十四ノ百六十五ノ百六十六ノ百六十七ノ百六十八ノ百六十九ノ百七十ノ百七十一ノ百七十二ノ百七十三ノ百七十四ノ百七十五ノ百七十六ノ百七十七ノ百七十八ノ百七十九ノ百八十ノ百八十一ノ百八十二ノ百八十三ノ百八十四ノ百八十五ノ百八十六ノ百八十七ノ百八十八ノ百八十九ノ百九十ノ百九十一ノ百九十二ノ百九十三ノ百九十四ノ百九十五ノ百九十六ノ百九十七ノ百九十八ノ百九十九ノ百十

百

劉涪

君姓劉氏諱涪字孝長天門縣人曾祖某祖某考正太學生 贈
徵仕郎以隱德爲里黨所重君資稟絕人於書未嘗再覽下筆不
移唇萬言立就始補弟子員督學涂嶽莊先生日以國士 睿皇
帝西巡五臺君詣 行在所獻詩五百韻 廷試拜文綺之 賜
時海內士集豹尾車後者數百人才皆出君下登嘉慶癸酉拔萃
鮑覺生侍郎得其文大奇之環語諸生曰劉生曠代才也吾不逮
遠甚還 朝徧告公卿曰所得奇士無踰劉生者丙子舉於鄉至
都名大起偉貌玉立英辨颯發酒酣縱論千夫卷舌諧謔雜選操
翰若飛諸公貴人及四方才俊之流見者歎以爲賈誼蘇軾復生

久之不得第鮑侍郎又沒傷時無知己者遂放浪燕趙吳越兩河
南北閒竟無所遇以大挑二等投遠安學博不數月棄官去浮湛
閭里意氣稍稍摧頹矣自乾隆嘉慶以來學士大夫爲文章斤斤
持繩尺章範句肖不若是則詆爲大悖於古君睨而笑之謂無得
於心者可無言有得於心者揆之事理而皆中然後形爲言焉當
以氣爲主氣之積而大者充宇宙高者抗星辰雄傑而迅疾者驅
風霆蹴河海若龍虎騰踔鬼神之不可端倪也不當規規如循牆
而墨守者然故其所爲文以意爲起止馳騁變化而不失法度要
之其氣獨盛世無能敵之者於詩亦然剗除塗澤靡曼之習一反
之正始神駿超逸往往似曹植李白君於詞藝最敏才識又最高

無尊思沈吟之苦然非奇偉振俗者卽薪去不存其刻意自卓立如此慷慨懷大略通知古今時變之異談天下事衮衮不休必度世所可行與行之有濟者不肖爲高言奇論以聳動一切時一二盛名之士捭擊談經濟君曰治道有其本得其本則萬事理諸所言皆末務也性豪邁不屑小節然其事親孝取與介交遊信無賢愚皆暱就之晚節益積誠敬翦翦如畏語及君父則肅然動容終身於人物無所臧否識者服其慎兩江制府沔陽陸公及楚方伯遵義唐公最重君皆折節事之所論議必采行君亦喜曰藉二公以濟世勝自爲多矣陸公嘗謂柏心曰孝長之才足冠一世後柏心自都下還陸公迎問曰所見士有孝長比乎對曰未也公曩言

不妄唐公梓君集自序之曰孝長非文士蓋命世才也惜不得用云君與時輩論詩獨心折大竹王大令魯之魯之沒君忽忽不樂今年春移書告柏心約以九月會鄂渚至期而君卒年五十有九著有雲中詩文集及辛儂長短句三十闕子偉華國子生能以文行世其家孫二君嘗弟畜柏心所以規訓之者甚至悲良友之逝又悼君負奇才而不遇也采其行事爲之傳

論曰君才氣類牧之同甫二子雖不遇然猶擁麾節登上第君獨蹇躓以終何不幸也君度不見用於世時時謂柏心曰吾欲著書已又曰精者言不能傳淺者又不足言也竟不果就嗚乎君之傳者非其所欲傳者也所欲傳者固未嘗傳天以奇才畀君厄之使

不得用又并其欲傳者終闕之抑獨何哉抑獨何哉

右傳王柏心撰

181-11-181

111

徐豫吉

君姓徐氏諱豫吉字介于系出明中山武甯王七世孫溶爲吳淞江都指揮始家太湖之東偏至君之高祖諱士函遷居吳江城北會祖諱天貴祖諱玉圻皆 贈朝議大夫考諱作梅以舉人知華陰蓋屋洋縣署潼關廳同知子三人君其仲子也以縣學生入太學應順天鄉試充四庫館臚錄以勞授直隸布政司經歷署保定府通判年饑按戶振給民獲蘇復徼巡竊盜尤嚴捕博之禁由經歷遷順德府同知兼董寶直局發奸擿伏吏胥斂手大府委任方殷而母沈太恭人春秋高兩目失明君遂懇乞歸養大府以其出於至誠不强留也君平生力行善事雖僮仆無所避其去官歸也

戚黨中隨時周卹葬其未葬者數十喪與陸朗夫中丞有連中丞子直之攜其孥赴任濟南道過吳江別去家人病疫旬日聞舟中死者六人君馳往經紀其事前後資助直之兄弟甚厚及直之歸益貧君復割田以濟之其他救災紓患所爲謀者必忠而家中時時空乏其立心真篤如此君卒於嘉慶丁丑十月五日得年六十有八配王氏 封宜人君凡二男子瀚縣學生清漢國學生爲君季弟鵬後三女子長適陸氏卽湖南巡撫燿之孫孝和也餘尙幼

右行狀張士元撰

周銘恩

君諱銘恩字克生又字素生湘潭人初名汝楨以附監生應順天鄉試選充 國史館謄錄中式嘉慶二十三年本省鄉試副榜二十四年五月湘潭市人與江西商人鬪於萬壽宮會館邑令奪門攜十九人出門復閉潭人譁曰彼膏其鼎無老幼悉就烹矣流言達京師時君父司農公爲吏部侍郎 上屢召詢其事君託爲司農書致巡撫情辭激厲巡撫方以所奏與司農殊奉 嚴旨乃以書上 聞部議私致書函當落職 加恩給編修巡撫再以君所致在籍石給諫書入奏於是司農被放歸而君徒固安 先帝登極特起司農還朝君亦得釋開復遂改今名云道光八年選永州

府江華教諭逾年降調十七年援例發廣東歷署仁化縣典史陽山縣新潭司巡檢補連平州長吉里司巡檢旋調署南海縣五斗司曲江縣平圍司增城縣主簿君伉儷有大志謂天下事無不可爲氣凌人上雖上官不爲沮抑坐是困躓終於卑位其爲校官也清釐官書殘闕課試諸生期事事覈實同官厭苦之邑連粵西私鹽充席學故有陋規君力絕之示禁文武生販賣學使案郡君舉發冒籍爲令難零陵令王某最稱彊悍君與抗爭於郡觀察李公宗傳時爲太守婉諷之不能解學中生有夫婦離異者訟經五六載君召其婦反復諭之已合矣忌者復嗾以控司辭連君遂入計典是時君年四十餘人謂以挫抑伏矣卽出必懲前轍及君入粵

意氣如故時大吏多出司農門下臬司某初莅任見君詢風土君
悉陳美惡既出外舍力疾爲詩數章以進書復圓美臬司歎賞君
既睥睨一世又才地過人班輩罔不側目啟事輒千言略無顧忌
上官愛其才終不欲重其任也總制林公整理夷務禁通商商無
計請君乃往見力陳不便民情林公謝曰公家事君幸無與及夷
人肆虐林公去位君長言書以讓之其負氣如此二十八年七月
六日以疾卒於增城官廨春秋六十有二妻甯鄉陶氏舉二子不
育前君卒副室藍氏子一錫祉奉君柩歸里以某年月日葬於某
原周氏顯於前明代有聞人曾祖諱昭祖諱世宇皆封榮祿大
夫父諱系英官終戶部侍郎江蘇學政曾祖妣某祖妣唐王妣謝

國朝三原縣志卷之二
三
皆封一品夫人兄弟三人君居長仲詒械浙江候補鹽運司運
判先卒季詒樸兩淮候補鹽庫大使皆有才名而敦行誼歸君器
與孥者季之力也君貌豐偉有氣燄而與人愛惡不常又多內寵
人以此薄君兼怪君不稍脂韋以致富貴然君任性適意視脂韋
致富貴者夷然不屑也銘曰

材輪囷兮謝墨繩放不自檢世所憎立躋津要非無能乃使卑伏
簿尉丞我爲舉實芟虛稱瑕瑜具在銘堪徵以視靡俗猶稜稜

右墓誌銘羅汝懷撰

龍光旬

君姓龍氏諱光旬字見田廣西臨桂縣人曾祖 贈文林郎鎮海
祖 贈奉政大夫翺考 贈奉政大夫濟濤官柳州府教授娶朱
宜人生光輔而君爲繼配王宜人出嘉慶二十四年舉於鄉大挑
知縣攝湖南澁浦縣君初試吏僕從吏役謂可以面謾誘揭爲奸
一不爲動聽訟不畱不私改湘鄉澁浦民張樂遠送畱省斷疑滯
獄卻求直者金補黔陽楊姓民詭明封爵列祖像於堂皆冕君聚
焚之火妖神廟禁龍舟溺人旣興置利害與學官子弟講習文藝
修唐詩人王昌齡樓時觴詠其上改武陵道光二十一年薦舉
召見擢乍浦同知夷亂後奸民狀羣鬼穴墓劫人君至穴執炬先

役行皆就縛巫坐幻術爲奸子罪并發入其財於官尤慎海防嚴
市舶私貨管其利者不便大吏以爲讓而君詞直然心謙其慙弗
善也調台州同知官無署皆畱省君心知其難然不欲苟從眾乃
借廨於民聽事未久民皆恐君去朔望講示 聖訓爲木牌十六
方條目書上先奉某牌敬立大言曰今日宣講某牌始入坐巨盜
捕未得一日至鄉講未畢械以歸於是官署立市廛橋道修二十
九年十一月八日引 見歸卒許州旅舍年五十八著宰黔防乍
錄少劇飲善畫及爲吏一皆屏絕祿所入衣食其族姻者十餘家
惟不以言詞假人或面斥人過至斷獄則與民爲家人語或感悟
罷訟而未嘗時讀律例曰合人情安吾心卽中律例矣故用法正

而不拘配黎蒸人子啟瑞以修撰進侍講任湖北學政請君就養而君官台州方日夜馳捕盜賊每冒寒中夜歸手足僵冷或謂君人爲吏求逸樂耳君固自苦今子貴矣盍少休君曰父子各受

恩各盡職無相貸也女四人長者亡幼者未許嫁其二皆適士族孫男二人維梁維棟女孫二三十年六月六日葬桂林北關外祖墓側啟瑞以書告且請銘其詞曰

吏也而勞避位者媿三古致身不聞乞休吏也而嬉得喜失悲逃爵之士世見爲奇於今則奇在古爲譏古義孰明惟君念茲不以子逸去崇就卑供養日否臣力未疲翦蔓除荒爲民去疵位不竟功德則永垂

皇朝詩林卷之二

右墓誌銘梅曾亮撰

三

孫葆恬

君諱葆恬字劭吾孫氏善化人祖繩武歲貢生考先振舉人直隸隆平縣知縣隆平君無子有兄曰先捷縣學附生晚而生君乃兼以後隆平君禮律所稱一子承二祧者也君生貴重兩翁絕憐之不欲苦以學業君曲承歡意進則奉槃疾趨嬉游無度退則頽頽自敕鑽仰羣書本末交修既治且篤年十七補諸生中式嘉慶己卯科舉人於是贈翁始知君之學之勤人之所不見也道光六年以大挑選桃源縣學教諭始至學官弟子或丙夜躡門曰願有謁也君訶禁立絕請生相戒惕息不敢近君稍稍引進矜其不能有某生才而無檢提學使者將除其名君召而數之曰若以惡聞於

一縣今當痛自艾埽地自新則生蹈故則否生頓首謝不敢負學使者亦竟不黜生又有數十人以錢糧浮收訴縣令於上官刻碑縣門頗劫持之冀薄斂以寬民力縣令大怒將名捕致之法君從容開說仆碑弛獄久之壹解縣令邵君以事罰富人錢二十萬輸於學宮陰以乞君君別藏之及以憂去官召諸生使具狀出錢予之貫則朽矣在桃源九年大計卓異例以知縣赴部謁選君曰今日令長豈得行其志者吾上有老親又奚爲於選人道光二十一年四月某甲子卒官春秋四十有八卒後三年君之子鼎臣芝房以道光乙巳科進士改翰林院庶吉士君以 覃恩晉贈儒林郎又二年次子頤臣以丁未科進士改兵部主事又三年 今上卽

位晉贈奉直大夫明年子觀臣中式咸豐辛亥科舉人又明年以
宣宗升祔恩晉贈中憲大夫是時粵匪洪楊諸逆方犯湖南聯
巨艦浮江而東荆揚鼎沸芝房及其兩弟歸自京師又二年頤臣
觀臣相繼淪逝又明年咸豐丁巳十二月某甲子君之配桂太恭
人卒死喪頻仍家稍替矣太恭人孝恭任淑處變不驚鎮守有卒
譁戕其長官濱沅州縣洶洶東徙避亂流賊有自通城竄長沙者
家人亦烏徙避之太恭人晏然守靜不爲謠言震駭卒以無事方
從官桃源學署贈翁縣學君實在養每晨興君布席太恭人進饌
贈翁年幾九十與子婦爲辭讓者再太恭人執玉寶寶恆有嬰兒
之色見之者不知其娶婦生孫子已登科也太恭人之沒後君十

有六載咸豐九年二月某甲子芝房奉母合葬於赤江先塋先事屬友人曾國藩表其墓國藩因循未卽爲而芝房不幸死矣始君以樸學沖襟未竟其施士林惜之又願臣觀臣以才子早世又益惜之至芝房秉父之訓立朝有風節著書廩廩近古矣復以憂死每加惜焉君子小人知與不知所共悼痛者也且所謂天者何也高高者與人世迴絕其好惡固當大異於人不可究詰耶抑食報有時遲之又久而後大定耶以君之積善教子芝房之所成立如此卓卓而猶不克顯則將來所謂大定焉者又可必其盡如人意而祚之無已乎於是爲鏡諸石揭諸墓道以俟夫異時觀化人者

取驗焉

右墓表曾國藩撰

欽定四庫全書

卷二十一

SECRET

SECRET

趙紹祖

國家選舉之法因明代舊制常科外又有博學鴻詞科有孝廉方正科以待異才魁彥士而孝廉方正之名尤美非文行相副不足以當之自 睿皇帝至 今上凡再舉皆於臨御之初用風示天下當道光元年余藩安徽咨於眾以琴士趙君首應 詔君固嘗辭府縣辟不就迨余採芻議特檄舉君涇令復親詣敦促始就道然年已七十不欲北上無錫孫文靖公時爲撫院乃以第一名咨部給六品冠帶會有 旨俞余請安徽省志遂以纂輯事任君凡在局五年志成同事歎其熟於史事條舉件繁詳贍有體云旋主講池州府之秀山太平府之翠螺兩書院殷勤教誘不稍倦道光

十三年七月十二日卒於里距其生乾隆十七年正月初三日春
秋八十有二君少好學九歲卽以能文稱伯祖侍御諱青藜公極
喜之年二十應童子試以經解冠八邑受知於大興朱笥河先生
拔入縣學旋補廩膳生朱先生奇其才手授以許氏說文且言讀
注疏日毋過十葉讀說文日毋過十字必精造乃已一時學侶咸
推之屢薦棘闈不售遂棄去入比藝專力於經史百家及碑版書
畫之屬罔不鉤考決擇惟精其所著書有新舊唐書互證二十卷
通鑑注商十八卷建元考二卷校補竹書紀年二卷校補王氏詩
考二卷金石文鈔八卷續鈔二卷金石跋六卷涇川金石記一卷
涇事一卷讀書偶記八卷消暑錄一卷古墨齋筆記六卷古墨齋

觀書記八卷古墨齋題畫記一卷琴士詩鈔十卷文鈔六卷又輯
其生平師友詩爲簡言集十二卷文爲同心言一卷輯其族人詩
爲趙氏淵源集十卷又彙集涇先輩所著書數十種爲涇川叢書
百餘卷皆行於世在志局日又另輯安徽人物志八卷安徽金石
錄八卷待刊君性孝友處鄉里恂恂然終身樸學手一編窮日夜
不輟當事重其爲人皆禮敬君曾未一私謁兩署滁州訓導一署
廣德州訓導皆不數月而士林慕之依依不能舍其教人先行誼
而後文藝其於邑公事有可以持風化蘇民命者未嘗不身爲之
倡也以故遠近識與不識咸謂行誼如君洵能不媿所舉云在嘉
慶時是舉所得有吾鄉嚴公如煜安徽程先生瑤田嚴公 廷對

策略伯仲賈生其後著績漢南爲一時名臣而瑤田篤學爲諸生
祭酒雖不出其志行均也若君者其瑤田之偶歟君諱紹祖字繩
伯號琴士其先出宋之宗裔曰不吝者由河南來遷世爲涇之東
隅人曾祖崇濟祖際飛考良猷皆以文學列名庠序配倪氏有淑
德與君同歲生後君一月卒子國禎孫同璋俱縣學生曾孫二鵬
飛蛟起元孫三如錐如鏐如鐘君逮事王父下見元孫道光七年
以七葉衍祥 欽賜扁額加賞緞匹十一年以修城勞 欽加五
品銜其卒也涇人士呈請祀於其鄉將以某月日葬某山國禎前
卒同璋主後來請銘銘曰

吾聞之三代以下習俗莫美於漢京自科舉帖括起而士多遺實

而趨名惟我 國家執權持衡既舉大比以鵠羣英復有特科以
廣子旌有皤其叟研古敦行於涇之原拓書滿楹恆窮年以矻矻
惟心耘而日耕炯靈光其上燭感藜火而下視乎星精猗彼何人
其通德之鄭氏歟抑傳經之伏生

右墓誌銘陶澍撰

徵君姓趙氏名紹祖字繩伯琴士其號涇人也趙本邑望族多文
學彥君考良猷有聲庠序中早世母翟守節撫君暨君弟繩祖君
九歲卽能文伯祖侍御星閣先生極賞之弱冠值督學大興筭河
朱公以古學倡導東南得君經解卷博瞻淵茂拔冠八屬並授許
氏說文令肄習既補諸生旋食餼名震一時顧屢薦棘闈不售由

是屏棄時趨專殫力考訂鉤鈇抽繹務求精要平生澹嗜欲惟日
夕手一編不輟竟矻矻終其身性孝友母素善病君偕配倪氏躬
侍湯藥勿敢懈或出館晨昏必歸定省如此者凡三十八年弟體
羸教養成立同室至老無稍閒待宗黨獎掖後進備盡誠懇久之
聞望愈孚邑中公事苟可維風化蘇民命輒爲之率遇有工役往
往請首任嚴寒溽暑絕不言瘁嘉慶丙辰府縣欲辟孝廉方正力
辭而罷逮道光辛巳方伯今制府陶公採輿論特檄舉君縣令親
詣敦促始就道尋奏名第一自揣衰齡難北上會修安徽通志畱
君纂輯志成羣歎爲詳整有體嘗兩署滁州訓導一署廣德州訓
導僅數月而士林慕嚮依依不忍別繼主池州之秀山太平之舉

螺兩書院君外和內肅持己端淑誨迪先行而後文當事禮敬君君不肖通私謁在志局彌謹晚乃以修城董勸勞 欽加五品銜道光十有三年秋七月十七日卒年八十二合邑推重呈大吏崇祀鄉賢余與焉咨部以 聞報 可僉謂不愧云君之學無弗窺究而尤深於史最著者一曰通鑑注商注爲元胡三省之書與其所著釋文辨誤相輔而行本極賅洽君參研抉發至六百餘條視顧氏炎武日知錄所列及陳景雲之舉正不啻倍蓰一一有成處可覈聞或原注未晰爲加疏通不欲輕訾前哲卽通鑑小有舛錯亦推闡其故意在實事求是而已一曰新舊唐書互證於劉昫並歐宋之書無所偏徇然其閒摘新書者十之八九蓋舊書尙具班

范之法近世儒者多表其長新書專修文詞又減削字句轉致詰屈其考證頗疎同時吳縝已有糾謬之作但縝因乞預官屬不得挾私憾有意吹索而君固平心以救其失初不存門戶之見於胷中也此二書實裨益正史必傳無疑君又篤好碑版偶見諸市肆不惜重價購歸悉心檢閱謂可補史傳之遺也成金石文正續鈔共十卷雖倣明都穆金龕琳瑯之例而皆其所未收審諦亦較勝穆所已收並蒐羅斷缺之本爲金石跋六卷中如漢太室石闕銘已漫漶而顧亭林錄其殘字崇高作嵩高不知說文有崇無嵩崇卽今之嵩字也他所舉類是若唐幽州昭仁寺碑鄭州等慈寺碑謂太宗馳驚遠略徒以立寺薦福贖殺人之咎議論正大更非恂

猶愁儒所能及在家既有涇川金石記一卷修志之暇別撰安徽金石略八卷與人物志八卷稱合璧足徵其無地不學也經學雖無專書而讀書偶記八卷前三卷胥以說經揆厥旨趣於易兼取漢京房虞翻與注疏本程子易傳朱子本義折衷以期其當於書不左祖東晉古文而謂梅賾及閻百詩惠定宇等竭力培擊亦各自有罅漏正持平之論其餘諸經都能穿穴而喪服尤詳祥禫諸制準之情理曲折通達堪羽翼鄭注第七卷有論韻學謂用古音當擇其信而可徵者吳才老之韻補陳第之古音考顧氏之音學五書皆有得有失不可盡從蓋析其源流不徒作調人以解難又謂古韻今韻皆不必無方音詩騷用韻有限今以四聲中曾有數

字同用而舉其全部以從之非也此論最允余亦曩所主持卽斯而觀知君之於經決非泛然涉獵者可比校補古書則王氏詩考二卷厚齋掇拾三家逸文明董斯張補之近范家相補之而君復補之踵事益增不妨分道揚鑣竹書紀年二卷歷引史記漢書山海經水經注宋書符瑞志史記索隱正義等條理甚密維揚陳君逢衡作集證擴充繁衍然時採其說陽湖洪稚存編修見之服膺爲製序顧謂引羅泌路史乃千慮一失不過因其爲宋人之書而輕之按路史雖不免厯雜而援据浩博箸錄四庫引之第證其異同未嘗以路史駁竹書豈遂爲病哉外此短簡若涇事一卷紀述遺聞建元記消暑錄閒中涉筆要亦矜慎不苟於戲君之學可謂

閱其中而肆其外矣君古文宗昌黎以夙熟史事集六卷內論數
首識力卓然詩十卷大抵不屑屑綺麗上沿盛唐之派兼工書畫
旁及於弈在他人得一已擅場而君直視爲餘技至哀香之編非
由己譏獨彙鄉先輩著作數十種積貲刊布曰涇川叢書與本邑
鄭漢林涇川文載同功其評隲師友本族詩及制藝特選家事故
不書

舊史氏曰近代譏著之富莫若蕭山毛氏奇齡然毛氏負氣求勝
紕繆百出才雖雄不如君之醇也且君行誼亦遠過特嗇於遇又
以樸學處僻壤未極烜燿余曩直史館與纂儒林文苑傳外省呈
卷帙甚繁顧罕似此者君與余同邑非敢阿好諸書具在明者自

識之今敘述君事用略疏其梗槩蓋欲使後之人修志乘得有所
據依而載焉

右傳朱琦撰

石家紹

君少孤太夫人撫育之弱冠補博士弟子員嘉慶癸酉拔貢生選
壺關縣教諭實心課士學使者稱爲真教官己卯舉於鄉道光壬
午成進士以知縣用分發江西署大庾縣事補龍南縣調署新城
調補上饒署新建調補南昌以循卓特薦升銅鼓營同知丙申上
計入都 召見 上垂詢地方情形君敬謹奏對回任丁酉權守
饒州戊戌權守贛州己亥五月以公事赴雩都途次受暑返贛庸
醫誤投溫劑遂卒聞者無論識與不識皆歎惜之君所歷五縣合
詞請祀名宦南昌士民尤感戴特爲建專祠焉君平日居官行政
洽於民心孚於輿論可想見矣君在龍南人傳其發奸擿伏一二

事境內稱爲神明在南昌連年水患饑民聞省會散振聚沙井者數萬上官委君同新建令張君湄辦理振務始而散米令饑民自爨繼而來者愈眾沿河一帶幾莫能容且恐人眾滋事於是散錢諭令得錢各返鄉里候截畱漕米分給各鄉計兩旬之久數萬饑民以漸散去君之心力既瘁而南昌水患未已君復請於上官開倉平糶而無力糶米者則又分廠煮粥以振之饑民提籃托鉢擁擠誼呶甚或紛爭鬪毆望見君至卽羣相戒曰石翁來矣我輩無得多事此非平日素行足以感人其能若是乎首縣政務繁劇處之裕如理辭訟必細心研鞫夜分不倦生平無他嗜好惟好聚書藏書至七萬卷每行役必以書自隨暇卽手一卷君事母孝恆

欲得其歡心事上官以敬然是非可否惟義是視不可阿意曲從
待僚友以誠有以事干者非義則拒之其合於義者則爲之籌畫
俾克有濟其宅心之厚又如此君沒一子尙幼所藏書盡以抵私
債聞者傷之

珠海老漁曰余五十年來交海內賢士大夫心藏心寫不一其人
求所謂順乎親信乎友獲乎上治乎民兼而有之者不易覩也如
石瑤辰庶幾當此而無愧乎其爲人宜壽乃年方強仕中道挫折
悲夫悲夫然千萬人同心同力報以俎豆馨香此又可以見秉彝
之良直道之公出於斯民者爲不可泯也

右傳張維屏撰

君諱家紹字瑤辰姓石氏山西翼城人也以嘉慶癸酉拔貢生教諭壺關己卯舉於鄉道光壬午成進士籤發江西補龍南縣知縣調上饒再調南昌歷署大庾新城新建擢瑞州府銅鼓營同知署饒州贛州知府己亥五月二十八日卒贛州府署年四十有八君耽精書史通百家之言和夷坦蕩口訥訥若不得辭而以己度人以情求物臨民折獄常得其真巨猾負嶠服君清德遂來歸命狂潦滌歲君盡心焉災以不害迹君宦轍來則老幼歡迎恬嬉謳舞去則壺漿塞路涕泣橫流知與不知稱曰石爹爹江西民呼父也乙未秋君謝南昌事寓省垣予從詢土俗涓滴之故君曰僕籍符十餘載閒居追溯無一可對士民者慚憾而已遑知其他予

聞斯言懌乎若飲醇醪而自醉也是年十二月朔省開粥廠主者
循例備三千人食而就食者五萬洶洶不可止君往諭曰汝等速
散明早看告示斷不使有一饑民無粥喫也則皆曰石爹爹不欺
人遂散去先是在事諸君所以諭眾者較君倍諄切矣然非君言
卒莫聽君集書六萬卷常就予論析疑義君或未習歸則竟夕檢
本必見其深時發予所未及治安於民道信於友如是可以爲易
簡理得仕學交優者也君既卒官所莅舊部各請祀君於澤宮南
昌紳耆更醵金錢建專祠以奉君烝嘗官斯土者慕君行治集力
彌踴躍遂以庚子冬落成祠宇於百花洲恆沙寺之右僉謂祠有
興廢唯明德爲不朽然非託於紀述何以昭示來茲興作嚮往爰

伐貞石載茲清頌庶幾中郎不作仍傳無媿之辭文子來遊不昧
與歸之智其辭曰

於穆石君天篤誠慤自孚孚人不負幼學懿之德好聲繼召父胡
不憖遺以福蓬戶民之戴君謂察謁請君之棄民誰淪痕癥桃李
不言榮名豈旣新祠有暈以妥豈弟君心乎民自茲有歲民心乎
君無怠永世

右祠碑包世臣撰

黎愷

君諱愷字雨耕晚自號石頭山人遵義黎氏曾祖國柄祖正訓廩貢生考安理舉人山東長山縣知縣長山君二子長曰恂字雪樓雲南大姚縣知縣君其次也雪樓厚重寡言氣蓋一世君則倜儻通易周覽羣書兄弟閒自爲師友長山君少遭不造備歷艱險旣見二子之成乃大歡慰二子翼翼趨承食必佐餒醕必奉漿應唯猶嬰兒也嘉慶十八年逆賊林清等倡亂內煽京師外起滑縣河南北山東直隸震動時長山君仕山東雪樓侍於官所譌言四起或告於貴州曰長山破矣縣令殉城死矣雪樓殉父矣親屬都無存者僅存兩孺子漂轉吳楚閒去矣君於時奉母楊太宜人在家

聞則北望號痛請於母刻日戒途赴山東之難至長山則闔門故
無恙傳者妄也由是遠近以孝歸之君曰父兄得全幸也庸有稱
乎雪樓之自桐鄉以憂歸也家居十五六年君晨夕造請進止雍
雍語或不合亦敬應之而徐理之終無所忤雪樓嘗病喉痺絕言
與食君午夜禱於宗祏泣曰我不及兄兄不可死必死者請以我
代喉亦旋愈其敬嫂也如嚴其兄其訓羣從如教其子蓋歷久而
不改至其終身亦卒不少懈居京師有友曾某之喪新尸猶厲雖
其兄亦畏惡不敢近君就舉而斂之必恪必躬見者感歎君少而
善病長山君雅不欲強之學而博涉多通窺見百家要指以縣學
生中式道光乙酉科舉人十五年乙未大挑二等補貴陽府開州

訓導二十二年十二月辛卯以疾卒官春秋五十有五卒之日囊
無十金之蓄士無識不識莫不惜君之位不稱其德又不獲耆壽
以昌其教澤也嗛焉若有憾於天地至其孝友篤行饜於人人之
心者則誠服而更無遺憾然則君之自省與後之論世者亦可以
無憾已君配張氏妾吳氏劉氏子四人庶燾咸豐辛亥科舉人庶
蕃壬子科舉人候選知州庶昌以諸生獻策 闕廷 天子褒嘉
特授知縣候補直隸州知州庶誠女五人皆適士族孫四人孫
女五人咸豐七年四月葬君於河西小青樹林其後閱十五年度
昌乞余追爲之銘銘曰

賢聖盛業豈貴高名其道甚邇事親從兄穆穆碩儒黔南之特韻

國朝文獻通考卷之三百二十一
三十一
斂英奇以修內則聞變趨庭萬里戴星禱疾身代感徹百靈胡誠
不格何施不普化彼梟狼澤以甘雨生徒濟濟飭爾五常白華孔
絜馨我膠庠亦有賢嗣文行並卓埋石茲邱永貞喬嶽

右墓誌銘曾國藩撰

楊瑀

楊瑀浙江會稽人道光辛卯爲桂陽典史明年峒獠趙金龍亂衝
永郴屬大震桂陽故設參將營兵四百精銳盡赴永餘老弱棊散
守烽汛駐城兵弁數十人率惟怯無固志奸民瞰虛潛結嶺南江
右諸不逞覲爲變氛甚惡瑀偵知之甚令聯鄉村練壯勇備器械
謹謀探以待非常議未決北鄉報劫盜瑀謂其鄉豪之在城者逆
歸斂眾我將往因慷慨請於令曰賊嘗我謂我不敢出也疾撲之
彼不虞吾猝至必就縛就縛民志定賊黨攜矣乃選健役八十人
疾馳五十里至其地而鄉豪亦糾壯勇三四百人與瑀合夜半擣
其巢賊果蒼黃狐鼠竄盡繫以歸寘之法當是時賊首李觀章者

方安居興甯老巢聯絡諸山賊悉索大舉得漏網瑀復碁令牒興
碁參將檄土官帥新民刻期會剿而密諭鄉豪集壯勇待於隘圍
合火起賊驚潰突煙出縱橫滿山谷至隘觀章與其親屬盡爲壯
勇所獲無得脫者觀章死興桂額手相慶先是北鄉告警南鄉亦
開平倉平倉者劫倉也蜂蟻聚拮鎖擴門者數家矣尙未死遲瓜
分瑀聞之曰亂可造已也北歸之明日碁令召鄉豪爲眾所憚者
數十輩教之團練曰爾鄉近粵剽掠者且至亟塞隘穀將焉往先
自亂資敵矣且觸憲 國法將不汝容翌日吾將命典史爲汝布
置瑀則帥其健役八十人者與紳民大會於井坡墟墟中南鄉民
糜至瑀從容曉譬利害咸俯首受約束富民量產捐米贍丁壯守

隘者而村舉一二人爲之長條畫井井俄頃而定趙逆平令以軍
功晉級瑀典史如故又明年瑀丁內艱貧無以爲道途資紳民贖
白金累數百始克歸葬畢旋湖南桂陽科舉寓省者往來存問密
於戚故己亥瑀卒安化典史官廨貧不能反其柩其子成謙訃於
桂桂人念瑀出死力捍大患而秩抑遇遭竟蹉跎以死潛然涕出
助之金并爲文以祭其辭曰天降疾威陰霾風烈草卉繚枝松檜
斷節柔以眾完剛以獨折莫夷其萃乃摧其傑惟公之生天挺峻
骨海汐走霆娥江濯雪胸直膽勇眼冷腸熱抑在下僚百鍊寸鐵
皇帝壬辰峒猺草竊風鶴譎傳狐鼠黨結公適尉茲見義奮決時
維鷹揚突入虎穴迺芟其莠迺殄其蠶疾雷一震乾坤開揭曾不

國朝莫此危艱大難既平薦紳忻悅東閣長開茗馨酒冽賦詩論
文談笑玉屑旁及書畫爬羅剔抉酣嬉淋漓撫掌纓絕歡娛未終
悲聲四徹玉佩瓊琚轉眼桐經風刀霜劍生離死別老驥翹雲夜
鵲唳血琴鶴淒涼士友結舌白衣西關送公歸浙需次省垣養晦
抱拙一官匏繫門多車轍風雨故人膾鯉魚鼈傲骨豪情吞吐鬱
噎晚得梅城吻際肘掣鵬鳥欺人登坐嗚咽乘彼白雲去如電瞥
嗚乎我公自今永訣干將莫邪堅剛沈闕屈產冀北權寄蹉跎永
跼死顏福庸隄哲天道如斯抑又何說惟公生平友朋惻切下堂
執手一言驪蔑寸心耿耿天日昭哲三年不見夜臺已鏤拂拭孤
桐哀訴明月搔首長空絃絕聲歇公其有靈魂來恍惚

右書事何慶元撰

右書事何慶元撰
卷之十一
十一

楊積煦

楊積煦字育庵一字和甫湖南黔陽人父兆李汝州直隸州知州積煦生長官署而樸素如寒儒喜讀經世書工繪事涉筆成趣不書款識以自禠肄業成均十應京兆試僥得復失道光乙未年幾強仕矣以通判職膳錄報滿分發河南十七年署汝甯府分防新息通判駐黃湖店地故盜藪無衙署他官率駐新蔡縣城積煦曰若是奚設官爲借一友二僕往僦居嚴申保甲威德並施盜遠徙二十一年署鄭州知州值河決需稽料又海疆兵差駱驛積煦至開諭急公民感激爭奮先是前刺史嚴正基調掌壩工旋奉諱薦積煦權鄭嚴故廉貪積煦仍其賓僕而盡以廉俸遺嚴俾得歸櫬

時人兩稱之欽使大學士王文恪公鼎聞其政治歎曰余昔權撫豫久悉楊倖父爲中州吏師賢者有後宜哉遂列薦章時廉能旣著屢奉差委南陽浙川蝗大起民詫爲神無敢捕積煦徧諭設法捕之夜半過山溪人馬幾溺未嘗告勞二十三年河再決省垣危迫積煦率紳弁搶護蘆花岡見難民蔽河而下亟撥護隄船迎流拯之並虛己棚分處男女自立風雨中一晝夜凡活八千餘口藩司張日昃飭各處做行之所救不可勝計水後淤地肥瘠互易設局以積煦總其事乃延廉士祝穎齋居守而躬履勘丈奸黨蠹胥百計弊混不爲撓二十七年河南北大旱檄積煦查辦新鄭災振所至勸捐粥廠審驗戶口竭慮殫精二十八年河南侵振事發禹

州尤甚前牧父子遣戍積煦奉檄攝禹篆單車入境災黎滿目疾
力撫綏至忘寢食民始慶更生官豫十四年僅以獲盜敘加三級
蓋所緝皆不及額或勸以屬印官刑求備數積煦曰是何言陽條
陰律顧不足畏耶每缺出則爲輿援者先得寔如也卒年五十有

三

右傳易變堯撰

汪時育

昔侍先君子於新安郡庠凡賢士之從先君子遊者余皆願與之遊而歛西溪汪君畹腴往來尤勤講論尤篤壬辰客京師君來應京兆試閒數日必相見見必質以所作之文與所交之人期盡言無所隱後君歸歛浦余亦返姑孰甲午君與從堂兄弟峻亭學虞兩君招余館於鮑坦山中使其子姪受業歡聚者又一載及余奉檄婺源君旋選英山教諭余以君晚得一官稍慰平生碌碌不平之氣乃莅任未久而捐館舍矣其孤運錦以狀乞銘嗚呼吾何忍銘吾畹腴哉君生有至性自幼不屑屑舉子業雖以此入邑庠試高等膺房薦而不以自喜惟綱常名教以身任之發於至誠而不

可遏抑兩遭喪以毀聞當父喪之殯也鄰人不戒於火煙昏黑不能辨人夜既深惟二工人伴宿君急甚以背負棺之前和反兩手舁之命二工人夾後和舉之須臾出棺於門外及風返火熄十數人舉之莫能勝云平生喜交遊以朋友爲性命居京師日戶外之屨恆滿同邑許詠亭吏部球尤愛重君言於相國曹文正文正文具杯酒邀君飲一見稱莫逆其時文正春秋高委蛇供職同鄉後進莫敢進一言君時時諷以山林樂趣一日偶談及宋歐陽永叔對王文康公語未及終文正遽止之曰吾知君愛我吾當緩圖之一時京師聞者俱以君爲有國士風程梓庭制府自閩浙任歸堅臥不起閉門謝客雖戚屬罕見其面聞君善詩菊逸園中多異品每

秋高氣爽輒蠟屐與君遊君性倜儻喜談諧不拘小節酒酣耳熱
之後放言微論語近滑稽制府愈益親近引以爲直諫友故贈君
聯句比之蓋次公之狂其見敬禮如此六句後始官英山未及一
載而歿同寅聞之皆弔哭失聲輓歸之日士泣涕送者道相屬也
嗚呼君雖位卑不稱其德時暫不究其施然其感於人心者亦深
矣其餘睦鄰黨惠貧乏興起文會修葺祠堂精岐黃之術起膏肓
之疾非其犖犖大者皆不書君諱時育字晚腴號小齋系出唐越
國公後至宋人鑑公始遷西溪高祖旭軒公鄉飲大賓婺源江慎
修經師爲立生傳謂合周禮孝友睦婣任恤爲六行曾祖磐石公
祖鑑雲公公父脊齋公俱隱德弗曜君生於乾隆癸卯年二月二十

八日歿於道光丙午年六月十三日享年六十有四配程孺人巨
婦德子一運錦國學生女三人皆適士族孫二人孫女四人以某
年某月某日葬於某山銘曰

夫子之孝兮通於神明夫子之信兮孚於友生夫子之議論兮以
儒生而折服乎公卿雖位不稱其德兮夫固沒世而有令名維茲
松楸之鬱鬱子孫其永護此佳城

右墓誌銘夏斨撰

俸常榮

俸常榮金堂人道光中任城步縣橫嶺巡檢橫嶺民苗雜處號爲難治常榮月一往所轄適中地召民諭以睦鄰任卹禍福順逆之道聽其獄訟居旬餘乃返民苗暱之相見必互相慰勞卒於官民苗哭之皆慟

右傳李元度撰

日本書紀卷之二十一

三

彭鼎

彭鼎保靖宣慰司順治初率所部獻輿冊投誠奉 敕獎諭並
賜宣慰司印康熙三年從撫臣周召南請蒙 欽賜坐蟒袍正一
品服晉太子少保任保靖宣慰司使事蓋曠典也又家乘稱其解
音律善丹青五馬十鹿等圖精細入神且精醫歲必以餘金製藥
施送救民疾苦亦土官之傑出者

右傳羅經畚撰

五ノ月ノ...

...

岑應麒

世襲土田州牧岑氏系出餘姚漢舞陰侯彭之裔諱仲淑者立功
宋仁宗朝授麒麟武衛懷遠將軍皇祐五年從狄武襄青征儂智
高克柳城破邕州寇平遂鎮其地都督桂林諸軍兵馬仲淑卒子
自亭襲自亭卒子翺襲翺無嗣弟翔襲崇甯間歸化蠻亂翔募兵
平之授沿邊溪峒安撫使翔卒子英襲駐劄永甯掌左右兩江兵
務祀思恩名宦英卒子雄襲安撫使以功加武略將軍雄卒子世
興襲元授來安路總管世興卒子帖木兒襲帖木兒卒子也先襲
也先卒子伯顏襲明洪武元年軍下廣南改授土府賜名堅堅卒
子永通襲隨征交阯升都指揮銜永通卒子祥襲祥卒子紹襲紹

卒子鏞襲從征藤峽加參政銜鏞卒子溥襲溥卒子猛襲因劉召
之役師敗受誣死長子邦彥亦死於兵諸子皆出亡都御史姚鏞
奏改流官土目盧蘇等脅邦彥之弟邦相糾眾抗命朝廷遂起新
建伯王守仁總制軍務戢兵招撫上疏言岑氏世效邊功治田州
非岑氏不可請降府爲州屬流官知府卽以岑邦相爲判領州事
岑氏之牧田州自此始當邦彥死時其子芝尙弱小祖母瓦氏祿
匿民間有副總兵張祐以其爲岑氏之嫡嗣也祕之篋中屬御史
陶諧畜之旣而邦相爲州眾所殺芝仍襲職芝卒子大壽襲大壽
無嗣弟大祿襲大祿卒子懋仁襲擊寇安南加總兵官冠服懋仁
卒子廷鐸襲以防禦流寇功加右都督銜廷鐸卒子漢隆襲漢隆

無嗣弟漢華襲君漢華庶子也漢華長子應裕死故襲諱應麒字
山公三歲失恃善事嫡母得歡心養生送死如禮少聰穎喜讀書
慷慨有大略及長受事每思所以維此邦風教者必自家始族祠
故罹兵燹譜失支派不分吉凶秦越視君曰非親親之道也乃收
召子姓得百餘人立家廟序昭穆歲祀無缺田州故西南荒服俗
陋男無履女無裘淫奔侏儻等於禽獸君約法除之以士爲民首
講義學延師儒獎進秀良以率不馴捫建文廟規模祭器如式自
是田人始知學濟濟爲土屬冠州地故大延表千餘里其阡陌荒
荆葦者半併豪强者亦半君勸懲並行民得盡力稼穡至今稱富
庶又設社倉賑糶兼施民無饑歲四民無告者立養濟院生則給

米死則殮之俾無野殍橋梁道路以時修葺凡往來田陽間者屬
餽曲盡行人便之康熙五十三年 覃恩誥授奉直大夫加一級
雍正三年制軍孔公毓珣撫軍李公紱上其績 賜朝衣一襲雍
正七年鄂公爾泰總制雲貴西粵軍取道田州廉得君治狀賞朝
珠弓箭馬匹令與漢州縣依品序坐以示優異從來世秩土官不
過食租衣稅夜郎自大而已且或昏愚不辨菽麥甚乃與二三奸
目相倚如蝥駘搏噬其眾一旦怨家仇人揭竿排闥則口喘足踈
首鼠心狐莫知所措 國家緩急無需此輩亦卒無毫髮事相及
惟君力矯其弊屹然以西南門戶爲己任雍正四年奉議州波洪
土民羅文綱負嵎劫奪君誘縛文綱解省正法五年八達土目顏

光色光都叛右江軍段某檄君協剿有功九年隨右江軍蔡某征鄧橫蠻賊君親領土兵奪營斬馘制軍高公其倬敘功第一奉

旨加軍功一級十三年奉檄赴古州防守兵糧適黃茅龍里告急君身先士卒攻堅破銳兵不挫衄凱旋奉 旨加軍功一級乾隆

五年應調往義甯協剿逆苗親冒矢石次子潔分兵擣穴獲全勝功敘一等奉 旨加軍功一級時君以州治遼闊請分陽萬里屬

州判卽以潔任判職從之考岑氏自世興後支分努木罕襲職泗城若豹若應若接蹂躪猖獗卒以敗亡惟帖木兒一支世世奉職維護君承二十餘傳念祖宗勗業之難天王帶礪之重思所以上報 朝廷下訓士卒以備 國家干城之用凡騎校編戶亦莫不

感君之義踴躍行閒執銳前驅者語曰以義得之以仁守之其量
百世非君之謂歟君生於康熙乙丑卒於乾隆丙寅享年六十有
二配羅氏田人正思女 誥封宜人生於康熙丙寅卒於乾隆庚
午享年六十有五宜人善治家凡君隨征五次從戎數年內外鉅
細皆決於宜人糧餉接運無缺所謂克相夫子以成偉業者也子
四長淵襲娶黃氏歸德州土牧印彪女次溥早卒三潔分管陽蕪
州判娶谷氏監生鍾女四游任西城掌印兵馬司指揮娶李氏監
生雲煒女孫宜棟娶黃氏上林土縣某女繼娶馮氏瀾卒宜棟以
嫡孫襲職乾隆十一年冬先葬君於三塘今乾隆十八年十二月
十七日改葬君與羅宜人於四塘五馬嶺銘曰

其生也全其死也安五馬之麓松柏桓桓是爲岑君合窆之原宜
食報於其子孫

右墓誌銘楊仲興撰

國朝耆獻類徵初編卷二百六十補錄

僚佐十二

陳炳極

君姓陳氏名炳極字杰峯初名元春後更今名其先上元人有曰
尙進者官四川武職遷於貴筑家焉父玉珍 贈奉政大夫君幼
穎異好學年十九補縣學生爲鄉先生何編修泌翟孝廉翔時所
知居父喪哀毀骨立奠葬如禮嘉慶五年舉於鄉十三年大挑二
等以教職用署興義教授十六年成進士榜出聞母喪奔歸哀毀
如喪父時十九年補殿試列二甲以內閣中書用乞改歸班仍就
教職明年選大定府教授道光四年選上杭縣知縣六年署沙縣

知縣縣有巨盜曰張老仔爲一方民害有司屢捕弗獲君以計獲之署霞浦知縣十二年調臺灣知縣由廈門渡海赴官舟至虎井颶風大作舟壞幕客舟子及從者咸溺死君坐水匱中若有物負之遂登岸澎湖通判蔣鏞爲之治裝始復渡海至臺灣臺灣營兵素橫好吸洋片時 朝廷方嚴其禁君獲吸洋片者二人下之獄營眾大譁圍知縣署吏役及士民請與兵鬪君弗許幕客及從人請逃又弗許君從容理衣冠抱印綬坐堂皇營眾放槍君巖然弗動眾以爲神咸羅拜因一一訶斥勸導之眾始散竟置二兵於理由是號令肅然無犯者明年十月嘉義縣人張丙作亂戕其知縣邵用之巡檢朱懋全家遇害臺灣知府呂志恆偕營將率兵捕剿

亦遇害總兵劉廷彬又率兵擊之爲賊所圍府城震恐臺灣道遣使渡海馳告於上官君募鄉勇巡城郭理軍需浚溝築壘以待官軍之至夜以麻稗灌脂作大炬照城賊違城僅數十里卒不敢近月餘大兵至賊解圍而遁大兵進至嘉義丙窺臺灣防兵少與其黨許成率眾來襲君分防南北二面聞賊至率鄉勇民壯數千人開城突出撲之賊黨皆散許成等十餘人在後爲君所縛急進追丙丙匿不知所在君率親信數人蹤迹得之賊遂平事聞 賞戴花翎擢濟南同知又二年以病乞歸主講正習書院凡七年二十六年四月卒年七十二君性孝友常以祿不及親爲恨每遇忌辰令節必盥漱詣家堂親酌酒薦饌以獻其先兄弟五人常與同處

長長幼幼各得其家庭之樂嘗訓其子曰處己宜以純謹和爲
先處家宜以孝弟勤儉爲重讀書須有實學爲政宜存實心皆爲
有識所稱子翰清增貢生候補布政司經歷孫瀛道光二十四年
舉人泚國學生

右傳鄒漢勛撰

國朝耆獻類徵初編卷二百六十補錄

僚佐十二

方鉦

巴陵人 國朝二百餘年無祀鄉賢者而方氏得二人焉一廣西
巡撫敬齋公一敬齋公元孫美堂先生諱鉦字二如美堂其別字
也以名諸生領嘉慶二十一年丙子鄉薦歷任攸零陵嘉禾縣學
髫齡卽溺苦於學常先雞鳴起默誦待曉冬夜或據案達旦學以
主敬爲宗終日危坐無情容寡言笑雖盛暑不見褻衣遇人無所
擇壹接以禮人亦皆嚴憚之事親愉愉色養長子大清戎部及京
師先生慮母年高將不勝感歎笑膝下如平時閒裏銀鈿葭葉諸

物附家書偽爲戎部自京遣問祖母者如此者五年及母垂沒然後跪謝告實自爲諸生時不與外事晚主岳陽講席守宰皆雅重先生然罕至其庭有訟者進重金勾爲一言峻拒之遂絕不與通其時先生蓋寔甚嘗語諸子曰士人立品如護新製衣不可命少著污泥性寬仁長兄自官所遣僕歸金先生僕詭言舟覆某所先生故知某所水淺無覆舟理然不以證其妄後僕稍出金市日產或以告先生曰甯人負我竟怒置之先生未昏時婦家以女嬰廢疾來還其聘先生引劉庭式娶瞽女爲言固執不可既昏婦家請妾其美婢又不可卒生令子爲名人鄉里至今稱義行云

右傳杜貴墀撰

國朝耆獻類徵初編卷二百六十補錄

僚佐十二

高翮映

高翮映號雪君世襲姚安土同知博學能文著有妙香國草增訂
來氏易註等音聲位合彙續雞足山志暨理學西銘諸補述數十
種

右溟繫小傳師範撰

國朝耆獻類徵初編卷二百六十一目錄

將帥一

費英東 子索海 圖賴

扈爾漢 子準塔

額亦都 子圖爾格 伊爾登

安費揚古 孫都爾德 曾孫馬錫泰 遜塔

國朝耆獻類徵初編卷二百六十一目錄

國朝耆獻類徵初編卷二百六十一

通奉大夫前署江西巡撫江西布政使司布政使湘陰李桓輯

將帥一

費英東 子索海 圖賴

費英東姓瓜爾佳氏世居蘇完後隸滿洲鑲黃旗驍果善射引強弓十餘石 太祖高皇帝勦業之初隨其父蘇完部長索爾果首率所部軍民五百戶來歸 太祖嘉之授一等大臣尙主有兒沁巴顏者費英東女兒之夫也謀逆費英東擒而誅之初征瓦爾喀部取噶嘉路殺部長阿球降其眾以歸戊戌年正月同台吉褚英等統兵千人再征瓦爾喀取安楚拉庫路圍屯寨二十餘所屬人

戶悉招降之丁未年正月蜚悠城長苦烏拉侵擾請內附費英東
同貝勒舒爾哈齊等遷之盡收其環城屯寨令侍衛扈爾漢護五
百戶先歸烏拉以兵追擊相持未下費英東率師繼至大敗之五
月討東海渥集部與貝勒色雅喇等取赫席赫路鄂摩和蘇魯路
佛訥赫託克索路俘二千人而還辛亥年七月同台吉阿巴泰等
取烏爾固辰穆稜二路癸丑年正月從 太祖征烏拉同諸貝勒
大臣力戰破敵乘勝奪門遂拔其城尋 命與何和哩額亦都扈
爾漢安費揚古爲五大臣佐理國事天命四年二月明兵四路來
侵一軍據薩爾滸山巔費英東率本旗兵進擊破之 太祖之征
明取撫順也明兵來援礮驚費英東馬旁逸諸軍不前費英東迴

馬大呼揮諸軍並進遂破之 太祖拊髀歎曰萬人敵也從攻葉赫城上矢石雨下 太祖命之退對曰我兵已薄城下矣再 命之退對曰勢垂克必不退竟拔其城費英東自少從 太祖征討諸國三十餘年身先兵士衝突堅陣當其鋒者莫不拔靡性忠直遇事敢言毅然不撓以功授三等子世襲五年三月卒年五十有七 太祖聞之哀慟親臨其喪 太宗文皇帝天聰六年追封直義公配享 太廟八年以其子察喀尼襲爵 賜勅免死二次 太宗嘗諭羣臣曰費英東見人不善必先自斥責而後劾人見人之善必先自獎勸而後舉之被劾者無怨言被舉者亦無驕色朕未聞諸臣以善惡直奏似斯人也順治十六年 世祖章皇帝念

佐命勳臣 詔晉費英東世爵爲三等公康熙九年 聖祖仁皇帝御製碑文勒石紀勳雍正九年 世宗憲皇帝加封號曰信勇乾隆四十三年 上追念費英東忠勳晉世爵爲一等公子十人察喀尼見大臣表第六子索海第七子圖賴別有傳

右 國史館本傳

國初 太祖時以瓜爾佳信勇直義公費英東鈕祜祿宏毅公額亦都棟鄂溫順公何和哩 賜姓覺羅忠烈公扈爾漢覺爾察敏壯公安費揚古爲五大臣凡軍國重務皆命贊決焉

國初甫定遼瀋官職悉沿明制其總攝國政者有五大臣其餘設總兵副將遊擊備禦之分而皆階以等級

如一二三等總兵官其一二三等遊擊之類

後改爲國語無復漢名如固山額入關後始改總統旗務者爲都

統每旗一員其參協者爲副都統每旗二員其下設參領佐領等

官惟世職名仍沿國語如一二三等阿思尼哈番一乾隆初從舒

文襄公始設漢銜其一品者爲子二品者爲男三品者爲輕車都

尉四品者爲騎都尉五品者爲雲騎尉而官名乃釐正焉

右錄宗室昭棟撰

索海

索海滿洲鑲黃旗人姓瓜爾佳氏費英東第六子也天聰五年七

月初設六部官授刑部承政七年八月同兵部承政車爾格至錦

州偵明邊隘斬獲有功 命兼佐領崇德三年二月明石城島總

兵沈志祥挈所屬來歸索海隨貝勒杜度等運米濟之七月更定
部院官制改授都察院左參政統兵往大凌河兩岸十四屯堡略
地還復任刑部承政明年十二月同工部承政薩木什喀往征索
倫部索海率右翼兵偵知掛刺爾屯有敵兵五百與理事官喀喀
木等輕騎襲之奪其柵斬二百級擒百三十人及左翼薩穆什喀
攻陷雅克薩城旋攻鐸陳城不下而還烏喇與兀魯蘇屯之博穆
博果爾合兵六千襲其後索海率眾設伏衝擊之獲其輜重生擒
四百人乘勝往攻博穆博果爾營馳馬直入敵眾大潰是役也先
獲二千二百五十四人後至額蘇里屯以西額爾圖屯以東又獲
男婦五千餘牛羊駝馬無算凱旋 太宗親率諸王郊迎宴勞之

敘功授二等輕車都尉世職部議索海出征索倫不豎立營寨嚴
束士卒以致疎脫俘囚應罰贖追還賞賚 上以索海功罪相抵
特詔免之明年三月隨睿親王多爾袞等圍明錦州坐阿附王貝
勒私遣官兵歸家離城遠駐罪論褫職籍沒後得 旨寬免仍輸
罰贖六月王貝勒等統軍再圍錦州索海以兵四百截敵出城路
還遇錦州出汲小凌河兵三百邀擊之斬九十餘級又從攻松山
兵克之墜馬乘廐卒騎而歸會 敏惠恭和元妃喪索海坐召優
人歌舞論罪免死削職分奴僕一半給其弟護軍統領圖賴且
諭曰爾既耽於逸樂任爾居家可也順治二年署副都統從征四
川卒於軍子多頗羅 太宗文皇帝時授佐領順治元年以入關

從破流賊功授騎都尉世職尋任都察院理事官九年八月加一等輕車都尉任蒙古副都統十四年十二月隨信郡王多尼進征黔滇至雲南磨盤山爭先擊敵遂沒於陣 賜祭葬子多禪襲職

右 國史館本傳

圖賴

圖賴姓瓜爾佳氏費英東第七子也先隸鐵黃旗後與兄納蓋弟蘇完顏改撥正黃旗天聰初隨征董夔追擊察哈爾及攻明甯遠所至有功三年從 太宗文皇帝伐明進兵燕京其大同總兵滿桂以師赴援圖賴直前衝擊斬殺甚眾授騎都尉世職四年隨大貝勒阿敏等鎮守永平明監軍道張春等圍灤州圖賴與副都統

阿山等率護軍自永平馳至乘夜擊敗之師還大貝勒阿敏棄永平出邊明將率步卒百人已追及圖賴率十六人還戰進殲其眾尋授三等輕車都尉五年八月從征大凌河圍其城 太宗指授方略令與護軍統領南褚立兩旗之間遇逐我樵採者邀擊之又明兵誘戰圖賴先馳入陣諸軍各進戰圖賴被創 上以其違命輕進切責之九月明發兵四萬餘來戰圖賴統右翼兵躍馬衝陣敵兵潰走遂擒張春旋征大同拔靈邱縣及小石城敘功晉二等六年大軍破走察哈爾遂移師征明次於布里度圖賴奉 命同參領蘇喇達齋 敕諭明沙河堡守將明人遣兵齎牛酒幣帛以獻七年隨貝勒岳託等攻取旅順口統兵守旅順口偕漢軍遊擊

修圖賴明年從攻朔州以越界出略又不至期會地盡奪所獲物
入官九年任護軍統領隨貝勒多鐸入廣甯同都統阿山等率兵
四百先趨錦州明總兵祖大壽遣其將合松山兵三千餘人來禦
未及戰明兵驚潰我兵分路剿擊俘獲無算軍還敘功得優賞
崇德二年授爲議政大臣明年復隨貝勒岳託征明率師先驅踰
牆子嶺攻克十一臺進兵山東明將合步騎八千餘來禦正紅旗
隨營蒙古阿藍泰旁卻圖賴方營部馳擊敵以百騎突至圖賴搏
戰陷堅大敗之旋與都統譚泰敗明閣部劉宇亮等兵於通州河
上攻拔二城又分兵略地取二城累功晉爵三等男六年圍錦州
明兵自杏山赴援擊敗之先是蒙古有降明者曰諾木齊在圍中

道人約獻東關以降至是明兵覺圍諾木齊家圖賴登城力戰殺敵出諾木齊以歸復破松山騎兵指揮漢軍拔塔山杏山二城晉一等男部議錦州之役諸貝勒所屬三旗護軍有退怯不戰者貝勒大臣未經察治圖賴坐附和徇隱論罪罰贖得旨寬免八年攻拔中後所及前屯衛晉三等子順治元年大軍至山海關流賊李自成遣兵拒戰圖賴率前鋒軍破賊將唐通於一片石既入關破自成兵復會大軍追敗之於望都縣超授三等公是年十月豫親王多鐸帥師下河南自成走陝西圖賴至孟津率精兵先渡河明守將黃士欣等各遁去瀕河十五寨堡兵民望風歸附睢州總兵許定國等率眾來降進薄潼關賊遣僞侯劉宗閔沿山列陣以

拒圖賴以騎兵百四十人進戰一以當百設伏掩擊盡殪之明年賊將劉方亮整兵千餘來窺我營圖賴與護軍統領阿濟格尼堪等率正黃鑲白正紅鑲紅鑲藍五旗將領迎擊賊懼而奔俘獲甚眾自成聞敗集兵拒敵圖賴復率鑲黃正藍正白三旗兵力戰殲其步卒餘騎奔竄賊糾眾又至連戰敗之遂破潼關賊眾大潰遁走陝西既定移兵收江南攻克揚州獲明閣部史可法斬之追福王朱由崧於蕪湖據江口截擊靖南伯黃得功兵敗之得功中流矢死遂獲由崧餘眾悉降師旋進爵一等公圖賴嘗謂睿親王多爾袞曰圖賴自誓於天效忠主上不避諸王貝勒大臣嫌怨久矣圖賴有過王若不言將恐不免於罪戾我欲改過自新王幸毋

姑息不我教誡也會睿親王於午門集議譚泰擅隱 諭旨罪三
日議未定圖賴面詰之曰何爲遲久不結耶聲色俱厲王怒曰爾
曩追流賊至望都分兵前進諸將爭先爾於肅豫諸王前誚讓且
唾逞威自恣今又以言詞偪我我固不能堪此怒色疾聲也遂去
諸王執圖賴將罪之王曰雖然此非退有後言比且爲國效勤矢
忠無他咎也解其縛而釋之三年任本旗滿洲都統隨端重親王
博洛進師浙閩軍次杭州時明魯王朱以海據紹興其總兵方國
安等營於錢塘江東岸艤舟以拒圖賴率諸將士從上流浮渡江
廣十餘里人馬無溺者分兵縱擊之國安驚以爲神盡棄戰艦攜
魯王遁保台州圖賴奮力追勦拔金華衢州各城會端重親王令

與都統漢岱分兵進取福建圖賴自衢州統所部兵擊敗明閣部黃鳴駿於仙霞關攻克浦城漢岱亦自廣信破分水關入崇安明唐王朱聿鍵遁走汀州諸將乘勝追擊擒斬聿鍵等五人及其總兵等官盡降其眾閩海悉平回次金華病卒年四十七子輝塞襲爵圖賴既卒之後二年貝子吞齊等誣告圖賴黨徇肅親王鄭親王又與譚秦等私相盟誓睿親王追論之奪輝塞爵并沒其家世祖章皇帝親政知圖賴無辜且念舊功追諡昭勳配享太廟賜文勒石復輝塞一等公還其資產雍正九年加號曰雄勇

右 國史館本傳

嘗讀孫徵君夏峯集中孫高陽相公行狀載崇禎庚午收復永平

四城頗著偉績以爲諛墓之文例多溢美近讀八旗通志乃知當時文皇帝雖東歸所畱守者皆一時勇將謀士如圖雄勇公賴圖果毅公爾格范文肅公文程及勞薩葉臣等俱在圍中高陽能以新集烏合之兵力撻其鋒使諸名將棄城遠去實一時之奇捷較之韓蘄王大儀鎮岳忠武朱仙鎮之功有過之無不及者明莊烈帝乃視爲泛常僅廕一錦衣指揮其後因凌河之役立加罷斥眞賞不酬功矣然則亡國非不幸也

右錄宗室昭槿撰

滿洲氏族以八大家爲最貴一日瓜爾佳氏直義公費英東之後一日鈕祜祿氏宏毅公額亦都之後一日舒穆祿氏武勳王揚古

利之後一曰納喇氏葉赫貝勒錦台什之後一曰棟鄂氏溫順公
何和哩之後一曰馬佳氏文襄公圖海之後一曰伊爾根覺羅氏
敏壯公安費揚古之後一曰輝發氏文清公阿蘭泰之後凡尙主
選婚以及 賞賜功臣奴僕皆以八族爲最云

右紀聞陳康祺撰

扈爾漢 子準塔

扈爾漢姓佟佳氏世居雅爾古寨後隸滿洲正白旗 太祖高皇帝戊子年從其父扈喇虎率所屬來歸 恩遇之賜姓覺羅尋授一等大臣居五大臣之列扈爾漢感 上撫育恩誓以戎行效死每出戰輒爲前鋒瓦爾喀部蜚悠城長策穆特黑者苦烏拉貝勒布占泰之虐請內附 上命扈爾漢隨貝勒舒爾哈齊往徙之扈爾漢以兵三百護五百戶先行烏拉聞之遣萬人邀諸路扈爾漢結寨山巔分百人衛降者身率二百人與烏拉軍相持不下翌日敵悉衆來戰同揚古利擊卻之丁未年從貝勒巴雅喇等征東海渥集部有功己酉年復率兵千人征渥集部所屬溲野路盡降其

部落收二千戶而還 太祖嘉之賞甲冑駟馬 賜號達爾漢
亥年同何和哩等征渥集部之虎爾哈路圍扎庫塔城三日攻克
之癸丑年從征烏拉乘勢奪門遂克其城天命元年同安費揚古
統兵二千征東海薩哈連部至兀爾簡河刳舟二百水陸並進收
河南北三十六寨黑龍江北十一寨又招降使犬諾洛石拉忻諸
部長四年明兵四道來侵扈爾漢從擊撫順開原二路大敗其眾
明總兵劉綎復由寬奠口進董鄂扈爾漢先奉 命率大兵千人
伏山隘以覘其衝眾貝勒繼至引左右兩翼兵夾攻綎倉卒不及
陣殲其兵五萬人綎戰死先是扈爾漢率兵往禦董鄂路遇明遊
擊喬一琦擊敗之一琦奔孤拉庫崖朝鮮營自縊死明年 上復

征明扈爾漢從又擊敗明總兵賀世賢等軍於瀋陽歷加世職至三等總兵官六年十月卒年四十八 太祖親臨哭之以其子準塔襲

右 國史館本傳

準塔

準塔滿洲正白旗人姓佟佳氏扈爾漢第四子也天聰八年授騎都尉世職任參領同參領鼉拜等率兵略明錦州復與前鋒都統勞薩等率將士百人往巡察哈爾國來歸者崇德二年隨武英郡王阿濟格征明皮島王以敵兵堅守不能克集諸將問進取之策準塔與鼉拜對曰吾二人先登誓必克之否則不復見王遂連舟

越眾渡海舉火爲號以待後師敵兵據堡列陣準塔與鼇拜冒矢
石奮勇衝擊遂取其島敘功超授三等男 賜巴圖魯號尋擢任
都統隨貝勒岳託征明至密雲攻牆子嶺八旗並進準塔先據嶺
以導諸軍遂毀邊城入敗明內監馮永盛及總兵侯世祿軍三屯
營守將以步騎三千截我輜重同都統武賴擊敗之連敗敵兵二
千於董家口遂往略地克取二城敘功晉爵二等男六年三月隨
睿親王多爾袞征明錦州以聽從遣兵回家離城遠駐論罪應革
職籍沒得 旨改罰鍰九月 命隨安平貝勒杜度等圍錦州有
功七年復同都統葉臣等率將士鎮錦州先是圍錦州時城內明
兵出犯鑲黃旗壕塹三旗護軍避敵壕內王貝勒等袒護不報準

塔坐徇情附和論罰一詔免之明年隨征明山東與都統葉克舒等遣將領攻孟家臺以調度失宜致傷士卒且誑稱率五人突入敵圍衝出敵陣論罪革巴圖魯號隨爲一等輕車都尉罰贖十二月復鎮錦州順治元年從睿親王入山海關擊流賊李自成與都統譚泰等追至正定大破之賊焚輜重蒼黃遁去於是燕京迤北居庸關內外各城及天津正定皆降敘功復授爵爲三等男二年正月率右翼兵隨饒餘郡王阿巴泰征山東平定郡縣趨江南時明福王朱由松遣兵渡河圍徐州浦縣李家樓準塔督兵馳擊敗之擒斬其將六人明兵赴河死者無算下徐州奉命屯兵鎮守五月自徐州進兵南下擊敗明副將高雅軍於宿遷師次清河總

兵劉澤清率步兵四萬船千餘據黃淮清三河口連營十里準塔
遣副都統康喀賴等率兵渡清河列營相拒以礮擊敗敵艦復遣
都司楚進功率步兵六百人拒黃河北岸鳴礮相應隨分兵兩路
一自清河上游進擊一攻對岸馬步敵兵俱敗之合軍追至淮安
界斬其副將二參將一有僞新昌王者潛遁海島雲臺山聚眾攻
陷興化準塔遣兵進剿破其巢穴擒斬之通州如皋泰興等城皆
下遂平定淮安鳳陽廬州望風納款敘功晉爵三等子仍賜巴
圖魯號三年奉命隨肅親王豪格剿流賊張獻忠於四川賊糾
眾迎戰準塔指揮八旗前鋒及兩黃正白三旗騎兵奮勇進擊俘
斬甚眾復同貝勒尼堪等分兵攻克遵義夔州茂州榮昌富順內

江資陽諸郡縣川寇悉平復隨肅親王勦陝西賊黨武大定等四
年凱旋卒五年論準塔前後功加世職爲一等子無子以弟阿拉
密襲十二年追謚曰襄毅 詔立碑墓道

右 國史館本傳

THE UNIVERSITY OF CHICAGO

111

額亦都

子圖爾格

伊爾登

額亦都姓鈕祜祿氏世居長白山後歸太祖高皇帝隸滿洲鑲黃旗幼時父母爲人所害額亦都以鄰人匿之得免年十三手刃其仇避走嘉木瑚地依於其姑居數歲太祖過其地額亦都識爲真主請事太祖白於姑姑止之不可遂從行歲癸未從太祖討尼堪外蘭於圖倫城先登攻色克濟城掩敵無備取之又別率兵攻舒勒克布占克其城額亦都驍果善戰挽弓十石能以少擊眾所向克捷太祖知其能日見信任丁亥年八月命督兵取巴爾達城至渾河河漲不能涉以繩聯軍士魚貫而渡夜薄其城率驍卒先登城中兵猝驚起拒跨堞而戰飛矢貫股著於堞揮

刀斷矢戰益力被五十餘創不退卒拔其城而還 太祖迎於郊
燕勞之其所俘獲悉以 賜遂 賜號巴圖魯薩克察之入寇也
額亦都率數人禦敵大敗之夜入其城進攻連克尼瑪蘭城及章
嘉城索爾瑚寨功最師還 上迎勞如初界藩有科什者以勇聞
盜九馬遁額亦都單騎追斬之盡返所盜馬家穆瑚之貝勒揮巴
顏謀叛附哈達 命討之誅其父子五人以還癸巳年九月葉赫
九國之師來侵 太祖陳兵古埒山命額亦都以百騎挑戰敵悉
眾來犯奮擊殪九人敵卻大兵繼之斬葉赫貝勒布齊九國之師
皆潰遂乘勝略諾賽寨及兆嘉村會我軍有齊法罕者戰歿額亦
都直入敵陣以其尸還訥殷路者九國之一也其長收穩色克什

既敗歸復聚七寨之眾據守佛多和山 命同理事大臣噶益等以兵千人圍其寨三月下之斬收穩色克什 上賜所乘馬以旌其勞丁未年五月同大臣費英東隨貝勒巴雅喇征東海渥集部有功庚戌年十一月 命招撫窩集部之那木都祿綏芬甯古塔尼瑪察四路降其長康果哩等十九人師旋乘勝擊取雅攬路俘萬人而還辛亥年十二月同額駙何和哩等征渥集部之呼爾哈路克扎庫塔城天命二年同內大臣安費揚古攻明馬哈單花豹衝岔兒堡並克之四年明經略楊鎬率六總兵統兵二十餘萬分四路來侵大貝勒代善出禦明總兵杜松王宣趙夢麟兵於撫順過扎喀關議駐師僻地以竅 太祖 太宗文皇帝時爲四貝勒

謂界藩山有築城夫役急往護之宜耀兵向敵以壯夫役士卒之
膽不當駐僻地示弱眾議未決額亦都曰貝勒之言是也遂進師
界藩會 太祖大兵亦至指揮夾擊大破明兵於吉林崖及薩爾
濟山明三總兵皆歿於陣還破明總兵馬林於尙閒崖劉綎於阿
布達哩岡額亦都皆在事有功連歲 太祖親征各部之不用命
者若哈達輝發烏拉葉赫以次削平額亦都在行閒輒爲軍前鋒
用兵垂四十餘年未嘗挫衄每克敵受 賜輒分給將士之有功
者不以自私 太祖特優遇之當天命建元之初國人有私訴於
額亦都者額亦都擅自聽斷 太祖以大臣不應聽受私訴恐一
人獨斷必至生亂因罪額亦都并著爲禁令然心知其忠誠 寵

顧不少衰初妻以宗女後尙和碩公主與費英東等同爲五大臣佐理國政累官至一等內大臣授爵一等子天命六年卒於官年六十太祖親哭之慟祭葬如禮太宗文皇帝天聰元年追封宏毅公配享太廟議功以其子遏必隆襲一等子世祖章皇帝復建碑墓道用表勳焉子十六人車爾格圖爾格伊爾登敖德超哈爾索渾遏必隆均有傳額森見大臣表

右 國史館本傳

圖爾格

圖爾格宏毅公額亦都第八子也自少隨征積功累爵至輕車都尉天命十一年太宗文皇帝卽位八旗八大臣下每旗又各設

二人備屯戍決獄訟號十六大臣以圖爾格任鑲白旗尋遷都統
又念其父勳晉爵子天聰三年十一月從 太宗伐明克遵化城
有功四年二月班師 命貝勒阿敏等守永平而以圖爾格同都
統納穆泰率兵守灤州五月明合兵攻灤州與納穆泰分汛固守
閒簡精銳出城殺敵敵轉攻納穆泰所守汛圖爾格急遣阿玉什
分兵往援會火及城樓有執燾者乘雲梯登阿玉什揮刀斬之奪
其燾敵卻時阿敏聞灤州被圍不急救及遣大臣巴都禮率兵數
百來援夜三鼓突圍入城而城已垂破未幾明兵發巨礮攻城城
壞城樓焚圖爾格度力不能支率眾潰圍奔阿敏軍阿敏大驚棄
承平遁諫之不聽殿後全師而還於是議棄永平罪以不能力諫

削世職解都統任五年五月我師攻明錦州令率護軍駐錦州松山閒夜截明兵之赴松山者斬首二十級敵敗從之我軍有星訥者墜馬敵還取星訥圖爾格從三十騎馳之翼之出是月聞明人將城大凌河 命同納穆泰往覘之俘其人畜以歸七月起爲吏部承政八月從 太宗攻大凌河分圍城東面之北城中兵突出犯我南礮臺圖爾格不及騎徒步擊走之十月略松山八年三月略錦州並有功是年五月 太宗伐明入大同 命同副都統勞薩率兵駐張古臺河以扼敵師九年二月 命率左翼兵從貝勒多爾袞等往招察哈爾降其長額哲六月還兵略明山西分兵三隊爲先鋒自平魯衛入毀甯武躡代州乘勝至忻口遇伏敗之追

至崞縣殲其眾還經平魯衛兵邀我師於途親陷陣殺敵百人敵遁走入城不敢出圖爾格策敵必復至設伏以待而身爲之殿明錦州總兵祖大壽合大同總兵王某率兵三千來追圖爾格返兵用步戰衝其中堅伏起來擊大敗之乃徐引兵出邊十年二月敘功授一等男崇德元年五月復任鑲白旗都統是年隨武英郡王阿濟格攻克明昌平雄縣並先登二年閏四月以罪黜初圖爾格尙和碩公主公主所生女爲貝勒尼堪福晉福晉無子詐取僕女爲女至是事敗圖爾格以坐罪論死得旨免削職二年八月仍令攝都統事三年十月隨多爾袞伐明破太監馮永盛總兵侯世祿兵復同都統拜音圖敗敵於董家口毀邊牆入奪青山關下四

城五年七月隨多爾袞圍錦州取其禾連破錦州松山兵又同都
統葉克舒率兵三百伏烏忻河口伺錦州牲畜出牧驅之歸敵眾
千餘來戰葉克舒馬中箭蹶敵人將兵之圖爾格射敵敵蹙救之
上馬併力衝殺敵敗復合凡六戰六勝身被二十餘創猶殿後力
戰悉保所俘而還十月晉爵子尋擢爲內大臣六年八月明經略
洪承疇率兵十三萬援錦州 太宗親征明旣敗承疇兵 命隨
阿濟格邀擊明敗兵於塔山時明總兵曹變蛟吳三桂王樸等各
引本部兵遁而變蛟兵夜衝鑲黃正黃兩旗汛地突犯 御營時
守營右翼大臣及侍衛等皆未至圖爾格發矢連殪二人率眾軍
併力攢射變蛟兵始敗去又隨豫親王多鐸設伏敗吳三桂王樸

兵於高橋七年十月同饒餘貝勒率師伐明直抵山東兗州府甯
明魯王朱以派及樂陵陽信東原安邱滋陽諸王並各王府宗室
官屬幾千人下三府十八州六十七縣八年六月班師 賜銀千
五百兩十月晉爵二等公順治二年二月卒年五十以子科布梭
襲九年六月追諡忠義配享 太廟立碑墓道雍正九年 賜公
爵號果毅

右 國史館本傳

伊爾登

伊爾登滿洲鑲白旗人姓鈕祜祿氏額亦都第十子也幼 太祖
高皇帝撫之宮中及長任侍衛屢從大軍征討天命初築界藩及

薩爾汗諸城有勞績 賜蟒服八年授世職三等輕車都尉累功
晉三等男 太宗文皇帝嗣統列十六大臣佐理鑲白旗事尋奉
命駐防邊界天聰三年九月率兵剿獐子島獲船四沈之俘其人
眾以歸十月從 上征明隨貝勒阿巴泰阿濟格攻克龍井關墮
其水門入斬明將易愛王遵臣盡殲其眾復攻遵化敗明山海關
援兵斬其將趙率教十一月隨大軍征明薄燕京克永平灤州遷
安等城師旋晉爵一等男會其兄都統圖爾格鎮灤州以失守罷
任 命伊爾登代爲都統五年八月攻大凌河城伊爾登與各旗
都統分受方略卽率本旗護軍圍其東面之南深溝堅壘環城守
之卒破敵兵明年 上親征察哈爾 命與貝勒阿巴泰等畱守

瀋陽軍次都勒河聞林丹汗遠遁遂略歸化城而還七年六月
上以征明及朝鮮察哈爾三者何先 諭諸貝勒大臣各抒所見
時 上畱八旗諸軍興屯明山海關外地於是諸貝勒大臣奏曰
明吾讐也用兵宜先今畱重兵關外不若徑入內地視其城有可
取則取之多率步兵備梯牌以爲攻具乘機摧陷何城不克況蓄
銳已久人有戰心及是時而用之所謂事半而功倍也明日 上
命伊爾登率左翼隨貝勒岳託等取明旅順口俘獲人戶牲畜器
用財賄無算旋與都統葉臣率兵二千五百駐守之八年 上征
明分兵入上方堡伊爾登復奉 詔與貝勒阿巴泰正白旗都統
阿山率兵由巴顏珠爾格入關門會大臣於宣府敗明步騎兵獲

馬百餘進攻靈邱縣及保安州皆有功是年冬前鋒統領巴奇蘭等出征黑龍江虎爾哈部伊爾登與都統納穆泰達爾漢葉克舒葉臣阿山色勒篇古八大臣簡士卒閱器械集諸將宣讀 敕諭而送之先是眾大臣奏諸王旗纛事畢將退伊爾登曰公等不勤國事乃急爾私事遽拂衣行乎既而眾大臣集於禁門外伊爾登又曰日者諸王謂八旗都統爲不及古大臣於時伊爾登兄圖爾格爲吏部承政矣會諸王令圖爾格與護軍統領揚古利入奏事眾都統以圖爾格爲曾獲罪也而非議之伊爾登不悅篇古曰爾以爾兄爲無罪耶伊爾登曰汝輩殊可厭皆幸禍之流耳於是眾都統悉以其言訐之法司崇德元年伊爾登下法司勘訊坐讒謗

諸王及大臣論罪削一等男爵解都統任仍罰鍰尋隨豫親王多鐸征朝鮮既還復隨武英郡王阿濟格攻皮島以不俟旗纛輒先渡江坐罰鍰三年復任護軍統領四年春武英郡王阿濟格征明攻燕京伊爾登率兵略地以三十人敗敵千人獲其馬 上親統大軍征明攻松山杏山城我前鋒軍偵知明總兵祖大壽內監高起潛以兵二千迎戰我軍既沒伏伊爾登率兵四十人誘敵追襲伏發還擊大敗敵眾六月 命爲參政大臣尋兼內大臣六年六月隨鄭親王濟爾哈朗圍錦州明總督洪承疇以師赴援立營松山西北鄭親王令右翼兵擊之失利乃據乳峯山以保兩紅旗與兩藍旗駐營地爲敵所奪都統葉臣等斂兵不進獨四旗護軍恭

順王孔有德與蒙古敖漢柰曼察哈爾兵及伊爾登所領侍衛與
戰伊爾登先右翼軍突入敵陣陷重圍身中數創所乘馬死易馬
負傷再戰益奮凡三易馬四戰皆捷 太宗嘉歎復三等男世爵
襲八次 賜白金四百兩八月 上陳師松山杏山間 命偕超
品公塔瞻率八旗護軍參領先赴高橋設伏方出營遇明步卒之
自杏山潰遁者千人擊斬之遂至高橋復遇杏山步騎兵六百餘
南奔塔山伏發盡殲其眾 上移營近松山夜有松山敗軍突犯
御營伊爾登與內大臣宗室錫翰整兵拒戰奮勇擊殺敵兵旋敗
遁 命侍衛大臣之疏防與不能力戰卻敵者各輸罰鍰以資軍
士伊爾登得 優賞順治元年 世祖章皇帝定鼎燕京論功進

一等男三遇 恩詔累進二等伯世襲十三年以年老致仕 上念伊爾登爲宣力老臣 命上駟院給乘騎入朝每至必 召見賜食又圖其像二一藏內庫一予其家康熙二年疾卒 賜祭葬如典禮諡曰忠直孫噶都襲爵官至鑲黃旗蒙古副都統領侍衛內大臣

右 國史館本傳

國家之有重臣猶九廟之有宗器巨室之有棟梁也其用之也非一日之報則其蓄之也亦非一日之積宋蘇文忠銘張文定之墓謂仁宗在位四十餘年蒐攬天下豪傑旣自以爲股肱心膂而又畱爲三世子孫百年之用余嘗讀其文以爲知言伏覩 祖宗朝

英傑景附際會風雲長養培護傳之果葉更有度越前代萬萬者
如二等伯宜公其尤著者也公諱爾登滿洲人父至勇公額亦都
巴圖魯以開國勳配食 太廟公生而明敏才識絕人自幼嫻習
武略天命中筮仕爲裨將 太宗文皇帝素廉知公才益見任用
授三等阿思哈哈番會他事註誤落職崇德中大師再略明都公
在行間與敵軍遇敵軍逆戰者千餘人公率勁卒三十人擊之敵
敗走盡獲其馬匹有謀者言明總兵祖大壽偕太監高某分兵二
千潛襲我軍時我軍用步卒設伏以待敵逡巡不前公乃將四十
騎紆道誘敵且戰且卻敵兵遂遇伏公與伏兵合力奮擊大敗之
錦州之役公率多爾機蝦等將右翼時敵眾我寡諸將相顧愕眙

莫敢進擊公觸刃先登與敵共戰四合皆敗之公勇力冠諸軍而其潛機制敵應變如神尤爲諸老臣宿將所難故所至皆獲勝崇德六年以功授原職 世祖章皇帝既定燕京推恩勳舊晉一等阿思哈哈番郊祀禮成 覃恩在廷諸臣以公父至勇公有世勳特晉公三等精奇尼哈番嗣兩遇尊號禮成復由三等伯晉封二等伯世襲不替 今上御極之二年六月以疾卒於位朝廷聞之震悼遣官諭祭 恩賚有加易名忠直年六十有八夫史稱召公畢公爲周室元老歷事文武成康四世而其壽考皆逾百齡以我公方之則始襄締造之功繼贊太平之業歸然四世之老矣而躬親矢石久歷戎行武功之盛較畢召二公猶且過之獨是康強白

首雖不爲天年而論者猶以未登期頤爲公未盡之憾嗚呼以至
勇爲父以忠直爲子其爲不朽豈復可以年齒論哉公生子一人
早卒孫噶篤襲封二等伯爲內大臣護軍統領噶公將樹石於公
墓道而乞文於余余不能悉公行事特援據舊聞述其梗槩聊以
誌我 國家人才之盛云爾銘曰

天胡景運英傑駿奔奕葉光裕厥有世臣赫赫忠直偉略絕人克
紹至勇益大厥聲龍韜虎略拏風躍雲斬關薙寇佐命作京遺孽
未熄提戈四征應手斷肱前無堅城丹書鐵券上賞是膺白首耆
艾允矣國楨人雖云亡令名永存勒茲片石百世有徵

右墓碑張玉書撰

按伊爾登公名
一作宜爾登

安費揚古

孫都爾德

遜塔

曾孫馬錫素

安費揚古姓覺爾察氏世居瑚濟寨後隸滿洲鑲藍旗父完布祿事太祖高皇帝有章甲尼麻喇人誘之叛不從又劫其孫以要之終無貳志安費揚古自少從太祖征伐癸未年八月太祖以薩爾濟城長諾木納陰附尼堪外蘭執而誅之命安費揚古帥兵取其城兆佳城長李岱導哈達兵劫瑚濟寨既去安費揚古方獵聞之帥十三人疾追斬四十人盡獲所掠以歸甲申年正月從征兆佳城獲李岱其黨李古里扎泰走附汪泰奉命往招並汪泰降之六月從征馬爾墩寨寨居山巔進攻三日矢石交下不能克安費揚古夜帥兵從間路攀崖而上拔其寨丁亥年六月

太祖征哲陳部八月征洞城明年九月征王甲皆從征有功尋攻克章甲尼麻喇赫徹穆等城又取香潭寨其長李墩拜湖遁追及於碩郭之陽擒以獻癸巳年六月從征哈達克其富爾佳齊寨師還太祖親殿敵潛躡焉有數騎突前勢甚急安費揚古迎擊皆斬之九月隨大軍擊敗葉赫等九國兵閏十一月同額亦都等討訥殷部克佛多和山寨斬其長收穩塞克什己亥年九月從太祖滅哈達辛亥年七月奉命征東海渥集部與台吉阿巴泰等取烏爾古宸木倫二路癸丑年正月太祖征烏拉安費揚古帥師薄城執大纛先登天命元年同扈爾漢征薩哈連部至兀爾簡河取河南北諸寨八月師次黑龍江江水常以九月始冰是時中

流忽結冰皆浮梁約廣六十步安費揚古曰此天佑我 國也策
騎先涉眾從之遂取江北十一寨復招服使犬諾洛石拉忻諸部
三年四月大軍下撫順明總兵張承蔭等赴援分營爲三安費揚
古擊其左營大破之遂乘勝取三岔兒諸堡四年破明經略楊鎬
兵滅葉赫六年取瀋陽遼陽安費揚古皆在事有功 太祖嘗嘉
其鷲勇 賜號碩翁科羅巴圖魯 命爲一等大臣佐理國事居
五大臣之列七年七月卒年六十有四順治時追諡敏壯子八人
第六子曰達爾岱天聰五年任鑲藍旗參領從征大凌河守臧家
堡崇德時從征朝鮮攻明錦州甯遠皆有功順治二年授雲騎尉
世職七年以追敘安費揚古功晉一等輕車都尉世襲罔替康熙

五十二年 聖祖仁皇帝念安費揚古為開國勳臣復 賜三等輕車都尉世職令其裔孫明岱分襲焉

右 國史館本傳

都爾德

都爾德滿洲鑲藍旗人姓覺爾察氏安費揚古之孫也父阿爾岱任佐領天命十年率師駐防耀州禦敵有功授騎都尉世職天聰五年從征大凌河歿於陣 卹贈三等輕車都尉都爾德於天聰八年襲職順治元年正月任刑部理事官四月隨睿親王多爾袞進山海關擊敗流賊李自成十月豫親王多鐸統師征陝西都爾德署護軍統領以從十二月至陝州流賊踞山巔都爾德率眾先

攻拔其營還軍殿後賊追襲擊卻之明日設伏潼關賊至擊敗之
斬獲無算二年正月賊將劉方亮合千餘眾偪我營同護軍統領
圖賴等率兵迎擊賊眾潰走尋隨大軍由河南下江南破明兵於
揚州城北獲戰艦百餘既克江甯明福王朱由崧奔蕪湖復率兵
邀截之江口俘斬大捷三年十一月隨端重親王博洛平浙江進
師福建與前鋒參領拜音岱攻建甯延平二府下之明唐王朱聿
鍵遁走汀州同護軍統領阿濟格尼堪率兵進攻擒斬聿鍵及其
官屬遂定汀州五年九月鄭親王濟爾哈朗統師討湖廣流賊李
錦等都爾德從征所至有功六年十二月流賊王強犯沅州同尙
書阿哈尼堪率兵破之斬僞副將三人殲其眾獲馬數千七年凱

旋投護軍統領八年 命為議政大臣先是兩敘軍功晉世職為一等輕車都尉至是遇 恩詔加一雲騎尉九年再遇 恩詔晉一等男康熙三年七月卒 子祭葬如典禮諡忠襄子席布襲爵

右 國史館本傳

遜塔

遜塔滿洲鑲藍旗人姓覺爾察氏安費揚古之孫也父碩爾輝太祖高皇帝時分編安費揚古所屬人戶授為佐領尋卒遜塔承管之天聰八年 太宗文皇帝嘉其克副任使予騎都尉世職崇德三年投戶部副理事官是年冬 上遣師征明貝勒岳託帥右

翼由牆子嶺毀邊牆入遜塔署參領隨前鋒統領席特庫等擊敗
明總督吳阿衡兵遂越燕京略山東明年春師還將出邊敵躡我
後遜塔隨護軍統領圖賴等奮戰卻之敵侵我喀喇沁營遜塔移
兵赴援敵潰走六年大軍圍錦州明總督洪承疇集兵赴援列營
松山遜塔同參領藍拜率兵進擊連破三營敵乘陰雨犯我右翼
營復同藍拜步戰卻敵八年十月授參領 世祖章皇帝順治元
年四月隨睿親王多爾袞入山海關擊敗流賊李自成二年敘功
授三等輕車都尉世職三年隨肅親王豪格征流賊張獻忠過漢
中同都統巴哈納等擊敗叛鎮賀珍兵進師西充獻忠糾賊抗拒
遜塔同都統李國翰等連挫賊眾五年凱旋兼任刑部理事官尋

奉 命駐防淮安六年二月莒州賊曹良臣糾黨數百掠海州城
知州張懋勳州同李士麟擊賊遇害遜塔同參領烏達琪兵備道
卞三元漕標遊擊王欽中等赴援賊遁歸馬鬣山乃進兵圍之絕
其去路直擣賊巢執良臣及其黨盡殲之旋師復勦滅羽山牟山
餘賊先是揚州設浙淮鹽務理事官兼僉事銜尋改兼戶部右侍
郎銜是年十月 詔以遜塔任之駐揚州七年改督理漕運戶部
侍郎移駐淮安八年裁遜塔還京授鑲藍旗滿洲副都統三遇
恩詔晉三等男十三年擢工部尙書考滿廕一子入監十五年三
月監修壇殿工成晉二等男八月以建造乾清宮怠玩議降職得
旨寬免九月兼鑲藍旗蒙古都統十七年二月以應 詔自陳罷

尙書專任都統是年明桂王朱由榔竄緬甸其將李定國白文選等分踞孟艮木邦謀入犯永昌普洱沅江上命定西將軍愛星阿偕遜塔及護軍統領費雅思哈等率禁旅赴雲南合鎮守兵進勦明年十一月會師木邦文選定國皆遁大兵趨緬甸緬人執由榔來獻文選降乃班師康熙三年敘功並錄前此隨征張獻忠及勦滅曹良臣戰績晉爵一等男兼一雲騎尉世襲罔替四年五月遷本旗滿洲都統十二月卒子祭葬如典禮諡忠襄子馬錫泰襲爵馬錫泰初任佐領尋兼前鋒參領康熙十四年隨信郡王鄂扎征察哈爾布爾尼師次達祿布爾尼踞山岡列火器抗拒馬錫泰率本旗前鋒薄險當其衝四戰皆捷敘功晉三等子十六年從

國朝書廟表續編 卷二百二十一
三
大軍討逆藩吳三桂率兵赴吉安十七年授鑲藍旗蒙古副都統
尋遷本旗滿洲副都統隨征南將軍穆占等鎮守茶陵攸縣諸處
十九年隨征南將軍莽依圖征廣西至賓州陶屯擊敗僞將軍范
齊翰詹養等二十年隨征南大將軍賴塔自廣西征雲南破賊將
何繼祖王有功等於石門坎黃草壩進圍雲南城斬賊無算復同
都統希福率兵勦賊楚雄賊將馬寶巴養元等窮蹙降雲南平凱
旋晉一等子三十年四月以老病致仕尋卒子伍爾希襲爵

右 國史館本傳

國朝耆儒類徵初編卷二百六十二目錄

將帥二

何和哩

子多精
孫和爾本

和碩圖

都類

西喇布

子噶祿

馬喇希

武理堪

子吳拜

蘇拜

雅希禪

博爾晉

子特錦

達珠瑚

康果禮

弟喀克都哩
子黃塔

佟養性

孫國瑞

楊額禮

洪尼雅喀

子武拉禪

鄂本兒

武納格

子德穆圖

齊墨克圖

國朝通志卷之二十一

一

國朝耆獻類徵初編卷二百六十二

通奉大夫前署江西巡撫江西布政使司布政使湘陰李桓輯

將帥二

何和哩

子多積禮

和碩圖

都類

孫和爾本

何和哩姓棟鄂氏其先自瓦爾喀遷於棟鄂因以地爲姓祖曰克
徹巴顏父曰額勒吉世長其部落何和哩代其兄屯珠魯巴顏爲
部長戊子年聞太祖高皇帝納妃哈達身率甲士三十人護從
以行比還遂以所部軍民來歸隸滿洲正紅旗太祖以長女妻
之初設滿洲八旗隸正紅旗爲總管一旗大臣戊申年從征烏拉
率本旗兵破敵有功辛亥年奉命同額亦都等督兵二千征渥

集部之呼爾哈路攻扎庫塔城圍三日招之不下攻拔之俘斬甚眾遂降其環近諸路取五百戶以歸癸丑年從 太祖再征烏拉時布占泰與葉赫期送其子爲質將行我師先一日至進克郭多鄂謨二城卽駐其地翌日布占泰率兵三萬越富勒哈城而軍太祖欲戒諭之冀其悔罪求和何和哩與諸貝勒大臣並以布占泰反覆難信奮然曰我軍士飽馬騰利在速戰所慮者布占泰不出耳今敵軍旣出平原廣野可一鼓擒也鼓勇進擊克其城遂滅烏拉天命四年明經略楊鎬率六總兵分四路來侵 太祖親統師禦之明兵皆潰六年下瀋陽遼陽前後降七十餘城何和哩並身在行間歷有勞績以與費英東等綜理軍國庶務稱爲五大臣

敘功授三等子世襲九年八月卒年六十有四 太祖聞之震悼
曰天何遽奪朕股肱耶 太宗文皇帝時晉世爵爲三等公 世
祖章皇帝順治十二年追諡溫順勒石紀功 世宗憲皇帝雍正
九年加封號曰勇勤子六人多積禮和碩圖都類別有傳

右 國史館本傳

高祖初起兵時滿洲軍士尙寡時董鄂溫順公諱何和哩者爲瑛
春部長兵馬精壯雄長一方 上欲藉其軍力乃延之至興京款
以賓禮而以公主妻之公乃率眾歸降得兵馬五萬餘我 國賴
以締造薩爾滸之役卒以敗明師者皆公兵馬之力也其前妻聞
其尙主怒埽境而出欲與之戰 高皇面諭之然後罷兵降故今

襲世爵者皆係公主所出其前夫人所生者不許列名國語呼爲厄赫媽媽蓋譏其鮮德讓之風也

國初沿明舊制惟修列聖實錄附載諸勳臣於內祇履歷官階而已康熙中仁皇帝欽定功臣傳一百六十餘人名曰三朝功臣傳藏於內府雍正中修八旗通志諸王公大臣傳始備然惟載豐沛世家其中州士族勳業茂著者仍闕如也其所取材皆憑家乘秉筆詞臣又復視其好惡任意褒貶如開國名臣何溫順公和哩費直義公英東等諸傳其文寥寥數則而如蔡綏遠毓榮蘇侍郎拜幾至萬言皆剽竊碑版中語也純皇帝夙知其弊於乾隆庚辰特命開國史館於東華門內重簡儒臣之通掌故老修之

將傳傳盡行刪雜惟遵照 實錄檔冊諸籍所載詳錄其人生平
功罪榮而不斷以待千古公論真修史之良法也後又重修王公
功績表傳恩封王公表蒙古回部王公表傳等書一遵是例焉嘉
慶庚申 上復命補修 列聖本紀及天文地理諸志乘儒林列
女等傳附之一代之史畢具矣其續錄者以十年爲則陸續修之
以爲萬禩之計也

右錄宗室昭棟撰

多積禮 弟都類

多積禮滿洲正紅旗人姓棟鄂氏額駙何和哩次子也初任佐領
事 太宗文皇帝於藩邸從征烏喇有功天聰三年 上親征明

至燕京多積禮以參領從攻奪土城關五年從征明圍大凌河城
屢敗敵兵敘功授三等輕車都尉世職崇德元年率師征瓦爾喀
部俘丁壯三百餘婦女老幼數百獲牲畜豹皮等物凱旋 命禮
官迎宴尋擢本旗副都統四年七月奉 命同鎮國公扎喀納等
統兵駐守藩城屏城閒會內大臣多爾濟屬下數人竊馬由戍所
遁去多積禮追之弗及論罪革世職籍沒家產 命畱弓矢甲冑
及三馬與之仍管副都統事五年正月率兵防禦錦州敵人稽察
叛逃二月 命同參領喀珠赴甯古塔集兵三百餘征烏扎喇部
俘百餘戶獲馬牛及貂貉虎狐等皮無算六月師還 遣官勞之
卽以所俘獲分 賜將士六年大軍圍明錦州明總督洪承疇集

諸鎮兵十三萬赴援據乳峯山松山列營 上統師親征屢敗明兵 上度明兵必夜遁分布諸將截其歸路多積禮受 方略率騎兵循海濱追擊殲敵甚眾七年十月以年老罷管副都統事順治五年卒多積禮之第五弟曰都類初任佐領天聰時擢正紅旗都統以其爲固倫公主所出 命加兩佐領人戶崇德元年冬同都統譚泰等圍朝鮮國都樹雲梯登城城上兵不敢拒悉奔竄明年凱旋部議在軍中時失察所屬違法亂行諸罪罰鍰奪所俘獲三年隨貝勒岳託征明踰牆子嶺至密雲敵以步騎三千逆戰都類與譚泰指揮所屬兩旗兵夾攻敗之獲馬百駝二十遂乘勝略地至山東濟南府乃班師四年六月征明錦州還有護軍囊球安

朱訐同行之阿蘭泰臨陣退縮都類不受首詞且召阿蘭泰告之坐狗庇又以奉 命兼管外藩蒙古納其所饋獻承 旨詢問不以實對及新附丁壯逃遁先後論罪罰鍰削一佐領人戶罷都統任尋 命復任都統並 諭諸貝勒曰都類雖有罪念公主在仍令兼轄兩佐領人戶是年九月屬下護軍碩詹首告都類證明山東時徇隱家人盜馬等事索取降城中財賄且於濟南府私發明德藩埋藏珍玩攜歸下法司鞫實論死籍財賄珍玩入官 命免死納贖革職任所轄人戶歸隸禮親王代善應入官之物以其半與碩詹八年再起爲都統妻以郡主封和碩額駙同輔國公篇古等率兵鎮守錦州 世祖章皇帝定鼎燕京敘入關破流賊功授

騎都尉世職 命隨肅親王豪格征張獻忠道經西安分兵勦滅
慶陽土賊會兵西充獻忠既殪復與都統準塔等分勦川北郡邑
餘賊斬獲無算論功復屢遇 恩詔晉爵至二等伯順治十三年
卒以其孫新達里襲

右 國史館本傳

和碩圖 子和爾本

和碩圖滿洲正紅旗人姓棟鄂氏何和哩第四子也初襲三等子
爵 太祖高皇帝愛其才以大貝勒代善女妻焉封和碩額駙

太宗文皇帝卽位之初授爲正紅旗都統天聰元年四月從大軍
征朝鮮五月又從征明攻錦州甯遠二城著有勞績二年五月隨

貝勒阿巴泰率師破錦州杏山松山諸路九月從征察哈爾克其
四路軍以功加五佐領進爵三等公三年十月隨貝勒岳託征明
攻大安口敗其駐防兵於馬蘭峪再敗其援兵於石門寨復從大
軍攻遵化城受上方略率本旗兵攻其城西面之北克之十二
月師薄燕京結營土城關明兵來犯擊卻之復奮勇先驅敗敵於
盧溝橋同副都統阿山等陣斬明總兵滿桂孫祖壽生擒黑雲龍
麻登雲以獻旋師攻克永平四年正月率騎兵駐守灤州五年三
月上以御書三函分諭諸貝勒大臣等勉以殫心盡職時和碩
圖已列入大臣遂陳疏自誓曰伏蒙上諭諄切臣雖駑鈍敢不
自懷兢業以副報稱若知而不言畏罪緘默不勤理諸務以圖便

安惟天鑒之八月我軍分圍大凌河城數重和碩圖以本旗軍營西面之北明兵突圍出偕都統葉臣等夾擊之追奔及城濠而還七年六月 上詢征明及朝鮮察哈爾三者何先和碩圖疏言宜先固城堡然後相度明之邊界乘瑕而入若 天意佑我各城納款雖欲速歸勢必不能故必固城堡而後可無虞也其南面六城可暫停修築仍立界屯耕恐我兵去後各處敵人窺伺鞭長不及難於救援也惟將瀋陽牛莊耀州三城修理庶邊界內外皆可長驅矣逾月病卒年三十八 上親臨哭之順治十二年追諡端恪立碑紀功雍正九年 賜勇勤封號子和爾本襲三等公爵尙主以祖父勳 賜免死二次崇德三年任護軍統領隨貝勒岳託征

明徇山東山西敗敵十餘陣所攻城堡輒下四年二月以病卒於
軍年二十喪還 命部臣奠酒會部議護軍囊珠等許告同征之
阿蘭泰臨陣退縮事以前此和爾本從參領魯克都等之言袒庇
徇隱應削公爵不准承襲並奪所屬人戶奉 旨和爾本已故免
究以其弟哲爾本襲爵

右 國史館本傳

西喇布

子噶祿

馬喇希

西喇布世居完顏以地爲氏 太祖高皇帝時率所部來歸常翼
衛 太祖列理事十大臣癸巳年富爾佳濟之役哈達西忒庫以
兩矢射叔貝勒西喇布並奮身當之中創而沒 卹贈二等輕車
都尉後定八旗佐領俾其子噶祿馬喇希隸滿洲鑲紅旗噶祿襲
世職從征沙嶺有功加二等輕車都尉卒無嗣天聰九年 太宗
文皇帝命免功臣徭役馬喇希以父功授佐領並襲其兄二等輕
車都尉崇德二年隨都統葉克舒等征卦勒察有功明年七月任
刑部理事官八月擢蒙古副都統又明年授都統尋隨睿親王多
爾袞等圍錦州坐阿徇王貝勒等私遣官兵歸家離城遠駐論罪

明史紀事本末卷之三十三
罰贖復隨貝勒阿爾泰等征明奪黃崖口入長城所至克捷七年
部臣奏大軍擊明總督洪承疇時馬喇希承勘護軍統領噶布喇
敗走罪狀任其狡辨不能確審應請議罪 上命免之順治元年
四月隨睿親王多爾袞自山海關破流賊李自成復追擊至望都
十二月與都統阿山征陝西自蒲州渡河擊斬賊眾敘功加一等
輕車都尉兼雲騎尉尋奉 命移師往會豫親王多鐸南征二年
五月自歸德渡河率眾奪泗北淮河橋明守泗總兵焚橋遁走大
軍遂夜渡馬喇希與都統宗室拜音圖以紅衣礮攻克武岡寨引
兵而東擊敗明守將黃蜚等步兵數萬於常州下宜興進攻崑山
途遇明水軍戰艦擊破之值都統恩格圖等列礮攻崑山縣城馬

喇希率所部兵超頽堞先登遂拔崑山克常熟師旋晉三等男四年八月隨定遠大將軍肅親王豪格西征軍至漢中叛將賀珍遁走西鄉縣馬喇希與都統鼇拜分兵馳擊躡及於楚湖斬獲甚眾敘功加二等男五年以失勘冒功妄爭之參領希爾根罪論罰贖得旨寬免會睿親王出獵馬喇希坐與都統噶達渾等私行射獵鐫秩一等八年世祖章皇帝親政馬喇希訟削秩冤詔復職贈其父西喇布兼一騎都尉兩遇恩詔晉三等子九年九月奉敕偕定南將軍護軍統領阿爾津平定廣東十月調鎮漢中十二月復調征湖廣辰常諸賊十一年以病卒賜祭葬越明年上復追念西喇布之效命於太祖也賜諡順壯視一品大臣

國朝通志卷之二十一

例立碑墓道 賜馬喇希諡忠僖子瑪爾漢襲爵

右 國史館本傳 按公卒於癸巳係在太祖天命前二十三年我朝龍興五大臣勳績最著前

已編列將帥卷首付刊
故將公傳謹次於此

武理堪 子吳拜 蘇拜

武理堪姓瓜爾佳氏世居義屯父伊蘭柱徙居哈達之費德哩太祖高皇帝未滅哈達時武理堪來歸歲癸巳葉赫貝勒布寨糾哈達烏喇輝發科爾沁席北卦爾察朱舍里訥殷諸路兵來侵武理堪奉命偵敵出東道百餘里將陟嶺羣鴉譟集馬前若阻其行武理堪心異之自度與敵左馳歸以告復奉命出扎喀路薄暮至渾河敵營河北方會食武理堪擒葉赫一卒訊之言敵眾三萬將乘夜渡沙濟嶺而進遂攜以還報時夜方半傳諭諸將俟達旦出師我兵有謂敵兵眾者武理堪宣言曰敵雖眾心不一誰能禦我及戰諸路敵兵果潰布寨爲我兵吳談所殺天命四年明

分兵四路來侵 太祖親統師擊之敗其三路兵明經略楊錦檄
總兵李如柏引兵還瀋陽武理堪率二十騎至呼蘭山見敵軍行
山麓乃於山巔駐馬大呼弓手四顧爲指麾伏兵狀敵望見驚潰
武理堪遂縱騎疾馳擊之斬四十人獲馬五十敵相蹂躪死者千
餘初定滿洲旗制武理堪隸正白旗分轄人戶爲佐領每有征伐
任前鋒統領旣卒 太祖追念曰武理堪從朕摧鋒陷陣幾死者
數矣以其長子吳拜襲管佐領事吳拜年十六卽隨大軍略明撫
順所遇敵輒奮戰矢中頰不顧嘗從 太祖出獵有熊突圍上峻
嶺 太祖遠見一人躍馬射熊貫胸而墮 諭侍臣雅蘇曰是非
吳拜不能 遣視之果然復 諭諸皇子曰吳拜之勇今共見之

矣遂授侍衛天命四年從征葉赫負重創力戰不退師還 賜良馬是時明總兵毛文龍誘我新附之眾往歸皮島吳拜循徼三日擒八十餘人其來誘者乘騎遁追及射殪之還奏卽以所獲 賜之管轄六年從征明破敵於南壽山授騎都尉世職遼城既下諸將分隸所俘有差 太祖以吳拜能繼父志年少建功 命視一等大臣例隸千人十一年蒙古巴林部貝勒囊努免背盟劫掠吳拜隨大軍征之我謀者爲敵困援之出殲敵百人 太宗文皇帝初卽位擢列十六大臣佐理鑲白旗事 命追捕叛逃蒙古至都爾弼有十五人拒戰吳拜旣被創仍奮擊盡殲之 太宗諭諸大臣曰是固 先帝數嘉許者 特予優賚天聰四年大軍取明永

平灤州吳拜隨貝勒阿敏守永平聞明兵圍灤州率護軍馳援乘夜破明步兵營會阿敏棄永平吳拜隨歸逮繫論罪以其會夜入敵營破敵 命釋其縛尋授前鋒參領五年從征明圍大凌河城同參領蘇達喇赴錦州偵敵有斬獲六年從征察哈爾率精銳先驅遇叛逃蒙古五人斬首以獻察哈爾林丹汗攜其丁壯牲畜渡黃河西奔土默特部大軍還克歸化城吳拜奉 命撫輯降戶八年征明大同額駙多爾濟將中軍前鋒統領圖魯什將左軍吳拜將右軍明總兵曹文詔迎戰敗之復同參領席特庫薩海設伏宣府擒明守備殲其游騎尋與承政阿什達爾漢等招察哈爾汗之子額哲及其大臣來歸九年五月明屯兵大凌河西吳拜與都統

阿山石廷柱圖賴邀截其歸路陣斬副將劉應選殲步騎五百餘擒遊擊曹得功及守備三人攻克松山城南臺堡師還復設伏敗敵兵敘功晉三等輕車都尉世職是時上遣諸貝勒征明朝州代州忻州命吳拜率兵駐上都城舊陞偵軍事會軍中遣使奏捷遂與俱歸崇德元年同前鋒統領勞薩等齎書至喜峰山潘家口諭明守邊將吏斬其邏卒二十三人擒二人獲馬十是年冬上親征朝鮮命同承政馬福塔等率兵三百先行襲其國都尋敗拒戰兵國王李侖潛遁南漢山城大軍進圍之吳拜與勞薩殲敵援兵二百餘二年授前鋒統領列議政大臣時參領丹岱阿爾津等往土默特貿易將還遣吳拜率將校赴歸化城護之遇明

哨卒十六人斬十五人獲馬十九擒一人以還三年四月略明甯遠逐敵墮壕塹斬殪甚眾八月率兵八十人至紅山口遇明兵斬其裨將二擊走羅文峪騎兵五百奪其纛獲馬四十又殲密雲步兵百餘五年與勞薩率兵過中後所略海濱斬級二百獲馬騾牲畜旋受上方略策應圍錦州大軍駐要隘屢擊敗敵兵明年春以大軍攻圍錦州弗力論統師王貝勒及諸將罪吳拜坐罰鍰秋上親征松山明兵敗遁吳拜未截擊命拘繫旋釋之七年隨貝勒阿巴泰入明邊敗敵於豐潤三河靜海及通州八年隨鄭親王濟爾哈朗取明中後所前屯衛是年十一月改任正白旗副都統世祖章皇帝順治元年隨睿親王多爾袞入山海關擊敗流賊李

自成追至望都逾年解副都統任列內大臣三年蘇尼特部長騰
機思叛吳拜隨豫親王多鐸征之斬獲無算四年同輔國公鞏阿
岱內大臣何洛會率兵駐防宣府先是兩敘軍功晉一等輕車都
尉至是論征騰機思功晉爵一等子屢遇 恩詔晉二等伯八年
同內大臣羅什博爾輝等舉發英親王阿濟格謀干政事 優敘
三等侯未幾羅什博爾輝以諂媚諸王造言構釁伏誅吳拜坐附
和削職籍沒十五年 世祖念吳拜戰陣功 命復一等子爵世
襲罔替康熙四年四月卒年七十 賜祭葬如例諡曰果壯子嗣
坦襲爵別有傳

右 國史館本傳

按武理堪公名
一作武哩堪

蘇拜

蘇拜滿洲正白旗人姓瓜爾佳氏前鋒統領武哩堪之次子也蘇拜年十五從太祖高皇帝征蒙古有功授侍衛兼管佐領事

太宗文皇帝天聰九年隨大軍征察哈爾收降林丹汗子額哲遂入明邊境攻代州明兵三百自崞縣赴援蘇拜爭先迎戰敵潰遁崇德元年從征朝鮮破敵桃山村三年任護軍參領隨貝勒岳託證明自牆子嶺入邊越燕京擊敗明太監馮永盛軍五年大軍圍明錦州蘇拜屢擊卻松山杏山敵兵又同都統圖爾格等設伏烏忻河口多所俘獲敵兵千餘襲追戰卻之獲輜重以歸六年復圍錦州敗松山騎兵又敗明總督洪承疇三營步兵敘功子世職

騎都尉加一雲騎尉七年隨貝勒阿巴泰征明至山東屢敗敵馬
步兵攻克樂安昌邑二縣八年凱旋晉世職三等輕車都尉
世祖章皇帝順治元年隨睿親王多爾袞入山海關擊敗流賊李自
成是年冬隨大軍西勦自成取道士默特鄂爾多斯入邊鑿黃河
冰濟師擒斬賊眾明年春至榆林賊乘夜襲我蒙古營蘇拜與護
軍統領徹爾布往援擊敗卒賊旋軍遇伏復戰卻之進征延安七
戰皆捷自成走湖廣臨追之至安陸屢破賊營斬獲無算三年署
護軍統領隨肅親王豪格征流賊張獻忠敗賊將高汝礪於三寨
山進擊獻忠於西充連敗賊眾我正藍旗軍爲賊所困蘇拜同護
軍統領阿爾津率兵趨援大敗賊五年還京授護軍統領先是敘

入關及勦滅自成功洊晉一等輕車都尉加一雲騎尉及獻忠滅
敘功並三遇 恩詔晉爵二等子八年正月同其兄吳拜及內大
臣洛什博爾輝等舉發英親王阿濟格謀干政罪狀議敘晉一等
子加一雲騎尉二月洛什博爾輝以諂媚諸王造言構釁伏誅蘇
拜與吳拜並坐附和罷任削爵籍沒又以睿親王葬時私置御用
服飾蘇拜徇隱不舉又王欲移駐永平蘇拜曾與密謀論死得
旨寬免九年起爲正白旗副都統十三年擢內大臣十五年 上
念其戰陣有功復晉一等男世襲尋授領侍衛內大臣康熙三年
十二月卒 賜祭葬如典禮諡曰勤僖子昂安巴襲爵第三子和
託初任侍衛康熙十五年以參領從征陝西叛鎮王輔臣至平涼

城北擊敗賊眾十六年從征逆藩吳三桂至湖廣於攸縣河岸擊
敗賊將王國佐等又敗賊將胡國柱等於永興十九年由廣西征
逆孽吳世璠敗賊將何繼祖等奪石門坎黃草壩進薄雲南城敗
賊將胡國柄劉起龍敘功 予世職騎都尉加一雲騎尉尋任護
軍參領五十二年卒子巴爾泰襲職

右 國史館本傳

國朝書目考卷之二十一

一

雅希禪

雅希禪滿洲鑲黃旗人先世居馬佳以地爲氏父尼瑪禪當太祖高皇帝勅業時隨其兄赫東額率五十餘戶來歸任佐領雅希禪隨父事太祖立戰功授騎都尉世職列理事十大臣天命四年奉命同大臣額克星格等與喀爾喀五部位盟還奏稱旨從征明戰於界藩先眾克敵復擊明總兵馬林於尙間崖破其中堅晉二等輕車都尉太祖既取遼陽敘功晉三等男沙嶺之役爲敵所傷戰弗勝論罪降一等輕車都尉八年隨貝勒阿巴泰征扎魯特攻其貝勒昂安所居寨昂安攜其孥乘牛車遁雅希禪與前鋒統領達音布等以兵追之昂安督從者拒戰達音布中創歿

雅希禪合兵直前奮擊斬昂安及其子殲其從者俘其孥以歸奏
凱分 賜所俘獲尋卒年五十有一子三人長恭袞次訥爾特次
拉篤渾恭袞襲世職獲罪降世職爲騎都尉二 命與其弟訥爾
特分襲之 太宗文皇帝崇德三年授恭袞刑部副理事官四年
從征索倫陣亡部議以恭袞不遵軍令致爲敵所殺應革世職籍
家產三分之一 上念其父雅希禪功 特命宥之以其弟拉篤
渾襲世職拉篤渾少隨父兄征戰屢立功崇德六年隨征明錦州
力戰陣亡 卹贈加一雲騎尉子鄂爾璧襲訥爾特之未襲世職
也從 太宗征明敗敵於小凌河復由大同入明邊率善射者攻
小石城克之既襲騎都尉隨征錦州屢敗明兵於松山杏山崇德

七年任刑部參政兼副都統時左右兩翼會兵擊松山城松山兵
夜遁訥爾特同護軍統領鼇拜趨塔山南海岸先敵至尊食以待
夜擊明兵達旦明兵據山巔訥爾特冒矢石率眾仰攻敵敗走復
乘勝追躡敵眾溺水死者無算八年隨貝勒阿巴泰征明初入邊
敗明守將進軍渾河築梁以濟明將合兵千餘來拒訥爾特率眾
擊走之復敗其援兵於三河縣隨大軍至山東指揮所部兵攻克
武定州城旋師將出邊敵劫我紅衣礮訥爾特與都統準塔還擊
破其步兵二營六月凱旋 賜白金五百兩九月隨鄭親王濟爾
哈朗征明甯遠明總兵吳三桂糾眾來禦訥爾特力戰歿於陣時
年三十有八 晉贈三等輕車都尉以其子訥新襲職順治十二

年 世祖章皇帝追念舊勳 賜雅希禪諡曰敏果立碑墓道

右 國史館本傳

博爾晉 子特錦

博爾晉世居完顏以地爲氏 太祖高皇帝時率戶口來歸卽使
轄之任佐領隸滿洲鑲紅旗尋授侍衛嘗從征富爾佳齊博爾晉
族弟侍衛西喇布爲哈達西忒庫所射中兩矢博爾晉拔其矢還
射遂殪西忒庫天命六年 命董築薩爾澗城工竣從大兵征明
瀋陽擊敗明總兵賀世賢陳策瀋陽旣下進征遼陽明總兵李懷
信侯世祿蔡國柱姜弼董仲葵等率眾五萬於城東南五里拒戰
我左翼兵大敗之明兵在城中聞敗自西門出援時博爾晉奉
命畱城旁偵敵遂合兩紅旗兵奮擊明兵挫衄爭入城自相蹂踐
死者枕藉會左翼四旗兵已登城博爾晉麾眾畢登遂取其城復

分兵攻沙嶺擊敗明廣甯援軍八年扎魯特昂安貝勒屢害我使
臣肆掠牲畜博爾晉時爲參領與前鋒統領達音布參領雅希禪
進征薄昂安所居寨昂安率眾拒戰達音布被創歿博爾晉雅希
禪督兵奮擊斬昂安及其子俘獲甚眾凱旋得 優賚十年任副
都統率兵二千征東海虎爾哈部降其五百戶以歸 上郊迎於
渾河宴勞之尋設理事十大臣博爾晉與焉 太宗文皇帝初卽
位擢鑲紅旗滿洲都統天聰元年正月隨征朝鮮五月 上親圍
明錦州距城西二里駐營博爾晉自瀋陽率兵至擊敗明兵追至
甯遠城下盡殪之嗣以招撫蒙古瓦爾喀各部並追敘前此戰功
授一等男爵尋卒後因遺失 敕書子孫不得襲康熙三年其子

特錦爲父奏請 賜碑事下禮部以無證驗寢其議旋奉 諭曰
博爾晉於 太祖朝在理事十大臣之列後授爲都統勤勞素著
可議加恩於是 予謚忠直立碑墓道特錦博爾晉第四子也初
任佐領天聰八年授騎都尉世職崇德五年隨鄭親王濟爾哈朗
率兵屯田義州先是多羅特部蒙古蘇班代等降於明居杏山西
五里臺至是願來歸遣人通款 上命鄭親王移師往迎明總兵
祖大壽吳三桂劉周智合距杏山邀戰特錦分隊擊敗之六年隨
大兵圍松山明總督洪承疇兵犯我汛界特錦力戰卻敵尋隨征
明甯遠敗其騎兵順治元年隨睿親王多爾袞入山海關以步軍
擊敗流賊李白成追至望都合副都統和託軍大敗賊眾明年敘

功晉世職爲三等輕車都尉任兵部理事官考滿以辦事勤慎晉
二等輕車都尉三年隨肅親王豪格征四川流賊擊敗賊將胡敬
德於三水縣復敗高汝礪於禮縣進勦賊渠張獻忠於西充賊眾
或距山巔或自山旁繞截我兵後特錦俱擊走之大破賊將楊正
於馬湖六年征叛鎮姜瓖於大同時賊由絳州侵及壽陽特錦率
兵往勦斬級千餘賊又由阻馬路得勝路犯我兩藍旗汛地特錦
連擊敗之復破其援兵移師至汾州府有賊兵七千夜犯兩紅旗
營特錦禦戰多斬獲又勦賊於平遼遼州榆社次第就平七年擢
兵部侍郎兼鑲紅旗蒙古副都統三遇恩詔晉爵至三等男九
年調本旗滿洲副都統十二年擢本旗蒙古都統列議政大臣十

五年隨信郡王多尼征貴州雲南攻戰招撫並有功議敘晉二等
男十八年轉本旗滿洲都統康熙十一年卒 子祭葬如典禮諡
襄壯立碑墓道子特爾赫襲爵

右 國史館本傳

達珠瑚

達珠瑚姓兆佳氏世居納殷祖曰達爾楚 國初時來歸後隸滿洲正藍旗達珠瑚初任佐領從 太祖高皇帝征烏拉斬級四十大兵克西林屯俘其人戶以歸敵眾追襲達珠瑚還擊敗之斬級五十旋率兵征葉赫斬級三百俘五十人又遇越界採葑者斬三十人俘六人敵侵我甯古塔境達珠瑚率護軍出戰斬敵將一及其兵百獲甲百副馬三百敘功授三等男爵天命十年率兵征東海瓦爾喀部凱旋 太祖出郊宴勞之明年征卦爾察部俘人戶獲馬牛無算 太宗文皇帝卽位擢列十六大臣佐理鑲黃旗事天聰元年大兵征朝鮮克義州畱兵駐守 命達珠瑚分統之後

復率兵征瓦爾喀部斬獲甚眾軍旋爲俘卒所害年六十有三八年以其子翁阿岱襲爵會大兵復征瓦爾喀 諭諸將曰前所遣達珠瑚以疏忽遇害念其效力年久著有勞績方合承襲世職爾等未能如達珠瑚之功儻不自慎欲希格外之恩不可得也

世祖章皇帝順治十二年追諡襄敏視一品大臣例立碑翁阿岱初任佐領既襲父爵管參領事隨都統巴奇蘭薩穆什喀征呼爾哈部有功加一雲騎尉崇德三年授工部副理事官四年擢都察院參政兼正藍旗副都統五年正月奉 命同副都統多積禮率兵防禦錦州稽察叛逃六年大軍圍錦州駐營城南山巔明總督洪承疇集眾松山以步兵來犯我左翼兵戰失利翁阿岱時守右翼

營率兵突前衝擊敵乃潰走追擊敵山下敗其騎兵復與參領鼇
拜率護軍破敵步兵營捷 聞得 優賚尋合兩翼兵擊敵松山
薄營力戰歿於陣 賜卹白金千兩晉爵一等男無子以其弟之
子濟木布襲職

右 國史館本傳

國朝通志卷之四十一

三

康果禮

弟喀克都哩

子賚塔

康果禮先世居那木都魯以地爲氏歲庚戌太祖高皇帝命巴圖魯額亦都率兵千人征東海渥集部招降那木都魯甯古塔尼馬察諸路屯長昂古明安圖巴顏烏祿喀僧格尼喀哩泰松阿等時康果禮爲綏芬屯長與其地喀克都里哈哈納綽和納伊勒占蘇爾休率兵壯千餘人歸賜金幣宴勞授康果禮喀克都里三等子哈哈納三等男綽和納三等輕車都尉伊勒占蘇爾休騎都尉分轄其眾爲世管佐領六隸滿洲正白旗旋以貝勒穆爾哈齊女妻康果禮封和碩額駙天命三年大兵征明取撫順克撫安三岔等十一堡進鴉鶻關破清河城康果禮並在事有功六年從大

兵征明瀋陽樹雲梯先登遂克其城 太宗文皇帝初卽位以康
果禮列十六大臣佐理正白旗事尋擢護軍統領天聰元年隨大
貝勒阿敏征朝鮮凱旋分 賜所得獲三年從 上征明入洪山
口克遵化城薄燕京 上親統大軍駐德勝門外明甯遠巡撫袁
崇煥錦州總兵祖大壽率兵二萬赴援屯於城東南 上命康果
禮隨諸貝勒擊之諸貝勒擊敗敵兵俱追至城壕康果禮與參領
郎球漢岱等未至城壕而返並論罪削爵罰鍰奪俘獲五年卒子
六人次子色琥德承管佐領第三子邁色任護軍參領隨征明錦
州禦敵塔山歿於陣第四子賚塔別有傳

右 國史館本傳

按公姓那木都
魯木一作穆

喀克都哩

喀克都哩世居那木都魯以地爲氏 太祖高皇帝時與其兄康果禮率眾來歸各轄其眾爲佐領隸滿洲正白旗授三等子爵 太宗文皇帝初卽位以喀克都哩爲正白旗都統天聰元年隨征朝鮮有功三年 上親統大軍征明 命八旗都統攻遵化城 授方略分八隅列陣喀克都哩督所部兵薩木哈圖樹雲梯先登 眾繼之城遂拔明巡撫王元雅自殺 上嘉喀克都哩造以具如法督兵先諸軍克城功 親酌金卮獎勞 優賚之晉爵二等子 賜號噶思哈巴圖魯言其勇敢善戰疾如飛鳥也明年正月 上攻克永平明兵潰走昌黎 上遣敖漢柰曼巴林扎魯特兵攻其

城不克 命喀克都哩同都統達爾漢等率兵千人往助仍不克
焚其近城廬舍而還先是敘克遵化功薩木哈圖得 賜巴圖魯
號授騎都尉世職並 諭喀克都哩曰薩木哈圖奮勇建功宜加
愛惜自後攻城但令隨眾並進如彼欲先登亦必阻之至是攻昌
黎薩木哈圖運木築柵復樹梯將登城聞 上命撤兵乃止 上
以喀克都哩弗恤士卒申 諭切責五年五月同都統楞額禮分
率左右翼步騎征明南海島徵舟艦於朝鮮弗至師次海濱不能
渡遂還屢擊敗明兵之邀戰者俘獲甚眾八月從 上征明圍大
凌河城喀克都哩率本旗兵軍其城之東北城中食盡明總兵祖
大壽率眾來降乃班師六年從 上征察哈爾與諸將分路率兵

攻取籍所俘人戶及金帛馬牛羊以獻獎賚有差七年 上以征
明及朝鮮察哈爾三者宜何先詢諸貝勒大臣喀克都哩奏言宜
先征明以承 天佑協人情且利在神速攻其不備 上嘉納之
八年喀克都哩家人訐其欲逃歸瓦爾喀以財物運藏那木都魯
故屯 上曰喀克都哩豈有外遁之理果欲負朕 天必鑒之遂
不窮治其事仍以訐告者付喀克都哩殺之逾數月喀克都哩卒
會有 詔分別舊臣勲績 賜敕書于世襲喀克都哩之子寒古
德圖爾泰赴吏部述其父功請襲 上命諸貝勒集議貝勒多鐸
言喀克都哩之嫂和碩郡主謂喀克都哩前此被首事屬實參領
吉思哈自虎爾哈凱旋亦言虎爾哈人謂喀克都哩曾欲逃歸諸

貝勒並以 聞遂不予襲

右 國史館本傳

賚塔

賚塔滿洲正白旗人姓那穆都魯氏和碩額駙康果禮第四子也
年十四授三等侍衛 太宗文皇帝天聰九年因其叔父喀克都
哩欲逃瓦爾喀事覺坐黜罷崇德六年隨大軍圍明錦州擊松山
杏山敵兵屢有斬獲明年冬隨貝勒阿巴泰征明越燕京趨山東
攻新城高陽朔州壽光博興等城皆先登身中五創 賜人戶牲
畜銀幣授前鋒侍衛 世祖章皇帝順治元年五月隨大軍討流
賊李自成敗賊將唐通於一片石追擊自成至安肅望都十一月

授護軍參領隨豫親王多鐸由河南征陝西連敗自成眾於潼關
明年隨豫親王征江南攻克揚州取江甯追敗明福王朱由崧於
蕪湖敘功 予雲騎尉世職三年隨端重親王博洛征福建明唐
王朱聿鍵遁汀州賚塔率兵破其城晉世職騎都尉五年明桂王
朱由榔據湖南賚塔隨鄭親王濟爾哈朗往征六年四月師至衡
州敗僞總兵陶養用於青草橋又敗僞伯胡一清萬五千眾於府
南山進克祁陽僞總兵周進唐於大忠橋拒敵擊敗之復斬其僞
副將等於王公嶺一清旋與僞總兵王進才各率馬步數千人拒
河岸亦敗潰賚塔進擊僞總督譚洪於道州又擊一清及僞伯焦
璉等於全州皆聞風竄遁七年八月兩遇 恩詔游晉二等輕車

都尉初喀克都哩獲罪康熙禮之世管佐領亦坐革 太宗諭以
後有報效仍準給還至是賚塔請於部得 旨復之卽予賚塔承
管十一年流賊張獻忠餘黨李定國犯廣東賚塔隨都統珠瑪喇
等往征屢敗賊兵解新會圍定國遁走追敗之興業及橫州敘功
晉爵三等男十三年擢護軍統領十六年海賊鄭成功犯江甯
命安南將軍達素同賚塔率師往征至則賊已敗遁遂移師福建
明年賚塔同都統索渾剿賊廈門官軍不習水戰失利 聖祖仁
皇帝康熙元年論罪罷任革世職及佐領二年署前鋒統領隨靖
西將軍穆哩瑪征流賊李來亨等於茅麓山屢戰皆捷賊平凱旋
復授護軍統領兼佐領八年擢正白旗蒙古都統十三年逆藩耿

精忠叛 命賚塔爲平南將軍統兵赴浙江剿禦精忠賊黨犯金華賚塔遣副都統瑪哈達雅塔哩拉哈等擊走之復義烏及諸暨二縣賚塔進駐衢州僞都督周列率賊二萬由常山來犯賚塔遣副都統瑚圖等邀擊於焦國擒斬過半僞總兵桑明旋以五萬眾犯衢州賚塔同總督李之芳遣兵迎擊復斬級萬餘十四年督兵擊敗僞將軍馬九玉等於黃潭口大鐵村王屋山杭埠南塘諸處僞副將李廷魁屯衢州城北元口山賚塔督兵乘夜攻圍破走之焚其木城九玉同賊將林福等退據大溪灘時康親王傑書爲大將軍駐金華賚塔奉 詔參贊軍務並分駐衢州仍佩平南將軍印屢擊卻來犯賊眾十五年八月康親王進衢州賚塔循例歸將

軍印以都統任參贊先率兵馳擊大溪灘斷賊糧道復江山馬九
王潛遁九月賚塔同瑪哈達等率兵破仙霞關僞參將金應虎降
進拔浦城又同副都統吉勒塔布等敗賊於建陽克其城進復建
甯府十月隨康親王抵延平精忠窮蹙迎降時漳泉興化俱爲海
賊鄭錦所踞十六年正月賚塔同甯海將軍拉哈達勦賊興化連
破二十六營陣斬僞總督趙得勝等復興化僞總兵郭維藩以仙
遊降三月同拉哈達討叛鎮劉進忠於潮州進忠迎降康親王奏
復授賚塔平南將軍印守潮州十七年四月鄭錦之僞總統劉國
軒陷平和犯海澄 上命賚塔移師赴援賊斷江東橋及長泰同
安諸小徑我師弗克進六月賊陷海澄漳平同安惠安犯泉州九

月賚塔與總督姚啟聖合兵進討大敗賊於蜈蚣山破其七營斬
四千餘級復長泰十月復敗賊於漳州萬松關十八年僞將軍吳
淑何佑等犯長泰賚塔同提督楊捷等分道進擊斬二千餘級生
擒僞總兵副將三人劉國軒復犯江東橋賚塔迎擊敗之賊走太
平寨追斬千餘級十九年二月同姚啟聖楊捷等勦賊海澄招降
僞總兵蘇堪復其城聞水師提督萬正色已取海壇賚塔由松嶼
進征僞將軍陳昌率眾迎降鄭錦遁臺灣廈門金門相繼定四月
調本旗滿洲都統仍爲平南將軍守潮州尋奉 命移駐廣州會
尙之信獲罪逮繫其藩下長史李天植等怨都統王國棟發難誘
殺之藩兵咸畏罪思亂賚塔密承 詔旨以罪不株連慰撫藩兵

自率兵圍之信第收捕天植及同謀者繫獄候旨餘釋勿問時逆孽吳世璠尙據雲南定遠大將軍貝子彰泰自湖南進征貴州上以賚塔在福建廣東勞績素著授爲平南大將軍赴廣西調遣滿漢兵由南甯直進雲南賚塔遂率兵由田州泗城進西隆州僞總兵周應龍迎降僞將軍何繼祖等擁賊數萬於石門坎築壘拒敵石門坎者距安籠所三十里地峻隘稱天險賚塔令都統貝勒希福瑪奇護軍統領額赫納等率師直前自與副都統洪世祿赫呀布總督金光祖分兵爲二由閒道躡其後二十年正月賊無備飭前軍進攻賊倉卒出禦後軍履險上前後夾擊大敗賊眾奪其隘口進復安籠城降僞總兵陳義魁何繼祖復糾僞將軍詹養

王有功等率二萬人據黃草壩列眾拒戰二月二日賚塔督兵奮擊自卯至未奪賊營二十三生擒詹養王有功及賊眾千餘獲其象馬 上以賚塔自廣西深入雲南獨先諸路大敗逆賊 溫旨嘉獎師抵曲靖降偽總兵尹士元偽道員劉世忠等隨遣兵取霑益州斷賊中路偽將軍線絨等皆遁歸分遣希福瑪奇等復雲龍州易龍所及楊林城營總碩塔等克嵩明州其他賊營聞風解散遂會合彰泰軍駐營歸化寺偽將軍胡國柄劉起龍等離城拒戰賚塔與彰泰分兵進擊自卯至酉賊大潰斬國柄起龍及偽總兵九生擒賊六百餘逆孽吳世璠嬰城守陰調賊將馬寶胡國柱夏國相等還救大軍並力環攻賊內亂欲擒世璠出獻世璠自殺線

絳等開城降遂磔僞大學士方光琛等於軍前戮世璠屍傳首京師夏國相竄廣南賚塔與彰泰檄土官儂朋總兵李國棟率師追勦擒之西板橋又遣希福等追勦胡國柱於雲龍州國柱縊其黨王敘李匡自焚餘眾悉降雲南平二十一年十月大軍凱旋上親率諸王大臣郊勞於盧溝橋西二十里外御黃幄詔彰泰賚塔行抱見禮還京仍任都統二十二年以隱匿尙之信藩下應入宮婦女事覺應勘問上曰賚塔自福建廣東雲南宣勞勤力樹立大功勿因細微事遂以非禮加之致失朕眷顧功臣之意下所司集質得實請革職治罪詔從寬削級罰俸明年十二月卒子祭葬如典禮加祭二次諡襄毅二十四年六月上諭王大臣

等曰平定雲南賚塔之功最大縱有他過爲人訐告朕究不加罪
諸臣曰 皇上俯念賚塔有功曲賜保全不特效力行閒者皆歡
忻鼓舞卽臣等亦莫不感戴二十五年追敘其功 予一等男爵
子賚葉楞襲雍正五年八月 世宗憲皇帝諭曰原任都統賚塔
當三逆變亂時統兵征剿克復雲南功績懋著朕恭閱 聖祖仁
皇帝實錄備悉其詳因身有過犯功過相抵是以未封公爵止授
一等男在當日之不優封賚塔者欲使立功之人咸知儆惕收斂
不可恃功驕肆妄爲今事歷多年後人已知鑒戒奉法著追封賚
塔一等公令伊孫博爾屯承襲以示朕眷念舊臣之意八年始建
賢良祠 詔以賚塔與大學士圖海等並入祀九年加公號曰襄

續

右 國史館本傳

賚塔姓那木都魯氏滿洲正白旗人額駙康古禮第四子順治初任本旗護軍參領升護軍統領康熙八年擢本旗蒙古都統吳三桂耿精忠相繼反 聖祖命賚塔爲平南將軍赴浙江勦禦尋以康親王傑書督師耿逆兵犯金華衢州賚塔屢遣兵擊敗之前後斬賊數萬收復諸暨義烏淳安等縣復親率兵擊走僞將軍馬九玉進兵仙霞關僞參將金應虎等獻關迎降官軍長驅入閩十五年隨康親王大兵抵福州耿精忠降閩地略定 命賚塔移鎮潮州海寇劉國軒等作亂賚塔屢摧破之十九年復會提督萬正色

總督姚啟聖分路進剿破陳洲馬洲灣觀音山等一十九寨追國
軒於銅山燬其巢其冬 聖祖已命大將軍貝子彰泰等取雲南
以賚塔爲平南大將軍領兵自廣西入賚塔抵西隆州吳逆僞將
軍何繼祖擁兵萬餘據石門坎隘口其地羊腸石徑高出雲表賚
塔先令都統貝勒希佛馬緝護軍統領額赫訥率前隊仰攻自與
副都統洪世祿赫勒布總督金光祖分兵二隊繼其後遂奪石門
坎復安籠城繼祖遁至新城所會僞將軍詹養據黃草壩迎敵賚
塔奪其營二十二生擒詹養自黃草壩抵曲靖復馬龍諸州次年
至雲南僞將軍胡國柄率馬步兵萬餘人出城列象陣拒戰賚塔
與大將軍彰泰等分隊進擊陣斬胡國柄等生擒六百餘人進薄

城下並力環攻雲南平遠 朝任本旗滿洲都統二十三年卒給
祭葬謚襄毅 世宗追封一等公雍正九年加公號為襄績

右 國史賢良小傳

按公名賚塔
一作賴塔

佟養性 孫國瑤

佟養性遼東人先世爲滿洲居佟佳以地爲氏因業商遷撫順天命初見太祖高皇帝功德日盛傾心輸款爲明所覺置之獄潛出來歸賜尙宗室女號曰西屋裏額駙授三等男六年從克遼陽晉二等子天聰五年正月太宗文皇帝命督造紅衣礮初軍營未備火器至是礮成鐫曰天祐助威大將軍征行則載以從養性掌焉時漢軍未分旗敕養性總理官民俱受節制額駙李永芳及明副將石廷柱鮑承先等先後來降者與佟氏族人皆爲所屬上以漢官漸多慮養性無以服眾志特諭養性曰凡漢人事務付爾總理各官分別賢否以聞爾亦當殫厥忠忱簡善絀惡

恤兵撫民竭力供職勿私庇親戚故舊陵轢疏遠仇讐致負朕委任之意昔廉頗藺相如一將一相以爭班位幾成嫌釁幸相如重視國事不念私讐是以令名垂於千祀願爾之效之也又 諭諸漢官曰爾眾官如能恪遵約束非敬謹養性是重國體而欽法令也八月從 上征明大軍圍明總兵祖大壽於大凌河養性遵上方略率漢軍載紅衣礮立營錦州通衢擊賊城西隅臺降守臺兵又擊賊城南隅壞樓堞翌日擊東一臺臺圯守者宵遁盡殲之九月關內兵援錦州 上遣親軍擊敵養性率漢軍五百從敵望風遁明監軍道張春與總兵吳襄等赴援大凌河乘夜向城 上督騎兵破之方追奔明潰卒復陣養性承 旨屯敵營東舉礮攻

燬敵營十月攻克子章臺礮擊臺堞臺內兵死者無算十一月祖
大壽以大凌河城降 上命城中所得槍礮鉛藥悉付養性尋率
兵攻克馬家湖臺自大凌河至廣甯明所置臺墩悉毀之六年正
月 上幸演武場閱兵養性率所轄漢軍試礮擐甲列陣 上嘉
其軍容整肅且以出兵大凌河時能遵 方略有克敵功 賜雕
翎良馬一白金百兩設宴勞之四月 上親征察哈爾 命隨貝
勒阿巴泰等畱守瀋陽七月奉 敕宣諭大凌河投誠各官察哈
爾之役 上命參領顏布祿佐領董山移哈爾占所貯糧於烏蘭
哈達顏布祿調遣失人遲久不至下廷臣會議罪當死有 旨覆
勘 諭曰儻有可矜則釋之眾皆言法當不宥佟養性奏曰顏布

國史館本傳
三三
祿等不知畱賢員協助而用不更事之人誤也罪固應死或懲責而曲貸之實惟 聖恩前鋒參領圖魯什亦以懲之而全其生爲請 上允二人議顏布祿等遂從末減未幾養性卒於官 詔以其子普漢襲爵普漢卒弟六十襲崇德七年隸漢軍正藍旗順治初六十屢遇 恩詔晉三等伯仕至本旗都統十三年 世祖章皇帝追錄舊勳 賜佟養性諡曰勤惠六十卒子國瑤襲

右 國史館本傳

國初時俘掠遼瀋之民悉爲滿臣奴隸 文皇帝憫之拔其少壯者爲兵設左右兩翼 命佟駙馬養性馬都統光遠統之其後歸者漸多入關後明降將踵至遂設八旗一如滿洲之制康熙中平

三逆其藩下諸部落亦分隸旗籍雍正中定上三旗每旗佐領四十下五旗每旗佐領三十其不足發內務府包衣人隸焉於是其制始定蓋雖曰旗籍皆遼瀋邊氓及明之潰軍敗卒今生齒日繁其從龍豐沛舊臣尙不能生計富饒而聚若輩數萬人於京華又無以令其謀生之道當軸者宜有遠略歟

右錄宗室昭棟撰

佟國瑤

佟國瑤漢軍正藍旗人二等子佟養性之孫也養性卒子普漢六十遷襲六十於順治初年三遇 恩詔晉三等伯授副都統子國瑤順治十七年襲伯爵 九年擢正藍旗漢軍副都統十二年

十二月逆藩吳三桂反 上以湖南鄖陽地界三省山谷隄塞奸民易嘯聚且恐賊乘閒侵犯 特授國瑤爲鄖陽提督往駐防十三年三月襄陽總兵楊來嘉通吳逆據穀城叛鄖陽副將洪福應之劫所部兵千餘反攻國瑤署國瑤率遊擊杜英佟大年以健丁三百名奮勇衝擊賊退復來連日格鬪十餘陣斬首二百餘級賊遁走疏 聞得 旨嘉獎下部優敘加左都督十四年四月洪福及叛將等分五路犯鄖陽西復大敗之追勦至泥河口板橋河陣斬僞將軍林躍等七人殺賊兵數百十五年三月四川叛鎮譚洪犯鄖江北岸洪福等出掠鄖江南相聲援國瑤分兵勦禦敗賊於坪溝黃坂九里岡又渡江擊賊於南岸連敗之焚其舟械擒斬無

算九月洪福遣眾伏鄖江兩岸以三十餘舟順流下泊琵琶灘進
逼鄖陽運道急國瑤與將軍噶爾漢撫治楊茂勳等率水陸兵大
破之於沿江及陡嶺糧運始通敘功加一等十六年七月以捐賞
兵丁難民功加太子少保十七年二月進勦楊來嘉洪福諸逆於
房縣擒偽副將以下五十二人獲偽印十二劄牌二十四房縣保
康相繼復十八年五月偕噶爾漢等勦賊於興安以日久未下部
議盡削前功 詔止削陡嶺所敘一等功二十一年六月授福建
將軍 諭曰國家設立督撫提鎮原以爲民孟喬芳總督陝西李
率泰總督福建能潔己奉公愛民恤士秦閩人至今思之爾到地
方宜恪遵國憲安輯民兵無忘恭敬二十二年四月疏言京口將

軍所統每旗協領參領防禦驍騎校共十七員今福建駐防每旗止四五員邊海重地軍務不可乏員料理請增協領以下驍騎校以上等官下部議駐防四旗應各設協領一員參領一員防禦五員驍騎校五員二十八年八月卒於任 賜祭葬如例諡忠愨其伯爵以子海福襲

右 國史館本傳

楞額禮

楞額禮滿洲正黃旗人姓舒穆祿氏揚古利次弟也自少從太祖高皇帝征伐敘功授騎都尉世職累晉一等男任正白旗副都統天命九年明將毛文龍縱兵渡朝鮮義州城西鳴綠江入島中屯田楞額禮奉命率左翼兵同右翼副都統吳善襲之途中獲謀者知明兵晝則渡江入島收穫夜仍回宿江岸楞額禮遂乘夜引兵由山閒潛行平旦度明兵已渡江卽突馳至其島明將士大驚奔潰追斬五百餘級餘眾爭舟盡墮水死焚其島中積聚而還太宗文皇帝卽位楞額禮列十六大臣尋任正黃旗都統爲八大臣偕參領阿山率兵六百人往略喀爾喀巴林地擒其貝勒十

四人俘獲甚眾 上嘉其功率貝勒大臣迎勞之晉爵三等子天聰元年隨大貝勒阿敏等征朝鮮率兵八十人乘夜襲明斥埃六所盡獲其哨卒既至朝鮮攻克義州城晉一等子三年二月明人由海島移駐朝鮮鐵山楞額禮率精兵勦之斬獲無算九月隨其兄揚古利率兵往雅爾古追捕逃人遇毛文龍部下採獲軍士擒數十人以歸五年三月 上以書諭八大臣陳政事得失楞額禮奏言臣以微賤之身擢居大僚 皇上所行果有關失豈敢緘默不言若無過舉臣又何所指陳自今以後願罄所知以抒忠悃知而不言惟天鑒之至於治民使無枉屈嫌怨何由而生臣惟有省躬自誓秉公聽斷以仰荅 聖意而已五月同都統喀克篤禮分

統左右翼兵往征南海島有功八月從大軍征明圍大凌河城率
本旗將士軍城北面之西 上招明總兵祖大壽降大壽遲疑未
決先遣其部將韓棟來謁出楞額禮所守門楞額禮令軍士戎服
執戟林立營門內外森嚴堅整棟既謁 上遣使送之歸將入城
楞額禮呼之止門外問姓名審形貌然後令入棟目擊軍威及城
守嚴整狀還白大壽大壽降志始決七年應 詔陳軍事言宜先
率外藩蒙古及本國兵直抵明內地資其糧草牲畜再整飭奪山
海關既入關卽屯駐關中多積芻糧以備往來攻伐之用此時若
不速圖遷延歲月則彼先有備進取轉難至於朝鮮姑與和好若
內地既得朝鮮自爲我有也六月隨貝勒岳託等率右翼兵取明

旅順口凱旋 上迎勞如初八年正月卒 上親臨其喪哭之慟
明年 巡幸盛京北山道經其墓 躬下馬奠而哭之順治十二
年追諡武襄子穆成格襲爵歷官刑部左參政見大臣表

右 國史館本傳

洪尼雅喀子武拉禪

洪尼雅喀姓吳扎庫氏世居噶哈哩太祖高皇帝勅業時扈倫諸部爭爲雄長而烏喇尤橫肆聞洪尼雅喀以財武豪於鄉曲欲其臣附劫其孥以要之洪尼雅喀既偕往復念烏喇貝勒不足事中途棄走與弟薩蘇喀薩穆唐阿攜族屬四十人來歸太祖嘉之授佐領撫戢其眾隸滿洲鑲紅旗天命三年從征明有功擢參領天聰二年太宗文皇帝征明錦州師薄城洪尼雅喀先登毀其堞墜傷足敵乘機將縛之弟薩穆唐阿以護軍校隨征馳護鬪死洪尼雅喀乃免八年五月敕敘開勦功臣以洪尼雅喀率眾歸附授三等輕車都尉世職尋卒子武拉禪襲順治元年七月授

護軍參領十月 世祖章皇帝命豫親王多鐸追剿流賊李自成
武拉禪以右翼從十二月至潼關甫立營賊眾掩至擊卻之又敗
其步兵於關外設伏擊敗賊騎兵乘勝破賊步兵二營二年從端
重親王博洛下浙江趨平湖敗敵獲戰艦進平杭州明閣部馬士
英總兵方國安擁眾來犯武拉禪破之於赭山又破之於朱橋范
村等地四年五月授鑲紅旗蒙古副都統五年正月增設滄州大
名駐防 命武拉禪以副都統駐防大名是年逆鎮金聲桓據江
西叛武拉禪隨征南大將軍譚泰攻南昌兵五合五勝聲桓以步
騎七萬拒戰武拉禪率本旗兵合擊大破之聲桓既死勦餘賊於
袁州敗偽總兵朱翊縱步卒千五百人定一府二縣六年七月奉

詔率將士協同通州總兵由天津至趙北口剿淀賊趙鳳岡遇於良店斬之殲其眾千人別遣參領哈其哈等擊賊寶山村擒其魁田東樓楊牌子七年五月授刑部侍郎先是遇 恩詔晉世職爲一等輕車都尉至是敘平定江西浙江功加一雲騎尉八年三月部議武拉禪會以英親王阿濟格私藏軍器事告知異親王滿達海等不行奏 聞削雲騎尉世職尋遇 恩詔晉一等男九年正月 上以前此吏部奉 恩詔予襲太濫 命分別降等改武拉禪世職爲二等男十二年隨甯海大將軍宜爾德攻舟山僞總兵陳六御等以三萬人拒戰武拉禪領纛前進擊敗之十四年凱旋敘功晉一等男遇 恩詔加一雲騎尉十六年五月以領侍衛

丙大臣額爾克戴青家奴毆侍衛阿拉那於市武拉禪承勘不行
詳訊枉論阿拉那罪坐削雲騎尉十七年四月自陳有疾解任康
熙六年十月卒 賜祭葬如例以其子呼喇禪襲爵

右 國史館本傳

鄂本兒

鄂本兒蒙古正黃旗人姓曼靖氏初爲明守備 太祖高皇帝天命六年征明取遼陽鄂本兒率三十五人以馬六十來歸七年從征明廣甯有功授三等輕車都尉世職天聰元年 太宗文皇帝征明錦州距城二里駐營 命額駙蘇納選蒙古將士禦敵於塔山西鄂本兒與馬遇敵兵二千奮擊敗之分 賜所俘獲 上移師甯遠明總兵滿桂列陣城東 上督諸將進擊鄂本兒率五佐領甲士敗敵晉二等輕車都尉二年從 上征多羅特部分兵二百先驅遇敵百人三戰逐北敵復糾驍健死戰我兵稍卻鄂本兒躍騎突前敵敗遁 上率諸貝勒並進殺其台吉古魯俘獲無算

晉鄂本兒一等輕車都尉擢右翼蒙古都統三年從 上證明遵
化明邊將五路迎戰鄂本兒率右翼蒙古兵挫敵斬參將一獲馬
及驟入大安口拔其城大軍既取遵化進薄燕京鄂本兒敗敵援
兵明年師還取永平灤州 上命貝勒阿敏等守永平都統納穆
泰等守灤州鄂本兒同都統察哈喇副都統蒙阿圖等守遵化未
幾灤州被敵攻圍納穆泰引眾入永平阿敏度弗能禦敵檄遵化
將士棄城偕歸敵軍已偪遵化鄂本兒率五十人出禦斬敵哨騎
七人奪其馬趣察哈喇蒙阿圖遄行先自勒兵對敵列陣一敵將
挺槍來犯鄂本兒迎斬之敵不敢前我軍盡行乃居殿防衛全師
而還晉爵三等男五年復從 上證明圍大凌河城率所部列營

城西敵出城奪我已取臺堡甫樹梯鄂本兌與都統和碩圖整軍
並進敵大敗入城追蹙之及壕殲殪甚眾自是敵坐困弗復出犯
凱旋得 優賚九年正月卒兄瓦色襲爵

右 國史館本傳

165-276

武納格

子德穆剛

齊墨克圖

武納格姓博爾濟吉特氏其先居葉赫後隸蒙古正白旗 太祖
高皇帝勅業興京諸蒙古向化武納格率七十二人來歸有勇略
通蒙古文及漢文 賜巴克什號歲癸丑從征烏喇有功授三等
男天命十一年大軍圍甯遠城未下 命分兵攻海中覺華島明
參將姚撫民擁眾四萬倚島列營鑿水十五里爲濠衛以車楯我
軍奪濠口進攻盡殲其眾焚所積芻糧及船二千餘乃還天聰三
年從 太宗文皇帝征明入龍井關克遵化進兵京城北土城關
明督師袁崇煥自甯遠來援我左翼蒙古兵迎敵弗勝武納格率
右翼蒙古兵繼進遂敗敵 賜所俘獲之半以犒其軍尋攻克固

安縣復同額駙蘇納等率左右翼蒙古及滿洲兵八十人征察哈爾降其邊境二十戶令從歸旋以降者窺我兵少欲叛歸明遂盡殺其男子惟釋二台吉俘婦女八十有奇還 太宗命分隸左右翼養贍之 諭責武納格蘇納殺降奪所給駝馬牛羊四年大軍征明克永平有騎卒三千自玉田出武納格遣兵擊之走獲馬百餘自永平往略豐潤還聞明兵四千圍大安口城急赴援破其圍又設伏於樵採處斬獲無算五年從征明明總兵祖大壽守大凌河城杏山守將以書與之有攜軍士棄城或單騎潛來之語武納格獲以獻於大軍於是圍城築壘濬濠爲久困計武納格統蒙古軍列營城東南大壽縱兵出圍我所取臺堡武納格與貝勒阿濟

格等率兵夾攻殲敵過半自是城中兵不敢復出六年同阿濟格招撫大同宣化邊境察哈爾人眾七年同貝勒阿巴泰等攻明山海關俘獲人眾及馬牛以歸明兵襲追武納格殿力戰卻之

太宗諭諸貝勒大臣曰武納格所在建功今又殿後敗敵人臣爲國義當如是八年五月敘功 賜敕晉三等公世襲罔替時 太宗率諸貝勒分道征明 命武納格統左右翼蒙古兵供調遣且策應大軍始與貝勒德格類收察哈爾千餘戶歸附繼由獨石口越長安嶺至保安州會大軍於應州所過或攻或撫悉稱 旨閏八月自得勝堡班師歸遇逃入陽和之蒙古四百七十人收以隨軍九月喀爾喀部長族屬有爲察哈爾眾邀殺於路者奉 命領兵

百人往緝追斬二十餘人而還九年二月卒 恩卹如典禮子廣泰襲三等公爵德穆圖由佐領積戰功授一等輕車都尉世職崇德時官戶部參政齊墨克圖以戰功授騎都尉世襲官副都統

右 國史館本傳

德穆圖 弟齊墨克圖

德穆圖蒙古正白旗人姓博爾濟吉特氏父武納格積功授三等公既卒以第三子廣泰襲德穆圖初任佐領 太宗文皇帝崇德三年正月擢戶部承政七月更定官制改右參政四年二月上親征明松山樹雲梯攻城明兵自錦州赴援德穆圖見明兵至度不能克敵棄梯而還論死得 旨從寬罰贖尋兼任副都統六年

隨鄭親王濟爾哈朗等圍明錦州有守郭之蒙古貝勒諾木齊等約降鄭親王令德穆圖迎之會諾木齊率眾蒙古與明兵戰德穆圖攜諾木齊之子阿桑喜出大兵既克郭諾木齊始來歸師還以德穆圖會詭言諾木齊父子俱爲所攜出論鞭百罰贖籍家產半革參政及副都統任專管佐領事七年十月隨貝勒阿巴泰征明自薊州入邊薄燕京至山東明年六月凱旋得 優賚 世祖章皇帝順治元年隨大軍入山海關破流賊李自成追擊至望都敘功授騎都尉世職二年隨豫親王多鐸擊敗自成兵於潼關平定河南江南敗明將鄭鴻逵於瓜洲又同都統瑪喇希徇常州與明將黃蜚等戰再敗其眾隨分兵攻宜興崑山等縣並克之敘功加

一雲騎尉復任本旗蒙古副都統三遇 恩詔晉一等輕車都尉
世職九年卒子霍達襲齊墨克圖者德穆圖仲弟也早歲屢從行
陣崇德三年同參領沙爾虎達等率蒙古四十人略甯遠界至紅
山口遇明兵百人逐之斬其裨將二人而還是年弟廣泰隨豫親
王多鐸征明坐違令不前削公爵明年六月 命齊墨克圖降襲
一等男七月同沙爾虎達等率哨卒至錦州敵兵五百來追還擊
敗之獲馬六十及其大纛大兵三圍錦州齊墨克圖皆在軍中累
著功績初圍錦州時敵出城搏戰齊墨克圖控騎截擊陣斬十人
後攻明總督洪承疇步兵三營同參領吳拜奮勇掩殺遇敵騎來
援復擊敗之八年三月同護軍統領阿爾津哈甯阿等往征黑龍

江圍都里屯克之又招降大噶爾達蘇小噶爾達蘇及能格爾三屯俘獲無算師旋賜貂皮銀幣十一月擢本旗蒙古副都統順治二年以從大兵入山海關破流賊功加一騎都尉併爲三等子三年隨定西大將軍何洛會征陝西叛鎮賀珍遣兵破賊黨劉文炳於浦城賀珍遁奔武功追擊之斬獲甚衆五年四月卒詔以其子薩哈納襲騎都尉世職仍以廣泰襲一等男爵

右 國史館本傳

國朝耆獻類徵初編卷二百六十三目錄

將帥三

衛齊

子卓布泰
孫蘇勒達

巴哈

巴奇蘭

察哈喇

子富喇克塔

哈哈納

子斐洋古

恩格德爾

子額爾克戴青

揚古利

子塔瞻
曾孫富善

孫愛星阿

額參
子魏武

吳巴海

阿岱

孫巴朗

托班

康喀賚

子錫納海

岱松阿

子阿納海

巴漢

舒賽

子西蘭
孫席特庫

安達立

子阿積賴

阿爾沙湖

兄子果爾沁

額琳奇岱青 子扎木素

揚善

巴都哩 從子海都

達爾漢 子鄂羅塞臣
孫勒貝

國朝耆獻類徵初編卷二百六十三

通奉大夫前署江西巡撫江西布政使司布政使湘陰李桓輯

將帥三

衛齊 子卓布泰 巴哈 孫蘇勒達

衛齊滿洲鑲黃旗人姓瓜爾佳氏貴英東第九弟也天命十年

太祖高皇帝命同侍衛博爾晉等率兵二千往征虎爾哈收獲五

百戶凱旋 上郊勞賜宴並念其父索爾和歸附功授騎都尉世

職會蒙古逃亡十戶衛齊追之盡俘以歸天聰三年從 太宗文

皇帝征明略地至遵化三擒哨卒明兵犯我師衛齊遮擊數逐北

論功晉三等輕車都尉 上統大軍出征嘗令衛齊畱守盛京任

八門提督九年 命免功臣徭役衛齊與焉並增給佐領人戶使之專轄尋卒以第六子穆里瑪襲職 世祖章皇帝以衛齊歷事兩朝忠誠素著 賜諡端勤視一等大臣例立碑墓道擢穆里瑪一等待衛順治四年授參領屢遇 恩詔晉一等輕車都尉又一雲騎尉 子世襲五年隨征江西叛鎮金聲桓師至童子渡賊將列陣以拒穆里瑪與參領喀爾塔喇等擊敗之復率兵渡河衝擊敗賊眾二千至饒州下其城移師前進賊集兵騎二萬追襲同參領巴都還擊賊兵卻走我軍攻南昌掘壕圍守聲桓與其僞帥王得仁悉眾拒戰穆里瑪以本旗兵奮勇撲勦連敗賊眾十七年六月擢工部尚書八月授都統康熙二年四川賊李來亨等竄伏湖

廣郎襄山中聚寇劫掠穆里瑪奉 聖祖仁皇帝命爲靖西將軍
與都統圖海率禁旅會楚蜀之師討之時來亨擁眾據茅麓山穆
里瑪督兵攻圍九戰皆捷賊復夜襲總督李國英提督鄭蛟麟等
營穆里瑪分遣諸將先後援勦追斬甚眾來亨勢蹙自焚死招撫
僞王侯及僞總督等官論功超晉一等男世爵內大臣公鼇拜穆
里瑪兄也輔政攬權穆里瑪及大學士班布爾善等私相黨附凡
朝政皆就鼇拜家取進止八年鼇拜伏誅穆里瑪坐黨惡營私削
爵與班布爾善等並棄市六十年 上念衛齊功復以穆里瑪之
曾孫察克慎襲騎都尉世職衛齊子七人次子卓布泰第三子鼇
拜第四子巴哈皆別有傳

右 國史館本傳

卓布泰

卓布泰滿洲鑲黃旗人姓瓜爾佳氏衛齊次子也 太宗文皇帝時任佐領崇德四年隨承政薩木什喀索海征瑚爾哈部有鐸陳阿薩津二城以兵四百逆戰卓布泰與佐領薩弼圖率甲士九十人擊敗之斬級五十敵復與索倫部長博穆博果爾合兵來拒卓布泰率先邀擊挫敵獲丁壯六十有奇敘功授雲騎尉世職五年任參領隨大將軍證明錦州於松山杏山閒連敗敵兵六年鄭親王濟爾哈朗復圍錦州明總督洪承疇以重兵列營山口拒守卓布泰同副都統翁阿岱迎戰明兵敗遁大軍合左右翼擊敗於松

山復與翁阿岱率兵破之還軍敵蹙我後翁阿岱中創仆卓布泰力戰敗敵掖翁阿岱乘馬以歸七年十月隨貝勒阿巴泰征明至青州屢敗敵軍明總兵張登科和應薦等合入鎮兵來拒卓布泰率兵奮擊大敗之又乘夜襲破其餘眾八年五月凱旋 賚白金兼任兵部理事官 世祖章皇帝順治元年同參領沙爾瑚達征黑龍江攻克圖瑚勒禪城獲丁壯二百餘是年冬隨豫親王多鐸進勦流賊李自成師次潼關同都統恩格圖等連敗賊眾二年進克西安自成遁湖廣卓布泰與護軍統領敦拜阿爾津等追擊殲賊騎三百移師下江南隨端重親王博洛征浙江敗敵眾於杭州松江海甯平湖諸郡邑斬級數百獲戰艦百餘三年復隨端重親

王征福建署副都統師次延平明唐王朱聿鍵走汀州大軍追勦之卓布泰別率兵直趨福州攻克其城是年敘功晉世職騎都尉兼一雲騎尉明年考滿晉三等輕車都尉五年隨鄭親王濟爾哈朗征湖南時衡州寶慶諸郡爲明桂王朱由榔之將所踞六年四月卓布泰復署副都統同都統佟圖賴等自湘潭進征連破賊寨斬僞總兵陶養用遂復衡州僞與甯伯胡一清以步騎萬餘踞城南山岡列七營卓布泰與佟圖賴合攻之皆潰走又擊敗僞總兵王進才方世勇周進唐等於道州靖州七年凱旋得優賚八年擢刑部侍郎九年改授鑲黃旗副都統尋遷護軍統領列議政大臣敘征湖南功並先後遇恩詔晉爵至二等男世襲罔替十一

年擢內大臣十三年任鑲黃旗都統十四年命爲征南將軍率兵至廣西與湖南四川兩路大兵會期規取黔滇時朱由榔竄雲南其將李定國白文選李成爵等分踞黔西要隘十五年九月卓布泰次獨山州與信郡王多尼等約師期遂率兵由都勻進盤江賊聞大兵至悉沈船潛伏山谷卓布泰用土司岑繼魯言從下流十里取所沈船中夜濟師李成爵以眾萬餘屯踞涼水井大破之進攻雙河口山寨李定國列象陣拒戰擊之俱潰定國又悉眾爲三十營列柵固守卓布泰分軍三隊張左右翼進擊再戰皆捷追斬四十餘里獲其象馬嗣聞賊眾尙堅守鐵索橋乃從普安間道進羅平州會信郡王等軍攻克雲南城由榔奔永昌十六年二月

同貝勒尙善等進鎮南州破白文選於玉龍關渡瀾滄江取永昌
由榔奔騰越復進勦之渡潞江定國以兵六千伏磨盤山卓布泰
分兵入隊以槍礮發其伏掩擊之斬殺過半遂取騰越州由榔奔
緬甸卓布泰乘勝追逐越南甸至猛卯而還捷 聞 賚蟒服鞍
馬明年二月還京 命內大臣迎勞之仍任都統兼佐領尋追論
在軍營時鞫勘將士功罪不實應革爵罷任議政王貝勒等召卓
布泰告之卓布泰厲聲爭辯王貝勒等劾其出言怨望請處絞籍
沒 上命從寬革爵罷任 聖祖仁皇帝康熙三年復原爵八年
以弟鼐拜獲罪連坐革爵十六年 聖祖念其征雲南有功仍復
二等男世襲十七年卒 賜祭葬如典禮諡武襄子增壽襲爵

右 國史館本傳

巴哈

巴哈滿洲鑲黃旗人姓瓜爾佳氏衛齊第四子也初任一等待衛
太宗文皇帝崇德二年設議政大臣二十有四巴哈與焉征明錦
州凱旋 上幸牧馬所 命內大臣侍衛與新降之明總兵祖大
壽等校射獎賞有差巴哈得 賜駝一 世祖章皇帝順治元年
隨大軍入山海關定燕京二年以巴哈在 太宗朝扈從著勞授
騎都尉世職時睿親王多爾袞攝政都統譚泰訐內大臣索尼詆
誹睿親王及捕魚牧馬鼓琴演戲諸款法司鞫訊以巴哈曾與索
尼同官偶戲議革世職罷任 詔貫之三年隨肅親王豪格征陝

西四川尋以考滿並敘隨征功晉世職至一等輕車都尉六年睿親王帥師討大同叛鎮姜瓖巴哈請從征自效王弗許復再三請王使人諭以或隨明甲隊或隨暗甲隊惟所自便巴哈知王終弗用也拂衣起遽歸翌日議罪應斬改罰贖七年睿親王有疾貝子錫翰等奏請上駕臨視睿親王罪以擅請並責巴哈弗執問復罰鍰八年上親政命爲議政大臣三遇恩詔晉爵至一等男初肅親王爲睿親王構陷卒於獄子富綬尙幼尙書宗室鞏阿岱議殺之巴哈同內大臣哈什同持不可乃止鞏阿岱因與其弟錫翰及侍衛冷僧機勸睿親王疏遠巴哈及其兄鼇拜旣而錫翰復以巴哈入直御前因數集內大臣西訥布庫等議其罪復聞

有旨嘉巴哈勤勞議乃寢至是上以鞏阿岱錫翰冷僧機西
訥布庫等朋比妄行命諸王大臣鞠訊巴哈證其狀成伏誅十
二年以巴哈恪供職業加少保兼太子太保十四年晉少傅兼太
子太傅十五年授領侍衛內大臣聖祖仁皇帝康熙六年以其
子訥爾都尙公主封和碩額駙八年上以察哈爾阿布奈久缺
朝請無藩臣禮命巴哈往察其狀及還會齎拜以結黨擅權獲
罪同父兄弟並褫革論斬籍沒上念巴哈宣力年久貸其罪並
免籍沒後以疾卒子九人次子蘇勒達別有傳

右 國史館本傳

蘇勒達

蘇勒達滿洲鑲黃旗人姓瓜爾佳氏原任內大臣巴哈第二子也
初任侍衛康熙二十一年授護軍參領兼佐領明年擢鑲黃旗蒙
古副都統尋調滿洲副都統累遷護軍統領前鋒統領二十六年
擢鑲黃旗蒙古都統二十八年 命爲領侍衛內大臣會噶爾丹
與喀爾喀構釁侵掠邊境二十九年六月蘇勒達奉 命率將校
往科爾沁調兵統駐要地時科爾沁親王班第駐圖斯噶爾圖山
其兵赴調者僅半喀喇沁阿巴噶柰曼土默特諸部兵亦未至蘇
勒達疏 聞隨移檄諸部速飭軍伍進發會噶爾丹已深入烏珠
穆沁 上命豫親王福全爲撫遠大將軍出古北口恭親王常甯
爲安北大將軍出喜峰口 詔蘇勒達俟蒙古諸部軍畢集協力

會剿七月蘇勒達同土謝圖親王沙津等率兵赴巴林八月會大軍合擊大敗噶爾丹於烏蘭布通噶爾丹遣使同濟農胡土克圖至裕親王營設誓歸誠裕親王信之檄蘇勒達所統諸路兵勿進擊蘇勒達知噶爾丹將遁欲羈縻之遣使給噶爾丹與語噶爾丹不應乘閒越營遁去十一月師旋王大臣議裕親王等調度乖方賊敗不卽追剿乃檄止蘇勒達進兵致窮寇逃遁應革爵蘇勒達亦應罰俸一年得旨噶爾丹奔竄時若蘇勒達等率兵邀擊可以就擒乃領兵王大臣反阻使勿進蘇勒達等亦遂聽從不復追剿俱應依議治罪但已擊敗厄魯特兵噶爾丹遠遁諸王大臣槩從寬免罪於是蘇勒達亦免罰俸三十四年五月噶爾丹復犯邊

上欲發兵進剿先檄盛京諸處兵設伏圖拉左近伺之 命蘇勒達與領侍衛內大臣等詳議蘇勒達言我兵不必卽趨圖拉當誘其深入一舉殄滅若彼逡巡不進俟偵實再行議奏 上嘉納之 三十五年三月 上統師親征由中路進以撫遠大將軍費揚古由西路會師五月 上駐蹕什巴爾臺距敵營甚近而費揚古軍未至圖拉奏緩師期 上以我軍旣徧敵境不必俟費揚古當卽前行令王大臣等集議蘇勒達與內大臣馬斯喀等議卽進剿與上意合會噶爾丹潛遁 上密諭費揚古絕其歸路敗之於特埒爾濟口俘斬無算噶爾丹僅引數騎遠竄乃 命班師是年九月 蘇勒達復扈 駕出居庸關巡行塞北經理軍務 賜內殿馬十

一月還京三十六年卒 賜祭葬如例諡恪傳

右 國史館本傳

巴奇蘭

巴奇蘭姓納喇氏世居伊巴丹後隸滿洲鑲紅旗 太祖高皇帝
勦業初巴奇蘭率眾來歸屢從征伐沙嶺之役率五佐領兵先眾
敗敵天命十一年從征明甯遠奉 命同都統武納格率兵攻覺
華島破之敘功授三等輕車都尉世職 太宗文皇帝卽位進列
十六大臣佐理正黃旗事天聰三年從征明至京城北駐營遵
上所授方略擊敗明總兵滿桂等軍於城下七年隨貝勒岳託等
征明旅順口爲步軍統領借鑲白旗大臣薩穆什喀聯舟前進敵
踞崖拒戰巴奇蘭身中數創冒矢石裹創奮擊獨敗敵遂號於眾
曰孰能用命先登者吾暴其功於 上前於是佐領雍舜朱瑪喇

超距而登巴奇蘭率眾繼之敵殊死戰我軍少卻巴奇蘭疾聲大呼曰敵兵敗矣士卒皆踊躍騰藉入遂克旅順口是年九月敘功晉三等男八年五月 太宗親統師征明以貝勒濟爾哈朗畱守巴奇蘭副之十二月 命偕薩穆什喀分統左右翼兵征虎爾哈諸部 諭曰此行道路遙遠務奮力直前慎無憚勞而稍息俘獲之人須善言撫慰甘苦共之攜之而來皆可爲我用爾等其善體朕意 賜食啟行九年五月凱旋 上御殿設宴 親酌金卮勞之分 賜所獲牲畜等物 命以招降二千餘戶編籍安業敘功晉一等男明年二月病創潰卒 卹贈三等子以其子拜山襲

右 國史館本傳

察哈喇 子富喇克塔

察哈喇姓郭絡羅氏初隸滿洲鑲黃旗後改隸鑲白旗父常舒爲
沾河寨長 太祖高皇帝時與其弟揚舒率眾來歸 命分轄其
眾爲佐領既卒察哈喇仍其任 太宗文皇帝卽位以察哈喇列
十六大臣佐理正紅旗事天聰三年大軍征明取遵化薄燕京明
年正月還師取永平灤州 命貝勒阿敏等守永平都統納穆泰
等守灤州以察哈喇署都統率蒙古左右翼兵守遵化四月同都
統武納格於樵採所設伏敗敵獲馬二百餘匹明將合步騎四千
奪大安口察哈喇與武納格整軍奮擊殲殪甚眾五月明兵陷灤
州納穆泰等走永平阿敏度不能禦敵撤遵化將士棄城偕歸會

敵兵已偏城察哈喇同都統鄂本兒等突圍出全師以還五年
上遣都統楞額禮等征明南海島察哈喇率兩紅旗兵隨征次海
濱獲敵船以未足濟師暫駐守猝遇明兵渡海來犯我佐領穆世
屯禦戰陣亡察哈喇督兵奮擊敗敵別遣人沈其船敵還爭舟不
得溺水死者過半六年五月大軍略明宣府大同邊境分兵略歸
化城及黃河濱 命察哈喇同承政車爾格率兵五百爲前隊日
備船濟師十一月同承政巴篤理往朝鮮議職貢歲額九年隨貝
勒多鐸征明錦州與都統阿山參領吳拜等率兵四百先驅遇明
兵三千於大凌河西相對列陣以眾寡不敵遣騎還告貝勒營貝
勒統師馳赴明兵望見驚潰察哈喇與阿山等分路追擊擒斬無

舞凱旋分 賜所俘獲逾年卒子富喇克塔任佐領兼都察院理事官崇德八年七月擢工部參政兼參領 世祖章皇帝順治元年四月授正藍旗滿洲副都統旋擢本旗蒙古都統隨睿親王多爾袞入山海關擊敗流賊李自成追至望都連敗賊兵敘功授騎都尉世職是年冬隨豫親王多鐸征河南趨潼關自成聚賊抗拒僞汝侯劉宗敏據山列陣富喇克塔同都統拜音圖以礮擊潰之賊犯我蒙古營復督兵殲賊無算明年陝西底定移師征江南同都統阿山馬喇希率兵先驅明兵據泗州北淮河橋我兵至賊焚橋遁遂進克揚州三年隨貝勒博洛征浙江以雲梯兵攻克處州城進征福建同都統漢岱克分水關趨泉州連敗拒戰賊眾招撫

國朝名將列傳卷之三十三
二
州一縣三凱旋加一雲騎尉五年二月以都統巴哈納等違例奏
授佐領吉賽爲護軍統領富喇克塔坐扶同列奏解都統任尋隨
征南大將軍譚泰討江西叛鎮金聲桓次九江賊眾迎戰富喇克
塔率師進擊獲戰艦百餘同都統何洛會截賊運道奪糧艘二百
進攻南昌聲桓與其黨王得仁糾賊七萬離城掘踞要隘富喇克
塔督眾掘港以沙船二十先薄城明年賊平凱旋富喇克塔卒於
軍先是遇 恩詔晉世職爲三等輕車都尉七年五月敘江西戰
功晉一等輕車都尉以其子福克都襲

右 國史館本傳

哈哈納 子斐洋古

哈哈納姓那木都祿氏世居東海窩集部 太祖高皇帝時從其父明安圖巴顏來歸編所屬爲二佐領以哈哈納及弟綽和諾分統之隸滿洲鑲紅旗妻以宗室女尋從征烏拉身中數槍仍力戰敗敵復奉 命率本旗兵戍守賽明吉未至其人眾叛逃守將瑪爾圖追弗及哈哈納聞之兼程疾進斬三百餘級收男婦五百餘人而還 上嘉其功賜以所得叛渠及鞍馬弓矢等物天命四年三月明兵四路來犯 上率諸貝勒往征之破明兵於界凡尙閒崖及阿卜達理岡時朝鮮遣兵助明亦爲我兵所敗 上遂統師取明開原鐵嶺二城哈哈納俱在事有功六年從征遼陽同副都

統博爾晉偵敵於城旁敗其援兵復分攻沙嶺城敗廣甯兵之來援者 太宗文皇帝卽位以哈哈納列十六大臣任鑲紅旗副都統事天聰八年率兵略地錦州敗明兵於甯夏進征甯遠遇敵掩襲哈哈納所乘馬傷仆徒步力戰不少卻仍擊敗敵往修海州城明人來爭哈哈納率所部首先迎戰敵潰走尋赴援耀州釋其圍追敵渡河獲馬三十崇德元年隨武英郡王阿濟格征明入長城攻克昌平涿州二城尋以傷發病廢致仕哈哈納第三子斐洋古初任佐領 聖祖仁皇帝康熙十三年隨順承郡王勒爾錦討逆藩吳三桂師至荊州賊將劉之復陶繼智犯宜昌斐洋古隨護軍統領額師泰率舟師橫江逆擊敗之獲其戰艦十七年勦賊將胡

國柱於永興鏖戰一日在國柱敗走進攻常甯耒陽等處俱率兵
前驅十九年投驍騎參領二十五年改護軍參領三十五年二月
擢鑲紅旗漢軍副都統從上征噶爾丹領火器營兵出古北口
五月師抵克魯倫河噶爾丹棄廬帳遁斐洋古隨大將軍馬斯喀
率兵窮追至巴顏烏蘭而還三十六年二月卒于祭葬如例

右 國史館本傳

日本書紀卷之六十一

三十一

恩格德爾 子額爾克戴青

恩格德爾姓博爾濟吉特世居西拉木楞 太祖高皇帝初業時
喀爾喀蒙古自分五部爭相雄長恩格德爾爲巴岳特部台吉歲
乙巳首先來朝獻馬二十 上優賚遣之明年率五部使臣獻駝
馬奉表尊 上爲神武皇帝自此朝貢無間天命二年尙貝勒舒
爾哈齊女爲額駙九年請率部眾來歸 上嘉其輸誠最先子宥
罪券 遣大貝勒代善等統兵移之遼陽 賜鞍馬貂裘及田宅
器用與其地莽果爾岱並授爵三等子子囊弩克滿敦等 賜裘
服授職有差隸滿洲正黃旗 太宗文皇帝天聰三年同都統武
納格等率兵征察哈爾招降二千戶尋從 上征明入龍井關克

遼化城薄燕京 上親統師駐德勝門外明甯遠巡撫袁崇煥錦
州總兵祖大壽合眾二萬赴援屯於城東南 上命分軍進擊恩
格德爾率外藩蒙古兵戰失利卻走會武納格率兵突前奮擊乃
敗敵於是集議恩格德爾不嚴整隊伍縱騎驟進致敗罪應罰鍰
奪俘獲並削爵 上念其率眾歸順功免削爵明年春大軍克永
平 上駐蹕城中恩格德爾奉 命略地遇明步卒三百將戰復
有敵騎三千自玉田縣突出恩格德爾佯退誘敵敵稍前疑有伏
還走因追襲其後獲馬百五年大軍圍大凌河城明監軍道張春
總兵吳襄等合眾四萬自錦州赴援 上親督兵擊敗之敵初接
戰時鋒甚銳我右翼兵獨先衝入張春營左翼兵避櫟矢進擊稍

緩因論臨陣退縮諸將罪恩格德爾應罰緩削爵 上復免其削
爵罰緩崇德元年五月卒以其第四子額爾克戴青襲爵 世祖章
皇帝順治十二年追諡恩格德爾曰端順視一品大臣例立碑墓
道 世宗憲皇帝雍正七年追封三等公加號順義額爾克戴青
初任侍衛授三等輕車都尉世職既襲其父三等子以所授職子
弟索爾噶襲順治二年以額爾克戴青素荷 太宗眷顧晉二等
子七年春睿親王多爾袞欲額爾克戴青附己令大學士剛林等
許以改入正白旗當晉封三等侯額爾克戴青不從明年 世祖
親政嘉其守正不阿超晉一等侯九年列議政大臣管鑾儀衛事
尋擢領侍衛內大臣遇 恩詔晉二等公復因索爾噶卒以其職

仍與額爾克戴青併襲晉一等公十年同內大臣鄂齊爾等以佐領敦達禮岱敏互訐事奏請下刑部鞫訊刑部祖岱敏坐敦達禮削職罰鍰敦達禮訟冤得釋部臣及奏請諸臣並坐徧徇降革有差額爾克戴青降爵二等公十四年加少保兼太子太保十六年以家僕陳保毆侍衛阿拉那於市反誣阿拉那持刀擊人額爾克戴青坐徇縱革世爵加銜罷議政及領侍衛任專畱內大臣銜以所襲恩格德爾之三等子子其兄二等輕車都尉囊弩克子併襲爲二等伯十八年六月卒 賜祭葬如例諡勤良康熙六年仍改囊弩克爲二等輕車都尉以額爾克戴青之子岱壽襲二等公

右 國史館本傳

揚古利 子塔瞻 孫愛星阿 曾孫富善

揚古利姓舒穆祿氏世居琿春後隸滿洲正黃旗父郎柱爲庫爾喀部長傾心歸附 太祖高皇帝厚遇之 命其子揚古利入侍郎柱爲部人所害圍其家其妻負幼子納穆泰於背射眾突出以其族來歸未幾庫爾喀舉部內附揚古利察知部人之殺其父者手刃之時年甫十四 上深異之曰見信任且尙主焉始令守汛江上警備嚴密無敢犯者征輝發多壁城阻大水眾難之揚古利率先徑渡大獲而還取納殷部及朱舍里安褚拉庫等路皆有功從征哈達擒其貝勒孟格布祿丁末年遷蜚悠城戶口侍衛扈爾漢率兵二百禦烏拉兵萬人方據山谷結營相持揚古利勵眾曰

吾儕平居相謂與其死於疾無甯死於敵此非臨敵時手持矛突
入斬烏拉兵七人敵稍卻諸貝勒兵踵至併力奮擊大破之征輝
發城及赫席黑木倫等路衝鋒奪險常爲眾先戊申年從征烏拉
金川城城中拒命冒矢石攻之癸丑年再征烏拉攻青王河敵勢
甚銳 太祖遣使持矢召諸將退揚古利獨麾眾薄城疾攻拔之
從擊明兵於界凡破其軍進擊尙閒崖之兵有 旨令被傷者勿
行揚古利獨裹創率佐領兵憑高馳擊大破之天命六年大兵取
瀋陽遼陽皆先登陷陣既定 上嘉揚古利績且憫其傷疾 命
位次八貝勒下統左翼兵授一等子世襲兼 諭勿更臨戰陣十
年明總兵毛文龍兵三百人夜入耀州復率兵殲其眾天聰元年

從征朝鮮有功三年九月同副都統阿山緝逃人至雅爾古遇文龍所遣採獲者斬九十六人擒千總三員從者十六人以歸是月太宗統大兵征明揚古利率護軍兵敗明總兵滿桂軍於都之北十二月師還略通州火其船遂取張家灣明增兵來援薊州我兩紅旗護軍兵少卻揚古利鼓勇直前明兵敗奔 命以兩紅旗規避各貝勒贖罪物予之揚古利卽以分諸將士四年率兵略錦州義州六年 太宗親征察哈爾 命同貝勒阿巴泰等畱守七年六月 上以討明及朝鮮察哈爾三者用兵孰先詢諸大臣揚古利奏宜深入明境朝鮮察哈爾自當歸順且極言用兵之不可緩 上於是決意征明八月 命率兵往略山海關八年五月晉

超品一等公仍管六佐領事世襲不替 賜敕免死罪三次八月
從攻大同宣府拔靈邱縣斬其知縣守備官崇德元年與武英郡
王阿濟格等帥師直入明境攻克關隘下昌平等十二城五十八
戰皆勝俘獲者億萬計二年 太宗親征朝鮮其全羅清忠兩道
兵來援營於南漢城會天大雨雪晝晦揚古利從豫親王多鐸進
擊之追及山嶺有朝鮮敗卒竄崖側竊舉礮中揚古利重傷而卒
年六十有六揚古利歷事 兩朝恩寵極隆 太宗嘗命護軍爲
之守門 賜豹尾槍二令親軍佩之甲卒二十人爲之荷其卒於
軍也 太宗解御衣衣之哭之慟親視含殮比葬復臨奠醮爲置
守冢是年十一月追封武勳王建碑墓道順治中配享 太廟

聖祖復 御製碑文紀其功雍正九年加號曰武誠子二人長阿哈旦以軍功授雲騎尉次塔瞻襲超品公擢置內大臣崇德六年八月 太宗親禦明洪承疇援兵於錦州敵遁 命塔瞻往高橋設伏追擊斬獲甚眾尋以 上移營松山時明總兵曹變蛟棄寨宵遁我兵擊之其敗軍突入 御營塔瞻不能督眾守營降爲一等公改 賜敕爲免死二次順治四年卒子愛星阿襲別有傳

右 國史館本傳

余外祖舒穆祿武勳王諱揚古利以開國功臣封王尙主爲異姓諸臣之冠其功業載余文集中王末年從 文皇帝征朝鮮大捷後巡視山谷天大霧中伏弩而殞按北齊書韓賢破韓木蘭後檢

閱甲仗有餘賊藏屍邊待賢近舉刀斫之中脛而卒與王差彷彿也

右錄宗室昭棧撰

愛星阿

愛星阿滿洲正黃旗人姓舒穆祿氏額駙揚古利孫也順治四年襲父塔瞻一等公八年世祖章皇帝追念揚古利功加給愛星阿三等輕車都尉俸尋授領侍衛內大臣十六年大軍征雲南明桂王朱由榔與其黔國公沐天波等奔緬甸僞晉王李定國奔孟艮僞鞏昌王白文選奔木邦世祖命吳三桂移平西藩屬鎮雲南十七年三桂疏請發兵入緬滅由榔以除邊患愛星阿奉敕

爲定西將軍與都統卓羅果爾欽遜塔護軍統領畢力克圖費雅思哈前鋒統領白爾赫圖等率禁旅會同三桂進征十八年九月督兵次大理秣馬逾月出騰越州取道南甸隴川猛卯十一月至木邦擒白文選所遣之僞副將馮國恩訊知李定國走景線文選與定國不睦屯兵錫箔江濱愛星阿令白爾赫圖費雅思哈果爾欽遜塔畢力克圖等先簡精銳疾馳三百餘里至江濱文選已毀橋遁走茶山大軍繼至結筏以濟別遣總兵馬甯沈應時追勦文選愛星阿同三桂領兵趨緬先是三桂屢檄諭緬人令擒獻由榔緬酋莽猛白盡殺白榔從官沐天波王維恭馬吉翔魏豹等數十人密使人守由榔謀生擒以獻十二月大軍次舊挽坡離緬城六

十里緬使人詣軍門請遣兵百人薄城愛星阿遣白爾赫圖率前鋒百人進次蘭鳩江濱復令畢力克圖等率護軍二百居後策應緬人聞大兵將薄城以船載由榔與其親屬及故從官妻女獻之軍前時文選爲馬甯等追及於猛養度不能脫率眾數千降定國竄死猛獵康熙元年奏捷 聖祖仁皇帝優旨嘉獎 諭以所俘獲委三桂區處愛星阿振旅還京仍爲內大臣加少保兼太子太保增紀軍功 予世襲一等公 敕書三年二月卒 恩卹其家白銀三千兩 賜祭葬如典禮諡敬康子富善襲一等公爵十九年授領侍衛內大臣三十五年二月 聖祖以噶爾丹背約肆逞分路進討 命撫遠大將軍費揚古出西路 親統大軍出中路

富善領鑲紅旗兵隨 御營 駕駐沙河 諭富善曰古北口一路兵燬以爾統率所過城池村舍遵朕法令毋絲毫擾累其有以捕獸馳騁竭馬力者並飭禁之四月 駕駐西巴爾臺離噶爾丹所居之克魯倫河計程五日議者謂宜俟西路兵會剿富善奏言西路兵至尙遲時日恐賊聞風逃竄卽以中路兵剿賊未爲不足宜乘其不備速遣精兵擊之奏入稱 旨 命仍進征克魯倫河會噶爾丹知 上親征盡棄其廬帳器械潰竄 上已密諭費揚古等絕其歸路先整兵特勒爾濟口以待陣斬二千餘級噶爾丹僅以身免厄魯特部眾千餘來降 上仍命班師每 行營閱選駝馬徵輸芻粟富善承 旨以行咸當 上意敘功加太子太保

嘗扈 蹕至會岐口有疾 上親臨視 賜醫藥四十七年卒
賚白金二千兩 遣官經紀其喪 予祭葬如典禮以其子海金
襲一等公雍正八年 敕建賢良祠愛星阿富善並入祀乾隆元
年追諡富善曰恭懿

右 國史館本傳

愛星阿姓舒穆祿氏滿洲正黃旗人世居琿春地祖武勳王揚古
利父一等公塔瞻順治四年愛星阿襲父公爵尋擢領侍衛內大
臣十七年 特命爲定西將軍討僞晉王李定國於雲南與平西
大將軍吳三桂統官兵分道並進十八年會於木邦李定國先奔
景線僞鞏昌王白文選遁據錫波憑江爲險我軍自木邦晝夜行

三百餘里臨江造筏將渡白文選復奔茶山遣總兵官馬甯等率
偏師追之僞桂王朱由榔逃匿緬甸時軍中奉 世祖諱愛星阿
集諸將議進止吳三桂意欲養寇以緬國在化外山谷險遠且瀘
水阻隔饒運難致爲辭愛星阿正色折之曰我等奉 命至是不
得由榔何以卒事雖上天入地亦當追至豈可中道廢 先帝之
命於是麾眾徑前旣行三日吳三桂始率兵繼進阿洼城遺書緬
酋諭以毋匿逋逃能執送自效者當爲退軍無秋毫犯緬酋震懼
執朱由榔獻軍前斬僞華亭侯王維恭等百餘人而總兵官馬甯
等亦追及白文選於猛養文選率所部降滇南平康熙元年以
聞 聖祖深嘉之在事有功者並加優敘軍還愛星阿仍官內大

臣三年卒 賜祭葬如制謚敬康

右 國史賢良小傳

英誠公愛星阿揚武勳王之孫也同吳三桂入緬擒獲明主由擲有功績任領侍衛內大臣初索相國額圖以椒房擅寵明太傅珠時爲侍郎因交結索公得以見知於 仁廟愛公謂索曰吾視明公才智皆出君上今雖因君見用而其志殊有所畏悞蓋忌公同事故也他日齟齬公者必明某也索不悟其言其後明太傅招引高江村徐健庵輩結爲朋黨索終爲其所擠落職抑鬱以終果如愛公之料云

右錄宗室昭槩撰

按公名愛星阿
一作艾星阿

富善

富善滿洲正黃旗人一等公愛星阿子康熙初襲爵尋授領侍衛內大臣寵遇優渥嘗扈 蹕至會岐口遇疾 聖祖往視取所佩良藥授之三十五年 聖祖親征噶爾丹分三路進討富善隨中路 御營參預機務多所規畫一切芻粟輓運及軍行進止皆命傳宣時從征軍士各分別營隊富善領鑲紅旗兵爲一營 聖祖念古北口兵眾 特令率之以行富善遵 諭禁侵擾戒馳騁紀律嚴明軍中肅然大軍次克魯倫河眾欲緩行以待西路兵集富善建議噶爾丹近在巴顏烏蘭我師已偪賊營宜乘不備速擊之師進噶爾丹聞風驚怖棄廬帳奔潰明年復從征閱選駝馬籌

畫軍餉事皆辦給與大學士阿蘭泰撰招撫噶爾丹敕文稱旨
 賊既平敘功加太子太保富善誠實端謹嘗奉命修理陵寢刻
 日竣工每遣代郊廟大祀恪勤將事聖祖深器重之四十
 七年卒賜白金二千兩令內侍經紀其喪予祭葬如禮乾隆
 元年追諡恭懿

右 國史賢良小傳

按公名富善一作福善

額參 子魏武

額參滿洲正黃旗人姓吳雅父額柏根 國初來歸額參初授膳房總領歷任內大臣崇德元年十二月從 太宗文皇帝征朝鮮適朝鮮遣人致書於明額參遇而射之立斃 詔嘉其能卽以其人所乘馬 賜之二年正月同額駙公揚古利率兵大破朝鮮於南漢城追入山敗卒伏崖間竊發烏槍中揚古利傷隕尋有越山去者或言彼卽傷揚額駙者也 上命額參追之次日以其首來獻 諭獎之三年隨睿親王多爾袞證明至山東克濟南臨清還攻大同均在事有功授世管佐領卒長子魏武官至護軍統領是爲 孝恭仁皇后之父雍正元年敕曰額柏根係本朝舊族勩業

名家在 太祖高皇帝時撫育禁庭視同子姪額參歷事 三朝
軍功懋著魏武天挺俊傑啟後承先厚德鍾靈篤生 聖母宜加
峻秩以協彝章俱著追封一等公卽以魏武子博啟承襲並令世
襲罔替乾隆十八年博啟卒子相永襲二十三年以病解任子西
銘襲乾隆四十三年奉 旨向來后族承恩世襲俱係一等公此
等特因椒房至戚恩澤加封以視佐命功臣櫛風沐雨拓土開疆
者實難並論況宗室王公以近支恩封者尙以世次遞降而外戚
轉得崇封延世未免過優著俱改爲三等公世襲罔替於是西銘
改三等公四十六年授蒙古正黃旗副都統四十八年授內大臣
四十九年九月出使朝鮮五十年正月舉行千叟宴西銘未還京

特命給賞七月授江甯將軍五十二年卒於任

右 國史館本傳

吳巴海

吳巴海姓瓜爾佳氏世居烏拉後隸滿洲鑲藍旗天命三年從太祖高皇帝征尼堪外蘭以功授佐領天聰元年四月隨大貝勒阿敏征朝鮮攻義州與副都統阿山穆克譚等相繼登城破之五月從太宗文皇帝征明錦州敵犯我汛地我軍少卻吳巴海殿後督戰擊敗其眾五年三月同副都統蒙阿圖征瓦爾喀進師黑庫倫及額勒約束收降部眾數千人而還 賜號巴圖魯六年六月大軍征察哈爾察哈爾聞我師入境攜其部眾牲畜渡河以遁夫巴海奉 命追捕逃人遇察哈爾兵五人斬之並獲其馬匹牲畜從征旅順口破敵紀功旋率師征烏扎喇分遣八旗軍士每二

旗合兵爲一道四道並進會敵方漁於握里河吳巴海麾旗直前
斬三百餘人獲其輜重七年二月偕佐領郎格赴朝鮮互市獲瓦
爾喀部長族屬十五人以歸復同參領吉思哈率兵三百往征東
海虎爾哈部明年五月奏捷俘獲無算十二月同佐領荆古爾代
率兵四百再征瓦爾喀降其屯長分得里復收阿庫里尼滿部眾
千餘人凱旋 命大臣迎勞卽以所獲 賜之九年十月隨貝勒
岳託領兵鎮守歸化城時土默特人來言其部長博碩克圖之子
使喀爾喀陰與明通岳託遣吳巴海同參領阿爾津等四人要於
路毛罕洩其謀喀爾喀人潛遁吳巴海追執之並獲明使者以獻
毛罕者博碩克圖子乳母之夫也初從土默特來歸既有叛志私

稱博碩克圖子爲汗自稱爲貝勒且殺我察哈爾降人至是擒斬之師還復往追蒙古逃人俄綽克斬獲有功明年投副都統加世職一等輕車都尉崇德元年六月晉三等男十二月喀木尼漢部葉雷等叛挈其妻孥亡去吳巴海率甯古塔及科爾沁兵追之數十日無所見遇宿雁三射其一雁負矢而飛墮往取之見賊營遺火躡其蹤及之於溫多獲賊妻子葉雷逃入山追及圍之諭使降不服發矢射之葉雷將注矢有狐起於前觸葉雷弓弓墜遂殪葉雷並誅其黨捷聞太宗嘉其功命都統等迎勞二年六月敘功晉三等子賜衣服僕馬莊田三年七月以隱匿本旗罪人罷副都統任先是從征朝鮮吳巴海以所轄戰艦不列汛地又往

圍南漢山城移營時士卒離伍參領沙爾虎達擊敗敵人又詭言
不知論死得 旨寬免至是與副都統吳善征歸化城以本旗廝
卒盜米徇隱不究論罪折贖四年七月卒無子嗣子傅喀襲一等
輕車都尉弟夏色姪錫漢分襲兩騎都尉

右 國史館本傳

阿岱 孫巴朗 托班

阿岱姓鄂爾果諾特世居喀爾喀 太祖高皇帝時來歸隸正黃旗蒙古 予三等輕車都尉世職 太宗文皇帝天聰元年正月授參領同佐領恩格圖等駐伊蘭布哩瑚防游牧蒙古率部卒巡徼海濱猝遇明兵擊斬千人擒一遊擊以歸明水師千餘犯海州復率兵三百馳擊多斬馘十月率駐防兵還 上親賜酒勞之敘功晉世職二等輕車都尉累遷至右翼蒙古都統八年五月上證明阿岱率右翼以從七月隨貝勒代善自喀喇鄂博攻得勝堡同兩紅旗都統尼哈里葉臣等力戰殪明守卒殆盡進略大同會大軍於朔州閏八月師還遇蒙古逃人四百七十人攜以歸 命

分給八旗是月喀爾喀部長族屬有爲察哈爾眾邀殺於路者惟一人得脫入奏 上遣阿岱與都統武納格率兵二百人往緝誅二十餘人崇德元年五月隨武英郡王阿濟格征明攻克定興寶坻等城又設伏邀擊三屯營援兵盡殲之九月凱旋籍所獲以獻得 旨優獎尋部議初入明邊攻昌平時阿岱所部退縮及旋師不收後隊猝遇敵敗走坐罰鍰奪俘獲十二月 上親征朝鮮阿岱同都統譚泰樹雲梯攻城先登朝鮮王李侗棄城遁三年隨貝勒岳託征明攻密雲東北牆子嶺明總督吳阿衡以六千人來援自領立寨分步騎爲三隊我師克臺堡十一座阿岱與都統恩格圖等潛率騎兵踰嶺突入分兵夾擊大敗敵眾四年卒孫布卜德

襲 世祖章皇帝順治七年 恩詔晉一等輕車都尉卒以阿岱
次子善丹襲九年卒無子以色卜德弟巴朗襲兩遇 恩詔晉爵
至三等男十一年巴朗任參領隨靖南將軍珠瑪喇率兵赴廣東
征僞晉王李定國時定國寇新會巴朗隨大軍自三水馳擊敗賊
萬餘定國復糾步騎四萬分據山峪拒戰巴朗涉險薄賊營鏖戰
賊眾皆潰竄凱旋敘功晉爵二等男十三年卒以其弟托班襲
聖祖仁皇帝康熙十二年逆藩吳三桂反四川郡邑叛應之托班
任參領隨前鋒統領穆占由漢中入川討賊十三年三月擊敗叛
鎮譚洪於陽平關乘勝抵朝天關擊敗賊將石存禮萬餘眾連破
其木城十一月進征保甯叛鎮吳之茂立寨斷我餉道托班射卻

賊渠隨穆占率眾奪寨又擊賊將王屏藩等屢敗之於郿嶺龍潭
驛諸處敘功晉爵一等男三十三年卒子錦保襲

右 國史館本傳

康喀賚 子錫納海

康喀賚滿洲鑲藍旗人姓瑚爾喀氏 太祖高皇帝時由新建謨率族來歸會初立佐領使統其一屢從征伐天命十一年 太宗文皇帝御極入旗各設總管政務大臣一是爲八大臣又每旗設理事聽訟大臣二是爲十六大臣康喀賚與舒賽並任鑲藍旗理事聽訟大臣天聰元年正月有蒙古十有五人自奉集堡叛逃康喀賚同正白旗大臣阿達海鑲白旗大臣吳拜追至都爾弼十五人還關吳拜中槍不退康喀賚與阿達海併力奮進盡斬之事聞得 優賚五年七月始設六部每部以一貝勒總管部務次設承政以康喀賚與蒙阿圖祝世充囊努克並爲工部承政崇德三

年七月重定官制每部止畱承政一員康喀賚遇裁五年十一月
授鑲藍旗滿洲副都統尋卒子錫納海天聰九年隨睿親王多爾
袞征察哈爾招降林丹汗子額哲以還尋選每旗二十人爲王府
護衛錫納海與馬崇德三年八月隨睿親王征明越燕京由臨清
直抵濟南五年十一月隨鄭親王濟爾哈朗圍明錦州還鄭親王
以錫納海勤幹奏授二等護衛會父卒襲管佐領六年三月復隨
鄭親王圍錦州克其外城明總督洪承疇率兵赴援錫納海同前
鋒統領努山偵探至杏山遇哨騎擊敗之擒一人以歸我左翼兵
設伏松山北以前鋒兵誘之比至伏發擊敗其援兵錫納海與侍
衛喇世塔等自錦州還盛京奏捷復赴軍襲獲甯遠哨卒 世祖

章皇帝順治元年隨睿親王入山海關擊流賊李自成兵二十餘萬賊遁走錫納海率兵追之至望都奮力勦擊多斬馘二年敘征錦州杏山及平流賊功 予雲騎尉世職遷二等侍衛六年隨睿親王平湖南凱旋兼任刑部郎中尋授一等待衛兩遇 恩詔晉世職至三等輕車都尉十七年擢鑲藍旗滿洲副都統 聖祖仁皇帝康熙元年八月同靖西將軍穆里瑪征鄭襄流賊郝搖旗李來亨等三年會陝西湖廣四川三省兵勦平之斬搖旗來亨遁走茅麓山自焚死十年錫納海以病乞休 允之十二年三月卒於家年五十有七 賜祭葬如例以孫道福色襲世職

右 國史館本傳

岱松阿 子阿納海 巴漢

岱松阿滿洲正紅旗人姓佟佳氏世居雅爾湖 太祖高皇帝時
授佐領 太宗文皇帝天聰二年隨貝勒岳託征明錦州獲人戶
牲畜復攻克十三站以東二十餘臺岱松阿同佐領巴什泰先還
奏捷七年 命同參領英俄爾岱往朝鮮互市且齎 敕責國左
李侖背約附明侖惶恐上書謝罪八年以克副任使 予騎都尉
世職九月隨副都統巴奇蘭征黑龍江敘功加一雲騎尉崇德元
年隨英親王阿濟格征明昌平有俘獲二年駐防蓋州躡擊明兵
旅順口獲敵船二斬二人擒七人以獻 命以所獲銀布賚之六
年四月卒子阿納海襲世職任佐領順治二年隨大軍勦流賊李

自成於武昌追至富池口獲賊船三年隨肅親王豪格征流賊張獻忠師至西安聞叛鎮賀珍以馬步二千拒守雞頭關阿納海與護軍統領鼇拜等攻破賊營進征四川屢擊敗獻忠部眾五年授工部理事官尋兼任參領六年隨征叛鎮姜瓖於大同掘壕圍城賊數犯我汛亂阿納海同都統噶達渾往來禦擊皆克捷七年九年三遇 恩詔晉世職至一等輕車都尉十八年山東土賊于七作亂阿納海隨靖東將軍濟席哈往征敗賊黨喬玉季於連山賊復乘夜來犯我營阿納海奮力拒戰中創卒晉爵三等男 子祭奠如典禮分世職爲二以其子愛音布襲二等輕車都尉而以岱松阿次子巴漢襲騎都尉兼一雲騎尉巴漢初任佐領隨安南將

軍明安達哩駐防荊州聞海賊犯江甯移師赴援擊敗僞都督楊文英等康熙五年愛音布卒無子卽以所襲之職併於巴漢復爲三等男十三年九月以參領隨副都統碩塔穆森等征逆藩耿精忠師次安慶聞賊陷建德巴漢率兵偵探至赤頭關賊拒戰擊之潰導大軍進攻賊開北門遁遂復縣城十一月賊四千餘眾犯南康巴漢隨碩塔穆森等擊敗之斬級千餘獲器械無算十六年隨鎮南將軍莽依圖江甯將軍額楚等征逆藩吳三桂由廣東進攻廣西破僞總兵蔣雄於樹梓墟十八年僞將軍吳世琮犯南甯大軍往援世琮率眾渡江屯新甯州西山下列鹿角拒戰巴漢隨莽依圖等進剿斬獲無算世琮負重傷遁南甯圍解二十年隨征南

大將軍賴塔規復雲南敗賊將何繼祖等於西隆州奪石門坎黃草壩諸要隘遂趨曲靖會湖南四川兩路兵攻克雲南城復隨都統希福等追剿賊將馬寶巴養元等於楚雄之烏木山敘功晉爵一等男二十九年三月卒子巴顏圖襲爵

右 國史館本傳

舒賽 子西蘭 孫席特庫

舒賽世居薩克達以地爲氏後隸滿洲鑲藍旗天命四年從太祖高皇帝征明敗其總兵馬林等於尙閑崖授騎都尉世職隨征瓦爾喀俘獲甚眾晉二等輕車都尉太宗文皇帝卽位擢列十六大臣佐理鑲藍旗事天聰元年隨征朝鮮凱旋奉命同都統阿山等率師駐防義州八年太宗親統師征明以鄭親王濟爾哈朗畱守盛京舒賽同副都統蒙阿圖等副之初舒賽率兵攻城輒被縣甲先登太祖嘉其勇又慮其輕進諭止之舒賽益奮勉前後攻克十六城至是賜敕晉三等男崇德六年十月卒世祖章皇帝順治十二年追諡壯敏立碑墓道子西蘭初任佐領

天聰八年授騎都尉世職順治元年擢任護軍參領隨副都統鄂羅塞臣等征黑龍江生擒二十餘人尋隨豫親王多鐸討流賊李自成師次潼關賊眾抗拒西蘭三戰皆捷明年隨貝勒博洛征江南招降松江府復隨征福建攻克平和縣有功加一雲騎尉遇

恩詔晉三等輕車都尉七年卒次子阿蘭襲西蘭長子席特庫崇德六年襲其祖舒賽三等男爵八年任參領隨鄭親王征明前屯衛同參領覺善等擊敗敵兵以礮克城斬其總兵李輔明順治元年隨大軍入山海關敗李自成兵進征山西助都統葉臣等攻克太原府二年隨英親王阿濟格征陝西敗賊於延安自成遁湖廣追剿至安陸與護軍統領鼇拜哈甯阿等連挫賊眾敘功晉二等

男五年四月卒子常舒襲

右 國史館本傳

國史館本傳

三

安達立 子阿積賴

安達立滿洲正紅旗人世居葉赫姓納喇氏 太祖高皇帝時遣兵刈鐵嶺田禾有降明蒙古拒阻安達立先驅擊走之 太宗文皇帝時隨貝勒薩哈璘駐防牛莊追斬叛逃蒙古數人大軍攻明永平副都統葉臣率二十四人冒礮矢先登安達立與焉得 旨獎賚師旋同參領圖魯什偵敵建昌夜遇敵邀戰我軍士有中矢墜馬者安達立援之出尋擢前鋒參領隨大軍入明邊攻崞縣城領所部先登繼復率四十人伏忻口擊敵騎二百擐燾三生擒六人獲馬五十餘及出邊都統圖爾格戰捷敵奔竄安達立邀擊逐敵入壕殲殪甚眾崇德元年敘功授騎都尉世職擢任正紅旗蒙

古副都統三年冬隨貝勒岳託征明距牆子嶺數里聞敵踞隘口
備甚固安達立同都統恩格圖率所部蒙古別趨嶺右陟高峰入
邊遇敵騎七千迎戰先眾奮擊斬級無數遂越燕京略山東明年
春師旋由青山口出邊擊敗追躡賊眾攻克山巔一臺五年隨大
軍圍錦州明兵自松山杏山來犯安達立連戰皆捷六年復圍錦
州明總督洪承疇集援兵駐松山安達立率兵破其三營敵自塔
山來犯安達立奪其揆牌鏖戰至日暮敵潰走翌日松山敵犯我
右翼營安達立復戰卻之七年敘功加一雲騎尉尋卒年六十有
三子阿積賴襲世職任護軍參領 世祖章皇帝順治元年隨大
軍入山海關擊敗流賊李自成追至望都復隨都統葉臣擊敗賊

黨於懷慶進攻太原屢挫拒戰賊眾又分兵敗賊於黃河渡口尋署正紅旗蒙古副都統隨英親王阿濟格攻延安城賊劫我輜重阿積賴擊之走追擊自成於武昌屢敗賊壘聞自成竄入九宮山復搜剿之翦其黨甚眾敘功晉世職爲三等輕車都尉四年兼任刑部理事官五年隨鄭親王濟爾哈朗征湖南署護軍統領分兵徇道州明桂王朱由榔以其眾踞永安關阿積賴破其柵壘皆潰遁獲馬二十餘七年凱旋 賚白金三遇 恩詔晉世職至一等輕車都尉兼一雲騎尉十二年卒子海都襲

右 國史館本傳

阿爾沙湖 兄子果爾沁

阿爾沙湖姓瓦三氏初爲察哈爾林丹汗護衛天聰六年 太宗
文皇帝征察哈爾林丹汗竄奔唐古特阿爾沙湖率所屬四十餘
戶渡哈屯河東歸隸鑲白旗蒙古 予三等輕車都尉世職崇德
三年十月隨貝勒岳託證明由牆子嶺入邊屢敗敵乘勝至山東
攻克濟南等處明年三月師還出邊擊敗太平寨敵兵五年同前
鋒統領錫特庫征索倫部斬獲甚衆生擒部長博木博郭爾及其
妻子六年大兵圍明錦州有松山馬兵劫我紅衣礮阿爾沙湖力
戰卻之又敗明總督洪承疇三營步兵論功晉世職爲一等輕車
都尉八年卒以兄子果爾沁襲果爾沁初任佐領崇德元年從

上征朝鮮偕侍衛二十人敗敵兵於桃山村 世祖章皇帝順治
元年隨睿親王多爾袞入山海關擊敗流賊李自成敘功加一雲
騎尉尋授護軍參領五年擢鑲白旗蒙古副都統屢遇 恩詔晉
爵至二等男十七年擢本旗都統時明桂王朱由榔竄緬甸而僞
晉王李定國僞鞏昌王白文選分據孟艮木邦假擁戴由榔爲名
復集潰眾出掠 上命內大臣公愛星阿爲定西將軍率師會平
西王吳三桂往征而以果爾沁及都統卓洛遜塔副之且 敕諭
愛星阿凡軍中機宜皆與果爾沁會議而行十八年九月果爾沁
隨愛星阿至大理府秣馬逾月出騰越州取道南甸隴川猛卯十
一月師次木邦偵知定國走景線而文選遁據錫箔江愛星阿令

果爾沁及遜塔護軍統領畢力克圖賈雅思哈前鋒統領白爾赫圖等簡精銳疾馳三百餘里至江濱文選已毀橋遁走茶山總兵官馬甯追至猛養文選窮蹙乞降大軍次舊挽坡緬人以由榔獻乃旋軍 聖祖仁皇帝康熙三年敘功晉爵一等男兼一雲騎尉尋列議政大臣八年調本旗滿洲都統九年二月卒 賜祭葬如典禮諡襄敏子鄂爾輝襲爵

右 國史館本傳

額琳奇岱青

子扎木素

額琳奇岱青姓博爾濟吉特氏先世居翁牛特部額琳奇岱青爲
察哈爾部宰桑 太宗文皇帝天聰六年大軍征察哈爾林丹汗
驚懼率眾奔土默特部旋自竄唐古特部而其舊部人眾相繼潰
散額琳奇岱青欲歸我 朝會察哈爾部多爾濟塔蘇爾海率所
屬遊牧與大軍遇倚山拒戰敗遁額琳奇岱青追及與之謀歸順
八年八月 上征明大同凱旋出尙方堡額琳奇岱青遂同多爾
濟塔蘇爾海率七百戶來歸 上遣大臣率兵衛其家屬至盛京
賜賚優厚分隸正白旗蒙古崇德元年 予二等子爵三年隨睿
親王多爾袞征明由青山口毀邊牆入越燕京趨山東額琳奇岱

青遇敵輒奮戰克捷六年隨鄭親王濟爾哈朗圍錦州明兵自松
山一再來犯又欲劫我紅衣礮額琳奇岱青皆先眾擊卻之明總
督洪承疇集步騎十三萬援錦州列營松山額琳奇岱青偕眾擊
敗十三營步卒七年敘功晉爵一等子世襲罔替八年卒以其子
扎木素襲扎木素尋授散秩大臣順治十八年十二月 聖祖仁
皇帝加恩諸大臣之舊自察哈爾來歸者扎木素與內大臣噶爾
瑪散秩大臣沙哩岱等並 賜莊田奴僕康熙三年三月擢內大
臣六年七月卒 賜祭葬如例以其子根敦扎布襲

右 國史館本傳

揚善

揚善姓瓜爾佳氏費英東第四弟音達戶齊之子也 太祖高皇帝時以其祖索爾果歸附功授騎都尉世職初隸滿洲鑲黃旗後改隸鑲白旗 太宗文皇帝卽位設十六大臣以揚善佐理鑲黃旗事尋任護軍統領三年從大軍征明北京遵 上方略衝鋒破堅所至有功五年攻大凌河城與明監軍道張春戰冒矢石先眾入陣擊敗敵兵胸腕中創各一晉三等輕車都尉擢內大臣六年上統大軍親征察哈爾揚善從時林丹汗旣率眾潛遁其部眾近明界沙河堡者悉逃入堡內揚善奉 命率兵六十人偕通事顧祿古齋 諭索取之明人驚懼盡歸我察哈爾逃人崇德二年征

大同蒙古部人有被掠者悉取以歸旋授議政大臣六年隨鄭親王濟爾哈朗圍錦州以城內明兵出犯鑲黃旗官兵退怯避敵揚善坐徇隱論罰贖得旨寬免順治元年四月都統何洛會希睿親王多爾袞意誣告肅親王豪格言詞悖妄揚善不力爲諫阻又不舉首與其子羅碩俱棄市羅碩初以能通滿洲蒙古漢語太宗文皇帝擢居文館崇德七年授國史院學士尋任前鋒參領兼刑部理事官凡在文館軍營傳宣諭旨往來報捷以及問罪朝鮮審斷獄訟罔不當上意至是以平素出入肅親王府第坐詔附爲亂論死順治八年世祖章皇帝念揚善父子之無辜也治何洛會罪命復揚善輕車都尉世職以其孫霍羅襲

右 國史館本傳

三

四

巴都哩 從子海都

巴都哩滿洲鑲藍旗人先世居性佳以地爲姓父剛格當太祖高皇帝時同其族人福瑚等來歸巴都哩屢從征任佐領兼參領太宗文皇帝天聰八年大軍征明大同府巴都哩同宗室拜音圖爲嚮導當未入邊牆之先獲察哈爾宰桑四人以歸尋擢護軍統領崇德元年大軍征朝鮮豫親王多鐸統師攻克其國都巴都哩奉命同護軍統領鞏阿岱別率兵眾往濟其師進圍南漢山城屢敗敵兵二年從上行圍葉赫巴都哩與護軍統領哈甯阿所屬兵眾前後亂行上訓責之曰凡獵於布圍時卽須分別整齊以次前進合圍始能得獸今爾等不加約束前後行走參差何以

使獸不突逸此皆爾等庸懦無能所致今次姑寬宥後若再違必從重治罪三年隨睿親王多爾袞證明從密雲東北毀邊牆入越燕京趨山東克濟南府明年春凱旋出青山口明邊將以眾追襲巴都哩率兵還戰護軍尼喀遜被創墜馬巴都哩令護軍校拉卜什希遣人護之歸因付與護軍圖罕旋爲圖罕棄於路巴都哩戰卻敵行巴達乃知之不及還攜尼喀遜事 聞 命鞭圖罕百貫耳鼻以徇巴都哩不早察之責罰如例六年授兵部參政尋兼任鑲藍旗滿洲副都統八年同副都統鄂羅塞臣征黑龍江招降圖瑚勒禪等城順治元年五月師旋 世祖章皇帝遣侍郎明安達哩往迎宴勞以所獲戶口一千九百有奇分隸入旗貂狐水獺等

皮給從征將士敘功 予雲騎尉世職十一月擢鑲藍旗滿洲都
統卒無子以叔父之子杭嘉襲尋亦卒子海都襲海都初任佐領
兩遇 恩詔晉世職爲騎都尉兼一雲騎尉十一年隨貝勒屯齊
出征湖南擊敗僞秦王孫可望步騎賊眾於岔口賊復集潰眾來
襲我正黃旗正紅旗兩營海都奮擊卻之十五年隨信郡王多尼
征雲南擊敗僞晉王李定國僞鞏昌王白文選於七星關 聖祖
仁皇帝康熙十五年海都任參領署護軍統領事隨安親王岳樂
征逆藩吳三桂師至袁州城賊將夏國相等踞萍鄉縣拒戰海都
領兵擊破之隨安親王至岳州十六年同都統霍特率兵進擊僞
總兵陳宗啟等於平江縣賊眾潰奔我師奮勇追擊賊潛出伏拒

戰海都復擊敗之又敗賊將邱義朱永昇等於七家洞柏營等處
尋以疾卒二十五年敘功 予雲騎尉世職合所襲之職為三等
輕車都尉以其子穆錫屯襲

右 國史館本傳

達爾漢 子鄂羅塞臣 孫勒貝

達爾漢姓郭絡羅氏初隸滿洲鑲黃旗後改隸正藍旗父揚舒爲
沾河寨長 太祖高皇帝時率所部來歸尙長公主爲額駙從征
尼堪外蘭攻薩爾滸城以計擒其長納米納而誅之嗣從征屢有
功及卒 太祖親臨其喪達爾漢爲長公主所出初任佐領尙和
碩公主爲額駙從征葉赫誅其貝勒錦台什積功授一等男 太
宗文皇帝卽位擢列入大臣任鑲黃旗都統隨大貝勒代善征扎
魯特部單騎追擒其台吉以歸復征棟揆俘古穆楚赫爾杜喀爾
岱青多爾濟三塔布囊父子晉爵三等子天聰元年隨大軍征朝
鮮克義州定州安州斬其府尹李莞等朝鮮國王李侗請議和達

爾漢與都統納穆泰等莅盟師旋 上賜宴勞之復從 上征明
攻錦州有功先是貝勒阿巴泰因 賜宴時不得與大貝勒並列
使達爾漢以恥與子弟列坐意代奏 上諭達爾漢曰爾宜勸諭
之奏朕何爲者至是察哈爾使臣昂坤等來歸設宴阿巴泰復使
納穆泰申奏 上以達爾漢有啟導貝勒之責前此不能勸諭而
以其言入奏 命解都統任尋復之三年從攻遵化率鑲黃旗兵
攻北面之西克其城四年赦漢柰曼諸蒙古兵從征明攻昌黎不
克 詔遣達爾漢與都統喀克篤禮等率兵千人馳赴應援達爾
漢進攻又不克會永平灤州皆下有 詔班師遂焚其近城廬舍
而還五年三月 上諭八大臣指陳政事關失達爾漢奏曰臣以

微賤之軀拔至大臣之列如 國家果有過舉豈敢不言既無闕
失指諫何從至於小民懷怨實有自來豈有政治和平而致怨者
臣請自今洗心正己矢公審斷以協羣情凡有所見盡心直告以
圖報稱而已七月從攻大凌河城率本旗兵圍北面之東深溝築
壘與都統楞額禮等環城固守八月明人以步騎五百出戰達爾
漢率八十人擊敗之越日敵復出兵誘戰又率本旗兵邀擊明兵
墮壕死者百餘人六年從 上親征察哈爾軍次哈納崖達爾漢
從者蒙古二人於軍中盜良馬六潛奔察哈爾告以大軍至林丹
汗舉部西奔驅歸化城富戶及牲畜盡渡黃河而去達爾漢坐家
人漏洩軍情降爵一等男七年明登州參將孔有德以所部及戰

艦來降達爾漢與都統篇古駐兵江岸守其船八年復從征察哈爾遂入明上方堡毀其邊牆進略朔州分兵直抵宣府右衛是歲命免功臣徭役達爾漢與焉並增給佐領下人戶九年 上遣諸貝勒統師征明山西 命達爾漢同都統阿山等營於要地制明甯錦兵使不得西援途遇敵兵八百共擊敗之斬錦州副將劉應選凱還得 賞所俘獲崇德元年五月都統篇古拜音圖譚泰葉臣阿山石廷柱奏劾都統伊爾登讓謗諸王及大臣下法司勘訊達爾漢助伊爾登訴辨以證辭先後互異坐罰鍰是月武英郡王阿濟格征明攻順義縣達爾漢率本旗兵先登敘功晉爵一等子尋以克順義府城不謀固守致敵復攻陷且縱兵離伍爲敵所殺

坐罰鍰奪所俘獲十二月隨征朝鮮明年部議朝鮮王李倬謁
上時達爾漢亂班釋甲又於上前言不飲酒出輒私飲並論其
失察徇情諸罪應罰鍰追奪 賞賜得 旨罰鍰以懲六年隨鄭
親王濟爾哈朗等征錦州師還部議達爾漢於王召議禦敵時不
卽至及護軍統領鼇拜擊敗明步兵達爾漢妄謂敵兵爲豫親王
多鐸所敗且嗾副都統翁阿岱等與諸護軍爭功坐革世職並罷
都統任順治元年卒年五十有五長子鄂羅塞臣別有傳

右 國史館本傳

鄂羅塞臣

鄂羅塞臣滿洲正藍旗人姓郭絡羅氏額駙達爾漢長子也天聰

元年從其父征明錦州有斬獲尋任護軍參領三年從征明燕京同護軍統領哈甯阿破明巡撫袁崇煥營 太宗文皇帝嘉其善戰授騎都尉世職四年署都統事隨貝勒阿巴泰等鎮守永平因取糧遇明兵自開平衛迎戰擊敗之五年從征明圍大凌河城連敗城中出戰兵八年隨貝勒薩哈廉略明山西邊境與崞縣兵遇鄂羅塞臣從第三隊先眾擊敵斬四人獲其馬累功晉二等輕車都尉崇德元年從征朝鮮與副都統薩穆什喀等敗其援兵二年列議政大臣三年十月隨豫親王多鐸征明甯遠錦州有擒斬謀卒功十一月豫親王至中後所將往會鄭親王濟爾哈朗軍爲明總兵祖大壽所襲參領翁克等及隨征土默特部兵先奔鄂羅塞

臣同護軍統領哈甯阿等且戰且退士卒有死傷者論罪罰贖革世職六年三月隨征明圍錦州以聽從睿親王多爾袞等私遣兵丁歸家及離城遠駐坐罰鍰六月復隨鄭親王圍錦州殲其樵採者九人連敗明總督洪承疇松山援兵是時祖大壽據錦州突糾步兵出城來犯我鑲黃旗營我左翼三旗騎兵多避敵鄂羅塞臣同參領阿桑喜率護軍直前奮擊敵挫衄乃遁肅親王豪格欲袒庇三旗之未戰者睿親王附和之皆使人謂鄂羅塞臣曰爾所敗明兵勿言皆爾護軍力亦勿言戰時未見騎兵也於是功罪槩勿論明年事 聞 上命罰睿親王白金五百肅親王白金千兩于鄂羅塞臣以旌之復授二等輕車都尉世職擢任副都統八年

同參政巴都禮等征黑龍江克之撫定其地順治元年凱旋世祖章皇帝遣侍郎明安達禮往迎宴勞以所獲戶口分隸八旗二年隨大軍擊流賊李自成師抵潼關賊嬰城固守鄂羅塞臣奮勇先登殺賊無算五年正月命統兵駐守滄州十二月復率兵從英親王阿濟格軍前協剿叛鎮姜瓖六年以敘錄世效勞績舊臣晉一等輕車都尉詔以鄂羅塞臣爲和碩公主子予特恩晉爵三等男世襲罔替是歲七月擢正藍旗蒙古都統尋兼任刑部侍郎兩遇恩詔晉二等子七年坐讞獄徇情罷侍郎任明年授都察院左都御史尋解任專管都統事十三年以疾乞休不允十六年同安南將軍明安達禮率兵駐防荊州會海賊鄭成功犯江甯

鄂羅塞臣同明安達禮等赴援戰於揚子江中海賊敗竄十七年
還京仍任都統康熙三年卒 贈太子太保 賜祭葬諡果敏子
鄂忒渾襲

右 國史館本傳

勒貝

勒貝滿洲正藍旗人姓郭絡羅氏父鄂羅塞臣官蒙古都統諡果
敏有傳勒貝初授侍衛兼佐領順治十八年由一等待衛授正藍
旗蒙古都統康熙八年調正藍旗滿洲都統十六年三月吳逆未
平 上以簡親王喇布出師江西久無功其參贊大臣均不勝任
命勒貝及護軍統領哈克三副都統舒庫往代之十月鎮南將軍

四庫全書 卷一百一十三
莽伊圖由廣東進定廣西 命勒貝偕江甯將軍額楚守韶州十
二月 詔曰韶州地屬緊要一切軍務若令簡親王轉奏恐有遲
誤其令額楚統轄兵馬勒貝參贊軍務凡事許得專奏十七年二
月 上以梧州爲兩廣接壤要地 諭勒貝及額楚前往時逆賊
祖澤清據高州叛陷鬱林州及北流興業陸川博白四縣四月勒
貝偕將軍傅宏烈等擊敗僞總兵梁子玉於白米嶺斬之僞總統
饒一龍等各棄城遁一州四縣盡復十八年吳逆僞將吳世琮圍
南甯總督金光祖遣總兵譚昇等與戰於新村西山之巔勒貝偕
額楚及副都統額赫納分路撲剿殺賊甚眾世琮重創遁南甯圍
解十九年五月復偕額赫納等剿叛賊馬承蔭於柳州大敗之於

陶登乘勝克象州承蔭降均得 旨嘉獎下部議敘八月葬伊圖
卒於軍 上以勒貝代爲鎮南將軍尋 命隨征南大將軍都統
賴塔進定雲南卽令參贊軍務十二月大軍抵西隆州偵僞將軍
何繼祖王宏勳等糾眾萬餘扼安籠所之石門坎勒貝與都統希
福等先驅二十年正月抵其地攻克第一峰第二峰第三峰奪隘
口復安籠所城繼祖等走復糾約僞將軍詹養王有功等九人眾
二萬餘守黃草壩列象拒戰二月勒貝率官兵隨大將軍賚塔進
勦生擒詹養王有功及賊千餘直抵雲南城逆孽吳世璠自殺雲
南平班師勒貝以疾道卒柩至京 命內大臣往奠二十三年
賜祭葬如例

右 國史館本傳

國朝耆獻類徵初編卷二百六十四目錄

將帥四

固三泰

子明阿圖
孫賽弼翰

布爾喀圖

布顏代

托克推

布善 子誇扎

伊勒慎

和濟格爾

子拜音達哩

和託

阿山

康喀勒 兄孫通嘉

費揚武

吳守進

子國柄

德參濟旺

恩格圖

甘都

哈甯阿

蘇納 子蘇克薩哈

葉臣

子車爾布

國朝不... 卷之... 七

--	--	--	--	--	--	--	--	--	--

國朝耆獻類徵初編卷二百六十四

通奉大夫前署江西巡撫江西布政使司布政使湘陰李桓輯

將帥四

固三秦

子明阿圖

孫賽弼翰

固三秦姓納喇氏葉赫貝勒金台什同族 太祖高皇帝時率屬來歸隸滿洲鑲藍旗任佐領尙公主 封固倫額駙從大軍征明廣甯單騎入敵陣身被數創戰愈力大軍繼之遂敗敵兵優加男爵 太宗文皇帝御極設八大臣以固三秦爲鑲藍旗都統天聰元年三月隨大貝勒阿敏征朝鮮有功四月凱旋 上郊勞之優以殊禮三年 上親統大軍征明攻遵化固三秦率本旗兵於城

西南隅攻克之明年大軍取永平明兵潰走昌黎 上遣敖漢柰
曼巴林扎魯特兵攻其城不克 命固三泰同都統達爾漢等率
兵往助尋遣人以城守堅還奏奉 諭撤兵因焚其近城廬舍而
還復受 上方略征明灤州先令參領高鴻中庫爾禪率二十人
誘敵啟門大軍遂入城籍其倉庫銀穀以 聞五年 上幸文館
閱館臣達海所譯武經因 諭羣臣曰古來爲將帥者必體恤士
卒朕聞額駙固三泰與敵交鋒士卒有戰死者常以繩繫其足曳
歸輕蔑士卒若此何以得其死力乎尋以固三泰不能鈐束士卒
不諳機務 命解都統任九年 詔免功臣徭役固三泰與焉並
增 賜人戶俾專管佐領事 世祖章皇帝定鼎燕京 加恩優

賚尋卒子明阿圖初任佐領大軍入關時明阿圖署副都統督兵
殿後有功順治二年授雲騎尉世職任都察院理事官四年考滿
晉騎都尉六年授鑲藍旗蒙古副都統兩遇恩詔晉三等輕車
都尉八年二月卒長子關柱襲職次子賽弼翰初爲簡親王濟度
護衛聖祖仁皇帝康熙四年授護軍參領十三年隨護軍統領
瑚里布討逆藩吳三桂由陝西進征四川攻克陽平關及朝天關
趨保甯叛鎮吳之茂王輔臣糾賊阻餉道乃退駐西安十四年隨
瑚里布攻復秦州十五年王輔臣降師旋賽弼翰得優賚十七
年海賊鄭錦犯福建陷海澄長泰詔增遣八旗赴福建以賽弼
翰爲營長同諸參領率之往十八年賊將劉國軒吳淑何祐等犯

漳州結壘郭塘歐溪頭來奪江東橋賽弼翰隨平南將軍賴塔進
戰連挫賊眾毀其壘殲殪無算二十年隨賴塔由廣西征雲南討
逆賊吳世璠敗賊將何繼祖等於石門坎黃草壩遂會四川貴州
兩路兵平定雲南二十二年擢蒙古鑲藍旗副都統二十四年調
本旗滿洲副都統二十五年敘功授騎都尉世職二十九年十一
月卒 予祭葬如典禮子伊增額襲職

右 國史館本傳

布爾喀圖

布爾喀圖蒙古喀喇沁人姓博爾濟吉特初爲其部貝勒天聰三年六月遣使納貢九月來朝十月 太宗文皇帝親統大軍征明以布爾喀圖前在喀喇沁時曾往來明國習知關隘使爲我師嚮導於是入明邊攻克龍井關及洪山口大安口等城撫定羅文峪十一月大軍克遵化城 上命貝勒杜度駐兵守之復 命布爾喀圖分駐羅文峪四年正月明副將丁啟明等率兵三千來犯布爾喀圖勒兵邀擊致眾敗奔退歸營堡翌日進兵奪其堡奮擊大破之陣擒啟明及遊擊以下官三員斬獲無算 賜號岱達爾漢五年正月 詔以貝勒阿巴泰女妻之三月 上親征察哈爾布

爾喀圖與土默特部貝勒等並率所屬從征遇察哈爾叛逃蒙古劫土默特西蘭國部下人畜布爾喀圖追擊斬之足被創尋挈其所部人戶來歸隸蒙古正藍旗崇德元年敘功 予一等子爵世襲罔替順治元年卒子班珠勒襲後遇 恩詔晉爵至一等伯

右 國史館本傳

布顏代

布顏代姓博爾濟吉特氏初爲蒙古烏魯特貝子 太祖高皇帝
天命七年率所屬人戶自西拉塔喇來歸尙主爲額駙 予二等
輕車都尉世職隸滿洲鑲紅旗十一年大兵征明甯遠攻城未下
分兵取覺華島布顏代率蒙古兵隨都統武納格破敵營殲其眾
焚所積芻糧而還 太宗文皇帝天聰元年隨征朝鮮凱旋分
賜降戶及所獲馬三年從 上征明入龍井關克大安口取遵化
薄燕京四遇敵眾皆擊敗之復擊敵於盧溝橋率七人先衝破敵
陣明年春師還駐遵化敵犯我隨征蒙古喀喇沁營布顏代趨援
卻敵尋同武納格略地取糧遇敵山岡斬級七十餘五年授禮部

承政兼右翼蒙古副都統從征大凌河圍其城明兵突出城來犯布顏代被創仍力戰卻敵斬一人六年隨大軍略明宣府大同邊外地收察哈爾部眾師還以所俘獨少又弗即遵諭歸隸戶籍並隱匿牲畜革世職罰鍰奪所俘人戶及賜物上念前此先眾來歸免革世職八年上親統師征明大同布顏代同侍衛星訥等率蒙古護軍八十取道哈麻爾嶺收察哈爾潰散人戶進次西拉木輪招降百餘戶又遇率眾來歸之察哈爾部臣俄爾塞圖等攜以會大將軍是年敘功晉爵三等男九年擢鑲紅旗蒙古都統崇德元年隨武英郡王阿濟格征明既克昌平保安州等城旋師出邊敵襲我後隊布顏代還擊不嚴整隊伍爲敵所敗又嘗擅

令驍騎校等出掠被殺七人論罪罰鍰奪俘獲罷都統任降世職
爲一等輕車都尉 世祖章皇帝順治元年復爲前鋒參領隨睿
親王多爾袞入山海關擊敗流賊李自成同副都統和託等追剿
至望都尋隨豫親王多鐸由河南征陝西敗流賊於潼關明年正
月敘功加一雲騎尉四月隨征江南渡黃河與敵接戰所乘馬被
傷身受數創猶衝鋒射殪敵人尋創發卒於軍年六十有一子鄂
穆布襲職

右 國史館本傳

165-396

17

托克推

托克推先世居瑚爾哈以地爲姓兄納罕泰爲瑚爾哈部屯長
太祖高皇帝天命四年十月納罕泰同托克推攜其親屬及同部
百餘戶來歸 上遣官迎之 御殿賜宴各與裘服奴僕田宅器
用馬牛隸滿洲正紅旗尋授納罕泰爲理事大臣托克推爲佐領
太宗文皇帝天聰三年托克推任護軍參領從 上征明由龍
井關入遇三屯營哨卒斬五人獲馬七旋護糧以行遇敵來劫復
斬數人奪纛一遂會大軍攻克遵化州五年三月同參領榜素等
率兵百人赴明錦州斬其哨卒生擒間諜以獻八月 上統師圍
大凌河城 命貝勒阿濟格移兵掘錦州松山要路駐營邀擊明

兵之赴援者托克推率兵隨敵自錦州來犯托克推擊卻之追至城下斬獲甚眾八年二月同都統阿山等率兵略錦州獲馬牛而還七月從上征明大同凱旋出尙方堡遇察哈爾諸宰桑來歸上命托克推率兵護降人家屬還盛京是年彙敘有功諸臣予騎都尉世職九年同護軍統領布哈等率兵略明邊境至甯遠擒七人獲馬四十牛百餘師還出邊六十里敵以千人追襲布哈殿後戰歿托克推同參領阿濟拜巴圖魯哈坦還擊敗敵護所獲以歸卽以牲畜分賚之崇德三年八月隨貝勒岳託征明由牆子嶺入邊越燕京趨山東圍臨邑縣城托克推督兵樹雲梯攻克其城賚良馬及白金四年六月擢正紅旗蒙古副都統崇德六年

隨睿親王多爾袞圍錦州擊卻明總督洪承疇援兵猝遇敵斃身
中數創七年以疾解副都統任 世祖章皇帝順治元年起爲
陵寢總管二年九月卒年六十有三子摩和托襲職

右 國史館本傳

Vertical text on the right side of the page, likely a page number or title, written in Chinese characters.

--	--	--	--	--	--	--	--	--	--

布善 子誇扎

布善滿洲鑲紅旗人姓伊爾根覺羅氏工部參政烏善之弟也

太宗文皇帝時任護軍參領兼佐領尋擢護軍統領列議政大臣
崇德五年從征明錦州偕眾擊敗杏山騎兵六年 上親征松山
明總督洪承疇以兵來犯布善先眾力戰卻敵時明兵甚眾餉運
不繼 上度敵必遁去分 命諸將比翼而列直抵海濱是夜敵
果遁諸將相繼截擊布善率兵窮追殲敵無算八年隨鄭親王濟
爾哈朗攻克前屯衛復同護軍統領阿濟格尼堪移師攻中前所
拔其城 世祖章皇帝順治元年隨大兵入山海關擊敗流賊李
自成敘功 予騎都尉世職二年隨豫親王多鐸征江南卒於軍

賜祭葬如例子誇扎襲三遇 恩詔晉世職爲二等輕車都尉順
治十七年任護軍參領尋兼佐領康熙十三年隨定南將軍希爾
根討逆藩耿精忠圍撫州府城賊出城抗拒誇扎屢率兵擊敗之
賊棄城遁十四年隨安親王岳樂擊逆賊吳三桂黨夏國相於萍
鄉縣賊眾數萬據山結寨誇扎率兵奮擊大敗賊國相及賊將李
良棟等俱棄資械走十七年遷護軍統領十八年擢鑲紅旗蒙古
都統隨安親王進攻武岡州軍器輜重由水路進賊據巖溪爲邀
截計誇扎率兵馳擊賊卻走時我綠旗兵立營於對岸賊船彙集
偏營誇扎從陸赴援道險極馬不能行乃親率兵步行賊踞山梁
設鹿角列槍礮以拒我兵直前攻勦斬獲甚眾賊之在水陸者皆

潰竄十九年奉 詔率湖廣兵數千赴廣西隨簡親王喇布勦叛
鎮馬承蔭卽參贊軍事遂敗賊於武甯復其縣乘勝取象州圍柳
州馬承蔭率眾降又進次慶遠府僞將軍饒一龍亦以城降廣西
平還京二十一年八月卒二十五年追敘誇扎什塔襲
世職爲一等輕車都尉子誇扎什塔襲

右 國史館本傳

皇朝通志卷一百一十四

大

伊勒慎

伊勒慎姓費莫氏世居薩齊庫烏喇攻薩齊庫降其眾伊勒慎遂率所屬六部來歸後隸滿洲鑲黃旗兄曰古蘇 太祖高皇帝戊申年征烏喇 命古蘇招降蜚悠城策穆特諸部落烏喇惡之盡俘殺古蘇妻子 太祖念其家以歸誠被害授伊勒慎騎都尉世職尋從征明有功加三等輕車都尉又以沙嶺戰功加二等輕車都尉天聰五年七月奉 命統兵鎮海州時明邊將窺伺瀋陽屢縱士卒入遼河探捕伊勒慎旣之鎮密爲防禦嚴偵緝設遊哨率所部駕輕舟追斬逋逃先後收獲人戶及舟艦器械無算七年九月敘功並以從征旅順口多斬馘加一等輕車都尉崇德元年四

月晉三等男九月明將造巨艦百餘橫截遼河爲戰禦計伊勒慎
與各守將烈烈渾塞薩等沿河分立營寨別寨兵遷移近邊居民
仍率將士設伏河口執其謀者以獻明兵望風引遁由此不敢犯
四年十一月同刑部承政索海等征瓦爾喀部獲噶凌阿及餘黨
二百餘人旣而伊勒慎監守俘囚疎防脫逃烏喇將博穆博果爾
復糾眾來攻伊勒慎先眾敗走索海等擊破賊眾伊勒慎又不於
汛地邀擊坐視博穆博果爾及餘眾遁去論罪應死 詔革職鞭
百籍沒其家六年十二月鑲紅旗大臣哈哈納劾伊勒慎防守海
口特託言祭天則多於苛斂兵丁財物及私造浮圖諸劣蹟勘實
復論死仍奉 旨鞭百八年六月復鎮海州順治元年八月 命

爲牛莊城守官二年卒年七十有九子朗圖隨征薩哈連烏喇陣
亡 卹贈騎都尉世職

右 國史館本傳

和濟格爾子拜音達哩

和濟格爾本蒙古烏魯特人後隸正白旗漢軍遂爲和氏 太祖
高皇帝天命七年征明取廣甯城和濟格爾時爲明千總從守備
石廷柱來降授參領十一年從征巴林部囊努克斬三人追獲叛
逃蒙古又從征棟奎俘獲甚眾 太宗文皇帝天聰三年從征明
偵敵薊州斬哨卒三值敵兵三百來犯和濟格爾衝鋒入斬其百
總一五年大軍圍大凌河城明兵自錦州赴援和濟格爾先眾斬
敵明總兵祖大壽遣兵出城樵採且劫奪臺堡並奮擊之生擒二
人尋與敵戰城下我軍執纛首墜於壕和濟格爾掖之出復以烏
槍殪敵三人八年 予騎都尉世職崇德三年隨貝勒岳託征明

至山東屢敗敵兵四年始分漢軍爲四旗以和濟格爾爲鑲白旗副都統五年隨大軍圍錦州禦擊松山步兵杏山騎兵皆捷六年復圍錦州明總督洪承疇率眾駐松山一再來犯和濟格爾俱擊卻之敵自松山分踞高橋南三臺和濟格爾以礮攻克之殲百餘人七年復攻克塔山杏山二城敘功加一雲騎尉是年分漢軍爲八旗改正白旗副都統兼任佐領八年隨鄭親王濟爾哈朗征明甯遠攻克中後所前屯衛二城 世祖章皇帝順治元年二月敘功晉三等輕車都尉世襲罔替三年二月卒長子巴圖襲職兼任佐領遇 恩詔晉二等輕車都尉七年巴圖卒和濟格爾次子拜音達哩襲兼佐領 聖祖仁皇帝康熙元年授參領九年擢宣化總

兵官十三年七月調隨征福建總兵官時逆藩吳三桂陷湖南耿精忠據福建平南王尚可喜請增兵駐防廣東拜音達哩與福建巡撫楊熙並奉 命駐廣州十五年二月可喜子之信糾眾據城叛拜音達哩與楊熙議引所部出城會大軍擊賊之信已分布叛黨閉城阻之拜音達哩控騎突前斬關奪門出同楊熙率所部還會大軍於贛州疏述其事以 聞 上以其奮勇奪門忠貞可嘉下部議敘部議予軍功紀一次復有 旨從優再議於是 予雲騎尉世襲罔替合所襲巴圖之職爲一等輕車都尉十九年授駐防廣州副都統二十七年擢廣州將軍三十七年六月卒於官賜祭葬如例以其子和天培襲職

國史館本傳

右 國史館本傳

三

和託

和託滿洲鑲紅旗人姓棟鄂氏父郎格 太祖高皇帝時隨棟鄂部之屯長對齊巴顏阿格巴顏等來歸任佐領天命六年從證明瀋陽城既下明總兵陳策等來援郎格與參領布哈錫爾泰等拒戰歿於陣 予三等輕車都尉世職以長子棟世祿襲和託其次子也 太宗文皇帝崇德七年正月投鑲紅旗滿洲副都統隨鄭親王濟爾哈朗等圍明錦州降其總兵祖大壽四月進攻塔山克其城鄭親王遣和託以所俘人口及所獲財物籍數馳奏 上命還諭以所俘獲分賜軍中陣亡及被傷者並齋 敕招撫明杏山守將 諭曰汝以善言招撫來降則已否則用礮攻之礮當擊城

中間俟城全頽方令我兵登進儻舉礮彼卽歸順亦許其降也和
託至軍遵 旨曉示城中猶固守及舉礮遂開門乞降師還和託
得 優賚七月部議圍錦州時諸將徇隱軍士失律罪和託應罰
緩得 旨以前勞寬免十月隨貝勒阿巴泰征明自界嶺口毀邊
牆入至黃崖口我軍議分兩翼夾攻而輔國公斐洋古令和託督
左翼兵建雲梯攻城和託周視畢復曰城可登無以梯爲也乃率
護軍四十人毀城入斬守備一餘悉潰走遂偕右翼兵進圍薊州
敗總兵白騰蛟白廣恩兵直抵山東攻克兗萊青諸府明年凱旋
擢吏部參政仍兼副都統 世祖章皇帝順治元年隨大兵入山
海關擊流賊李自成追至望都連敗賊兵敘功 予騎都尉世職

時明福王朱由崧立於江南其副總兵楊威踞登州四出侵擾招撫山東侍郎王鼐永請發兵進剿上命和託同副都統李率泰額孟格率師討之有趙應元者舊爲自成裨將敗竄長山聞鼐永至青州儲庖芻餉佯受撫旣入城伏兵戕鼐永以叛和託至山東聞變卽率師往援并牒巡撫陳錦總兵柯永盛會師速剿應元復僞以撫請和託與李率泰議曰我兵旣集破城卽可滅賊顧如良民何知府張文衡副將李國威在城中賊以民望未卽加害誠與密計令應元出城議撫縛而斬之餘黨不足平也旣定計遂許應元降應元隨張文衡出謁和託慰勞遣還密令我兵隨張文衡入城分布防守乘夜擒斬應元及其黨數十人徧諭脅從者弗罪青

國史卷之四十四
州賊平登萊諸賊亦爲陳錦招降楊威伏誅 詔和託李率秦移
兵河南會豫親王多鐸軍 優賚黃金紫貂等物晉世職爲三等
輕車都尉二年隨豫親王下江南尋隨貝勒勒克德渾征浙江先
是明福王就擒其大學士馬士英竄杭州總兵方國安守嚴州至
是大兵定杭州士英走依國安糾眾來犯和託率左翼兵禦之富
陽斬僞副將二僞參將二僞遊擊五大敗賊眾復破賊下關直溝
燬其木城奉 詔同副都統珠瑪喇率所部滿洲蒙古兵駐防杭
州三年四月卒無子以兄之子碩色納襲職

右 國史館本傳

阿山

阿山姓伊爾根覺羅氏世居穆溪 太祖高皇帝時阿山與其弟阿達海濟爾垓噶賴從父阿爾塔什率七村戶口來歸隸滿洲正藍旗 太祖以宗室女妻阿爾塔什爲額駙而以阿山與阿達海等令大貝勒代善轄之阿山以大貝勒置之閒散觖望有異志與諸弟及其子塞赫等逃之明 太祖命收其孥遣兵往追斃其二子阿山至明界明臺軍戮其從人於是阿山惶懼與阿達海等復歸請罪 上以其悔罪來也宥之而還其孥不令屬代善置諸左右備使令責立後效天命六年從征遼陽有功授二等輕車都尉世職 太宗文皇帝嗣統擢居十六大臣之列佐理正白旗事扎

魯特之役阿山奉命與都統楞額禮率六百人入巴林多俘獲還晉爵三等男天聰元年從征朝鮮攻克義州城三年同額駙揚古利至雅爾古偵軍事遇明故將毛文龍部下探濞者擊斬甚眾大兵征明從攻洪山口取其城趨燕京軍於城西南隅阿山同參領圖魯什周視敵營請速進攻上是其言命卽以是夜三鼓列陣明日陣獲其總兵麻登雲等四年圍永平乘夜力戰會城上礮裂藥發阿山與副都統葉臣以猛士二十四人冒火登諸軍繼進大破之遂取永平太宗嘉其驍勇晉三等子五年從征大凌河率銳騎偵錦州松山路俘獲明兵其守將來援阿山與前鋒統領勞薩以兵三百敗其眾二千斬首百餘級獲三纛上特召至

酌以金卮尋授都統六年 上統大軍親征察哈爾阿山與副都
統布爾吉先率兵防邊聞 駕臨西拉木輪河以眾來會遂奉
命率八旗將領及精兵三百人往助圖魯什前哨軍值察哈爾汗
道遁乃還復率兵防邊捕斬逋逃蒙古五人以獻明年與布爾吉
往偵鹿島俘獲甚多八年三月與圖魯什等稟受 方略至明錦
州略地貝勒岳託謂圖魯什曰軍中調遣事宜當就阿山商之勿
違其言遂往略地獲牲畜五月復從征察哈爾收集蒙古之潰亡
者以歸十二月 詔免功臣徭役阿山與焉并給虎爾哈俘百人
編屬佐領九年明國聞我師征山西將調山海關兵往援 上命
貝勒多鐸軍廣甯阿山與都統石廷柱領前鋒兵四百先趨錦州

會明副將劉應選劉成功等引兵三千五百人來禦遇於大凌河未及戰貝勒兵疾馳繼至白山而下士馬騰藉軍容甚盛敵望塵驚潰阿山突入掩擊我軍分路追勦陣斬應選擒遊擊曹得功等四員殲其兵五百人復攻克臺堡一凱旋上率諸貝勒郊勞賜良馬鎧甲以旌異之崇德元年隨武英郡王阿濟格征明攻下鵬鶚長安嶺二城又率本旗兵攻克東安縣師還明兵來追阿山殿後擊斬略盡旣班師上率諸貝勒迎勞如初是役也以出邊先歸不俟後軍俱至論奪所俘獲二年與葉臣率左翼舟師攻皮島西北隅先登克之斬守將沈世魁晉一等子世襲罔替四年部臣追論阿山於朝鮮主謁上時亂班釋甲及士卒離伍罪坐罰

贖六年二月隨睿親王多爾袞圍廣甯先登斬敵襲其城有俘獲
三月隨征錦州以聽從睿親王離城遠駐私遣兵歸家論死 命
改輸罰鍰八月復攻錦州掘濠環守敗松山騎兵之援錦州者錦
州兵突圍出犯我營松山守將潛謀奪我紅衣礮阿山連擊敗之
七年三月部議錦州兵犯鑲黃旗營貝子尼堪不察舉我軍之未
戰者阿山坐徇情附和應論罰有 詔寬免先是阿山從武英郡
王出征時欲奏其雄縣石橋會戰功屬稟啟王王曰石橋會戰無
殺敵俘獲功無可書取其奏稟削之既而阿山子塞赫與護軍洪
科忿爭洪科遂訐赫塞隨征雄縣石橋退縮事兵部以問武英郡
王王以削阿山奏稟爲證及詢阿山阿山又曰石橋未嘗交戰亦

未嘗以疏稟啟王及察疏稟王言實於是部臣議曰阿山邀功則云我曾交戰聞訐其子退縮則云未嘗對敵誕妄偏袒應革世爵罷都統任尋又以私取外藩蒙古進獻財物事論罪應奪所俘獲並得旨寬貸令罰贖十月奉命與饒餘貝勒阿巴泰復征明入牆子嶺取邊城至克州屢敗敵兵分遣將領攻拔數城恩賞銀幣順治元年從擊流賊李自成於山海關自成敗走阿山復偕左翼副都統阿哈尼堪右翼都統馬喇希濟蒲津擊破之遂同諸將鎮守平陽二年敘功晉爵三等公是時西安已定豫親王多鐸移師安撫河南進取江南阿山奉詔與諸將各領所部從至泗州與馬喇希等取淮河橋遂渡淮攻拔揚州進取揚子江明鎮海

伯鄭鴻逵等以水師規瓜洲及儀真阿山率舟師浮運河而南與右翼舟師分列大江東西岸敵至則以礮夾擊之遂攻下江甯追擒明福王朱由崧於蕪湖江南既定同貝勒博洛及都統拜音圖招撫浙江軍次杭州明路王朱常澆迎降嘉興湖州紹興甯波嚴州皆下凱旋 賜金銀鞍馬三年正月巫者薩海以阿山佐領下雅巴海之妻與人私通事告阿山阿山信之徒雅巴海而幽其妻雅巴海妻奔逸訴於刑部部鞠訊得薩海誣告狀阿山坐妄聽巫言削爵罷都統任旋復授一等子四年五月卒子塞赫襲

右 國史館本傳

康喀勒 兄孫通嘉

康喀勒姓納喇氏輝發貝勒旺吉努之孫也 太祖高皇帝時隨其從兄通貴率族屬來歸隸滿洲鑲紅旗授佐領 太宗文皇帝天聰六年從征察哈爾部八年正月 上聞察哈爾林丹汗逃竄其部眾流散於錫爾哈錫伯圖之地 今康喀勒與岱青塔布囊等率蒙古及外藩駐牧兵取之所獲甚眾五月以克副任使 予騎都尉世職崇德三年兼授刑部副理事官五年擢鑲紅旗蒙古副都統六年隨大軍征明錦州及松山七年松山錦州皆下復隨鄭親王濟爾哈朗攻克塔山城尋追論攻松山時退縮不前克塔山後與都統葉臣爭功罪應死 上宥之令戴罪立功 世祖章

皇帝順治元年隨睿親王多爾袞入山海關擊流賊李自成有功
加雲騎尉尋隨豫親王多鐸征江南同都統準塔自徐州水陸並
進次清河明總兵劉澤清遣部將馬花豹張思義等率戰艦千餘
兵數萬據黃淮口康喀勒同遊擊范炳吉天相等發礮毀其舟又
分兵兩路追擊澤清遁走遂克淮安時明總漕田仰遁踞湖口橋
康喀勒同副都統譚布追擊敗其兵卒三千又敗之於三里橋追
至海岸獲船八十又連敗田仰兵於如皋縣還攻通州以雲梯克
其城招降附近縣邑二年十一月授鎮守江甯副都統時江北賊
寇未靖江甯城中奸徒謀應之康喀勒同駐防總管巴山先期捕
誅倡亂者三十人已而偽潞安王朱誼石糾眾二萬餘三路來犯

皆爲我軍擊敗遁去三年敘功晉職三等輕車都尉世襲罔替四年卒子洛多哩襲職康喀勒從兄之子和托順治元年任前鋒參領隨大軍敗流賊李自成於潼關移兵征江甯復隨貝勒博洛征浙江擊敗明總兵方國安等於杭州進征福建所向克捷攻汀州率眾先登克其城敘功 予雲騎尉世襲罔替 恩詔晉騎都尉兼一雲騎尉十一年隨征雲南敗僞罕昌王白文選生擒十一人獲馬四十進取永昌率兵往奪瀾滄江之鐵索橋敗賊步兵康熙九年卒子華善襲職和托弟瑪拉順治十二年以三等待衛署參領隨都統伊勒德征復舟山有功尋隨世子濟度征海賊鄭成功至福建同護軍統領穆成額敗賊於泉州府斬七百餘級十六

年隨安南將軍達素征鄭成功於廈門得頭等功牌康熙十一年
華善卒無子以瑪拉襲和托世職二十二年卒子鄂色襲康喀勒
兄之孫通嘉初襲其父莽佳三等輕車都尉世職順治十八年山
東土賊于七踞棲霞縣之炬嶠作亂通嘉以護軍參領隨靖東將
軍濟什哈往征賊黨呂忌曲兪三等數千一再來犯通嘉同營總
察哈泰擊之屢捷擣平賊巢康熙六年改前鋒參領十四年隨信
郡王鄂托征察哈爾布爾尼師至達祿賊豫設伏山谷間比戰伏
發通嘉率所屬迎擊盡殲其伏復進擊賊眾大敗之布爾尼僅以
三十騎遁敘功加一雲騎尉後緣事削去十七年擢鑲紅旗滿洲
副都統十八年遷護軍統領由陝西進征逆藩吳三桂敗逆黨譚

洪三萬眾於四川雲陽縣敘功列二等二十三年改本旗蒙古副都統二十四年卒子瑪琦襲職

右 國史館本傳

國朝通志卷之四十一

三

費揚武

費揚武滿洲正藍旗人姓納喇氏由護軍校累遷參領 太宗文
皇帝崇德七年冬隨饒餘貝勒阿巴泰征明甫入邊明山海關總
兵馬科迎戰費揚武擊敗其眾遂越燕京趨山東既至膠州明兵
千餘屯城外費揚武奮勇挫敵乘勝薄濱州領雲梯兵先登攻克
其城及師還明總督范志完總兵吳三桂等分路阻截費揚武破
走之護所俘獲出邊凱旋敘功 予雲騎尉世職管佐領事

世祖章皇帝順治元年四月隨睿親王多爾袞入山海關破流賊李
自成騎兵尋署護軍統領隨豫親王多鐸追剿李自成師抵潼關
賊將劉宗敏等引眾出禦費揚武率本旗護軍擊敗山下步騎賊

復連破其兩營二年三月豫親王移師南征費揚武同護軍統領
固納岱伊勒都齊等率兵攻揚州城南獲船二百餘又同護軍統
領阿爾津擊敗江甯府境步兵追勦至蕪湖明總兵黃得功拒戰
費揚武擊敗其眾獲船三十有一尋隨端重親王博洛征浙江同
前鋒統領鄂碩副都統卓布泰等擊走明閩部馬士英於杭州生
擒偽總兵一復率兵勦平海甯平湖二縣土賊獲明總兵王之仁
戰艦十有六十二月授議政大臣先是敘入關破流賊功由雲騎
尉晉騎都尉至是敘江南浙江功績加一雲騎尉世襲罔替四年
仍留軍統領從征福建卒於軍以其子雅素哈襲職

右 國史館本傳

吳守進 子國柄

吳守進遼陽人後隸漢軍正紅旗初事太祖高皇帝以功授三等輕車都尉世職天聰五年太宗文皇帝詔定官制設六部守進任戶部承政八年考滿晉一等輕車都尉時始設漢軍世管佐領守進兼任之崇德三年正月奉命與額駙英俄爾岱等察戶部承政韓大勳等盜取庫物坐察覈疎忽論罪輸罰銀七月更定官制改任左參政四年正月以勒索官商金及侵冒工值等事下部論罪應死籍沒得旨從寬革世職解部任籍家產之半仍署副都統事六月授正紅旗漢軍副都統六年隨睿親王多爾袞武英郡王阿濟格征明錦州以紅衣礮攻克塔山四臺斬馘無算生

擒其副將王希賢參將崔定國等七年六月擢本旗都統七月率
兵攻明松山杏山同都統金礪擊呂洪山口所屯敵兵敗之松山
兵遁入杏山附近二臺復同都統劉之源攻克之遂拔杏山城尋
奉命與副都統馬光輝等往錦州督鑄紅衣礮八年隨鄭親王
濟爾哈朗征明甯遠攻取中後所前屯衛二城世祖章皇帝順
治元年正月敘功復授二等輕車都尉世職五月同都統葉臣往
平山西攻太原府城克之凱旋得優賚尋隨豫親王多鐸追剿
流賊李自成明年四月移師下江南詔頒賚王貝勒大臣之宣
力戎行者守進得賜蟒服五月偕都統圖賴敗明軍於揚子江
獲其戰艦克揚州府及江陰縣城並下嘉興府三年五月敘功賚

一等輕車都尉四年授定西將軍駐劄漢中五年八月卒年六十
有二長子國柄襲隨征湖廣有功官至副都統七年遇恩詔加
一雲騎尉尋卒以守進次子國正襲

右 國史館本傳

德參濟旺

德參濟旺蒙古正黃旗人姓博爾濟吉特氏世居阿布罕地方初爲察哈爾大臣察哈爾林丹汗不道天聰六年上統師往征林丹汗棄故業渡黃河西遁八年復征之林丹汗歿於大草灘察哈爾亡德參濟旺偕噶爾瑪濟農多呢庫魯克多爾濟達爾漢諾顏等攜眾六千及家屬來歸召宴於喀琿御營德參濟旺率諸臣跪獻酒諭曰朕本不飲酒念爾新附諸臣誠意當飲盡一卮復酌酒親賜之並授甲冑衣裘授一等子九年六月察哈爾索諾木白吉率本部內附上宴來歸者並賜德參濟旺飲諭曰察哈爾國之傾覆爾諸臣之來歸朕皆豫知德參濟旺奏曰

罪論及此洵有如神之鑒也順治二年以誣告沙濟降爲三等子
三年五月蘇尼特部長騰機思與其弟騰機特等叛奔喀爾喀德
參濟旺隨豫親王多鐸追勦至諤特克山喀爾喀土謝圖汗車臣
汗各遣兵數萬兩路迎戰我師奮擊大敗之先後斬級俘獲甚眾
捷聞 詔下所司察敘九月復德參濟旺一等子世職五年八
月卒子哈爾瑪襲

右 國史館本傳

恩格圖

恩格圖科爾沁蒙古人世居哈達 太祖高皇帝時挈家來歸隸正
紅旗授佐領與參領阿岱駐伊蘭布里庫防游牧蒙古率十人巡
徼海濱遇敵百人追斬幾盡聞明兵千餘犯海州率兵三百馳擊
敗之天聰三年從 太宗文皇帝征明北京明總兵滿桂等赴援
恩格圖首先奮擊斬獲有功尋攻遵化破山嶺敵營入大安口皆
先眾軍力戰敘功授三等輕車都尉世職擢兵部承政考滿晉職
二等尋授本旗蒙古都統崇德元年隨武英郡王阿濟格征明同
阿岱等分率甲士設伏明三屯營守備率兵來探伏發圍之盡殲
又與都統譚泰等征朝鮮暨雲梯登城朝鮮兵潰走盡收其牲

畜貨賄以歸先是隨武英郡王征明戰松山正藍正白鑲白三旗營汛錯亂恩格圖隱匿不舉及還師又不俟後隊齊至先行出邊猝遇敵兵戰敗遁走至是論罪罰鍰奪其俘獲明年又議征朝鮮時恩格圖在軍營方食奉 召不卽赴且約束不嚴致廝卒妄行爲朝鮮兵所殺論鞭百 詔免之罰贖以懲三年隨貝勒岳託征明密雲距牆子嶺五里恩格圖率兵先諸軍越高峰入邊破敵五年隨鄭親王濟爾哈朗等圍錦州松山城松山兵夜襲我營恩格圖率本旗兵敗之六年從 上征明明總督洪承疇等合軍十三萬赴援松山 上分遣諸將並 授方略令恩格圖與前鋒統領吳拜進擊之及諸軍並進恩格圖詐言未奉 上命不至期會之

地將戰猶披氍而坐遇敵不前旣旋師論罪應褫職仍輸罰錢得旨寬免罰如律部臣又論攻明錦州時明兵出犯鑲黃旗營汎貝子尼堪失察我兵之未戰者恩格圖坐徇情附和議罰上以諸王貝勒及大臣等久駐錦州素著勞績凡罪旣槩予寬宥恩格圖亦免議命更番駐守松山順治元年隨睿親王多爾袞入山海關敗流賊李自成二年敘功晉一等輕車都尉兼一雲騎尉復隨豫親王多鐸破流賊於潼關賊夜犯正黃旗營恩格圖率兵往援俘斬甚眾師旋賊分兵躡我後恩格圖殿四戰皆捷進征江南破明將鄭鴻達於瓜洲隨端重親王博洛下浙江至錢塘大破敵眾獲舟三十五旋攻克嘉興府與都統馬喇希圍崑山縣城內敵兵

國朝通志卷之二十一
三
迎戰恩格圖連擊敗之遂取其城三年晉爵三等男隨征福建同
都統漢岱招降一府五縣又同副都統鄂羅塞臣招降一府八縣
遣兵助大軍擊敗僞帥吳凱兵攻克賊眾萬餘於分水關進勦海
賊七千於南靖縣皆有功四年晉二等男尋晉一等五年征叛鎮
金聲桓卒於軍子鄂爾濟圖尙幼以兄子克什圖襲爵遇 恩詔
晉三等子十八年分授克什圖騎都尉職 命鄂爾濟圖襲一等
男

右 國史館本傳

甘都

甘都先世居葉赫邊巴林因以巴林爲氏 太祖高皇帝時率子弟來歸投佐領隸鑲藍旗蒙古 太宗文皇帝天聰元年從征甯遠擊敗明兵於城北山岡追逐至壕塹三年從征明攻克大安口敗敵玉田縣 上親統師取遵化簡將士駐守甘都與焉明年大軍棄遵化出邊甘都爲殿擊敗追襲敵兵八年 予三等輕車都尉世職擢兵部參政崇德三年考滿晉世職爲二等輕車都尉尋以裁參政改兵部理事官隨貝勒岳託征明北京擊敗明總兵祖大壽及太監高起潛等軍進趨山東攻克濟南府城明年春師還取道靈縣復克其城敘功晉一等輕車都尉會佐領傅喀爭濟南

先登功引甘都爲證甘都坐附和罰鍰五年從征瑚爾哈部有索倫兵五百據挂拉爾屯甘都同承政索海理事官喀喀木率兵攻破其柵斬級二百生擒二百三十人以歸六年大軍圍錦州明總督洪承疇列營松山屢以步騎來犯甘都皆擊敗之恭順王孔有德之長史徐勝芳爲敵所困甘都突入陣援之出七年錦州下部議諸將徇隱軍士失律甘都應罰鍰得 旨寬免仍敘功加一雲騎尉 世祖章皇帝順治元年四月隨睿親王多爾袞入山海關擊敗流賊李自成十二月隨豫親王多鐸由河南征陝西屢敗自成賊眾遂克潼關取西安二年五月移師征江南同都統恩格圖瑪喇希等取宜興崑山二縣敘功晉三等男三年隨端重親王博

洛征浙江追勦明總兵方國安於黃巖環城困之偵賊勢既蹙撤圍一面縱其出遁擊之賊皆潰城遂拔大軍進征福建甘都先眾攻克分水關追勦明唐王朱聿鍵於汀州招降漳州府及漳平縣五年上命都統譚秦爲征南大將軍討叛鎮金聲桓甘都署前鋒統領率兵征江西遇恩詔晉二等男尋以疾卒於軍子武山布襲爵

右 國史館本傳

三才圖會卷之四

四

哈甯阿

哈甯阿姓富察氏世居額宜瑚父阿爾圖山率族攻薩齊庫城殺部長喀穆蘇尼堪招撫三百餘人來歸 太祖高皇帝命隸滿洲鑲白旗任佐領復分編人戶俾哈甯阿亦任佐領天聰二年隨貝勒岳託等征明錦州略松山杏山高橋諸臺堡奮勇擊敵授護軍統領三年 太宗文皇帝統大軍征明燕京哈甯阿從與明巡撫袁崇煥及祖大壽戰於廣渠門外以敗敵授騎都尉世職四年奉命率精兵百人往昭明境五年從征大凌河八年大軍征明大同哈甯阿先馳至小西城列雲梯攻具我師遂畢登復以二十人出略擊敗敵兵三百九年同承政圖爾格徇地入明山西界師旋過

平魯衛明兵躡我後還擊敗之追至城壕斬馘無算敘功晉二等
輕車都尉崇德元年從征皮島有功二年列議政大臣三年隨豫
親王多鐸往會鄭親王濟爾哈朗軍征明道經中後所祖大壽輕
師來襲參領翁克及土默特部兵先奔哈甯阿且戰且退士卒被
陷論罪應死奉 詔免死革世職籍家產之半四年論征明失律
之佐領阿蘭太罪哈甯阿復以徇庇論死 上仍貸之坐鞭責六
年從圍錦州再敗敵兵明總督洪承疇以十三萬兵赴援 上親
統大軍環松山而營度明兵必宵遁 命哈甯阿同護軍統領鼐
拜率左翼軍列陣右翼軍以次遞列屬於海濱夜一鼓明
兵果沿海走哈甯阿率師掩擊敵自蹂躪死者枕藉尋進攻松山

屢戰俱捷 惠敏恭和元妃之喪也哈甯阿隨武英郡王阿濟格
方守高橋輔國公扎喀納於軍中弦歌而舞事覺哈甯阿以不舉
劫逮繫既而釋之八年三月同護軍統領阿爾津征虎爾哈部獲
男婦二千五百有奇牲畜貂皮無算七月凱旋得 優賚順治元
年隨睿親王多爾袞入山海關擊流賊李自成至望都大破其眾
又同都統譚泰率前鋒兵追敗之正定賊蒼黃焚輜重遁二年復
授三等輕車都尉是年擊賊綏德州賊聞風遁走追敗之延安府
城內兵出犯左翼軍又擊卻之時李自成已奔武昌進師馳擊至
安陸府獲賊艘八十復與譚泰合兵下江南遇敵於揚子江奪其
戰艦追至富池口敵列陣岸上又擊敗之三年二月隨順承郡王

勒克德渾征湖廣流寇敗僞伯吳汝義降其眾四月晉二等輕車
都尉五月隨肅親王豪格擊敗叛鎮賀珍於漢中窮追至秦州賊
黨武大定退據三寨山山勢壁立未可攻我師圍之僞遊擊周克
德者遣其子來降導我師由僻徑登其守將石國璽爲內應哈爾
阿同副都統阿拉善署護軍統領噶達渾率兵六百破壁壘入賊
皆白山墮崖下斬殺略盡進征川賊張獻忠略夔州茂州資州遵
義相繼克捷五年正月師旋敘功晉一等輕車都尉世職是年卒
子率顏襲

右 國史館本傳

蘇納 子蘇克薩哈

蘇納姓納喇氏葉赫貝勒金台什同族 太祖高皇帝初業時蘇納棄兄弟來歸 命尙主爲額駙編所屬人可任佐領隸滿洲正白旗天命四年 太祖旣滅葉赫 命蘇納收其親屬並領之十年投參領以其從征有功 賜赦免死四次尋擢副都統天聰元年 太宗文皇帝親征明錦州以大貝勒莽古爾泰等帥偏師衛塔山運糧草 命蘇納統八旗蒙古兵驍壯者截守塔山西路遇明兵二千來戰蘇納領驍前進擊敗之乘勝追擊俘斬無算獲馬百五十餘 賜所俘獲以犒其軍三年春同都統武納格率精兵八千人及蒙古軍征察哈爾其邊境二千戶比聞降者關我兵

所爲謀害我兵以歸明於是盡殲其男子釋二合吉俘婦女八千
有奇還以所獲 頒賜出征將士有差旋奉 諭責其殺僇奪所
給牲畜十月以蒙古人有自察哈爾逃入明境者 命同武納格
率兵以百人追躡捕獲百人驅馬駝牛羊以歸五年投護軍統領
擢兵部承政從征明圍大凌河城擊敗出戰敵眾及錦州援兵敘
功授騎都尉世職八年考滿晉三等輕車都尉世職 命免徭役
專管佐領九年正月以隱匿丁壯削世職七月投正白旗蒙古都
統崇德元年從武英郡王阿濟格征明北京攻雕鷲長安諸嶺及
昌平等城敗敵五十六次復同步軍統領薩穆竹喀合攻容城縣
取之及還以先眾出邊致後隊爲敵敗潰坐罰鍰奪所俘獲十二

月從征朝鮮其邊城將率步騎兵千餘來援蘇納及副都統吳塔
齊等奮勇邀擊大敗之生擒其將二年六月法司議蘇納於朝鮮
國王朝謁時亂班釋甲又擅離人軍由他徑歸坐罰鍰三年八月
以都統阿山之子塞赫爲正藍旗洪科訐告臨陣退避鞠訊不實
蘇納徇洪科證其事坐罰鍰罷都統任仍專管佐領事順治五年
以疾卒 世祖章皇帝以其子蘇克薩哈有功授三等輕車都尉
念蘇納爲勞績舊臣追復原職令蘇克薩哈併襲之蘇克薩哈別
有傳

右 國史館本傳

蘇克薩哈

蘇克薩哈滿洲正白旗人姓納喇氏額駙蘇納長子也初委署佐領崇德六年隨鄭親王濟爾哈朗等圍錦州明人出步騎接戰敗之太宗文皇帝聞明總督洪承疇以師十三萬赴援親帥大軍環松山列營敵兵遁走蘇克薩哈同護軍統領漢岱追敗其眾於塔山翌日復追擊明兵於海岸隨豫親王多鐸等設伏襲擊與漢岱追斬杏山兵之潛遁者二年敘功授騎都尉世職尋晉三等輕車都尉七年世祖章皇帝念蘇克薩哈父蘇納在太祖太宗時屢著功績繼因隱匿丁壯削世職三等輕車都尉至是特旨復蘇納世職以蘇克薩哈併襲爲三等男八年任議政大臣九年兩遇覃恩晉爵一等男加一雲騎尉初蘇克薩哈隸睿親

王多爾袞屬下既睿親王薨於獵所蘇克薩哈與王府護衛詹岱等舉首其殞殮服色違制及謀遷永平諸逆狀 命諸王大臣質訊皆實遂論睿親王如謀逆律是歲擢鑲白旗護軍統領十年流賊張獻忠餘黨孫可望聚寇湖廣蘇克薩哈奉 敕同都統陳泰等率禁旅出鎮湖南與經略洪承疇會師進剿十二年賊帥劉文秀遣僞將盧明臣馮雙禮等分兵犯岳州武昌蘇克薩哈伏兵邀擊大敗賊眾明臣等復遣賊縱艦拒戰又擊敗之文秀引兵寇常德戰艦千餘蔽江而下蘇克薩哈指揮軍士奮勇截擊明臣等悉眾抗禦我軍協力撲勦六戰皆捷縱火焚其船斬獲無算明臣赴水死雙禮被創遁降其僞副將等四十餘人文秀走貴州明年敘

功晉爵二等子任領侍衛內大臣加太子太保十八年正月與索尼及遏必隆鼐拜等受 顧命爲輔政大臣奉 聖祖仁皇帝嗣統是時索尼爲 四朝舊臣遏必隆鼐拜皆以公爵先蘇克薩哈爲內大臣鼐拜尤功多慮氣陵轍人多憚之蘇克薩哈以額駙子人侍 禁廷承 恩眷奉 遺詔輔政名亞索尼與鼐拜稱姻婭而論事多與鼐拜迕積以成讐索尼亦惡蘇克薩哈會鼐拜欲令旗黃旗與正白旗互易屯莊索尼贊成之遏必隆弗能止遂行圈換之令旗民皆弗便康熙五年大學士兼管戶部尚書蘇納海坐換地遲誤總督朱昌祚等坐紛更阻撓罪皆論死 上覽部議召內閣臣咸曰宜如議獨蘇克薩哈不對 上因不允所請鼐拜

卒矯詔並予棄市未幾索尼死鼇拜益驕恣蘇克薩哈慮其偏已也居常怏怏六年上親政諭部議加恩輔臣以示酬庸之典越日蘇克薩哈奏言臣才庸識淺蒙先皇帝眷遇拔授內大臣早夜悚懼恐負大恩當先皇帝上賓之時惟願身殉以盡愚悃不意恭承遺詔臣名列於輔臣之中分不獲死以蒙昧餘生勉竭心力冀圖報稱不幸一二年來身嬰重疾不能始終效力於皇上之前此臣不可追之罪也茲遇皇上躬親大政伏祈睿鑒令臣往守先帝陵寢如綫餘息得以生全則臣仰報皇上豢育之微忱亦可以稍盡矣疏上有旨諭議政王貝勒大臣曰蘇克薩哈奏請守陵如綫餘息得以生全不識有何逼迫之處

在此何以不得生守 陵何以得生其會議具奏王貝勒等以大
臣怨望奏請速治鼉拜與其黨大學士班布爾善等謂蘇克薩哈
不欲歸政文致之構罪二十四款坐奸詐欺飾存蓄異心論如大
逆律應與其長子內大臣查克旦皆磔死餘子侍衛穗黑塞黑里
郎中那賽塞克精額達器德器孫侂克扎兄弟之子圖爾泰海蘭
皆斬決籍沒族人前鋒統領白爾赫圖侍衛額爾德烏爾巴亦皆
斬決獄具入奏 上知鼉拜素與蘇克薩哈有隙是以構成罪款
必欲置之重典 諭以嚴議未當不許所請鼉拜攘臂 上前強
奏累日卒坐蘇克薩哈處絞餘悉如議八年五月鼉拜既敗 特
諭吏兵二部曰蘇克薩哈雖有罪不致誅滅子孫此皆鼉拜挾仇

滅其後嗣深爲可憫白爾赫圖等無罪誅戮殊爲冤枉其蘇克薩
哈及白爾赫圖等官俱應給還七月復蘇克薩哈原官及世爵三
等子 命其幼子蘇當壽承襲

右 國史館本傳

五十四年六月廿九日

四

葉臣 子車爾布

葉臣姓完顏氏世居兆佳後隸滿洲鑲黃旗天命四年從太祖高皇帝征明有蒙古兵助明拒戰於鐵嶺奮擊敗之六年從征遼陽積功授三等輕車都尉世職 太宗文皇帝卽位設十六大臣葉臣與馬佐理鑲紅旗事天聰元年隨大貝勒阿敏征朝鮮過明邊境以兵八十人夜襲斥堠六所盡俘其軍士旣至朝鮮攻義州城與佐領艾博先登敘功晉二等輕車都尉尋率兵戍蒙古追斬逋逃晉三等男四年 太宗征明將攻永平城 召入御幃授方略與副都統阿山乘夜率兵薄城下城上噉矢交集葉臣伺敵隙裂驚擾領精兵二十四人立雲梯先登城遂破 太宗嘉之稱爲

驍將並諭眾曰後遇攻城如彼欲先登當阻止愛惜之遂將三等子列議政八大臣諭以政有關失隨時陳奏葉臣對曰臣荷恩隆重願罄所知入告勉矢忠良但恐識有未逮耳五年任鑲紅旗都統從征大凌河列營城西南明總兵祖大壽守城突出襲我營葉臣與額駙和碩圖等督兵夾擊之殲敵過半七年六月詔諸貝勒大臣各陳時務時有議攻山海關者葉臣疏言今兵力聚集宜先往大同宣府偵察哈爾聲息近則往征若已遠遁卽入明內地進逼北京伐木造梯晝夜攻圍城卽不克可以震懾敵人太宗是其言是月隨貝勒岳託攻明旅順口斬獲無算八年隨大貝勒代善自喀拉鄂博入得勝堡略大同西至黃河擊敗朔州騎

兵二百崇德元年五月隨武英郡王阿濟格證明既入邊分兵克安州又合攻寶坻縣拔其城十二月 太宗親征朝鮮葉臣率兵入其國都二年四月率步兵助武英郡王證明皮島乘艦進攻島西北隅斬其總兵沈世魁師還晉一等子四年偕副都統八人簡諸佐領下兵各三入明邊青山口由太平寨奪青山關七年代貝勒阿巴泰駐防錦州順治元年 世祖章皇帝遣諸王討流賊李自成自成敗走西安奉 命率兵赴山西任招撫由饒陽至懷慶附近郡邑悉下賊黨猶據太原會師進攻克其城先後平二十七州一百四十一縣置官屬安輯居民明總兵李際遇守河南山寨定西伯唐通副將董學禮從賊擁眾邊關葉臣並招降之又徵薦

明翰林朱之俊主事胡全才等十二人山西底定還至定州值土賊埽地王聚眾劫掠遣兵勦滅之比至京坐擅拆禁城牆停止敘功賜白金六百兩二年七月隨順承郡王勒克德渾代豫親王多鐸統兵江南時大學士洪承疇任招撫凡不順命者咨葉臣討之輒奏績十一月以李自成餘黨一隻虎等出沒武昌襄陽荊州諸郡詔葉臣隨勒克德渾移師勦除三年十月凱旋賜黃金三十兩白銀五百兩五年病卒年六十有三改二等子爲一等子兼一雲騎尉命其子分襲長子車爾布襲二等子別有傳第五子車赫圖襲雲騎尉

右 國史館本傳

車爾布

車爾布滿洲鑲紅旗人姓完顏氏一等子葉臣長子也初任參領崇德六年 太宗文皇帝親征明錦州車爾布隨內大臣宗室錫翰等設伏高橋遇明杏山逃兵擊之追至塔山俘斬甚眾擢護軍統領明年七月部議王貝勒大臣圍錦州時徇隱失律罪車爾布應罰緩時明總兵祖大壽既以錦州降 上念諸臣攻圍日久勞苦有功樂予寬免 世祖章皇帝順治元年隨睿親王多爾袞入山海關擊敗流賊李自成遂同護軍統領阿爾津率前鋒兵追及於安肅有斬獲又追敗之於望都是年冬隨英親王阿濟格征勦自成取道士默特鄂爾多斯入邊鑿黃河冰濟師追斬賊眾招降

無算明年春至榆林賊乘夜來襲我蒙古營車爾布同佐領蘇拜
往援奮擊敗敵還軍遇伏復縱擊卻之同都統伊拜招降附近城
邑進圖延安賊馬步出城來犯車爾布同副都統羅璧卻之賊遁
走湖廣車爾布與護軍統領鼇拜馳攻安陸獲賊船八十復偕護
軍參領噶達渾追賊九宮山敗其馬兵八月凱旋十一月列議政
大臣先是敘入關功授騎都尉世職三年四月敘征湖廣功加一
雲騎尉是年隨肅親王豪格征流賊張獻忠屢擊敗賊兵與貝勒
尼堪等分徇遵義夔州諸處斬獲甚眾五年二月部議征獻忠時
護軍統領哈甯阿被圍車爾布未及援降世職爲雲騎尉停其賞
七月與弟車格圖分襲父葉臣一等子爵車爾布由雲騎尉晉二

等子車格圖襲騎都尉六年隨英親王阿濟格討大同叛鎮姜瓖
城中賊出犯鑲紅旗營車爾布率護軍擊敗之會賊黨自阻馬得
勝二路分兵五千至北山偪我軍瓖亦率眾出城拒戰護軍統領
鼐拜破賊一營車爾布偕副都統譚布合兵繼進賊出城者盡殲
焉爾遇 恩詔晉三等伯十二年十二月 命同甯海大將軍伊
爾德率師征海賊於浙江先是明魯王朱以海與僞侯阮進等據
舟山大兵逐之入海擒阮進取舟山至是阮進餘黨僞伯阮思僞
總制陳六御等復據舟山十三年師至杭州聞僞總兵王長樹王
光祚沈爾序等肆掠大嵐山乃先遣軍迎擊敗之於夏關追至南
斗門斬長樹光祚爾序及賊兵無算車爾布與伊爾德自甯波乘

舟趨定海分兵三路進攻賊眾萬餘列戰艦二百抗拒車爾布麾眾敗之追至衡水洋陳六御阮思遁擒偽總兵林德等一百餘人盡獲其偽印船破遂遣軍進剿舟山擊沈賊船招撫偽總兵以下數十人舟山平十四年正月班師 上遣貝勒杜蘭等迎勞郊外九月敘復舟山功並錄其隨征大同戰績晉一等伯兼一雲騎尉十五年十二月同安南將軍明安達哩奉 命統兵駐防貴州明年二月 命移駐荊州八月海賊鄭成功寇江甯車爾布同明安達哩自荊州赴援敗偽都督楊文英於揚子江港口斬偽副將一獲其船及器械十七年十一月率兵還京十八年調鑲紅旗蒙古都統康熙三年以久疾 命解都統任七年三月卒 予祭葬如

例子莽喀改襲二等伯

右 國史館本傳

國朝書次頁改刀局

卷三十三

將帥四

四

國朝書獻類徵初編卷二百六十五目錄

將帥五

鄂齊爾桑

阿伯通

阿濟格尼堪

柯汝極

子永業
從子永盛

瑪沁

兄子康喀喇

李懋珠

布延

張大猷

永順

阿濟拜

綽拜

瑚什布

武賴

瓦爾喀珠瑪喇

弟伊瑪喇

景固勒岱

從弟崇阿

布丹

剛阿泰

弟巴顏

明安

子昂洪

多爾濟

劉仲錦

喀山

子納海

國朝書目考卷之二十一

--	--	--	--	--	--	--	--	--	--

國朝耆獻類徵初編卷二百六十五

通奉大夫前署江西巡撫江西布政使
布政使湘陰李桓
將帥五

鄂齊爾桑

鄂齊爾桑姓博爾濟吉特氏扎魯特部長巴克之子也 太祖高皇帝天命六年巴克爲我師所擒鄂齊爾桑來請爲質釋其父還上許之八年巴克來朝 上遣鄂齊爾桑與俱還 太宗文皇帝卽位以扎魯特諸部背約附明 命大貝勒代善統師征之斬倡叛者擒巴克及其族拉什布等並以鄂齊爾桑至皆隸滿洲鑲黃旗 賜衣服器用有差授鄂齊爾桑爲佐領尋從征董夔有斬

獲天聰三年從 上征明遇薊州步兵同額駙揚古利率先破敵
五年圍大凌河城擊敗明錦州援兵八年敘功授三等輕車都尉
世職是年八月從 上征明大同 上命前鋒統領圖魯什參領
吳拜分率左右軍而以額駙多爾濟與鄂齊爾桑並領中軍擊明
總兵曹文詔大敗其眾追至城下獲馬百崇德二年同都統都類
參領和託皆以出獵誤射他人馬繫兵部鄂齊爾桑先至與諸繫
者共居一室參政穆爾泰以時方溽暑令都類獨留室中徙眾於
庭不以避之鄂齊爾桑亦徙出自設布帳以處穆爾泰復令撤去
爲和託更設鄂齊爾桑坐炎日中良久往告啟心郎穆成格穆成
格不言理事官鄂穆克圖曰爾徒自怨乎抑欲陳奏乎如徒自怨

則已果欲入奏我等代陳之鄂齊爾桑曰縲絏之囚何敢復有陳
奏耶事遂寢及鄂齊爾桑釋繫自奏 聞穆爾泰穆成格皆坐罷
任鄂齊爾桑擢內大臣六月從征松山明兵夜犯 御營侍衛坤
等擊卻之諸大臣未及禦敵者皆議罰 上念鄂齊爾桑自外藩
來歸著有勞績 特予免議順治二年正月子喇瑪思尙公主
封固倫額駙二月 世祖章皇帝以鄂齊爾桑素荷 太祖眷顧
晉爵三等男五年卒子楚祿襲

右 國史館本傳

陳伯通

公諱伯通字魁吾世爲三韓望族起家署章京 太宗朝升佐領
屢從征伐如攻朝鮮服蒙古克錦州下松山拔大凌河此 國家
開拓疆土戡定中原時也諸將士有事茲役者功輒稱最而公身
在行間所至著績視諸將士功獨多迄 世祖章皇帝入關建鼎
窮追逋寇公復從王師長驅逐北大破賊於潼關關中既定旋拜
西安畱守未幾孟公喬芳持節督秦時河西五鎮初下計非得素
有威望負文武大略者領重兵鎮之不可雅意屬公卽拜疏請授
公甘肅總戎已得 命矣會江西有叛將之變羽檄乞援甚急公
奉調馳往竟未赴甘比至江右叛賊金聲桓業連陷數郡逆餒方

熾公與諸路兵協力會剿未數月賊平振旅還京師一時論大將制勝克敵才者咸交口推轂公不日將再秉旄鉞以出而公自念束髮從戎披堅執銳者三十餘年戰必克攻必勝蓋君之靈社稷之福也今老矣且善疾不能復任金革遂引年乞休閱再歲以病卒年幾十有幾嗚呼古稱勇將易儒將難才將易仁將難以余聞公精騎射武略絕人顧嗜書史在軍中手不釋卷秉燭吟覽常至丙夜時擬之杜征南又性仁慈凡有俘獲輒矜釋之曰此一時誤羅賊網耳縱之令自新皆朝廷赤子也所俘眾感泣叩首而去公以百戰成大功而其在軍不冒妄殺一人如此夫不妄殺人者必有後今公之子孫先後躋貴顯繩繩繼繼益大公之家聲不可

謂非天道也子六人長養忠京口固山大能紹公志讀書明大義
折節與人交人咸德之次某次某孫長嘉善佐領次嘉猷太常寺
少卿次某內閣撰文中書舍人亦以文學稱俱養忠出公墓在某
鄉某原奉常將立碑墓道以垂示不朽而乞文於余余不能悉公
行事爲述其梗槩以見公之積善餘慶而陳氏之福蓋未有艾云

右墓碑張玉書撰

按金聲桓平在
順治六年正月

皇朝通志卷之八十五

四

阿濟格尼堪

阿濟格尼堪滿洲正白旗人姓他塔喇氏天聰八年襲父達音布三等輕車都尉世職任參領從太宗文皇帝征察哈爾由大同入明邊與護軍統領雅賴擊敗明兵於崞縣師還復同參領阿爾津至山海關值敵多斬獲崇德元年從上征朝鮮遇明甯遠守邊兵擊敗之二三年隨貝勒岳託征明過北京破總兵侯世祿軍追斬其護印者獲其印與馬四年擢護軍統領隨肅親王豪格攻錦州設伏於連山擒五人獲馬七六年鄭親王濟爾哈朗統兵圍錦州阿濟格尼堪以七十人設伏敗敵眾進攻杏山領蘇直入敵營敵大潰時錦州城中蒙古諾木齊等願投誠爲明總兵祖大壽所

覺以兵圍之未得出阿濟格尼堪偵知之乘夜薄城力戰率兵先登克其郭援諾木齊等以歸旋擊松山兵兩戰皆捷 上以阿濟格尼堪年少能奮勇殺敵 賚白金四百兩晉一等輕車都尉是年八月明總督洪承疇集諸鎮兵援錦州 上親統大軍駐營松杏兩山之閒截其糧道明總兵吳三桂唐通等潛遁 上召阿濟格尼堪 親授方略與護軍統領鼇拜等追擊大破之八年八月 奉 命駐防錦州九月鄭親王攻取中後所前屯衛阿濟格尼堪率所部及蒙古兵攻中前所明總兵黃色遁拔其城復進捕城中逸出者皆就獲敘功加一雲騎尉 世祖章皇帝順治元年四月 睿親王多爾袞統兵入山海關擊流賊李自成阿濟格尼堪率護

軍破賊追至望都敘功晉一等男十月隨豫親王多鐸追剿自成
取道河南渡孟津薄潼關賊鑿重壕以阻我軍賊將劉方亮糾眾
千餘來犯阿濟格尼堪同護軍統領圖賴阿爾津等奮戰賊挫衄
乘夜侵正白旗護軍驍騎營復擊卻之連破賊二營領兵踰壕塹
躬冒矢石先登城賊眾驚潰或竄或降大兵俱入關二年正月進
征西安自成由商州竄湖廣豫親王奉 詔征江南四月至淮安
遣阿濟格尼堪率護軍趨揚州列營城北合親軍攻克其城獲戰
艦二百餘渡江至江甯追擊明福王朱由崧於蕪湖敗其舟師捷
聞晉爵三等子三年隨端重親王博洛定浙閩攻克金華衢州破
仙霞關下建甯延平明唐王朱聿鍵遁走汀州阿濟格尼堪同護

軍統領都爾德追擊至城下率精銳先登擒斬聿鍵其總兵姜正
希糾眾二萬赴援阿濟格尼堪指揮將士擊之斬殺過半明年凱
旋晉爵一等子 賜勅予世襲勿替五年授正白旗滿洲都統六
年隨鄭親王征湖廣列參贊大臣是時明桂王朱由榔遣其督師
何騰蛟總兵王進才馬進忠等據湖南郡邑阿濟格尼堪至長沙
與兵部尙書阿哈尼堪領將士先驅次湘潭遇迎戰者輒擊敗之
破北門入騰蛟就擒追勦潰眾於湘鄉盡殲之遂趨寶慶距城七
十里進才進忠糾眾抗拒我軍分步騎更番進戰直薄城東門進
才等潛遁追勦之於沅州靖州進定全州七年正月班師 賜白
金五百兩晉爵三等伯列議政大臣四月卒 予祭葬如典禮謚

勇敏子宜理布襲別有傳

右 國史館本傳

勇敏子宜理布襲別有傳

五

四庫全書

丁

柯汝極子永綦 從子永盛

柯汝極遼陽人後隸鑲紅旗漢軍天命六年 太祖高皇帝克遼陽有降人叛逃汝極舉發其事復擒獲閒牒十四人授參領 子三等輕車都尉世職 太宗文皇帝天聰八年授禮部參政崇德三年考滿晉職二等輕車都尉五年裁省參政仍專任參領七年分漢軍隸八旗以汝極任佐領 世祖章皇帝順治元年三月復授禮部參政二年十月改鑲紅旗漢軍副都統遇 恩詔晉世職一等輕車都尉四年以副都統率兵駐防杭州七年七月卒於官無子以弟之子永綦爲子襲職永綦旋任兵部郎中兼參領遇 恩詔晉爵三等男十年擢鑲紅旗漢章副都統十二年兼任戶部

侍郎十三年擢本旗都統同甯海大將軍伊勒德征浙江海賊由甯波乘舟趨定海僞伯阮思僞總兵胡自慶等率眾列艦於衡水洋我師進擊賊眾既卻復前永綦躍入賊艦斬自慶餘賊望風披靡我諸軍並進斬阮思及僞總制陳六御等遂定舟山十四年追論在戶部時援 赦免員外郎朱世德虧缺稅銀坐贍徇降世職一等輕車都尉尋敘平舟山功仍復三等男 聖祖仁皇帝康熙元年同靖東將軍濟什哈征山東叛賊于七賊糾黨踞棲霞縣岨嶠山乘夜劫營永綦射殪三十餘人賊竄遁復追殪九十五人于七竄入海十年三月授京口將軍十二年擅撥戰艦與總兵李廷棟移取家口爲副都統張所養劾奏罷任十三年起署山東提督

十六年十二月文登城守兵以給餉遲延羣集縣廨鼓譟刃傷知縣吳閻啟十七年五月左都御史宋德宜劾永葵平日剋減兵糧縱成驕悍文登兵眾鼓譟又隱匿不報無異養癰待潰上命吏兵二部察議罷任革世職以其弟永葵襲汝極之一等輕車都尉二十四年卒

右 國史館本傳

柯永盛

柯永盛遼陽人隸鑲紅旗漢軍副都統柯汝極從子也 太宗文皇帝崇德六年任佐領隨大軍圍錦州以礮攻克晾馬山臺及杏山塔山二城七年奉命同副都統馬光輝鑄神威礮八年隨鄭

親王濟爾哈朗征明取前屯衛中後所二城敘功 予騎都尉世職 世祖章皇帝順治元年任刑部理事官大軍初定山東授膠州總兵至則勦平昌樂土賊秦尙行趙慎寬等流賊李自成裨將趙應元詭就侍郎王鼐永招撫入青州害鼐永踞城猖獗永盛率兵赴援同副都統和託李率秦駐兵城外輕騎入城設計誘款應元斬之復率兵圍高密擒斬僞元帥張輿二年濰縣土賊張廣旣降復叛糾眾數千犯萊州永盛遣游擊楊遇明擊敗其眾廣中銖死餘賊悉平三年調江甯總兵總督洪承疇遣永盛領兵會勦山西叛賊南贛巡撫苗胙土奏言江西諸郡叛服靡常贛州爲全省要區請畱永盛鎮守 詔調永盛南贛總兵四年正月湖廣興國

州土賊柯抱衝陳珩玉等殺武昌同知張夢白寇掠江西武甯永
盛遣將分勦連破賊寨抱衝珩玉並就擒斬時明桂王朱由榔據
湖南江西之石城甯都雩都瑞金長甯安遠諸邑叛應之倚山結
寨四出劫掠永盛遣副將劉伯祿徐啟仁參將董大用游擊孔國
治等次第勦平之八月擢湖廣提督五年江西總兵金聲桓叛興
國孝感雲夢黃安麻城蕪州諸土賊亦皆蠢動永盛移兵防守要
地分遣參將鄔乘鸞游擊張國忠等勦平賊寨十年流賊張獻忠
遺黨李定國孫可望等掠湖南甯遠大將軍貝勒屯齊統師由衡
州進征永盛督兵繼其後策應援勦屢敗賊眾擒斬無算遇 恩
詔晉世職三等輕車都尉十八年調山西提督 聖祖仁皇帝康

熙三年考滿加左都督七年永盛以年老乞休 上慰留之尋以
宣力年久加太子少保八年致仕十四年正月卒 賜祭葬如例
子鍵襲世職弟永昇由員外郎出任湖南糧儲道十九年遷江西
按察使二十二年遷安徽布政使二十七年二月擢湖廣巡撫時
裁湖廣總督令督標兵老弱者歸農強壯者候缺食糧五月永昇
甫之任裁兵夏逢龍結眾作亂突入巡撫廨署遇拒阻者輒刃之
傷永昇臂奪其印復傷永昇足仆地悉驅其親屬及家人出走搜
掠財物永昇乘閒自縊死子鉉由九江走安慶以其事訴於巡撫
楊素蘊入奏 賜卹如例 世宗憲皇帝時以永昇入祀昭忠祠

右 國史館本傳

瑪沁 兄子康喀喇

瑪沁滿洲鑲紅旗人姓完顏氏父本託輝官佐領兼都察院理事官都統博爾普之長子也瑪沁爲本託輝次子由護軍校洊擢護軍參領崇德三年隨貝勒岳託征明白牆子嶺入邊明薊遼總督吳阿衡以馬步卒六千來援瑪沁與前鋒統領勞薩等率兵擊敗之獲其馬及礮六年大兵圍錦州敗敵於松山順治元年隨睿親王多爾袞入山海關擊敗流賊李自成又追敗之於望都敘功子騎都尉世職五年擢鑲紅旗蒙古副都統七年遇 恩詔加一雲騎尉是年隨鄭親王濟爾哈朗征湖廣至衡州疾卒 賜祭葬如典禮無子以其兄之子康喀喇襲職康喀喇初任二等侍衛順

治四年蘇尼特部騰吉思與弟騰機特叛康喀喇隨豫親王多鐸率師往剿大破賊眾陣斬騰機特八年九年疊遇恩詔晉世職二等輕車都尉十二年任驍騎參領十五年隨甯南大將軍洛託征貴州有功康熙十年調護軍參領十二年冬逆藩吳三桂反上命順承郡王勒爾錦統師討之康喀喇率護軍以隨十三年四月師攻岳州與賊戰於荆河口及城陵磯以礮擊毀賊艦殲賊無算七月又隨貝勒察尼攻岳州賊將吳應麒集眾七萬餘拒戰康喀喇率兵衝擊大破賊十六年三月隨安親王岳樂攻長沙府城敗城中出戰賊兵十一月隨將軍穆占攻復茶陵州賊將王輝引賊萬餘犯攸縣城康喀喇擊敗之追北十餘里俘獲甚眾明年又

隨穆占取耒陽縣擒賊十餘人十八年攻克常甯新甯諸邑又隨
大兵征廣西復郴州二十四年擢鑲紅旗蒙古副都統二十五年
調滿洲副都統二十九年七月隨裕親王福全征噶爾丹竄遁班
師明年二月卒 賜祭葬如典禮以其子堪達海襲

右 國史館本傳

李懋珠

李懋珠字名山湖南桂東人生有勇力喜任俠不事家人產明末避寇江西嘗與營卒博負不償反毆勝者福建鄭成功據金廈巡撫吳廷祚南征求勇士被毆者薦懋珠應召而往既見吳奇其貌置之左右至廈門吳幾爲飛礮所中賴懋珠以身翼得免吳脫所衣貂裘衣之隨征四嶽有功累官延綏鎮總兵初懋珠被召與其兄懋修弟懋伯子進麒偕皆著戰績授官有差

右傳李元度

按鄭成功據金門廈門在順治七年

Table with 10 columns and 1 row. The table is mostly empty, with some faint markings in the second and third columns. The text 'CONFIDENTIAL' is printed vertically on the right side of the table.

--	--	--	--	--	--	--	--	--	--

CONFIDENTIAL

布延

布延姓郭爾羅特氏原籍蒙古居察哈爾部爲塔布囊天聰元年同昂坤杜稜來歸隸滿洲正黃旗初從征棟斲爲貝勒岳託鄉導率先進擊又征克什克騰部擊索諾木諾木齊兵首衝陣破之四年偕參領圖魯什略明邊敗其哨卒有俘獲八年正月偕圖魯什略錦州松山斬百餘級獲樵車百餘騾驢牛百四十命以所獲賞將士十月略十三站斬十級擒明把總獲馬三十二月遣迎察哈爾降衆是年敘來歸功授騎都尉世職九年同布哈塔布囊略甯遠俘獲歸比出邊明兵千餘追布哈陷於陣哈談巴圖魯前行還戰馬中矢仆布延急進援與之馬復同奮擊大敗敵兵論功

賜人一馬二牛三段三等輕車都尉崇德元年二月 命齋書

諭明松棚路潘家口董家口喜峰口守將責明偏助葉赫構起兵
端及致書不答之罪五月隨武英郡王阿濟格征明燕京遇敵盧
溝橋敗之三年二月從征喀爾喀前鋒將領勞薩違 上命得蒙
古漢人收其財物牲畜縱之去論死布延議削職鞭百贖身 上
宥之七月擢議政大臣兼護軍統領九月隨岳託征明由密雲東
北牆子嶺毀邊入明馬步兵三隊俱敗走布延追擊獲馬八十七
四年率兵防守烏欣河口偕侍衛阿爾薩蘭圍松山布延設伏擊
斬二十一級偵錦州斬哨卒八獲馬十二五年隨睿親王多爾袞
函錦州同左翼軍衝敵步營斬盈壕六年三月以多爾袞違 諭

離城遠駐又私遣軍士還布延不諫阻議削職籍其家之半 特
旨降罰未幾鄭親王濟爾哈朗克錦州外城布延同內大臣伊爾
登奮擊有功 賜百金晉二等輕車都尉時錦州之役多爾袞濟
爾哈朗更番相代明總督洪承疇率兵十三萬來援八月 上親
統大軍征之明兵遁移 蹕松山環城濬濠夜明總兵曹變蛟衝
圍突犯 御營尋中創奔回布延以內大臣不嚴防守論罰鍰七
年二月我軍擊擒洪承疇布延以援兵後至論死 命贖免十一
月大兵自黃崖口征明分三隊布延率護軍居次進圍薊州順治
二年 世祖章皇帝念 太宗眷顧舊臣加布延一等輕車都尉
五年從子烏納海先時出征陣亡 贈騎都尉其叔父桑阿爾齊

國朝通志卷之三十三
三
襲職至是卒併授布延襲晉三等男八年布延卒長子莽塞襲職
年卒無嗣以布延兄阿拉克泰襲又卒仍以布延嗣子茂奇塔特
襲康熙三十五年從征噶爾丹至昭莫多奮勇破賊有功加一雲
騎尉

右 國史館本傳

張大猷

張大猷遼陽人後隸漢軍鑲黃旗 太祖高皇帝天命六年大兵克遼陽大猷時爲明千總自廣甯來降授佐領逾年明邊將誘我新附之眾往歸遣人爲閒諜匿游擊郎某所大猷發其事 太宗文皇帝嘉之 予三等輕車都尉世職天聰九年以所管丁壯缺額論罰鍰崇德三年任刑部理事官尋擢右翼漢軍副都統四年正月大兵征明錦州以礮擊破城旁一臺臺中敵兵尙拒守旣而乘閒遁去大猷坐防範不嚴部議革職罷任得 旨從寬罰鍰六月更定漢軍旗制授鑲黃旗副都統五年隨睿親王多爾袞圍錦州率本旗兵攻取五里臺及晾馬山馬家湖諸處又克金塔口臺六

年隨鄭親王濟爾哈朗圍錦州會松山騎兵突出奪我紅衣礮大
猷擊卻之復同都統劉之源等攻克塔山杏山及附近諸臺論功
晉二等輕車都尉七年六月擢兵部參政十月隨貝勒阿巴泰征
明師至渾河築橋以濟明總督范志完集兵拒戰大猷與副都統
祖澤洪擊敗之八年隨鄭親王征明甯遠取前屯衛中後所二城
晉一等輕車都尉 世祖章皇帝順治元年同都統葉臣劉之源
等征山西追逐流賊李自成之將郭某擒斬之合兵攻克太原府
城復同都統李國翰招撫郡邑賊眾踞黃河濱立柵大猷攻毀之
賊潰遁獲船十有五二年隨大軍定江南同都統吳守進率兵征
浙江至石門縣明兵自錢塘乘夜來襲我營大猷奮擊卻之進取

嘉興府同都統格恩圖擊敗城中出戰兵遂克其城先後取揚州
崑山常熟江陰諸郡縣皆督兵以礮克城有功三年二月 命同
侍郎巴山率兵鎮守江甯總管漢軍及綠旗兵旋授爲提督江南
總兵官五月敘元年以來軍功晉爵三等男四年明故官侯峒曾
之子侯元滂等潛遣人通明魯王朱以海於海島取僞鎮黃斌卿
書以歸爲柘林游擊陳可所獲大猷與巴山以其書入奏得 旨
嘉獎 諭曰爾等嚴察亂萌具見公忠盡職六年率兵勦六安州
山賊賊渠張福寶自明季結黨倡亂聯踞英山霍山倚險立寨負
固有年至是江南總督馬國柱以兵進勦大猷與巴山率兵會之
陣斬福寶諸賊寨俱剪平國柱奏捷謂大猷身先士卒履險摧鋒

功居第一屢遇 恩詔晉爵至三等子世襲罔替九年正月卒於官以其子應庚襲爵

右 國史館本傳

永順

永順先世居棟鄂以地爲姓 太祖高皇帝時隨其伯父對齊巴
顏來歸隸滿洲鑲紅旗任佐領 子二等輕車都尉世職 太宗
文皇帝天聰三年擢鑲紅旗都統從 上征明由龍井關進圍遵
化八旗分八隅列陣永順率鑲紅旗兵攻城之西南督眾樹雲梯
克之明年正月從 上取永平奉 命同都統達爾哈喀克都哩
固三泰領兵千人合教漢柰曼巴林扎魯特諸部兵攻昌黎縣城
城上礮石交下我師所樹雲梯多燬折因焚其近城廬舍以覆
命時灤州遷安二城並爲大軍所取 上班師畱軍鎮守以永順
隨貝勒阿敏碩託鎮永平五月阿敏聞灤州遵化爲明兵攻陷欲

棄永平碩託及都統圖爾格等皆言不可阿敏與永順定議遂率眾出冷口而歸於是坐罪罷任革世職籍沒七年六月隨貝勒岳託征明旅順口冒槍礮矢石進攻身中數創仍鼓勇力戰以第一人先登城敘功復世職崇德三年授鑲紅旗副都統四年十一月同承政索海等征索倫部五年四月凱旋俘獲無算 賚貂皮及人戶晉一等輕車都尉世襲罔替六年隨睿親王多爾袞圍明錦州都統阿山分兵攻廣甯之山城永順同索海先設伏要路敵人自城潰遁者無一得脫旋遇錦州兵三百往小凌河敗獵擊斬九十二人是年秋明總督洪承疇集兵十三萬援錦州列營松山我師分左右翼擊敗其三營步兵明年論功人有言永順當接戰時

會墜馬獲他人之馬再戰同本旗兵皆避趨左翼及右翼戰勝乃馳至擊敗永順以其誣己欲焚楮設誓事 聞下部集質以鑲紅旗避趨左翼屬實論永順欺誑罪應死 命解副都統任從寬免死罰贖順治七年八年三遇 恩詔晉爵至二等男九年三月卒以其子庚圖襲爵庚圖先以護軍參領從征有功得騎都尉世職至是合爲一等男兼一雲騎尉

右 國史館本傳

RECEIVED
JAN 11 1965

TK

阿濟拜

阿濟拜蒙古正藍旗人先世居巴林姓卓特氏阿濟拜初任佐領
天命三年 太祖高皇帝取明撫順班師明總兵張承應自廣甯
襲我軍後阿濟拜隨貝勒阿巴泰擊卻賊眾四年明總兵杜松由
撫順來犯界藩阿濟拜復隨貝勒擊敗之七年從大兵征廣甯敗
明兵於沙嶺天聰三年 太宗文皇帝征明燕京阿濟拜任參領
略通州斬哨卒五獲馬四進薄燕京同參領鄂羅塞臣等擊敗明
巡撫袁崇煥兵九年 命護軍統領布哈率八十人略明邊境至
甯遠擒七人獲馬四十牛百餘還出邊六十里明兵八千追至布
哈與戰歿於陣阿濟拜同巴圖魯哈譚等還擊敗敵護所獲以歸

分 賜有差敘功授騎都尉世職崇德六年隨鄭親王濟爾哈朗
圍明錦州明年錦州既下以護軍統領鄂羅塞臣會先破敵陣諸
將隱其功並論罪阿濟拜應鞭責 上以諸將圍城日久勞苦有
功皆免之 世祖章皇帝順治元年四月大兵入山海關敗流賊
李自成阿濟拜署副都統爲後隊尋同都統伊拜勦賊山西至澤
州連破賊營十一月擢正藍旗蒙古副都統二年三月敘入關功
加一雲騎尉三年隨肅親王豪格征流賊張獻忠過漢中同都統
巴哈納擊走叛鎮賀珍進趨秦州同尙書星訥擊敗賊將高汝礪
獲馬騾百餘進擊獻忠於西充與護軍統領阿爾津蘇拜連挫賊
眾五年敘功晉三等輕車都尉三遇 恩詔晉一等輕車都尉兼

一雲騎尉九年八月以老疾乞休 命解副都統任尋卒 賜祭
葬如典禮證忠勤立碑於墓以其弟鄂兌襲職

右 國史館本傳

國朝文獻通考卷之八十四

三

綽拜

綽拜姓巴林氏世居葉赫 太祖高皇帝時來歸隸鑲白旗蒙古
尋管佐領事 太宗文皇帝天聰六年以克副任使 予騎都尉
世職九年隨護軍統領烏巴海征瓦爾喀部深入額赫庫倫及額
岳索地俘獲甚眾晉世職三等輕車都尉崇德三年兼任戶部
理事官是年隨睿親王多爾袞征明由青山口入邊屢擊敗敵眾
越燕京略山東直抵濟南敵騎千餘拒戰綽拜與都統和洛輝先
眾奮擊遂克其城七年隨肅親王豪格圍明總督洪承疇於松山
承疇遣兵乘夜越濠犯鑲黃旗營綽拜擊卻之並墮城濠殲殪無
算八年考滿晉二等輕車都尉 世祖章皇帝順治元年隨大軍

入山海關敗流賊李自成二年敘功晉一等輕車都尉四年考滿
加一雲騎尉五年授參領隨征南大將軍譚泰討江西叛鎮金聲
桓克復饒州南昌凱旋 賚白金千兩馬四十匹七年任倉場侍
郎八年二月授鑲白旗蒙古副都統三月兼工部侍郎五月遷本
旗都統三遇 恩詔晉爵至一等男九年八月以疾解任十二月
卒 賜祭葬如例子奇默格圖襲

右 國史館本傳

瑚什布

瑚什布姓納喇氏。葉赫貝勒錦台什之族人。太祖高皇帝時來歸隸滿洲鑲藍旗任佐領。時大貝勒代善屬下阿山阿達海等自負才勇以未遇任用欲他往。率屬潛逃。瑚什布隨貝勒阿敏追之射磴阿山二子阿山阿達海。既入明邊仍來歸。瑚什布尋任侍衛兼參領。太宗文皇帝天聰二年從征通古索爾和部。身中七創。戰益力。斬敵守將一敘功。于騎都尉世職。八年從上征明。大同與前鋒統領圖魯什等擊敗明總兵祖大弼軍。進攻萬全左衛。明總兵曹文詔遣騎兵出城迎戰。復設伏邀擊。斬三十餘級。生擒四人。九年分設蒙古八旗。都統擢瑚什布鑲藍旗蒙古都統。崇德

元年隨武英郡王阿濟格征明越燕京攻克定興縣城凱旋部議出邊時不整隊伍又不殿後致士卒十人爲敵所殺罰銀六百兩革世職罷都統專任佐領三年授理藩院副理事官 世祖章皇帝順治四年復騎都尉世職七年九年三遇 恩詔晉世職至二等輕車都尉尋卒子泰庫襲次子穆徹納初任護軍校順治三年七月隨豫親王多鐸征蘇尼特部逃人騰機思擊敗喀爾喀兵四年任護軍參領六年隨英親王阿濟格征大同叛鎮姜瓖敗僞總兵劉偉思等賊眾進攻甯武關賊帥宜孟臣來援穆徹納與護軍統領藍拜擊敗其眾尋運紅衣礮至左衛城遇賊於吳家峪步戰擊卻之十一年隨靖南將軍珠瑪喇征廣東敗賊渠李定國於新

會先是三遇 恩詔子騎都尉兼一雲騎尉世職至是敘功晉三等輕車都尉十三年閏三月卒子薩爾圖襲職

右 國史館本傳

武賴

武賴滿洲鑲黃旗人姓瓜爾佳氏費英東第五弟吳爾漢子也天聰四年四月同參領布爾堪等率精兵百人略明邊境渡大凌河馳斬俘獲甚眾八年任參領九年擢正藍旗都統崇德元年隨武英郡王阿濟格等征明值進化三屯營守備率眾來窺殲之尋以不俟後隊先行出邊誑言王貝勒等偪脅先歸論罰如律奪其俘獲朝鮮之役隨豫親王多鐸擊敗其援兵復與都統譚泰率雲梯兵攻城守陴者懼竄盡收其輜重牲畜以歸三年隨貝勒岳託征明至山東破明內監馮永盛總兵侯世祿等兵過董家口敵兵千餘沿山列陣同副都統準塔連戰皆大捷擄其營時我軍輜重旣

行明將率眾衝截復同準塔擊卻其眾遂乘勝略地克取二城生
是武賴奉 命鞠蒙古訟事坐受賄徇私論罪褫職至是敘功授
騎都尉世職五年隨睿親王多爾袞征明義州屯田刈錦州田禾
明兵爭拒武賴追擊至城濠而返遂進師松山敗其步兵八年隨
貝勒阿巴泰征明至渾河明將率兵千餘迎戰同副都統納爾特
敗之師旋過密雲明兵列火礮以截歸路與都統鼐拜奮勇衝突
明兵潰走大將軍出邊有敵兵來犯鑲藍旗武賴擊卻之整軍以
出復往略地克取一城錄功加一等雲騎尉順治元年入山海關
從破流賊李自成兵進秩二等輕車都尉七年九年三遇 恩詔
加至二等男 于世襲尋以老乞休病卒年六十有四 賜諡康

毅勒石紀功子固德襲爵

右 國史館本傳

國朝書院藏板刀身 國朝書院藏板刀身 國朝書院藏板刀身 國朝書院藏板刀身 國朝書院藏板刀身

五

--	--	--	--	--	--	--	--	--	--	--

THE UNIVERSITY OF MICHIGAN

UIN

瓦爾喀珠瑪喇 弟伊瑪喇

瓦爾喀珠瑪喇姓那木都魯氏世居瓦爾喀琿春地祖察禮當
太祖高皇帝時率族人來歸隸滿洲正白旗珠瑪喇自少扈從
太宗文皇帝征討任佐領時葉赫有同名者 命稱瓦爾喀珠瑪
喇以別之天聰八年 賜敕授騎都尉世職尋率前鋒十人追獲
叛逃蒙古四十三人 特予優賞崇德二年同佐領喀凱等分路
征瓦爾喀於額勒約索額黑庫倫僧庫勒諸路俘獲甚眾三年論
功加一雲騎尉授吏部理事官四年三月隨貝勒岳託征明乘夜
升雲梯攻克故城縣明總兵侯世祿以兵赴援珠瑪喇徒步突入
故軍力戰敗之被創甚猝遇明內監高起潛軍負創奮擊敵敗北

十月隨肅親王豪格略錦州破明邊城兵進至太平寨敵嚴陣以待珠瑪喇復徒步大呼衝鋒入陣斫毀鹿角中創不退敵兵大潰十一月隨承政索海薩穆什喀統左右翼兵征索倫部珠瑪喇俘獲十九人進攻虎爾哈之雅克薩城我軍火焚其郭佐領和託先登珠瑪喇繼之克其城師還黑龍江濱虎爾哈潰眾復合烏魯蘇屯之博穆博果爾兵六千來襲我正藍旗後隊珠瑪喇與索海設伏掩擊殲敵略盡五年六月晉三等輕車都尉六年隨鄭親王濟爾哈朗征明圍錦州敗松山騎兵明總督洪承疇赴援立營松山西北我右翼兵與戰失利敵兵環攻左翼軍珠瑪喇力戰敗敵破傷頷氣絕 上震悼 賜殮其三日復甦奏 聞 上甚喜令加

意調養勿卽隨征尋以監造盛京塔工告成 賞資甚優 命率
兵防守錦州諸山寨明兵來犯戰竟夜敵潰走斬四十餘級獲雲
梯及軍械明年晉二等輕車都尉八年考績晉一等 世祖章皇
帝順治元年珠瑪喇隨睿親王多爾袞入山海關擊敗流賊李自
成兵復勦滅馬山口土賊敘功加一雲騎尉二年十月調戶部理
事官十一月同都統巴顏等率兵會定西大將軍和洛輝征流賊
張獻忠自西安進師屢挫賊三年 上命肅親王豪格代和洛輝
統軍趨階州聞賊眾屯禮縣南遣珠瑪喇分兵擊之賊驚竄復與
護軍統領鼇拜進征西充獻忠旣滅乃班師六年隨英親王阿濟
格討大同叛鎮姜瓖至左衛賊列兵城外迎戰珠瑪喇擊走之復

左衛旋勦賊甯武關賊於山岡列礮以拒珠瑪喇同參領烏庫禮
率師疾馳據岡脊大破賊營僞總兵劉偉遂以關降七年敘錄勞
績舊臣晉爵三等男 予世襲罔替八年推正白旗副都統遇
恩詔累晉一等男十年三月卒於官年五十有三 予祭葬如例
祀四川名宦弟伊瑪喇初任前鋒侍衛順治三年隨肅親王軍於
四川賊黨趙雲桂圍保甯伊瑪喇登城射中雲桂目賊走我師
乘之大捷至是襲兄珠瑪喇一等男爵尋授參領康熙十三年陝
西提督王輔臣叛應逆藩吳三桂伊瑪喇隨揚威將軍阿密達討
之十四年五月師至甯州賊兵千餘抗拒擊之潰遂保甯州九月
進攻平原距城八里輔臣糾賊萬餘迎戰伊瑪喇隨貝勒洞鄂擊

敗其眾十五年隨撫遠大將軍圖海復攻平涼至城北虎山墩偵
賊賊合步騎突至伊瑪喇督眾奮戰賊敗北十八年搜勦棧道益
門鎮諸路賊營敗賊將陳君極二十一年賊平還京二十七年以
老疾乞休三十四年五月卒亦祀四川名宦次子滿色襲爵世
宗憲皇帝御極 恩詔察奏效力行間未議敘者兵部列伊瑪喇
名以進 賜加雲騎尉世職與長子能泰襲

右 國史館本傳

景固勒岱 從弟崇阿

景固勒岱姓扎庫塔初居呼爾哈部烏拉招之降不從 太祖高
皇帝遣兵征東海窩集部景固勒岱聞風徒步來歸遂隨征呼爾
哈部追獲叛逃降人偕眾攻取烏爾固辰路斬獲甚眾尋攜其家
室兄弟及所屬三十戶俱至隸滿洲正白旗任佐領天命三年
上征明進鴉鵲關攻克河城擢參領仍兼佐領後大軍取明瀋陽
遼陽景固勒岱並在軍有功 太宗文皇帝天聰八年五月 予
二等輕車都尉世職十二月 命同參領吳巴海統兵四百征瓦
爾喀部招降屯長芬達哩及屯眾五百餘戶俘阿庫里尼滿部千
餘人獲貂虎狐貉舍利獾水獺青鼠等皮無算九年六月凱旋

命禮部諸臣出迎宴勞卽以所獲分 賜敘功晉世職一等輕車
都尉崇德二年隨武英郡王阿濟格攻明皮島克之 賜裘服鞍
馬銀布駝牛諸物 世祖章皇帝時屢遇 恩詔晉爵至二等男
順治十一年八月卒 賜祭葬如例諡曰忠直從弟崇阿任佐領
天聰八年隨征明大同略回雁堡我兵三人爲敵所圍崇阿奮勇
援出之崇德元年隨征朝鮮破敵於桃山村六年隨鄭親王濟爾
哈朗圍明錦州會蒙古烏巴什等遣人約降我軍克其外城敵猶
巷戰崇阿偕眾擊敗之七年隨貝勒阿巴泰征明入邊敗敵兵於
渾河岸進至山東之壽光縣城敘功 予雲騎尉世職順治元年
隨豫親王多鐸追流賊李自成至潼關屢擊敗來犯賊眾二年隨

大軍下浙江攻拔湖州城進取福建擊敗明唐王朱聿鍵兵眾於
福甯晉世職騎都尉五年隨征南大將軍譚泰征江西叛鎮金聲
桓敗賊黨王得仁於南昌其冬廣東叛鎮李成棟犯贛州以應聲
桓崇阿同副都統覺善往援會巡撫劉武元總兵胡有升等內外
夾擊成棟大敗單騎遁走六年破賊兵二萬於南康進圍信豐克
之成棟溺水死凱旋敘功晉世職三等輕車都尉屢遇 恩詔晉
一等輕車都尉景固勒岱之卒也無子以崇阿襲二等男爵別以
其弟之子巴音布襲一等輕車都尉世職十三年十月以景固勒
岱親弟之子富勒都襲二等男爵仍復崇阿一等輕車都尉 聖
祖仁皇帝康熙十八年崇阿乞休以其子采任襲

右 國史館本傳

布丹

布丹姓富察氏世居葉赫 太祖高皇帝時來歸隸滿洲正紅旗
分轄葉赫人戶授佐領尋兼任前鋒參領 太宗文皇帝天聰八
年從征明大同進攻萬全左衛城先登克之得 優賚 予雲騎
尉世職九年隨貝勒多鐸征明錦州師旋敵猝追襲都統石廷柱
部下兵有被困者布丹破敵陣援之出是時 上別遣貝勒統師
由歸化城征明山西布丹旋奉 命統前鋒參領烏拜等率兵百
人往駐上都城舊地偵軍事迎奏捷使偕還崇德元年隨武英郡
王阿濟格征明將入邊擊卻敵騎擒其邏卒連破雕鷲嶺長安嶺
二城皆督所部先登轉戰至涿州擒斬無算既旋軍敵覲我輜重

潛出居庸關設伏邀劫布丹率兵衝擊敵皆潰竄四年同前鋒參領沙爾虎達等率土默特兵二百略甯遠北界以數騎挑戰敵堅壁不出仍俘其樵採者以歸五年大軍圍錦州敵離城築臺布丹同前鋒參領納海色赫蘇爾德馳擊斬四十人復追斬出城刈草者四十一人敵以三百騎一再來犯並擊之遁尋與納海色赫往小凌河遇明總兵祖大壽遣蒙古十七人自錦州至盡斬之六年明總督洪承疇集援兵據松山犯我前鋒汎地布丹偕諸參領奮戰卻敵追斬十人尋又擊敗杏山後敵騎七年錦州下敘功晉世職爲騎都尉是年冬隨饒餘貝勒阿巴泰征明入黃崖口趨薊州擊敗明總兵白騰蛟白廣恩等斬獲甚眾 世祖章皇帝順治元

年隨睿親王多爾袞征流賊李自成敗賊將唐通於一片石遂入
山海關逐賊至安肅及望都屢戰皆捷敘功 予騎都尉加一雲
騎尉並世襲罔替遇 恩詔晉一等輕車都尉九年擢任正紅旗
蒙古副都統十一年十月卒 賜祭葬如例諡勤毅子胡素理襲
職

右 國史館本傳

剛阿泰 弟巴顏

剛阿泰漢軍正藍旗人李永芳第三子也幼隨父自撫順所來歸及長屢從征伐 世祖章皇帝順治五年十一月授九江總兵未赴任值叛鎮姜瓖以大同叛明年二月至鎮剿平大同城東土寇撫定上下水泉等十餘堡三月改授宣府總兵時山西至宣化迤東山中土賊聚眾遙應姜逆懷來所屬礮山狼窩蔚州所屬三澗辛莊黑山所在屯聚剛阿泰甫莅任卽率兵赴懷來徧礮山而營遣參將頗重耀等分兵攻狼窩礮賊甚多礮山賊首王海等懼悉眾來歸會辛莊賊劫桃花堡剛阿泰移兵疾馳抵蔚州率兵搜山賊糾眾三百拒戰我軍奮擊斬馘七十餘賊敗竄追剿至黑山設

伏山隘攜礮具進攻賊潰伏發悉殲之獲其牲畜器械三湖等賊聞風就撫五月奉命勦易州土寇遣參將羅映台等進兵麻黃谷以巨礮燬其巢復統兵自紫荊關循邊牆搜勦至昌平屬鎮邊城撫定其眾乃還鎮六月疏言臣任宣鎮兩月三勦山寇共招撫賊首王海等二十三人餘賊一千三百餘人或隨營收伍或交插肅農尚恐猜疑未化請發恩諭免死以安反側又言宣鎮營制近議裁併臣思經制有昔設而今可裁者有今宜設而昔未立者道在因時變通鎮標舊有槍礮分隸各營本難盡一今盡調赴山西協勦臣思火器一營必須專設以資援勦請於宣屬四營內每營抽撥戰守步兵各七十五名演習施放別成一營領以游擊使

之朝夕訓練庶幾緩急足恃疏並下兵部議行六年九月大軍旣
平姜瓖餘孽張五桂高鼎劉永忠等竄代州定襄繁峙五臺山中
糾眾犯五臺縣城宣大山西總督佟養量檄剛阿泰率兵援剿十
月至代州偵賊屯聚寶村我軍悉銳乘夜襲擊斬偽副將張賓偽
守道張秀等十餘人賊驚潰追擊大敗城下賊聞之懼解圍去我
兵躡蹤追擊再敗之高鼎劉永忠遁入靈邱之曹巖巖據岩險拒
守其黨分布五臺之窯頭砦柏砦定襄之溥沱七角諸砦七年正
月我軍分路圍剿剛阿泰與右衛副將徐長春由東北閒道進逼
窯頭砦破之斬偽副將一賊退守柏砦塞山隘以自衛張五桂復
糾賊赴援我軍攀巖以上賊失隘驚竄我軍力擊並敗援兵擒五

桂獲僞總兵印餘眾皆降八月滹沱七角諸賊糧盡亦降我軍進
偏賊砦砦高數百丈四面峭削不可上乃募勇健數十夜半從別
徑縋緘援手而登繼以眾軍發礮直轟砦門賊駭逸僞總兵董景
誼等自焚其巢而死高鼎妻及其父高來貢就俘山砦悉平八年
三月師旋敘功加都督同知先是剛阿泰勦賊時以山西省應解
宣鎮兵餉截畱散給移咨督餉主事奏銷戶部以援勦兵內有已
經部議裁汰者駁令宣大總督佟養量覈奏尋以調勦在先議汰
在後奏奉 諭旨准銷及銷冊上數復不符爲戶科給事中高辛
允所劾下佟養量察審剛阿泰疏劾已升督標副將之舊任鎮標
參將張世忠冒領侵欺得 旨革張世忠職勘擬治罪十年九月

佟養量疏言宣鎮餉銀六萬七千兩有奇侵沒非止一人且恐朦
混支銷爲數尙多張世忠出入必由自無所逃其罪前任餉司徐
兆舉陸元龍扶同銷算罪亦難辭今奉 旨嚴察須直窮到底臣
調審經手餉銀之員役剛阿泰身爲主帥俱抗庇不發侵吞之弊
顯然請 旨一並褫革赴省質訊奉 旨數萬餉銀任意侵吞大
干法紀及奉諭察審經手人員又抗匿不行發出殊可痛恨張世
忠已經擊問追擬其餘干涉員役俱令分別嚴行察議議未上剛
阿泰疏劾佟養量袒護張世忠據其委罪妄扳之辭誣指鯨吞抗
庇佟養量復劾剛阿泰驕悍欺誑疏並下部察議給事中王廷諫
許作梅並以宣府重鎮文武互訐恐致貽誤封疆交章論劾請

敕法司拘犯會鞠 上命戶部侍郎覺羅額爾德等赴宣化察審
十一年正月以張世忠未曾冒領剛阿泰未曾鯨吞督鎮逞忿互
劾覆奏下部議處會時甄別督撫大臣解佟養量任部議剛阿泰
逞忿乖張應革職其餉銀支銷有無情弊令新任總督馬鳴佩再
審尋奏張世忠具印領支餉卽時散給兵丁並無侵欺值剛阿泰
赴陽和閱兵未及申報及回又未面啟卽赴督標新任剛阿泰未
見領餉底冊致銷冊不符因劾其冒領罪在張世忠目無主帥不
申不報應予杖懲疏並下部覈議 從之以剛阿泰已經革職毋
庸再議尋回旗卒於家

右 國史館本傳

巴顏

巴顏漢軍正藍旗人李永芳第五子也天聰元年襲父三等子爵
崇德六年任參領從 太宗文皇帝征科爾沁有功復從圍錦州
時明總督洪承疇領兵十三萬來援聞 太宗親征遂退守松山
我兵四出追擊巴顏與都統石廷柱等運巨礮以從大敗承疇於
松山城下七年三月明副將夏承德獻松山城巴顏與石廷柱等
奉 旨收藏所獲槍礮火藥以備用六月增漢軍四旗爲八旗巴
顏任正藍旗都統八年九月隨鄭親王濟爾哈朗等征甯遠拔中
後所及前屯衛順治元年二月敘甯遠功晉二等子五月同石廷
柱統兵勦昌平州寇尋同都統葉臣徇直隸饒陽河南懷慶山西

澤州潞安諸郡邑皆下之凱旋 賜白金五百兩二年十一月奉
命帥左翼兵與右翼都統李國翰會定西大將軍和洛輝於陝西
進勦四川三年正月流寇孫守法賀珍等犯西安府巴顏與和洛
輝夾擊之殲其眾殆盡賀珍復並力拒戰巴顏與副都統齊默克
圖擊破之珍收合餘燼馬步兵約五千列陣山上巴顏登山奮擊
眾賊未戰而走遂追敗之於濠泗河三月收勦黑水峪斬守法降
賊眾二千進勦流寇一隻虎於商州賊兵二萬據山爲陣巴顏與
和洛輝督戰斬萬餘級復率兵偕副將王平等擊敗延安諸路流
寇追賊入山寨我兵掘濠圍之夜潛攻克其寨擒斬賊渠獲馬騾
無算五年六月敘功晉一等子十一月帥左翼兵載紅衣礮赴大

同討叛鎮姜瓖六年隨睿親王多爾袞復渾源州又隨英親王阿濟格復左衛隨翼親王滿達海復朔州汾州及太谷諸縣巴顏在軍中每指麾左翼兵發巨礮以攻所向皆克八年敘平姜瓖功晉三等伯兩遇恩詔加一等伯九年正月卒年三十有三賜祭葬如例子釋迦保襲爵

右 國史館本傳

THE UNIVERSITY OF CHICAGO

明安 子昂洪 多爾濟

明安姓博爾濟吉特氏初爲蒙古烏魯特部貝勒 太祖高皇帝
天命二年遣使獻駝馬七年率所屬人戶來歸 予三等子爵別
立烏魯特蒙古一旗 太宗文皇帝天聰三年同都統武納格額
駙恩格德爾等率滿洲蒙古兵征察哈爾降其邊境二千戶五年
從 上征明圍大凌河城明總兵祖大壽以兵出犯我臺堡明安
同都統和碩圖等率兵夾擊大敗之既而我軍僞爲明兵赴援狀
以誘大壽出戰明安同兩翼都統齊進奮擊大壽敗卻尋率眾降
明安得 優賚六年從 上征察哈爾師還以俘獲數少又弗卽
遵 諭歸隸戶籍且擅以官牛與其下蒙古及私匿在逃蒙古二

人諸罪部議應革世職罰鍰奪俘獲人口及賜物上念其前此先眾來歸免削世職改隸正黃旗滿洲世祖章皇帝時三遇恩詔晉爵至二等伯順治十一年卒幼子朗素襲爵世宗憲皇帝時追封明安爲一等侯加號恭誠明安之長子昂洪初隨父來歸子三等輕車都尉世職天命十一年隨征巴林部及扎魯特部天聰五年從征大凌河俱有功超進三等男賜號達爾漢和碩齊順治二年晉二等男七年卒子鄂齊爾襲爵由侍衛累官至領侍衛內大臣十四年卒賜諡勤恪並祭葬如例明安之次子多爾濟亦隨父來歸子騎都尉世職尙郡主爲額駙天命十一年隨大貝勒代善等征扎魯特有賊人巴魯克竊馬遁多爾濟追

及擒之尋隨征棟奎及克什克騰等處又隨征朝鮮並有功天聰五年始設六部以多爾濟爲刑部承政理蒙古事六年以直御前失儀又奉命選取獵戶不當部議削世職上特宥之罰白金百兩八年八月從征明大同上命前鋒統領圖魯什烏拜分率左右軍以多爾濟領中軍擊明總兵曹文詔大敗其眾追至城下獲馬百崇德二年授內大臣並預議政四年隨鄭親王濟爾哈朗略錦州陣斬三人獲馬三匹六年上征明駐師松山杏山之閒多爾濟同內大臣宗室錫翰奉命伏兵高橋明杏山兵千人以糧不濟潛遁伏發敗之追至塔山斬獲甚眾尋以圍松山時明總兵曹變蛟率兵夜犯御營多爾濟未及禦敵所領侍衛護軍

巡守不嚴議罪繫三日罰白金五百兩仍敘高橋敗敵功晉爵一等男順治二年以多爾濟素荷 太宗眷顧晉三等子五年卒弟綽爾濟襲爵

右 國史館本傳

劉仲錦

劉仲錦遼陽東甯衛人後隸正藍旗漢軍 太宗文皇帝崇德五年任佐領隨睿親王多爾袞等圍明錦州敵騎兵千餘自城中出戰仲錦隨左翼兵迎擊追至城下始還尋復擊敗松山步兵杏山騎兵及呂洪山口步兵七年鄭親王濟爾哈朗等攻塔山發紅衣礮擊其城西城圯二十餘丈仲錦率所部兵先登克之進攻杏山復以礮擊毀城垣二十五丈餘城中窘迫遂降敘功 予雲騎尉世職八年三月隨護軍統領阿爾津哈甯阿等征黑龍江瑚爾哈部克其博和哩諾爾噶勒都里三屯俘獲甚眾招降小噶勒達蘇大噶勒達蘇綽庫禪能吉勒四屯凱旋 賜貂皮白金九月隨大

兵征明甯遠亦以紅衣礮攻克中後所前屯衛二城敘功晉世職爲騎都尉 世祖章皇帝順治元年大兵既定燕京仲錦任戶部理事官兼參領隨都統葉臣等征山西取太原府旋隨英親王阿濟格勦流賊李自成於陝西追至湖廣屢擊敗賊眾偽總兵馬進忠追獲其戰艦十有一五年擢兵部侍郎六年隨睿親王討大同叛鎮姜瓖復渾源州左衛及汾州皆以紅衣礮攻城有功七年授山東臨清總兵官加都督同知先是仲錦以征流賊平姜瓖功晉三等輕車都尉世襲罔替復以考滿並三遇 恩詔游晉一等輕車都尉兼一雲騎尉十年改福建右路總兵加左都督鎮守泉州十一年八月 上以仲錦有疾不能任事 詔解任還京調治尋

卒 賜祭葬如例子芳聲襲

右 國史館本傳

國朝文獻通考卷一百一十五 將帥五

五

喀山 子納海

喀山姓納喇氏世居葉赫部蘇完當葉赫未滅時挈家屬來歸隸滿洲鑲藍旗 太祖高皇帝以其才可用授佐領屢從征明取瀋陽遼陽並有功 子三等輕車都尉世職天命九年明總兵毛文龍以守備三員率兵百人來奪額駙康果禮屯莊喀山領所部禦擊斬二守備殲其眾 太宗文皇帝天聰六年從征察哈爾同前鋒參領勞薩參領吳拜率精銳先驅察哈爾林丹汗竄遁八年追敘禦擊毛文龍部眾功晉爵三等男時以目失明辭佐領順治二年 世祖章皇帝念其舊勞晉爵一等男三遇 恩詔晉爵二等子十二年十月卒 賜祭葬立碑墓道諡曰敏壯子納海初以喀

山病日命代管佐領事旋授前鋒參領天聰八年從征明大同與前鋒參領席特庫等率四十人擊敗陽和敵騎斬級二百獲馬六十餘復設伏宣府擒敵哨騎九年大軍復征大同納海奉命率兵駐上都城舊址偵軍事迎奏捷使以借還尋同參領鄂莫克圖等齎書諭明喜峯口潘家口董家口諸守將及還斬邊界哨卒百餘俘一人崇德二年同席特庫齎書諭明總兵祖大壽自廣甯入邊擒哨卒十二斬其九縱二人使齎諭至錦州以一人歸四年隨武英郡王阿濟格征錦州以攻克臺堡及俘獲之數還奏旋從上征松山明兵出城迎戰擊卻之祖大壽遣援兵自甯遠乘船趨杏山將入城納海同前鋒參領湖密色素渾率兵衝擊其

後斬五十人獲甲四十及船一旋與瑚密色等自松山路杏山獲牛三十九羊三百餘復同前鋒統領席特庫略錦州郊外擒斫木燒炭者二十二人獲馬騾牛無算五年大軍圍錦州敵出城築臺納海同前鋒參領色赫布丹蘇爾德馳擊斬四十人復追斬出城刈草者四十二人敵以三百騎一再來犯並擊之遁尋與色赫等往小凌河遇祖大壽所遣蒙古十七人自錦州至皆斬之六年明總督洪承疇集援兵次松山納海同前鋒統領吳拜擊敗其騎兵上統師親征圍松山城敵犯我前鋒統領納海偕諸參領合擊卻敵既而敵兵自杏山走塔山納海率眾邀擊追至筆架山斬級四百擐纛六生擒二十八人獲馬二百餘七年錦州下敘功 予雲

騎尉世職是年冬署前鋒統領隨貝勒阿巴泰征明自黃崖口入
長城趨薊州擊敗明總兵白騰蛟白廣恩迎戰兵遂進征山東明
年凱旋以不俟左翼軍先出邊右翼諸將並停敘 後三遇 恩
詔晉世爵至三等輕車都尉及喀山卒以二等子爵 子納海並
襲晉爲二等伯順治十七年二月卒弟納秦襲

右 國史館本傳

國朝耆獻類徵初編卷二百六十六目錄

將帥六

楊名高

李思忠

子塞白理

覺羅色勒

子額爾德

鄂碩

子費揚古

布克沙

阿爾津

李國翰

子海爾圖

桑額

努山

翁愛

伊拜

弟庫爾圖

葉克舒

子道喇

Vertical text on the right side of the page, likely a page number or title, written in a traditional East Asian script.

國朝耆獻類徵初編卷二百六十六

通奉大夫前署江西巡撫江西布政使司布政使湘陰李桓輯
將帥六

楊名高

楊名高遼東人 太宗文皇帝時率族屬百餘人來歸隸鑲黃旗
漢軍授佐領尋兼任兵部理事官崇德七年四月隨鄭親王濟爾
哈朗征明攻克塔山杏山城及附近諸臺論功 予雲騎尉世職
八月同副都統馬光輝等往錦州督鑄神威大將軍礮十月隨饒
餘貝勒阿巴泰征明擊敗明總督范志完兵於渾河橋明年師旋
至牆子嶺復敗敵於南山某年冬隨鄭親王取前屯衛中後所二

城 世祖章皇帝順治元年敘功晉騎都尉世職二年任參領三年擢都察院參政六年授福建漳州提督時福建大田一邑爲僞新建王朱由模所踞並連結延平高峯諸寨賊眾爲聲援七年春名高率師進剿破賊石磯嶺由模聞風遁走永安延平副將王愛臣追獲之賊渠陳光等踞高峯寨密遣人往德化約賊黨鄭文薦來援名高令副將韓尙亮等率兵截擊圍其寨賊被圍急從東門突出我兵奮勇追擊賊陷壕死者半師至大田賊眾四潰進擊之龍門橋俘賊甚眾擒僞都督郭奇僞總兵廖明正諸寨悉受撫是年冬又率兵剿賊邵武賊眾自建甯遁入江西新城縣名高分兵爲中左右三路而進自與總兵王之綱殿後直抵賊營追剿三十

餘里擒僞甯南伯洪國王僞總兵李安民王恆美等獲牛馬槍械
無算得 旨下部議敘子紀錄三遇 恩詔晉世職二等輕車都
尉九年海賊鄭成功偕其黨鄭森等由廈門出掠連陷長春漳浦
海澄南靖諸邑旋糾眾二十餘萬寇漳州屯於鳳巢山名高督兵
衝擊破之賊退據海澄所陷長泰諸邑以次克復會成功之父芝
龍疏請以書招降成功 詔允罷兵議撫成功不遵 詔仍糾賊
肆掠突陷漳州府及惠安同安安溪永春德化仙遊諸州縣十二
年給事中魏裔介劾奏名高禦勦怠玩貽誤封疆請 敕處分疏
下總督佟岱察覈十二年佟岱以名高調度無方馳援不力覆奏
於是革任尋卒子天福襲世職

日本書紀卷之二十一

右 國史館本傳

李思忠 子塞白理

李思忠先世居鐵嶺父如挺明甯遠伯成梁之從姪也初官太原同知後罷歸寓於撫順我太祖高皇帝天命三年大兵克思忠來歸明年師克開原鐵嶺如挺家居與弟如梓及子一忠存忠俱死焉六年太祖定遼陽敕思忠收集其族人之流亡者思忠招徠人戶並復故業上深嘉之授佐領子騎都尉世職尋以擒獲聞謀功晉世職至三等輕車都尉天聰三年太宗文皇帝親統大兵征明取遵化命思忠與參領英固勒岱等畱守既而明將謝尙忠等來攻城思忠開門出戰敵兵三進三卻時大安口三屯營等十一城既降復叛明監軍道張春等合步騎犯灤

州貝勒阿敏等怯不赴援灤州失守士卒奔潰阿敏大驚並檄遵化守將等棄城東歸值遵化軍中火器營猝爲敵火箭所焚眾心驚懼思忠戒無輕動徐結陣出城招明官之降者四人以行身自爲殿及出關無一亡失者旣歸 上命議阿敏等棄城罪以思忠爲偏裨非能主其事而貸之五年隨都統楞格哩等征明南海島未至遇明兵戰於茨榆坨擒十一人獲戰艦五敵復率眾來奪思忠迎戰破傷額不爲動仍奮擊敗之晉世職爲一等輕車都尉九年考察戶口思忠所轄之沙河堡即寨增丁百十有三晉爵三等男尋奉 命駐守蓋州城崇德二年疏言遼陽各城今悉謂丁夫修築而蓋州又復頽圯部議丁夫不足應調餘丁供役查蓋州城

地處邊陲軍士防守靡甯其餘丁僅堪耕種今若棄農就役不過
用土補苴而城工不堅歲功亦廢不若就應修處所勤加巡視守
護俟各城葺工再集丁夫造甄修築則城垣永固而人得及時盡
力農事得旨如所請行七年以漢軍分隸入旗思忠隸正黃旗
世祖章皇帝順治元年隨豫親王多鐸征流賊李自成破潼關隨
征江南克揚州招撫江北得十州縣三年二月奉命爲西安駐
防副都統三月擢陝西提督七年八年三遇恩詔晉爵一等男
兼一雲騎尉十一年以年老致仕十四年七月卒賜祭葬如例
子六人次子蔭祖別有傳第三子顯祖襲爵世祖賜名塞白理
授二等侍衛任參領聖祖仁皇帝御極擢隨征江南左路總兵

官康熙六年遷廣東水師提督八年改浙江提督招降海賊鄭錦
之僞甯遠將軍林伯馨都督施轟等十三年逆藩耿精忠反塞白
理疏言耿逆交通三桂結連鄭寇沿海所在賊踪皆可揚帆直入
江南之崇明孤懸海外尤爲可虞又黃巖圍困日久請援孔亟海
甯象山新昌餘姚四縣賊眾蠡起恐寇拒甯海斷我餉道請速援
台州護守甯波疏入並奉 敕授方略調兵防禦尋隨貝子傅喇
塔擊走賊將曾養性等於台州十四年九月卒於軍年四十有三
賜祭葬如例祀浙江名宦祠子李俊襲爵

右 國史館本傳

維李氏之世家起於遠其曰甯遠伯成梁者當前明神宗時治兵

北邊嘗拓地數百里有子如松復繼起爲大帥西平哮拜東援朝
鮮前後事績備載舊史兩人者既皆名將而諸子弟往來行閒亦
各以武勇自奮故近代推世將家必曰遼東李氏公卽甯遠伯之
四從孫也生而貌奇俊落落有才幹年二十四往游撫順外家
會太祖兵破撫順公被執至費阿喇地遂隸正黃旗久之又破
鐵嶺衛鐵嶺四埜皆甌脫公招集遼之遺民始各復故業太祖
奇公才授公拜他喇布勒哈番又以禽閒謀功晉三等阿達哈哈
番我師之入大安口也公從下遵化太宗卽命公據守之無何永
平灤州遷安皆歸於我四城互犄角爲聲援與明相持者數月天
聰三年春明人將謀恢復以全軍壓灤州而別遣將謝尙政等攻

公以牽制我師日夜擯礮箭薄城公開城門力戰三卻之最後永平灤州遷安諸將士皆拔師東歸而公城中火藥亦卒被焚眾洵洵思潰公急號於眾曰若輩移足一步卽殲於此無匹馬筋輪返者矣盍從我計眾皆惛然受命公徐結陳引明官之降者四人以行而身自爲殿旣出關無一矢亡者又別戰於茨榆沱馘十一人獲舟五艘礮傷公領不爲動以功進一等阿達哈哈番尋命公任禮部左侍郎事當是時每旗以烏金超哈二人理諸堡砦猶未設有牛祿甲喇章京也公所轄曰沙河堡曰燕郎砦遇歲饑公設法賑之所增壯丁數倍滿七載考太宗深嘉歎焉賜公元狐裘一進三等阿思哈哈番尋命鎮蓋州世祖入北京公從豫

王下潼關復從攻揚州破之招撫江北凡得十州縣及還 特命
公提督陝西通省漢兵兼管四旗烏金超哈昂邦章京自順治七
年以來 天子屢有事於諸大禮既郊祀 太祖再上 昭聖皇
太后尊號推恩舊臣進公二等阿思哈哈番繼又進一等阿思哈
哈番繼又加一拖沙喇哈番皆 予世襲公任陝西八年而乞告
以歸歸四年而薨春秋六十有三陝西自李自成之亂創痍未復
諸劫帥方羣聚蠶起公一推心置人腹中秦人皆悅服公又以麾
下無戰士數出金錢募之不三月得士四千人歲時椎牛市酒犒
賚不絕然一有犯輒引軍法按治以故將吏爭效命諸劫帥中推
北山郭君振耀州黃騎虎府谷王永強最劇公用便宜勦之遂次

第就禽而急解散其餘黨三秦始大定至今士民謳歌之相率樹

碑以表去思云嗚呼我 國家肇基東海奄有四方所謂熊羆之

士不二心之臣舊集森列而公獨起家布衣致身佐命卒與甯遠

伯之威名風采異世相望三十餘年之間凡七改官階三膺世爵

紀功檔子

本朝用簿版五六寸作滿字其上以代簿籍每數片輒用牛皮貫之謂之檔子

播之 制誥

與古人所賜丹書金滕何異中朝士大夫雅知公者爭用唐代英

衛兩公相比擬以予綜覈始末殆有過之無不及也康熙二年官

保公卜於六月某日葬公完縣檀山之原手其行狀來乞銘予按

狀公諱思忠字葵陽其先朝鮮人明永樂中遷遼東遂爲鐵嶺衛

人曾祖潤祖成功 贈某官考如挺 贈某官夫人佟氏子男六

長榮祖任參領工部郎中娶宗室伯克兔貝勒女次卽宮保公陸祖任湖廣總督太子太保兵部尙書兼都察院右副都御史加一級娶少保兼太子太保戶部尙書鑲紅旗都統祝公世胤女繼娶內大臣宗室色勒孫女次顯祖任隨征江南左路總兵官都督同知世襲一等阿思哈哈番又一拖沙喇哈番娶內大臣伯穆黑倫女繼娶白彥喇參領吳爾恰海女次耀祖任佐領刑部員外郎娶大學士鮑公承先女皆佟夫人出次似祖續祖尙幼側室趙氏出女二人長適參領佟國璽次適伯都統石公廷柱男某佟夫人出次適浙江都司金公國鼎男某趙氏出孫男女十一人銘曰隴西世族著望於秦煖臂善射在漢丕振桓桓英衛攀附龍鱗陰

國朝書傳卷之六
山耀武平壤勒功亦有甯遠繁公先烈名盛三韓左律右鉞公也
繼之遭時奮蹟介甲汗馬馳驟疆場 文皇 章皇子嘉乃績圖
像臺閣書伐簡冊西土餘黎望公如歲公節往臨惠威並濟險阻
榛蕪且闢且刈公日旋歸奏凱飲至赫赫我公永作前光生爲金
城歿侑明堂世勲舊德是實難忘後嗣載之久而益昌

右墓誌銘汪琬撰

覺羅色勒子額爾德

覺羅色勒滿洲鑲黃旗人祖禮敦追封武功郡王景祖翼皇帝之長子也色勒初任佐領太宗文皇帝御極簡列十六大臣晉八大臣任正藍旗都統天聰五年上統大軍征明圍大凌河城令八旗分任八隅掘壕以困之色勒率本旗兵駐城南明兵出犯色勒麾軍舍騎步戰敵敗北追至城壕乃還會我軍以礮擊毀城西南隅一臺據之列巨礮攻城城內兵突出圍臺將引梯登色勒同都統和碩圖等合兵夾擊敵大潰竄入城我師掩擊抵城壕截敵無算八年上統大軍征明宣府大同色勒奉命隨貝勒德格類進獨石口敗敵長安嶺攻赤城克其郭會大軍於應州

九年正月 詔免功臣徭役色勒與焉六月以同都統宗室篇古等董築城垣弗堅應罰錢 上貰之十二月降鑲黃旗副都統崇德元年十二月 上親征朝鮮朝鮮國王李侗遣其妻子入江華島而已遁入南漢山城豫親王多鐸等以兵圍城敵將率兵五百來援色勒同參領阿爾津擊敗之明年正月進攻江華島敵列戰艦截海道飛矢雨集色勒率右翼兵渡海衝越敵艦同佐領阿哈尼堪先眾至奮躍登岸破其守島兵大軍繼進獲侗妻子侗被圍急又知妻子被俘乃降凱旋論功授騎都尉世職三年兼任吏部右參政 世祖章皇帝順治元年擢內大臣仍任副都統四年錄武功郡王諸孫各 予騎都尉世職色勒晉一等男遇 恩詔晉

二等子八年擢領侍衛內大臣十四年七月卒 賜祭葬如典禮
謚忠愨立碑墓道子額爾德初任佐領崇德七年從大兵圍錦州
擊敗明總督洪承疇松山援兵八年隨貝勒阿巴泰征明明兵駐
渾河岸進擊走之復敗明步騎數千於三河縣順治八年隨睿親
王多爾袞擊流賊李自成追至望都敘功授騎都尉世職五年授
參領八年兼任戶部理事官九年遷本部侍郎遇 恩詔晉世職
至二等輕車都尉十三年以員外郎朱世德司權河西務虧稅銀
戶部援 恩詔議免並坐降黜額爾德降世職爲騎都尉罷侍郎
專任參領十五年擢鑲黃旗蒙古副都統後襲其父二等子爵康
熙十年卒子喇祜塔襲

國史館本傳

右 國史館本傳

鄂碩 子費揚古

鄂碩滿洲正白旗人先世居棟鄂以地爲氏祖掄布 太祖高皇帝時率四百人來歸 賜名魯克素授其次子錫爾泰爲佐領長子錫罕 子騎都尉世職卽鄂碩父也天命十一年蒙古貝勒卓哩克圖所屬叛逃錫罕追及之盡殲其衆天聰元年隨大貝勒阿敏征朝鮮率八十人先驅遇敵戰歿 太宗文皇帝念錫罕死事晉世職爲三等輕車都尉以鄂碩襲八年七月鄂碩隨豫親王多鐸征明攻前屯衛斬其哨卒十二月奉 命與前鋒統領勞薩率將士往迎察哈爾部之來歸者是年授佐領九年隨大軍招察哈爾部衆進征明朔州至崞縣遇敵哨斬二人獲馬四由平魯衛出

邊敵兵邀戰鄂碩與都統圖爾格擊卻之敘功晉世職爲二等輕
車都尉尋擢前鋒參領崇德元年鄂碩與勞薩率兵百人偵明邊
事至冷口斬哨卒三獲馬十五二年參領丹岱等往土默特貿易
還鄂碩隨前鋒統領烏拜率將士赴歸化城護之擒斬明邏卒三
年隨睿親王多爾袞征明由青山口入擊敗明太監高起潛兵四
年奉命與前鋒統領沙爾虎達率土默特兵三百人略甯遠鄂
碩遵上方略以前鋒挑戰敵人堅壁不出乃從錦州北界略其
樵採者而還五年隨大軍圍錦州以前鋒敗敵時錦州被我軍圍
急明總督洪承疇率兵赴援上聞之親統大軍營於松山杏山
之間命烏拜等以偏師營高橋東鄂碩統遊卒偵躡敵有自杏

山潰出者尾擊之既而杏山兵果潛出鄂碩偵知以告烏拜烏拜未卽擊致潰卒復入城上以鄂碩有統帥哨卒之責乃僅告知烏拜不親行進擊鞭責示懲六年復隨大軍圍錦州別將兵略甯遠遇明兵六百騎鄂碩與前鋒統領鄂摩克圖引軍薄之大破敵拳肱二獲馬六十餘七年隨饒餘貝勒阿巴泰征明毀界嶺口邊牆進師敗明總督范志完兵於豐潤敵自密雲出劫我輜重奮擊卻之遂越燕京趨山東所至克捷師旋出邊明總兵吳三桂遺步騎邀戰復擊之潰遁乘夜掩襲寨謀三斬級數十擒哨卒二十九獲馬二百餘世祖章皇帝順治元年四月從大兵入山海關擊敗流賊李自成追至望都十一月追自成至陝州距潼關立營成

據山爲寨以拒我師鄂碩與前鋒統領努山率兵拔其寨二年陝西既定大兵由河南下江南鄂碩率八旗前鋒兵之半先行至睢甯敗敵兵千餘復隨端王親王博洛分兵征蘇州擊明巡撫楊文驄舟師獲戰艦二十五趨杭州敗明魯王朱以海兵擒其總兵一尋與護軍統領哈甯阿等攻湖州克其城先是敘证明錦州山東及入關破流賊功鄂碩晉世職至三等男及是敘陝西江南浙江功晉爵二等男六年擢鑲白旗滿洲副都統時明桂王朱由榔據湖南廣西鄂碩隨鄭親王濟爾哈朗往征有功師還 賚白金三百兩八年授前鋒統領十三年擢內大臣兩遇 恩詔晉爵三等子復以其爲 皇貴妃父晉三等伯十四年九月卒加 贈爲侯

賜祭葬如典禮諡剛毅以其子費揚古襲三等伯別有傳

右 國史館本傳

費揚古

費揚古滿洲正白旗人姓棟鄂氏內大臣鄂碩之子也 世祖章
皇帝順治十五年襲父三等伯爵 聖祖仁皇帝康熙十三年隨
安親王岳樂率兵赴江西討逆藩吳三桂委署營總時賊將黃乃
忠糾賊萬餘自長沙犯袁州費揚古與副都統沃赫總兵趙應奎
擊敗之擒偽官童聖功復萬載縣城十五年擊走賊將夏國相於
萍鄉毀寨十二進圍長沙屢戰皆捷十八年敗賊將吳國貴於武
岡凱旋紀功擢領侍衛內大臣兼火器營總管列議政大臣二十

八年 命碩賚喀爾喀左翼土謝圖汗二十九年 上以噶爾丹劫掠喀爾喀又數擾我邊境授裕親王福全撫遠大將軍費揚古往科爾沁調兵隨征參贊軍事是年八月擊敗噶爾丹於烏蘭布通三十二年 命費揚古爲安北將軍駐歸化城三十三年五月噶爾丹使人至歸化城言欲入貢費揚古偵其踵至者男婦幾二千人遣兵迎問且止之馳疏請旨 上知噶爾丹陽爲修好潛蓄窺探意 命侍郎滿丕諭責其使遣之還七月 聞噶爾丹將偏圖拉 詔費揚古同右衛將軍希福率兵往禦希福請益兵 上責希福遇事疑沮令勿偕往 諭大學士等曰費揚古勲舊大臣今駐防歸化城軍民皆心服於此事無不能辦也尋以圖拉無警

慮噶爾丹將趨歸化城 詔費揚古旋師三十四年七月噶爾丹
至哈密費揚古率兵往禦噶爾丹由圖拉河西竄去十月授右衛
將軍仍兼管歸化城將軍事十一月疏言聞噶爾丹踞巴顏烏蘭
距歸化城約二千里宜集兵運糧於來年二月往剿 詔授爲撫
遠大將軍 召入覲授方略三十五年二月以黑龍江將軍薩卜
素率兵出東路 命費揚古集兵歸化城出西路振武將軍孫思
克率甘肅兵西安將軍博濟率陝西兵會期並進 上親統大軍
出中路四月費揚古至察罕和碩噶爾丹驅賊眾趨克魯倫河東
路兵未至科圖而 上已由科圖進次什巴爾台近壓賊境五月
三日費揚古師至圖拉疏言西路有草之地爲賊所焚我軍每迂

道秣馬又遇雨糧運遲滯師行七十餘日人困馬疲乞 上緩軍
以待會噶爾丹望見 御營於克魯倫河大驚奔竄 上密諭費
揚古邀擊 親督大軍至躡追拖諾山 駐蹕費揚古聞噶爾丹
遁歸特呼勒濟遂遣前鋒統領碩岱副都統阿南達阿迪等率兵
先往挑戰且戰且卻誘至昭莫多復分兵三隊東則滿洲漢軍及
察哈爾兵倚山列陣西則右衛大同及喀爾喀兵沿河列陣而使
將軍孫思克率綠旗兵居中並進 上方略令官兵皆步戰俟賊
勢披靡乃上馬衝擊時噶爾丹率眾幾萬人我軍分隊迎戰自未
至西斬殺二千餘賊皆潰奔乘夜追逐三十餘里生擒數百人獲
馬駝牛羊盛饗器械無算噶爾丹引數騎遠竄費揚古令阿南達

齋奏馳報 御營 召詢其詳阿南達奏曰噶爾丹聞 上親征
心膽俱裂且不虞我兵絕其去路突然交戰擒斬過半傷斃山谷
者相枕藉噶爾丹之妻亦受戮其部眾來降者又二千餘人費揚
古恐語涉矜張故疏內約略言之 上乃班師畱費揚古駐守科
圖七月奉 詔由科圖移駐喀爾喀郡王善巴遊牧地甫至噶爾
丹潛使台吉丹濟拉率千五百人來掠喀爾喀牲畜糧糧費揚古
遣副都統祖良璧禦卻之追擊至翁錦賊敗遁費揚古尋以馬疲
移軍喀喇穆倫會噶爾丹使其宰桑格類固英等來請納款 上
再幸塞外 駐蹕棟斯拉 命費揚古馳赴黃河西界 行在入
對諭及昭莫多之戰勢如破竹實爲可嘉費揚古奏曰軍中機務

四庫全書卷之二
皆遵 上密諭以翼成功西路官兵聞 聖駕先臨克魯倫河無
不踊躍奮勉噶爾丹之敗衄皆 睿謨神武震以軍威追之窮威
所致臣不能生擒以獻罪也 上曰觀來降台吉等及格類固英
之言噶爾丹窮威是實朕意不忍悉加屠戮欲招降其眾撫而治
之費揚古奏曰 聖意實非臣等愚昧所能測真天地好生之仁
也翌日 賜御佩囊韃弓矢遣還軍營三十六年正月阿南達自
肅州奏報哈密回人擒獻噶爾丹之子塞卜騰巴爾珠爾等 上
以其疏錄示費揚古 賜胙肉鹿尾關東魚等物 諭曰時當上
元令節眾蒙古及投誠厄魯特齊集暢春園適阿南達疏至眾皆
喜悅爾獨居邊塞不得在朕左右殊深軫念茲故以阿南達疏示

知並賜物問爾無恙卽如與爾相見也二月 上幸甯夏 詔費揚古密籌進剿噶爾丹費揚古疏請罷大將軍任隨領兵將軍出征 上不允所請令便宜調遣兵馬以行 上由黃河西岸 駐蹕達拉布隆 頒賜上駟院馬五十駱駝十費揚古進次薩奇爾巴勒哈遜時厄魯特部眾降者相繼丹濟拉亦遣人納款言噶爾丹已死欲攜骸骨及其子女並率三百戶來歸費揚古以 聞 上回鑿雷費揚古駐師察罕諾爾以待丹濟拉六月丹濟拉至哈密費揚古有疾 詔昭武將軍馬思喀代統其兵費揚古還京仍任領侍衛內大臣晉封一等公費揚古以噶爾丹雖死非係生擒疏辭封爵得 旨宜遵成命毋固辭 諭大學士等曰塞外情形不

可應度必身歷其境乃有確見昔朕欲親征噶爾丹眾皆不欲惟
費揚古密抒謀略與朕意合遂悉以西路官兵令其統領進兵道
路遼遠兼乏水草乃全無顧慮直抵昭莫多奮揚軍威俾奸狡積
寇挫衄大敗累年以來統兵諸將未有能過之者又 諭曰朕屢
出征知爲將甚難固不可急亦不可緩費揚古惟相機調遣緩急
合宜是以濟事四十年六月 上幸索約勒濟費揚古扈從中途
疾作 上停蹕一日 親往視疾 賜御帳蟒緞鞍馬等物銀五
千兩 遣內大臣侍衛等護送還家尋卒 賜祭葬如典禮諡襄
壯以其子辰泰襲一等侯兼一雲騎尉 世宗憲皇帝雍正十年
入祀賢良祠

右 國史館本傳

費揚古滿洲正白旗人先世居棟鄂以地爲氏父三等伯鄂碩費揚古年十四襲爵康熙十九年擢領侍衛內大臣三十二年厄魯特噶爾丹叛 聖祖命爲安北將軍駐歸化城明年噶爾丹侵土喇前往防禦尋復駐歸化三十四年授撫遠大將軍三十五年 聖祖親統大兵至克魯倫河噶爾丹蒼黃棄廬帳遁費揚古領軍至昭莫多偵得賊蹤令署前鋒統領碩代等挑之且射且卻誘至大軍所令將軍孫思克率綠旗兵居中京城西安滿洲漢軍及察哈爾諸扎薩克蒙古爲左翼屯東方山高處右衛滿洲漢軍大同綠旗兵及喀爾喀扎薩克爲右翼屯西方沿河布列行陣悉遵

聖祖預授方略噶爾丹率賊萬人逆戰中軍奮擊自未至酉左右合噶爾丹大敗分行追逐至特勒爾濟口陣斬噶爾丹之妻阿奴喀屯賊渠帥死者甚眾斬首三千餘級生擒百餘人俘獲駝馬牛羊無算噶爾丹引數騎遁餘賊投降大將軍馬思喀者千餘人三十六年副都統阿達擒噶爾丹之子色布騰巴爾珠爾於哈密噶爾丹至阿察阿穆塔台仰藥自殺丹濟喇諾顏格隆丹濟喇之婿拉思倫攜噶爾丹之尸及其女鍾齊海率三百戶來降費揚古統大軍至巴雅恩都爾受之論功進封一等公四十年卒於官賜祭葬諡襄壯

右 國史賢良小傳

賈揚古公滿洲正白旗人居棟鄂地方以地爲氏年十四襲三等伯爵性樸直而貌雄奇待人以和無疾言遽色好在 上前自言己短人多笑之康熙十九年以御前侍衛爲火器局總管兼議政大臣二十九年厄魯特噶爾丹不靖 聖祖命隨裕親王征之破賊於烏蘭地方先是厄魯特部落與喀爾喀連界厄魯特之子縱獵喀爾喀地方爭獸被殺厄魯特酋長噶爾丹謀報讎陰令番僧千人詭遊牧在其界內一年而喀爾喀不知也突於除夕率眾鼓譟直入所伏千僧從中接引喀爾喀度歲羶飲醉卧矣變起倉猝父子不相顧向南狂奔噶爾丹追逐所殺士卒無算喀爾喀奔至中國款關求救面目如鬼自言飢餓垂死乞 大皇帝活命 聖

祖憐而納之仍與位號賜牛馬撥有水草處俾居遣人諭噶爾丹
曰汝兩小國唇齒相依當各守疆脫何必互相吞噬朕仰體天地
好生之心不喜人爭鬪汝可斂兵回國毋違朕命噶爾丹奏云喀
爾喀殺我子我理當報讐 大皇帝要我罷兵可將我讐人車臣
汗哲卜尊二人交出我便回去 聖祖詔答云人窮促來歸朕心
哀之豈肯以讐人畀汝汝他日窮促來歸朕亦如待車臣哲卜
不岐視也噶爾丹恃強不服 聖祖怒下詔親征分三路出塞
命公出西路 御駕出中路將軍馬斯喀出東路先遣諜者誘其
來噶爾丹疑 聖祖必不親臨果以兵至到克魯倫地方離中路
營四十里其前哨探知 御駕所在精兵悍將萃焉西路費將軍

兵已糧盡噶爾丹遂避中路而直犯西軍公下令曰我兵深入不
毛噶爾丹探知糧盡故直來犯我我當先示弱以驕之而一鼓作
氣以禽之我軍今日視我鳴角然後發矢礮我角不鳴先發矢礮
者斬令畢噶爾丹兵數千至矣各列隊兩山岡公先遣疲卒四百
人挑戰噶爾丹張兩翼圍之四百人盡沒於陣噶爾丹大喜直薄
我師矢石如雨公端坐胡牀手執大角而不吹將軍孫思克跪請
曰事急矣賊騎相離二十步我軍張弓引矢張目待將軍若再不
戰勢恐不支公怒叱之退又稍稍近前公鳴角左右俱鳴角矢礮
齊發瞬息間煙塵蔽天賊眾披靡馬散走山凹公仰天大笑指揮
眾兵取虜糧物而窮追之其眾大潰酋長頭目或死或降噶爾丹

僅以身免奏上 聖祖諭云九月十三日卿奏已到朕甚欣慰見丹濟勒雖降噶爾丹降表未至然知其破壞已極不能支拒儻其來降卿可善言慰導令至歸化城候旨當籌一地方安置之亦是古聖人柔遠之義 王師凱旋公以軍功進爵一等仍管撫遠大將軍事公退而告人曰我兵枵腹不能耐久故鼓其銳氣忘命一戰竟能勝之如彼持重不鬪環圍一日則我敗矣或有頌其功者謝曰我有罪無功我恃勇深入至於絕糧一罪也約會後期致勞聖慮二罪也儻不仗 聖主如天之福虜不知兵我死有餘辜尙安敢言功乎其謙退如此公在軍中與士卒同甘苦坐帳下事無大小皆親決之有求見者不待傳宣登時召入好讀左氏春秋手

不釋卷一日立營未久民捉一兵至訴其闖入集家謂其婦公問成茲乎日未也公拔一刀與之日今立營之初斬之不祥嗣後此兵敢再來汝家即將此刀斬之民與兵俱叩頭去後作先鋒衝虜陣者卽此兵也胡漠旣平 聖祖詣箭亭觀射諸大臣皆彎弓發矢公奏臣情痛不可以弓 許之出而告人曰我曾爲大將軍儻一矢不中有損國家威重毋乃爲外夷所笑故不與諸將軍角技也人服其雅量斃後 賜諡襄壯

右傳袁枚撰

康熙五十九年春正月奉 諭征烏蘭布通時阿密達因天晚撤兵云 皇上必不以撤兵故遂殺我等將兵撤退索額圖明珠選

勇士數百人近身防護勇士云挑選我輩原擬或戰或追詎意止
令防護其生忿怨後中路出兵時令大臣官員等會議進兵之處
眾皆謂不可獨朕與費揚古以兵爲可進決意進兵及至科爾圖
地方眾皆不欲前發大臣等勸朕撤兵朕諭以祭告 天地 太
廟 社稷親統兵前來不見賊蹤如何驟行撤去不允所請將兵
前進噶爾丹聞我兵威甚是驚懼鼠竄而去朕選兵令馬思喀爲
將軍尾追噶爾丹又遇西路兵攻擊大敗之朕將中路初次運到
之米遣明珠速送至費揚古軍前二次米亦卽令續送三次米內
朕但畱十八日口糧餘俱送西路軍前是以西路兵丁未至饑餒
得保全而回彼時若輕信大臣等言中道撤兵則兩路兵丁安能

立功奏凱耶

右東華錄王先謙編

費襄壯公揚古勳業豐隆平噶爾丹功爲第一其膽識亦正不可及公嘗從 聖祖皇帝之番僧寺番僧中號爲活佛者見 上傲睨不爲禮公卽揮刃斬之 上尤其鹵莽公徐奏曰番僧雖貴亦人臣也豈可使無禮於 君前亂我國法使有異術臣抽刀時應早令伽藍按捺不延頸就戮矣扈從者爭服其言自此番僧見大皇帝彌益恭順

費襄壯公以國戚 封伯爵大兵征噶爾丹出爲撫遠大將軍既奏凱眾欲露布揚功績公不謂然其奏摺惟言兵至某處迷道某

處敗績某處絕糧此行屢蹈危機皆臣失算之故今憑藉 聖天子洪福傲倖成功實非意料所及云幕客皆咎其失禮公曰 天子深居九重如見策動太易必至好大喜功士卒勞瘁不可不使上聞之庶異日無窮兵黷武之患也人皆懾服此與前一則俱載在嘯亭雜錄內康祺敬按 聖祖皇帝開疆闢土仁育義正決不以平定一隅遽形夸大襄壯公之鯁鯁過計正足見老成謀國之忠且公所言大局耳若爲公一身一家計崇封懿戚顯秩殊庸豈可復有開邊之偉烈公之謙退沈毅如此洵乃上掩馬伏波下軼曹武惠豈非 國家氣運之隆產茲魁傑歟

右紀聞陳康祺撰

布克沙

布克沙滿洲鑲黃旗人姓瓜爾佳氏天聰時以護軍校駐防牛莊出偵敵擊敗明兵崇德二年從征明皮島同參領鼇拜乘舟先登島岸敗之得 優賚旋授護軍參領五年大軍圍錦州刈其田禾明兵拒戰布克沙率護軍十人擊卻敵眾復擊敗杏山松山步騎兵又同都統圖爾格等設伏敗敵追擊至河濱奪敵燾并獲其馬敘功 予雲騎尉世職六年復圍錦州明總督洪承疇自松山遣騎來犯戰卻之復破其三營步兵七年隨貝勒阿巴泰征明擊敗明總兵馬科於渾河岸其別將率三千餘人拒守渡口又擊敗之遂趨山東略萊州攻克蒙陰沂水二城八年五月凱旋 賚銀幣

晉世職爲騎都尉順治五年隨英親王阿濟格征流賊李自成走湖廣復躡擊之敗賊衆於安陸武昌又同都統都類追至九江口獲賊船會奉 詔班師過池州擊走明總兵黃蜚部衆獲其船十有二尋隨豫親王多鐸征蘇尼特部騰機思偵知布爾噶山有賊隨貝勒博和託追斬二十餘人又擊敗土謝圖汗及碩顏各汗兵九年二月擢鑲黃旗蒙古副都統九月兼任戶部侍郎十年四月以有疾解侍郎任八月並罷副都統先是敘平流賊暨征騰機思功由騎都尉加一雲騎尉及三遇 恩詔洊晉一等輕車都尉十四年卒長子哈楚罕襲第三子貴復任侍衛兼佐領順治十六年大軍既定雲南元江土司那嵩復叛貴復隨都統車洛討平之康

熙十四年隨安親王岳樂討逆藩耿精忠至江西敗賊於苻潭浦
賊將李茂珠等率萬餘人相拒於建昌府城南鐘鼓山貴復力戰
被創尋以創發卒 子雲騎尉世職以其子瑞色襲

右 國史館本傳

同前編類考不考

三三

阿爾津

阿爾津伊爾根覺羅氏世居穆溪父齊瑪塔 太祖高皇帝時來歸隸滿洲正藍旗任侍衛阿爾津初與其從兄阿山屢從征伐積功授二等輕車都尉世職任參領 太宗文皇帝天聰四年都統納穆泰等駐守灤州明兵來攻阿爾津力戰弗能卻敵發巨礮擊城城將墮納穆泰等度不能支率眾走永平阿爾津隨行遇敵斬殺甚眾及永平復失守 上命盡繫諸將以阿爾津於灤州城內曾力戰既出復能殺敵 特賞之九年大軍征察哈爾阿爾津隨貝勒岳託駐歸化城有博碩克圖汗之子結阿祿部喀爾喀部陰與明通阿爾津及參領吳巴海等擒其往來使者並獲馬駝及貂

皮等物晉世職一等輕車都尉崇德元年 上親征朝鮮國王李
侖遁入南漢山城阿爾津率精銳追躡敗其援兵於要隘二年率
每旗親軍五人往鐵山緝明哨卒尋列議政大臣管護軍統領事
三年隨豫親王多鐸征明過中後所明總兵祖大壽以兵襲追阿
爾津殿後部卒被殺及王督兵還擊阿爾津戰弗力又不收載亡
卒骸骨革世職籍家產之半仍管護軍統領事五年隨大軍圍錦
州以離城遠駐坐罰鍰六年明總督洪承疇守松山阿爾津屢擊
敗其步騎兵敵走保一臺阿爾津率三旗護軍攻克其臺斬敵將
三人盡殲其眾復破敵營三并援出前鋒之被圍者 上嘉其善
戰仍授三等輕車都尉世職七年從征甯遠敗城中出戰兵八年

同護軍統領哈甯阿等往征虎爾哈等部攻克博和哩諾爾噶勒都里三屯其大噶勒達蘇小噶勒達蘇綽康纏能吉勒四屯皆降俘獲無算師還得 優賚順治元年隨大軍入山海關擊敗流賊李自成率前鋒軍追及於安肅縣斬殺甚眾二年晉二等輕車都尉兼一雲騎尉尋隨豫親王討流寇至潼關賊將劉芳亮來窺我營阿爾津率五旗將士破其眾賊望風奔潰我師遂入關賊渠李自成焚所居室挈子女奔商州阿爾津將兵往追不及別圍賊三百於途盡殺之乃還復從征江南有功晉三等男三年五月同護軍統領鼇拜等擊敗叛鎮賀珍兵於漢中張獻忠自四川率馬步兵來戰阿爾津與護軍統領鼇拜等連擊敗之時正藍旗兵爲賊

因復與鼇拜等往援之出進攻敘州所至克捷五年六月晉一等
男十月率兵赴宣化平赤城叛兵六年解護軍統領任七年復任
護軍統領八年與都統額克青等舉發英親王阿濟格罪狀初睿
親王多爾袞薨英親王以阿爾津舊隸豫親王麾下使人召之阿
爾津因睿親王嘗禁諸王屬下人與英親王往來謂使者曰吾弗
至王所三年矣當告之睿親王屬下大臣□□之額克青等僉曰
宜往覘其言動乃往英親王責其不附己且妄爲大言阿爾津告
額克青等於是共訐英親王言動悖亂諸罪鞫實幽禁阿爾津得
旨嘉獎旋晉爵二等子兩遇 恩詔晉一等子加一雲騎尉九年
授西安將軍鎮守漢中尋 命爲定南將軍移朔湖廣賊寇十一

年由護軍統領遷都統十二年授甯南靖寇大將軍統師之荊州時歸州賊姚黃等出沒宜昌襄陽閒阿爾津率兵往剿連破走之招撫兵民萬餘分置枝江松滋諸邑十三年同都統□羅等征辰州賊聞大兵至棄城走追破之於瀘溪賊盡竄入山谷斬獲無算遂復辰州凡竇慶永順諸土司悉籍所轄人戶來降先是辰州屢下緣守兵寡輒復爲賊陷至是阿爾津議移常德鎮兵守之而別移兵駐常德爲應援否則以所部兵畱守辰州咨商經略大學士洪承疇承疇以常德兵力難分禁旅不宜擅畱覆之阿爾津復移咨曰辰州境內之民及各土司相率歸順若增兵守之則沅靖可達沅靖一得可進取滇黔今棄而不守賊必復來我士馬疲煩豈

能數踰越險阻且百姓既歸附一旦棄之去非惟失向化之心亦無以示信於後也承疇以其言疏 聞 上命阿爾津班師以征守事委承疇速籌十五年正月奉 命統本旗兵隨信郡王多尼進取雲南五月病劇卒於軍 贈太子太保諡端果立碑如例子濟世襲爵

右 國史館本傳

李國翰

子海爾圖

桑額

李國翰漢軍鑲藍旗人父繼學初以商人隨明經略楊鎬軍通使
我朝太祖高皇帝天命六年大兵取遼陽繼學來歸授都司
以副將劉興祚婪索民財劾罷之復屢擒開謀追殺逃人敘功
予三等男爵以年老致仕國翰襲父爵任侍衛賜號墨爾根
太宗文皇帝天聰三年從征明北京還攻永平先眾步戰有斬獲
五年圍大凌河城內兵突出國翰率兵戰卻之旋攻克其臺又擊
敗民兵之自錦州赴援者九年考察所管人戶以善於拊循晉二
等男崇德三年七月任刑部理事官十月隨貝勒岳託征明於邊
外發敵所藏火藥數處比入邊遇敵千餘人據山列陣國翰率兵

奮擊敗敵獲馬四十進克牆子嶺轉戰至山東克濟南府城師還
攻望都獲鹿二城並以殿擊毀其垣四年授鑲藍旗漢軍副都統
五年隨睿親王多爾袞圍錦州攻克呂洪山臺擊敗山口步兵敵
兵自松山遁入高橋迤南山臺國翰偕眾攻克之斬百餘級生擒
副將王希賢參將崔定國等七年明總督洪承疇就擒總兵祖大
壽以錦州降移師攻克塔山杏山國翰並在事有功晉一等男加
一雲騎尉是年擢鑲藍旗漢軍都統八年隨鄭親王濟爾哈朗取
明前屯衛中後所二城敘功晉爵三等子 世祖章皇帝順治元
年五月大兵旣擊敗流賊李自成定燕京國翰同都統劉之源祖
澤潤等率兵剿滅饒陽土賊康文斗郭壯畿等進征山西時李自

成遁陝西其黨猶分踞太原平陽等府國翰同都統葉臣等合兵
攻克太原府城復分兵勦賊眾於汾西縣山西旣平凱旋 賚白
金五百兩尋隨英親王阿濟格征陝西屢敗賊眾自成遁湖廣移
師追勦攻賊應山縣進征武昌同都統金鵬等奪賊船數百二年
十一月 命同都統巴顏率兵征四川甫至西安值叛鎮賀珍自
漢中糾賊黨孫守法等來犯國翰與駐防西安內大臣和洛輝期
師兩路夾擊斬級無算三年三月肅親王豪格統師至西安遣國
翰 已顏搜勦延安餘賊追至張果老崖掘壕困之乘夜攻克其
寨殲賊渠獲馬二百餘遂隨肅親王征四川滅流賊張獻忠於西
充復率兵渡涪江擊敗僞總兵袁紹五年四月 命爲定西將軍

同平西王吳三桂鎮漢中六年僞王朱森溢僞侯趙榮貴糾眾萬餘犯階州國翰先眾趨擊陣斬森溢榮貴尋擊僞將軍王永強斬級數千獲駝馬數百復宜君同官蒲城宜川安塞清澗等縣上深嘉其勇略並諭以自後但發縱指示不必身先士卒時叛鎮姜瓖踞大同其黨劉登樓張鳳翼任一貴謝汝德萬鍊等分踞城邑國翰遣兵會剿殲賊甚眾招撫河東諸處攻復府谷縣擒斬僞經略高有才及僞官三百餘人招降僞總兵郝自德等先是張獻忠既滅其黨孫可望劉文秀白文選李定國等竄遁既而降附明桂王朱由棖與其所設官屬並據川東川南九年國翰同三桂督兵攻復成都嘉定擒斬僞總兵李明廷林時泰龍名揚等文秀文

選皆敗走別遣將分徇甯叙州皆下之僞將軍王復臣等糾裸
羅列象陣合眾五萬犯保甯薄城下國翰自蘇州聞急趨援率兵
奮擊斬復臣及賊萬餘捷聞 頒賜紫貂冠服鍍金甲冑囊鞬
等物及鞍馬 敕部覆叙初國翰以征勦自成獻忠兩敘功復兩
遇 恩詔游晉一等伯至是晉三等侯可望懲保甯之敗與定國
併力犯湖廣不復窺四川國翰奉 詔同三桂還鎮漢中而僞侯
譚文譚洪譚詣與自成遺黨劉二虎等聯結爲寇尋復陷重慶使
僞都督杜子香據之十五年三月國翰同三桂進征由南郡西充
至合州杜子香率眾迎戰敗遁遂復重慶以總兵嚴自明率所部
畱鎮而自與三桂進兵桐梓僞總兵王友臣迎降遂趨遵義僞將

軍劉正國據險隘拒戰我師擊之潰由水西遁入雲南遂取遵義及所屬州縣五月進擊僞將軍楊武僞總兵梁亦英等於開州斬級千餘獲其象馬器械開州及附近城邑俱降水西土司安坤等並歸順時甯南大將軍宗室洛託與經略洪承疇已取貴陽國翰與三桂奉 詔俟信郡王多尼征南將軍卓卜特兩路兵並進雲南乃還駐遵義七月疾卒喪至京 命內大臣致奠 贈太子太保 賜祭葬如典禮諡敏壯長子海爾圖襲爵與第三子桑額俱別有傳 世宗憲皇帝時以國翰入祀賢良祠其侯爵既襲二次循例改襲三等伯今上乾隆十五年加伯號曰懋烈

右 國史館本傳

李國翰漢軍鑲藍旗人 太宗時任侍衛 賜名墨爾根初襲父
李繼學三等副將世職從征錦州松山杏山大凌河屢有功天聰
九年考察所管人丁加二等副都統崇德三年授刑部理事官隨
揚武大將軍多羅貝勒岳託等證明克濟南府城及慶都獲鹿二
城克呂洪山松山南山杏山諸臺順治元年加世職爲三等都統
同葉臣平定山西時饒陽汾西太原諸郡邑爲土賊流寇所據國
翰屢率兵擊敗之克其城又與眾都統分路招撫凡得七府二十
四州一百三十五縣二年同巴顏統軍往陝西逆賊賀珍等率馬
步兵七萬犯西安國翰合何洛會兵夾擊之殲賊殆盡又遣中軍
陳德副將任珍破賊首劉文炳李遙等僞王朱森淫僞定遠侯趙

榮貴犯階州國翰陣斬森溢榮貴又擊逆賊王永強秦隴悉平進
取延安府恢復延綏鎮城隨攻鞏蒲城宜川安塞清澗諸縣河東
附近悉納款加一等伯進征四川招撫漳臘松潘攻拔重慶等府
又降成都僞撫南王劉文秀擒斬僞將軍王復臣及僞將二百餘
員賊兵四萬餘級晉封三等侯十四年克復合州進取重慶僞
都督杜子香率眾逃竄又擊走僞將軍李正國等遂收遵義府克
開州並招撫土司烏斯國大寶法王大寶法王等國翰前後蕩
平賊寇宣力疆場克著狀猷十五年卒於軍予祭葬諡敏壯追
贈太子太保

右 國史賢良小傳

海爾圖

海爾圖漢軍鑲藍旗人三等侯李國翰長子 世祖章皇帝順治三年隨大軍至西安擊敗叛賊賀珍孫守法劉體純等進征四川又擊敗僞侯袁韜等五年授兵部理事官尋任參領七年擢鑲藍旗漢軍副都統九年遇 恩詔予騎都尉世職十一年三月任戶部右侍郎十一月轉左侍郎時流賊張獻忠餘黨李定國糾眾出廣西犯廣東海爾圖隨征南將軍珠瑪喇率師往剿敗定國於新會所陷州縣以次規復敘功晉世職爲三等輕車都尉兼一雲騎尉十三年二月以員外郎朱世德司權河西務虧缺稅銀戶部議援 恩赦議免部臣俱坐降革海爾圖罷侍郎任專管副都統事

降世職爲騎都尉十六年遷本旗漢軍都統 聖祖仁皇帝康熙
元年襲父三等侯爵以騎都尉世職予其弟諾遇襲十四年定西
將軍貝勒洞鄂征叛鎮王輔臣圍秦州海爾圖奉 命運紅衣礮
三軍前並參贊軍務既至西安疏言臣抵西安聞自荊州來之兵
及貝勒催辦弓矢之護衛俱爲賊阻暫住隴州仙逸關等處若不
滅此賊恐紅衣礮不能前進乞添發滿洲兵二千勦賊奪關以通
道路 諭曰秦州需礮甚急若俟發京兵恐稽時日今都統海爾
圖總督周有德參領達爾泰等兵統計已足二千其卽合軍平賊
速運紅衣礮往秦州尋復 諭曰欲平陝西諸寇必先取秦州欲
取秦州必須大礮今海爾圖等率兵護送紅衣礮與賊相持於仙

逸關恐諸將各自將兵互相推諉致誤軍機其令周有德海爾圖爲統領前赴貝勒軍會仙逸關賊遁秦州僞總兵陳萬策等降於貝勒洞鄂軍前洞鄂進征平涼奏令海爾圖運礮至平涼海爾圖具啟洞鄂以運礮屯夫多逃遁請發槍手步兵四百棉甲兵八百防護又以礮手熟練者少請於八旗滿洲漢軍內擇素習者遣發赴軍洞鄂以奏得旨貝勒洞鄂等帥兵抵平涼爲日已久不速滅賊平定地方及命其用礮攻平涼海爾圖又託故具啟遷延時日洞鄂等並不議可行與否但據啟以奏殊爲不合前送紅衣礮已撥漢軍每佐領二名海爾圖謂爲不足因添撥一名及海爾圖去時藉口沿途養馬不卽速行至關山又請兵二千欲靖賊寇復

如所請添撥而究不能開通關山今令用紅衣啟急取平涼海爾圖請自京師發槍手棉甲耽延時日有誤軍機殊負任使著解參贊之任十八年大軍進征四川撫遠大將軍圖海疏請以海爾圖駐守鳳翔十九年 詔海爾圖率自京發往四川之漢軍千人隨大軍進征雲貴二十年四月卒於軍 賜祭葬如例孫李廷燮襲爵

右 國史館本傳

桑額

桑額漢軍鑲藍旗人三等侯李國翰第三子由護衛遷參領 聖祖仁皇帝康熙三年授甯夏總兵十二年九月擢雲南提督未抵

任值逆藩吳三桂反畱駐荊州十三年正月改湖廣提督二月賊將夏國相犯澧州桑額率兵赴援戰失利還荊州三月賊將吳應麟陷岳州順承郡王勒爾錦統師駐荊州令桑額移守武昌七月隨貝勒察尼規復岳州由城陵磯進勦以礮擊沈賊船大敗賊眾於七里山下十五年二月敘功加右都督十七年七月賊由洞庭湖乘風出犯桑額率副將胡世英遊擊郭文魁等奮戰卻之追至岳州城下九月賊船數十聚癩子山下桑額同前鋒統領杭奇台兵攻擊發矢石槍礮殲賊百餘獲賊船四明年正月岳州賊遁桑額收復華容石首安鄉等縣敘功晉左都督 詔趣大兵滅賊收疆仍授桑額雲南提督桑額奏改彝陵鎮標兵爲湖廣提標以舊

所屬兵爲雲南提標率之進征十九年三月同總兵陳珀遊擊李
理等攻克辰龍關復辰州沅州進征鎮遠平越貴陽安順及永甯
州屢敗賊兵遂趨鷄公背鐵索橋賊聞風震懼焚橋而遁桑額乃
督土司沙起龍等築浮橋以濟師二十年二月隨大將軍貝子彰
泰圍雲南省城同總兵白成功王仕華等屢敗迎戰賊眾逆擊吳
世璠窮蹙其賊帥馬寶胡國柱俱自四川還救桑額率兵勦賊楚
雄馬寶踞烏木山列陣副都統託岱由中梁進攻營總幹都海由
右梁進攻桑額領精銳趨進併力衝擊賊眾潰遁窮追五十里馬
寶越山遁赴大將軍賴塔營乞降與逆黨方光琛等並磔死桑額
同都統希福搜勦胡國柱於永昌截守潞江諸要隘國柱度不能

脫自縊死其黨皆降雲南平初桑額赴援澧州退還部議革職及
進征雲南奏標下兵逃散三百餘 上命左都御史哲勒肯赴武
昌察審覆奏標兵因家口在武昌無資養贍逃回者千餘人 上
切責桑額不恤士卒下部嚴議革職並得 旨畱任戴罪圖功至
是敘功復原職二十一年五月乞休 詔慰畱之二十五年三月
卒於官子李楫由佐領洊陟鑲藍旗漢軍副都統見大臣表

右 國史館本傳

努山

努山滿洲正黃旗人姓扎庫塔氏世居鄂里父塔克都當 太祖高皇帝時率眾來歸 命其長子瑚什屯轄其眾爲佐領積功授三等輕車都尉世職無子以努山之子渾岱爲子瑚什屯既卒渾岱襲職努山代理其事每從征伐輒先驅覘敵有斬獲投前鋒參領天聰八年五月 太宗文皇帝嘉其能事 諭羣臣曰姪不如弟親以渾岱所襲職改 命努山襲之八月 太宗親征明大同努山同參領席特庫納海擒明哨卒以獻崇德元年六月率甲士偵明邊境至冷口遇哨卒十四人斬三人生擒一人獲馬十餘三年隨貝勒岳託征明將入邊斬首四十級俘三人發敵所伏火藥

五處至密雲東北牆子嶺明薊遼總督吳阿衡率步騎六千拒戰
既擊敗之復與前鋒統領勞薩等乘勝追擊潰卒獲馬數十及軍
械駝具進薄燕京明以騎兵五百設伏謀襲我軍太監高起潛又
率兵躡我軍後努山與勞薩擊走伏兵旋自設伏道側以少卒誘
起潛戰夾擊之斬獲甚眾是夜起潛復襲我前鋒營努山與參領
鄂克席特庫合兵奮擊大破敵眾追抵會通河溺死者無算遂次
涿州分路略地並隨睿親王多爾袞至山東克濟南府振旅出邊
同勞薩擊谷口步兵敗之六年七月與侍衛穆章等率兵征敵董
家口喜峯口斬級百餘生擒四人是年從大兵圍錦州明援兵踵
至 太宗自將擊之陳師松山杏山開敵騎兵犯我前鋒努山力

擊斬首五十有二獲馬三十明總督洪承疇悉眾來戰努山與勞
薩等陣而前戰良久會王貝勒等各率所屬兵至合擊之大破其
眾追至城塹而還十月擢前鋒統領尋奉 命馳赴杏山是時武
英郡王阿濟格駐兵杏山河岸敵以千騎至甯遠來窺猝遇努山
驚潰努山追敗之於連山斬級三十獲馬三十二七年三月略明
甯遠有中後所敵騎五十犯我牧地卽率前鋒兵縱擊並敗其援
兵四百甯遠守將背城而陣努山與前鋒統領吳拜破其陣生擒
二十三人是年敘功晉二等輕車都尉八年四月 太宗以貝勒
阿巴泰等征明山東未還 命努山偕參領四侍衛四率兵九十
至界嶺口偵大軍距邊遠近遇明兵邀戰斬其守備及步騎三百

餘生擒數十人獲馬騾牛二百餘還奉 命以所俘獲分賚從征將士八月同護軍統領阿濟格尼堪率兵駐防錦州順治元年世祖章皇帝定鼎燕京 命努山統左翼前鋒隨豫親王多鐸追勦流賊李自成至陝西距潼關二十五里賊據山爲陣謀拒我師努山率兵由閒道趨賊營斬獲過半賊潰竄二年移師定河南下揚州進克江甯明福王朱由崧遁走努山與諸將追擊於蕪湖殲敵甚眾由崧爲其總兵田雄等執以獻三年隨貝勒博洛征浙江明總兵方國安列營錢塘江東岸分布舟艦來犯努山與都統圖賴徑渡上流悉精銳擊之國安望風驚潰盡獲其舟艦遂進征福建斬僞巡撫楊廷清李暄芬時護軍統領都爾德等攻下建甯延

平明唐王朱聿鍵走汀州努山馳七晝夜追及則已閉城堅守乃令銳卒用巨木撞其門關外大兵並進遂擒聿鍵五年隨鄭親王濟爾哈朗征湖廣時明桂王朱由榔據廣西其總督何騰蛟總兵王進才馬進忠袁宗第等猶踞湖南郡邑六年正月努山至長沙同右翼前鋒統領席特庫簡精銳趨湘潭遇迎戰者輒擊敗之與都統阿濟格尼堪等破北門入騰蛟就擒四月同兵部尙書阿哈尼堪等徇寶慶距城七十里進才進忠糾眾抗拒努山令軍士舍騎步行連戰皆捷直薄城東門進才等潛遁追勦至武岡殲進忠所屬步軍三千連破進才宗第等十餘寨分克沅州靖州進定全州擒斬僞閣部楊鼐及副將參將等官四十餘人俘獲無算七年

九年三遇 恩詔晉爵二等男世襲十三年擢內大臣十五年九月卒 賜卹如典禮立碑墓道子托岱襲爵

右 國史館本傳

翁愛

翁愛姓卓爾古特氏世居科爾沁 太宗文皇帝時來歸隸鑲黃旗蒙古授佐領崇德二年 命同佐領喀凱舒書等征瓦爾喀俘獲甚眾四年隨鎮國公扎喀納等率兵駐防藩城屏城閒會內大臣多爾濟屬下數人竊馬以逃翁愛追之不及論罪罷佐領任時大軍屯田義州翁愛率所屬耕種穫糧獨多尋復佐領七年隨貝勒阿巴泰征明越燕京至山東先眾攻克莒州城八年凱旋 賚白金 世祖章皇帝順治元年四月大軍入山海關討流賊李自成翁愛署副都統督後隊兵有功七月追勦自成於山西自成遁西安其僞伯陳永福據太原翁愛率兵薄城環度進攻處賊眾突

出犯奮擊卻之二年隨英親王阿濟格征陝西敗賊於綏德州自成遁湖廣復躡追之同副都統阿喇善等斬獲賊黨無算三年授禮部理事官兼任前鋒參領隨肅親王豪格征流賊張獻忠過陝西擊敗叛鎮賀珍於雞頭關進征四川三與賊戰皆捷先是敘入關功 子雲騎尉世職考滿晉騎都尉及獻忠滅敘功晉三等輕車都尉七年八月兩遇 恩詔晉一等輕車都尉九年擢鑲黃旗蒙古副都統十五年十月卒 賜祭葬如例弟特澤襲職

右 國史館本傳

伊拜 弟庫爾闡

伊拜姓赫舍里氏世居齋谷父拜思哈當、太祖高皇帝時來歸授佐領隸滿洲正藍旗既卒伊拜與其兄宜巴里弟庫爾闡分轄人戶任佐領 太宗文皇帝卽位察哈爾部貝勒圖爾濟率人戶來歸 命伊拜迎犒之天聰八年 上統師證明伊拜齋 救往科爾沁部調兵隨征是年五月以克副任使 予雲騎尉世職九年擢正白旗蒙古都統崇德元年隨武英郡王阿濟格證明入長城攻克昌平等州縣俘獲甚眾師還出邊敵襲我後隊縱劫掠因論伊拜不殿後及徇隱軍士失律罪坐罰鍰三年九月隨睿親王多爾袞證明由青山口入邊越燕京略山東四年三月凱旋以過

三屯營時佐領喇巴希爲敵所困伊拜未助戰罰馬一又其僕與
軍士爭草鬪毆伊拜袒其僕以鳴鏑射軍士復罰鍰五年大軍圍
明錦州伊拜遇杏山敵騎率本旗兵擊敗之復連敗松山騎兵步
兵後敵騎復自杏山來犯伊拜邀擊多斬獲又同左翼軍擊卻錦
州城中出戰敵兵六年攻錦州破其山巔步兵復擊敗其拒戰騎
兵敘功晉世職爲騎都尉時明督師洪承疇集兵十三萬駐松山
援錦州 上親征陳師松山杏山閒 授諸將方略分布要隘俟
敵潰遁截擊伊拜奉 命同副都統譚拜等率兵倚杏山駐營明
兵自松山竄走伊拜追逐至塔山敵剽刎及溺水死者無算七年
大軍擒承疇於松山明總兵祖大壽以錦州降伊拜奉 命駐守

杏山是年七月部議圍錦州時敵犯鑲黃旗壕塹軍士有未戰者
伊拜徇隱應罰鍰 上賞之八年十月奉 命與輔國公篇古率
將士駐守錦州 世祖章皇帝順治元年調正藍旗蒙古都統隨
大軍入山海關擊敗流賊李自成尋同都統葉臣等勦賊山西圍
太原府城賊出城抗拒伊拜同都統巴哈納等督兵敗賊克其城
招降附近郡邑師還 賜白金三百兩二年隨英親王阿濟格征
陝西敗賊延安自成走湖廣追勦至武昌連破賊營三年敘功晉
三等輕車都尉五年隨鄭親王濟爾哈朗征湖南時衡州寶慶諸
郡爲明桂王朱由榔之將所據六年春大軍克湘潭伊拜同都統
佟圖賴等分兵趨衡州距城三十里賊千餘據橋立寨伊拜督兵

擊之潰進薄城下連破賊寨斬偽總兵陶養用遂定衡州大軍別
徇寶慶辰州武岡沅州靖州賊俱敗遁七年四月凱旋復 賜白
金三百兩八年以年老解都統任九年 命爲議政大臣疊遇
恩詔晉爵至三等男十五年卒年六十有五 贈太子太保諡勤
直 賜祭葬如典禮立碑墓道以其第三子費揚武襲爵伊拜弟
庫爾闡初任佐領天聰九年隨副都統巴奇蘭征黑龍江有功
予雲騎尉世職崇德三年授都察院理事官兼參領五年隨工部
承政薩穆什喀征索倫部與其部長博穆博果爾力戰卻之師還
以俘卒遁去論監守不嚴應鞭責 上念其曾與博穆博果爾力
戰停敘功免罪仍 予賞賚尋隨睿親王圍明錦州擊敗杏山敵

騎及松山步兵又同左翼軍擊敗錦州城中出犯兵六年擢都察院參政復隨鄭親王圍錦州敵騎自松山來奪我紅衣礮庫爾闡擊卻之旋率兵據守山寨敵來犯勢甚眾時薩穆什喀別守汛地欲遣兵助戰庫爾闡以敵易禦辭之遂獨率所部奮擊敗敵斬四十一人獲雲梯槍礮甲楯旗幟敘功晉世職爲騎都尉八年擢正藍旗蒙古副都統順治元年隨大軍入山海關擊敗流賊李自成並追至望都敘功加一雲騎尉二年正月復隨豫親王多鐸擊流賊於潼關連破其兩營敘功晉三等輕車都尉尋以考滿稱最晉二等四年六月奉命率兵駐防濟南會土賊謝遷等陷緇川縣城庫爾闡遣所部兵並調綠旗兵往援部議其不親赴勦罪處罰

錢解副都統任革世職得旨倍其罰餘寬免明年擢都察院承
政尋仍改爲參政六年同都統譚泰征江西叛鎮金聲桓卒於軍
遇恩詔晉世職爲一等輕車都尉以其子舒赫襲

右 國史館本傳

葉克舒 子道剛

葉克舒姓輝和氏世爲尼瑪察部長 太祖高皇帝初年隨其父
泰松阿以所屬來歸隸滿洲正紅旗投佐領天命六年從大兵攻
遼陽敵出城嚴陣以待葉克舒衝鋒奮擊有功授二等輕車都尉
世職沙嶺之役先衆殺敵晉爵三等男 太宗文皇帝卽位擢列
十六大臣佐理正紅旗事天聰五年任兵部承政六年授都統八
年八月率本旗兵隨大貝勒代善征明入得勝堡略大同取城堡
西至黃河合兵朔州十一月考滿晉二等男九年 詔貝勒多爾
袞征明由大同進師分遣葉克舒隨貝勒多鐸營甯遠錦州界以
制明援兵斬明副將劉應選俘獲遊擊等官崇德元年隨武英郡

王阿濟格征明入延慶州克十二城凱旋以葉克舒還軍時縱兵失伍攘獲擅殺諸罪罷都統任削爵仍管佐領事二年正月命同承政尼堪等率甲士百人會外藩諸部兵征瓦爾喀師出會甯遇朝鮮兵於吉木海我兵馳擊斬其平壤巡撫及兵二千餘敵兵繼至又敗之降其哈忙城巡撫總兵及各邊副使等官斬馘無算進略瓦爾喀以所獲牲畜分給外藩隨征將士遣之各還所部十一月偕參政星訥分統左右翼往征卦爾察至黑龍江俘獲甚眾明年班師特遣大臣迎勞尋任兵部右參政四年七月授副都統十一月與刑部承政索海統右翼兵征索倫部至雅克薩城攻克之敗其部長博穆博果爾而還五年四月復任都統七月敘功

授騎都尉世職 優賞部議征索倫時葉克舒督造監獄不堅致
俘囚逃逸應罰鍰追奪 賜物 上以葉克舒功罪相抵免之是
月隨睿親王多爾袞圍錦州與都統圖爾格率所部三百人設伏
錦州西南烏欣河追捕城中出牧牲畜敵兵千餘逆戰葉克舒馬
中矢蹶圖爾格馳救之上馬復戰殺敵數人比還敵引兵襲我後
葉克舒收兵還擊敵眾奔潰以功復晉三等輕車都尉六年三月
坐阿徇睿親王等遣官兵歸家及離城遠駐罪罰贖九月復隨貝
勒杜度圍錦州與都統譚泰阿山等掘濠環守擊明總督洪承疇
兵於松山七年三月 召還先是護軍統領噶布喇失律敗績葉
克舒與都統譚泰馬喇希承勘坐推諉支吾論應罰鍰及錦州騎

兵之出犯鑲紅旗營也葉克舒以備禦失宜調遣不當致傷士卒
復議罪應罰鍰并追奪 賜物賞給陣亡士卒 上命免其承勘
所坐罪餘悉如部議十一月貝勒阿巴泰等征明師至黃崖口葉
克舒與都統譚泰定議分兵兩路夾擊遂奪邊口薄長城葉克舒
麾軍先登敵兵潰走進攻薊州敗明總兵白騰蛟白廣恩諸軍尋
遣兵攻孟家臺三十人陷於敵八年師還下部勘訊葉克舒辨稱
敵欲歸順因遣兵招撫以致陷敵 上以葉克舒輕進失利又設
詞詭辨論罪罷都統任削世職順治元年三月 世祖章皇帝命
爲副都統駐防甯遠四月大兵入山海關擊流賊李自成葉克舒
率駐防兵與賊步戰身被三十一創戕一目戰彌厲大破賊衆二

年隨肅親王豪格征山東時賊渠十餘輩悉據滿家洞憑險爲巢凡二百五十一窟葉克舒與尙書車爾格合兵搜剿殲渠魁以土石湮塞諸洞口餘寇悉平敘功復 予三等輕車都尉世職旋晉二等三年授總管鎮守盛京屢遇 恩詔晉爵至三等男十四年以 昭陵總管鍾奈有罪葉克舒坐不舉劾免官並革世爵十五年卒長子道喇別有傳次子夏穆善官侍衛屢著戰功 贈世職二等輕車都尉第三子瑚葉官護軍參領以軍功授世職三等輕車都尉

右 國史館本傳

道喇

道喇滿洲正紅旗人姓輝和氏葉克舒長子也以護軍從征伐積功授護軍參領崇德三年 太宗文皇帝命貝勒岳託率師征明攻邊城道喇領兵先登克之五年從大軍圍錦州敵兵自松山犯正黃旗營道喇率護軍四十人擊敗其眾敵復來攻正紅旗汛又敗之會多羅特部蒙古蘇班代來歸道喇率兵取其家屬於杏山西五里臺遇明杏山騎兵復擊卻之 世祖章皇帝順治元年調前鋒參領隨大軍擊流賊李自成與前鋒統領鄂碩敗賊將唐通兵於一片石既入山海關追賊至安肅又敗之復誘敗迎戰賊兵追至望都乘勝躡擊斬殺甚眾尋隨都統葉臣征山西師抵汾州同前鋒參領圖爾賽破賊將白輝兵敘功授騎都尉世職三年賊

將李錦集眾踞荊州道喇隨順承郡王勒克德渾進剿賊眾潰走
五年隨都統譚泰征江西叛鎮金聲桓五敗賊兵生擒偽總兵及
參將遊擊三人七年隨睿親王多爾袞敗於中後所以行列不整
議罪輸罰鍰九年擢正紅旗副都統十年潮州總兵郝尙久叛道
喇奉 命同靖南將軍哈哈木率師討之復潮州尋統兵駐防荆
州十四年授本旗蒙古都統十六年隨信郡王多尼平雲南明桂
王朱由榔奔緬甸元江土司那嵩應由榔據城叛道喇與前鋒統
領白爾赫圖等攻克其城屢遇 恩詔復歷敘前功晉世職一等
輕車都尉康熙二年以年老乞致仕徙居盛京 詔許之十二年
聖祖仁皇帝念其效力年久勤勞素著 特加太子少傅二十一

年駕幸盛京 召見 賜坐及茶酒並 優賚之明年九月卒
年八十有一 賜祭葬諡勤襄立碑墓道以弟之孫伊濟納襲職

右 國史館本傳

國朝耆獻類徵初編卷二百六十七目錄

將帥七

沙爾虎達 子巴海

敦拜

石廷柱 子華善
孫文炳

吳世俊 孫雲龍

舒里渾

伊爾德 孫巴琿岱

薩弼圖

西喇巴雅爾

劉用楚

濟席哈

蘇魯邁 子鄂洛順

索渾

珠瑪喇

都爾瑪

國朝耆獻類徵初編卷二百六十七

通奉大夫前署江西巡撫江西布政使司布政使湘陰李桓輯
將帥七

沙爾虎達

子巴海

沙爾虎達姓瓜爾佳氏其先蘇完人世居虎爾哈 太祖高皇帝
時從其父桂勒赫來歸任佐領隸滿洲鑲藍旗天命初從征瓦爾
喀部有功授騎都尉世職天聰元年明人於錦州大凌河築城屯
田 太宗文皇帝自將擊之既至大凌河明人棄城走大軍遂圍
錦州沙爾虎達時任前鋒參領累戰皆捷三年大軍征明入紅山
口拔遵化州抵北京沙爾虎達敗其郭外兵論功授三等輕車都

尉世職自是載奉 命同前鋒參領勞薩等率遊騎入明邊往來
錦州松山杏山間俘擊明謀卒凡擒哨長一獲邊卒十八牲畜器
械甚夥大凌河之捷也明總兵祖大壽降請歸錦州爲內應旣而
背其言八年 上於行營遣大臣略地至錦州且遺書大壽恐不
能達 召沙爾虎達 親授方略令襲取守烽墩卒付以 敕書
如無所獲卽懸書十三站山坡沙爾虎達輕騎往未遇敵懸書而
歸九年與步軍統領巴奇蘭等征黑龍江以功加一雲騎尉時貝
勒多鐸率師征明錦州遇祖大壽部將劉應選等於大凌河曲
上以多鐸所將兵少令沙爾虎達及各旗大臣扎福尼等往濟其
軍會多鐸已擊敗明兵遂班師是年冬赴錦州偵軍事還獻俘獲

命卽以分賚將士崇德元年從征朝鮮率兵敗敵於南漢山城二年列議政大臣 上以參領丹岱阿爾津等往土默特貿易慮明兵於中途截擊 遣沙爾虎達率將校往歸化城護之三年與前鋒統領吳拜率兵八十人至紅山口遇明兵斬其裨將二擊走羅文峪騎兵五百奪其纛獲馬四十又殲密雲步兵百餘四年 上統軍征明沙爾虎達率前鋒兵趨義州復至錦州捕伐薪爲炭者取其牲畜猝遇敵卒敗之尋率土默特部卒二百人入甯遠北界與參領蘇爾德鄂碩布丹先設伏以數騎誘敵敵堅壁不出乃擒其樵採者以歸五年敘功晉二等輕車都尉六年三月隨睿親王多爾袞圍錦州以離城遠駐下部議罪應革職籍家產之半 上

特宥之令罰鍰八月擢前鋒統領 上以累歲用師錦州未克遣
將更番圍之明人分道赴援屯師松山 上親征部分諸將擊敵
賜沙爾虎達馬使率兵營於高橋東界 誡之曰爾素日行不逮
言今日之役當思自勉復 諭曰如敵兵敗可以杏山西臺橫截
大路躡擊之母使入城及戰明兵遁沙爾虎達違 命弗追擊縱
潰卒二百餘入城 上繫而問之曰汝何辭稽首對曰殺臣祇一
死耳宥臣當效命疆場乃 赦之罷前鋒統領及議政俾任參領
立功自贖七年虎爾哈部煽亂沙爾虎達受 詔與葉赫珠瑪喇
討平之招降喀爾喀木等十七人戶千餘獲馬騾牲畜無算凱旋
賜宴及布帛有差 世祖章皇帝順治元年沙爾虎達征庫爾喀

及黑龍江皆有功復隨大軍追擊流賊李自成於潼關明年隨貝勒博洛攻取江甯進師杭州所在力戰三年論功晉一等輕車都尉四年授副都統駐守東昌時克東賊渠丁維岳張堯中攻陷州郡撫臣張儒秀告急沙爾虎達馳軍進剿大破賊眾陣斬渠魁東郡以平敘功加一雲騎尉五年江西總兵金聲桓據南昌叛沙爾虎達隨大軍征討有功遷護軍統領後爲議政大臣六年河間賊竊發奉命率兵剿撫賊黨解散明年改任鑲藍旗滿洲副都統晉爵三等男累遇恩詔晉一等男兼一雲騎尉九年正月上以吏部於兩次恩詔加秩過濫削去沙爾虎達一雲騎尉七月奉詔統率官兵駐防甯古塔十年擢都統仍畱鎮守賜冠服

鞍馬十五年七月鄂羅斯犯塞沙爾虎達擊走之斬獲甚眾十六年卒年六十有一喪還 命大臣祭奠 贈太子太保諡襄壯立碑如例長子巴海襲爵別有傳

右 國史館本傳

巴海

巴海滿洲鑲藍旗人姓瓜爾佳氏沙爾虎達長子也初任佐領順治十四年授祕書院侍讀學士十六年襲父一等男爵 世祖章皇帝諭吏部曰甯古塔係邊疆要地沙爾虎達駐防年久甚得人 心今已病故其子巴海素著勤慎堪代其父授爲甯古塔總管十七年鄂羅斯犯邊境巴海同副都統尼哈里等率兵至黑龍江松

花江交會處偵賊在飛牙喀西境卽疾趨使大部界分布舟師潛
伏江隈賊船踵至合擊之賊敗卻棄船登岸竄走巴海督兵追剿
斬六十餘級溺水死者甚眾獲其船及槍礮軍器因招降飛牙喀
百二十餘戶敘功加一雲騎尉十八年追論禦擊鄂羅斯時有五
船兵失利巴海不以實奏削一等男及雲騎尉 聖祖仁皇帝康
熙元年改總管爲將軍仍以巴海任之十年 上詣盛京 召巴
海問甯古塔及瓦爾喀虎爾哈人民風俗 諭曰朕向聞爾賢能
今益知爾矣飛牙喀赫哲雖服然其性暴戾當廣布教化多方訓
迪鄂羅斯雖云投誠當加意防禦訓練士馬整備器械毋墮狡計
爾膺邊方重任尙知黽勉以報朕知遇之恩初邊境有墨爾哲氏

者累世輸貢至是巴海招之其長扎努喀布克托等願率眾內移
巴海請安輯於甯古塔附近地設佐領四十以扎努喀布克托及
諸族屬任之分轄其眾號爲新滿洲十三年冬巴海率諸佐領入
覲 頒賚有差 特賜巴海黑狐貂裘朝衣各一襲十七年 諭
獎巴海暨副都統安珠瑚實心任事撫輯新滿洲戶口咸令得所
各 予一等輕車都尉兼一雲騎尉世職二十一年巴海疏言巡
緝採獲官兵宜分別所獲多寡定獎賞之例 上諭部曰盜採者
緝獲視所獲多寡議敘甚爲允當其非採獲而子身採捕他物者
毋得妄拘並詳議著爲令時 上幸吉林回鑾 諭巴海以吉林
兵丁勞苦宜加憐憫 命除捕牲取魚諸徭役俾勤耕種二十二

年以奏報出禾歉收不實部議罷任革世職 上曰巴海遷移新
滿洲不可謂無功降世職爲三等輕車都尉罷將軍任二十三年
授鑲藍旗蒙古都統尋列議政大臣三十五年卒 賜祭葬如例
子四格襲職

右 國史館本傳

國朝文獻通考卷之二十一

五

敦拜

敦拜滿洲正黃旗人姓富察氏其先世居沙濟父木科理當 太祖高皇帝時來歸有朱舍理部長尤額楞梗化不服 命同鄂佛洛總管達賴往征之有功 賜號蘇赫巴圖魯管佐領事尋卒子三人敦拜其長也初任佐領天命十一年從大兵征明甯遠先驅偵敵擊敗城中出戰兵師旋遇敵二十人與步戰盡殲之敵復以騎追射我師敦拜還擊卻敵殿後以歸天聰八年 太宗文皇帝嘉其克副任使授騎都尉世職崇德五年擢護軍統領隨鄭親王濟爾哈朗圍明錦州敵出城誘戰敦拜突入其隊斬三人餘眾俱遁敵騎自杏山一再來犯並戰卻之六年復圍錦州明總督洪承

自松山遣兵犯我兩紅旗營敦拜先後率所部禦敵尋復來犯我外藩蒙古營敦拜趨援敗敵斬首二百餘級獲其雲梯十四七年敘功加一雲騎尉八年同護軍統領阿濟格尼堪率兵駐防錦州世祖章皇帝順治元年隨大軍入山海關擊敗流賊李自成兵追至望都二年敘功晉世職二等輕車都尉先是自成敗遁還西安明福王朱由崧自立於江南上敕豫親王多鐸征江南取道河南先除自成賊黨敦拜率護軍以隨師至陝州賊將劉方亮領兵千餘來犯敦拜同護軍統領圖賴阿濟格尼堪等奮擊敗之賊復夜襲我營敦拜率兵連敗賊眾遂破潼關進定西安自成由商州遁走湖廣敦拜同護軍統領阿爾津等追斬三百餘人豫親

王移師下江南敦拜復從破揚州趨江甯朱由崧聞大軍至遁走蕪湖將登舟渡江敦拜追及之與阿爾津圖賴等扼據江口截其去路明將黃得功迎戰我兵奮擊盡奪其舟得功中流矢死由崧爲其總兵田雄等執以獻三年敘功晉世職一等是年隨端重親王博洛由浙江進征福建同副都統珠瑪喇擊敗僞總兵黃某等拒戰兵五年隨征南大將軍譚泰討江西叛鎮金聲桓賊黨踞九江府敦拜先驅直抵城下敗賊眾聲桓與其黨王得仁糾步騎七萬自南昌迎戰敦拜合兵奮擊敗之復招撫臨江一府四縣六年命統兵勦畿南土賊陣斬賊渠李玉三陳金玉邢少川吳臨瑞席快等獻縣雄縣任邱寶坻諸邑土賊悉平七年五月敘平定西安

福建江西功晉爵三等男尋隨睿親王多爾袞獵於中後所以同
都統噶達渾等私行射生降一等輕車都尉明年上親政復爵
如故九年遇恩詔晉二等男十一年僞晉王李定國自廣西犯
廣東上遣珠瑪喇爲靖南將軍以敦拜佐之統兵往征時定國
擁眾新會據山峪立砦平南王尙可喜先以兵防禦未及戰敦拜
同珠瑪喇至遂合兵進勦破賊巢斬獲甚眾復追至橫州江岸定
國遠竄獲賊眾十六馬二百餘所陷郡邑悉復凱旋敘功晉爵二
等子得旨從優再議晉一等子會有疾乞休上念其勤勞年
久加太子太保以原官致仕十四年起爲盛京總兵十七年正月
卒賜祭葬如典禮諡襄壯無子以從孫瑚錫布爲嗣襲爵

右 國史館本傳

國史館本傳
卷之二十一 將帥七

八

國朝通志卷之二十一

石廷柱

子華善

孫文炳

石廷柱遼東人隸漢軍正白旗先世居蘇完姓瓜爾佳氏曾祖布哈明成化中任建州左衛指揮僉事祖阿爾松阿襲職父石翰始家於遼東遂以石爲氏有子三長國柱次天柱次卽廷柱也初爲明廣甯守禦天命七年太祖高皇帝親征明攻廣甯城天柱時爲明千總出迎賜金印鞍馬令其撫慰城中士庶廷柱遂以城降授三等輕車都尉世職俾轄降眾十一月蒙古巴林部貝勒囊努克背盟劫掠廷柱從上討之克取屯砦收其畜產論功晉三等男爵天聰三年太宗文皇帝命率兵搜勦明故將毛文龍所屬諸島會石城島兵來犯擊斬二百人俘十九人以歸尋從上

征明北京明年正月班師至沙河驛廷柱與文臣達海頌諭城
中軍民降之先是三屯營漢兒莊喜峰口潘家口紅山口並已歸
順至是復叛廷柱奉命同達海等率兵千人往偵收復漢兒莊
率其城中將士來謁五年明總兵祖大壽築城大凌河上親統
軍圍之廷柱擒斬出戰敵騎尋大壽糧盡窮蹙上頒敕諭降大
壽從子澤潤以書繫矢射出城一與廷柱一奏上乞令廷柱往
與大壽定議廷柱同達海等至城南臺下先遣陣獲千總姜桂入
城大壽令遊擊韓棟偕姜桂來迎廷柱並以其義子可法爲質廷
柱乃踰濠與語大壽言決意歸順惟乞大兵速取錦州俾得妻子
相見廷柱還奏上復遣廷柱諭之大壽遂出降六年從征察哈

爾多斬獲七年隨貝勒岳託等征明旅順口凱旋 上親酌金卮以勞晉爵三等子八年從征明應州城東南隅有石家村堡廷柱用礮攻克之九年貝勒多鐸統師征明次廣甯令廷柱同都統阿山率兵四百先趨錦州至大凌河西遇明兵相對列陣遣騎馳告貝勒貝勒移師赴之明兵見我軍踵至遂大驚潰廷柱與阿山等率所部掩擊陣斬明副將劉應選及其兵五百擒遊擊曹得功並守備三人翌日復攻克一臺師還分 賜所俘獲崇德元年二月上幸演武場以廷柱軍容整肅 獎賚之十二月 命廷柱整飭器械儲備糧糗統所部漢軍同恭順王孔有德懷順王耿仲明智順王尚可喜等護紅衣礮及諸軍器隨大軍征朝鮮二年大軍既

克朝鮮其國王李倧降遂征明皮島廷柱與戶部承政馬福塔從北隅督戰有功尋追論朝鮮王謁 上時石廷柱亂班釋甲及縱士卒違法妄行罪解任罰贖奪 賞賚是年七月始分漢軍爲左右翼以廷柱爲左翼都統三年 上與諸臣論兵事以呂尙 訓勉諸臣廷柱奏言呂尙能專制閫外生殺故所向有功今臣等若有過下部逮訊雖佐領以下亦當與之比肩對簿其何以堪諸大臣以其言懇請下刑部議罪論死 上特宥之是年十月從征明錦州攻克諸屯堡獲人戶及馬騾牲畜甚多會我軍破錦州城旁一臺臺上所餘敵兵都統馬光遠部兵守之敵兵潛從間道遁去部議廷柱弗追擊應鵠爵罰錢得 旨寬免四年二月 上統軍駐

松山 命廷柱攻城南樓臺毀其堞臺兵不能禦降其守將王昌
功等四十餘人 上登松山南岡相度城垣形勢 命廷柱隨尙
可喜用礮攻城南門之左廷柱與光遠先取城西南隅一臺諸將
繼進合攻城盡毀其堞會以日暮罷明日復進攻敵守禦甚固我
雲梯兵不能入遇害者二十餘人廷柱兄子達爾漢亦中創 上
召詢諸將皆謂必能攻克但鉛藥不繼宜遣人速取翌日復集議
有德仲明可喜光遠欲鑿地道攻城廷柱獨持不可 諭責廷柱
曰爾爲主將恇怯無鬪志而與攻城人異議後何以戰爾因兄子
被創故驚懼不欲戰耳廷柱惶恐對曰臣向曾出哨於此知地中
有木石必不可穿且亦不能越壕而過故冒陳愚悃今眾皆謂可

攻臣焉敢獨異乃與有德等鳩役於城南鑿地道會祖大壽自錦州遣蒙古兵三百乘夜入城覺之多爲備地道不能達於是罷攻城議師旋退論廷柱在松山時詭稱鉛藥已罄不盡力攻城諸罪罷任罰鍰尋命赦罪分漢軍兩翼爲四旗以廷柱爲鑲白旗都統初祖大壽之降也請歸錦州爲內應後竟背約屢抗我師六年七月廷柱條上困錦州策謂錦州爲遼左首鎮今我遣兵鑿壕築壘誓期翦滅以圖進取誠至計也第明國以祖大壽爲保障我兵圍之急彼必益發援兵併力一戰宜乘此時簡精銳分布各旗屯田處遇警卽並進如敵已立營用紅衣礮四面環攻伺其軍動我軍突入轉戰過錦州至松山杏山間敵必敗遁錦州可破矣錦州

既破關外八城聞風震動是卽當年瀋陽失而遼陽隨下沙嶺失而廣甯隨順之明效也近聞喀爾喀扎薩克圖聲言取歸化城恐陰欲取鄂爾都斯臣擬令鄂爾都斯移過黃河與歸化城相近彼此策應仍簡才勇將士攜取火器並鳥槍手百人往彼駐守而令王貝勒率兵從宣大諸處進略應州雁門歸化城有警輕騎倍道赴援彼明國援遼士馬所恃不過宣大陝西榆林甘肅甯夏諸路西省有變自顧不暇豈能復援遼哉此一舉兩得之策也明援兵從甯遠至松山所齎行糧不過六七日若少挫其鋒勢必速退或逗遛數日亦託言糧盡而返宜設伏於高橋險狹處掘壕截擊仍發勁兵尾其後使之進退無路則彼之援兵盡折而降於我矣我

兵遇敵步軍每奮勇直入第彼步營火器稠密恐致傷挫應偵敵
人遠離城郭或憑據高阜水泉易竭糧餉不充然後四面攻圍夜
則鑿壕守之晝則大礮擊之不一二日勢必自生變亂其斃可坐
而待也洪承疇書生輩耳所統援遼鎮兵亦皆烏合亡命雖張聲
勢心實惟怯如祖大壽一失則承疇與諸將縱得遁去亦東市伏
誅而已彼見我 皇上恩養降將最爲優渥或慕義歸誠亦未可
料今明國災異迭見流寇不甯 聖主乘時應運定鼎中原機不
可失疏入 上嘉納之九月大軍圍松山城敵乘夜犯廷柱營廷
柱率兵禦擊斬首十餘級獲刀甲槍礮無算晉爵二等子七年分
漢軍爲八旗以廷柱爲鑲紅旗都統 世祖章皇帝順治元年四

月隨大軍入山海關擊敗流賊李自成五月同都統巴顏等勦滅
昌平土賊六月同都統巴哈納率師勦撫山東郡邑七月移師會
都統葉臣攻克太原府城平山西河南賊寇師還 賜白金五百
兩晉爵一等子六年從征大同叛鎮姜瓖恢復渾源太谷朔州汾
州等城十二年五月授鎮海將軍駐防京口十四年二月以老乞
休 上念其宣九年久勤勞素著 命加少保兼太子太保致仕
先是敘平姜瓖功復三遇 恩詔廷柱晉爵一等伯兼一雲騎尉
尋改爲三等伯 予世襲十八年二月卒年六十有三 賜祭葬
贈少傅兼太子太傅諡忠勇立碑紀功以第三子華善之子文炳
襲爵廷柱子六人華善琳別有傳

右 國史館本傳

華善

華善漢軍正白旗人都統石廷柱第三子也豫親王多鐸以女妻之授和碩額駙尋任內大臣 聖祖仁皇帝康熙六年以元宵節赴宴時譏誚莊親王博果鐸革內大臣仍畱和碩額駙十三年三月以迎藩吳三桂反 命華善爲安南將軍率師防守鎮江四月杭州將軍圖喇奏耿精忠叛 詔華善選所部漢軍二百名領以部將二員赴浙江聽調遣五月鎮海將軍王之鼎奏耿逆結連海賊窺伺內地應調右路官兵集天甯洲訓練 詔華善督所部兵習水戰九月 命簡親王喇布爲揚威大將軍統兵駐江甯華善

與王之鼎等參贊軍務十五年四月改授華善平寇將軍統轄江
南滿洲蒙古兵十六年九月簡親王駐江西疏請增兵 詔華善
率江甯徽州所駐滿洲蒙古漢軍兵赴簡親王軍前以平寇將軍
印畱付江甯副都統科爾擴岱十七年三月授定南將軍 詔率
兵進湖南駐守茶陵閏三月奏茶陵兵少恐吳逆乘閒自衡州出
犯安仁攸縣請增調以資防禦時簡親王率師進湖南 詔卽以
簡親王統師駐茶陵六月 詔華善進守永興八月疏言永興道
阻難通且兵力單弱致行期稽滯 詔責華善調赴永興爲日已
久乃借口兵單道阻逗遛不前俟事平察議 諭趣以設策勦賊
并力進征尋簡親王疏報吳三桂病死永興賊解去議政王大臣

臣等言華善不赴永興應革職在簡親王軍前披甲效力 上曰華善自六月調赴永興迄今未至殊負厥職我國家將士凡有調遣俱卽馳赴從未有如此遲延觀望者姑免革職披甲令隨將軍穆占營領隊效力十八年三月穆占奏副都統布舒庫前鋒營塔勒岱等擊敗僞將軍吳國貴范齊韓於永州華善與有功二十二年二月議政王大臣等追論不急救永興罪擬革職籍沒家產 上以華善尙未償軍寬免籍沒二十七年三月華善疏言臣高祖布哈原係蘇完人姓瓜爾佳明成化年間授建州左衛都指揮僉事臣曾祖阿爾松阿嘉靖年間襲職臣祖石翰移居遼東臨沒時囑臣伯父石國柱石天柱臣父石廷柱曰我雖暫來漢地然此心依

戀故土爾兄弟當力成吾志務建功業以歸 本主其後 太祖
高皇帝兵臨廣甯臣伯父國柱天柱臣父廷柱相率出迎隨獻廣
甯城 太祖高皇帝見而大喜曰我國之人仍歸我國 恩遇特
優自是臣父隨征無不奮勉當先 太宗文皇帝知臣父出自滿
洲 命轄滿洲精兵後仍改轄漢軍伏念臣父雖統漢軍實係滿
洲近蒙 皇上察取國初功臣家世名字臣伯父石國柱石天柱
臣父石廷柱亦預其列謹備敘臣家世系乞 恩改入滿洲旗籍
事下部議以族人官職眾多應仍畱漢軍旗下嗣後編審冊內改
造滿洲四十二年六月卒 賜祭葬如例子石文炳順治十八年
襲其祖石廷柱三等伯康熙十二年任參領十三年授直隸援剿

總兵十七年授登州總兵旋調正定二十一年遷杭州副都統二十三年擢正白旗漢軍都統二十八年授福建將軍二十九年十一月疏言閩省自國初以來一叛於鄭成功再叛於耿精忠兵民習見悖逆人心機變異常近賴皇威遠布島寇蕩平然不逞之徒表裏窺伺無日不以有事爲幸臣標額設馬步甲二千較之江甯杭州將軍標下其數甚少宜酌增旗甲或照廣東及京口例配撥綠旗兵數千爲未雨綢繆之計疏下議政王等准添綠旗兵二千三十九年九月因其父華善年老召還仍授正白旗漢軍都統十一月卒於途賜祭葬如例以其子富達禮襲伯爵

右 國史館本傳

吳世俊 孫雲龍

吳世俊漢軍正紅旗人先世居開原 太祖高皇帝天命四年六月征明取開原城世俊隨叔父吳裕來歸任佐領 太宗文皇帝時敘斬獲逃亡功並以所管人丁增多 予三等輕車都尉世職 尋卒子常山保襲未幾常山保卒以世俊襲職仍任佐領兼參領 崇德五年大軍圍明錦州世俊以紅衣礮攻克馬家湖臺六年復圍錦州明兵踞呂洪山口世俊同都統金礪督兵擊敗之七年攻塔山杏山毀其城八年隨鄭親王濟爾哈朗征明甯遠克前屯衛中後所二城 世祖章皇帝順治元年二月敘功晉世職爲二等輕車都尉五月大兵既定燕京世俊隨都統葉臣招撫山西時流

賊李自成遁陝西其僞伯陳永福猶踞太原世俊同諸將攻克其城山西既定還至中途值鮑家莊土賊肆掠世俊同都統阿賚率兵捕剿之盡殲其眾二年隨英親王阿濟格追剿自成於陝西屢敗賊眾自成走湖廣三年七月隨端重親王博洛征浙西時明閩部朱大典踞金華世俊攻破其城大典自焚死餘黨悉平是年擢都察院左副都御史六年授正紅旗漢軍副都統三遇恩詔晉世職至三等男十月以疾解任十八年六月卒賜祭葬如例子延祚襲爵康熙八年延祚卒子雲龍襲十四年聖祖仁皇帝命貝勒洞鄂征陝西叛鎮王輔臣雲龍隨征將至平涼賊眾逆拒雲龍率本旗兵衝其陣大敗之二十年隨貝子彰泰征逆賊吳世璠

敗賊將線絨於盤江西坡追至砂子哨及腊家坡屢搦賊燾遂進
征雲南距城四十里立營擊敗賊將吳國柄等僞國公馬寶僞將
軍巴養元逃至烏木山盤踞林谷設鹿角扼險以守雲龍隨都統
希福提督桑額往勦擒斬甚眾二十五年敘功晉爵二等男四十
八年十一月卒子璘改襲一等輕車都尉

右 國史館本傳

皇朝通志卷之六十一

--	--	--	--	--	--	--	--	--	--

舒里渾

舒里渾滿洲正黃旗人姓棟鄂氏先世居瓦爾喀祖喀喇當 太祖高皇帝時率族來歸以從征有功授佐領 賜號巴圖魯天命四年與明總兵劉綎戰身被七創後創發卒父扎福尼 太宗文皇帝天聰四年隨大軍征明灤州我兵三人被執扎福尼衝陣力援之出敘功 予騎都尉世職八年十二月隨步軍統領巴奇蘭等征黑龍江有功加一雲騎尉崇德八年卒舒里渾襲舒里渾初任護軍校天聰五年從征大凌河城內蒙古兵出戰舒里渾擊卻之 世祖章皇帝順治二年隨英親王阿濟格征流賊李自成至延安府七戰皆捷自成遁湖廣追躡至安陸府獲賊船十有四三

年蘇尼特部騰機思叛舒里渾隨豫親王多鐸往征斬獲無算並
擊敗喀爾喀土謝圖汗及碩類汗兵師還授佐領六年隨端重親
王博洛征大同叛鎮姜瓖擊敗僞巡撫姜建勳等十一年擢護軍
參領十五年擢正黃旗滿洲副都統隨信郡王多尼征雲南擊敗
僞侯李成蛟於涼水井追至雙河口敗僞晉王李定國兵凱旋晉
三等男十八年八月卒子穆里琿襲爵舒里渾之弟洛多歡天聰
七年隨貝勒岳託征明旅順口克其城崇德六年圍錦州敗明總
督洪承疇兵七年隨貝勒阿巴泰征明攻順德府城先登取之
賜號巴圖魯 子三等輕車都尉世職後遇 恩詔晉至一等輕
車都尉兼一雲騎尉順治十七年卒以扎福尼第四子崆古圖襲

職崆古圖初隨靖南將軍陳泰征福建先登克興化城由護軍校
海擢參領 聖祖仁皇帝康熙十三年隨副都統雅賚阿喀尼等
征逆藩耿精忠由安慶進江西敗賊於小孤山復彭澤宜黃崇仁
樂安等縣十五年移師征逆藩吳三桂擊敗賊將夏國相於萍鄉
進征湖南十八年敗賊將吳國貴於楓木嶺復武岡州尋還京二
十四年卒子多博海襲職舒里渾之孫特爾勒穆里琿之次子也
任佐領康熙二十年隨征南大將軍賚塔征逆孽吳世璠敗賊將
何繼祖等奪石門坎黃草壩乘夜拔嵩明丹城直抵雲南省城復
隨都統希福擊敗賊將馬寶於烏木山又追蹙賊將胡國柱於雲
龍州敘功 子騎都尉世職四十一年卒子素爾禪襲

國史館本傳

右 國史館本傳

一

伊爾德 孫巴理岱

伊爾德滿洲正黃旗人姓舒穆祿氏揚古利族姪也天聰三年
太宗文皇帝命揚古利率師略明錦州甯遠諸邊境伊爾德從軍
有功復從大軍征明北京奮勇攻擊斬殺甚眾又敗山海關援兵
於灤州師還出邊先至木城擒斬明兵之守隘者五年 上帥諸
貝勒大臣攻圍大凌河城中兵突出伊爾德衝鋒入陣殺敵二人
都統和碩圖等合師來擊追奔至壕還又擊明監軍道張春兵遇
敵騎挾弓矢將犯 御營伊爾德馳斬之是秋往略前屯衛率十
五人偵緝明哨卒值我軍將領噶思哈爲敵兵所困伊爾德奮擊
援出之積功授騎都尉世職尋擢護軍統領崇德二年隨貝勒阿

巴泰往築都爾弼城率護軍四百人防護築城工役五年五月大
兵圍錦州敵兵出戰伊爾德領肅追擊至壕敗之七月隨王貝勒
等至錦州松山屯田明人縱牧於野伊爾德設伏於烏欣河驅其
牲畜以歸敵兵襲我後伊爾德率後隊還擊斬獲無算 特晉爵
三等男十一月以擅離營汛私往貝子尼堪家又向王貝勒及護
軍校索馬擅遣其子額爾畢黑隨參領希爾根往錦州部議應降
職明年奉 命往睿親王軍營傳諭通察各旗將領事不卽奏報
部議削爵籍家財之半均得 旨罰贖七年復從圍錦州敗松山
兵之來奪我礮者敘功晉一等男順治元年駐防錦州二年加一
雲騎尉 世祖章皇帝命伊爾德隨豫親王多鐸南征同尙書宗

室漢岱等統蒙古兵由南陽趨歸德招撫甚眾至揚州城北獲戰艦百餘渡江先入旗都統進破南京福王朱由崧遁走蕪湖復同都統阿哈尼堪等追擊之敗明靖南伯黃得功軍三年敘功晉二等子六年與都統譚泰征江西叛鎮金聲桓平之進勦廣東叛鎮李成棟於信豐拔其城成棟夜遁馬蹶溺水死隨分兵定撫州建昌破僞總兵楊奇盛兵二千餘江西悉平師旋復奉命統領將士往勦保定土寇敘功晉一等子八年八月護軍統領鼇拜訐伊爾德罪狀以上幸南苑時伊爾德擅令內直員役更番及私減守門護軍額數又嫉忌鼇拜等爲上效力鞠實論死籍其家上貸之命削世職降一級畱任罰贖十一月擢本旗都統明年三

遇 恩詔晉一等伯兼一雲騎尉隨敬謹親王尼堪征湖南敗績
十一年師旋論罪革職籍沒是時明魯王朱以海爲鄭成功所殺
其餘黨竊據浙江舟山爲寇十二年 上命伊爾德爲甯海大將
軍統兵往剿至則僞總兵王長樹毛光祚沈爾序等糾賊登岸肆
掠大嵐山伊爾德遣副都統碩祿古總兵張承恩引兵趨夏關抵
斗門連擊敗之斬長樹等三人殲賊兵無算而自率師攻甯波乘
舟趨定海分三路進發賊將陳六御阮思等於海島望江口山下
列戰船以待伊爾德揮眾進擊敗之追至衡水洋斬六御等遂取
舟山十四年凱旋 命貝勒杜蘭等郊勞復世爵敘功晉一等侯
兼一雲騎尉十五年隨信郡王多尼征明桂王朱由榔自貴陽至

盤江斬其將領進克雲南省城十八年卒於軍年五十六 子祭
葬如典禮諡襄敏子托和齊早卒孫巴琿岱襲

右 國史館本傳

巴琿岱

巴琿岱滿洲正黃旗人一等侯伊爾德孫父托和齊任三等待衛
早卒順治十八年巴琿岱襲一等侯授散秩大臣康熙十九年擢
正黃旗蒙古都統二十一年調正黃旗滿洲都統二十七年湖廣
裁兵夏逢龍等作亂據武昌攻漢陽 上命巴琿岱爲荊州將軍
與振武將軍瓦岱率師進討師至武昌逢龍棄城遁追至黃州降
僞總兵趙得等擒逢龍於黃岡磔之三十年五月疏請於駐防滿

兵內每旗派百名學習鳥槍得 旨允行十一月復任正黃旗滿洲都統三十五年三月 上親征噶爾丹增設每旗火器營大臣以巴琿岱管領正黃旗授議政大臣尋定中路營制 命隨皇五子允祺率正黃旗兵以行五月 駕至克勒和朝以噶爾丹遁班師 命平北大將軍馬斯喀選輕騎追襲巴琿岱與都統齊世武等參贊軍務會西路撫遠大將軍費揚古已破噶爾丹撤兵還九月扈 蹕巡北塞巴琿岱領右翼兵三十六年正月 命與都統蘇努等偵噶爾丹 諭以整肅戎行勤恤馬力閏三月 遣大臣往擒伊拉古克三呼圖克圖分兩路進兵 命參贊馬斯喀軍務十一月廷議以巴琿岱不急追伊拉古克三呼圖克圖應革議政

大臣及都統仍畱侯爵得 旨從寬畱任四十年擢領侍衛內大臣四十五年 命往扎薩克會盟四十八年正月 上以廷臣舉奏皇八子允禩 召見諸大臣 詔先舉者爲誰其時領侍衛內大臣阿靈阿散秩大臣鄂倫岱侍郎揆敘尙書王鴻緒私議保舉情形廷臣不卽舉出巴琿岱言是日宣 旨後臣等奏立皇太子事關係重大臣等何敢妄舉奉 諭爾等在行間俱能效命今正效命之日不可稍有隱諱於是臣等班坐會議眾議欲舉允禩遂同入奏並無首先發言之人 上曰爾等所舉皆同大可疑矣必有倡首之人著作速詳查舉奏巴琿岱復出奏臣等集坐一處並無倡首之人 上問領侍衛內大臣坡爾益坡爾益奏言臣等內

巴琿岱先發言額駙尙之隆亦奏巴琿岱發言在先是實 上曰朕知之矣此事必佟國維馬齊以當舉允禩示意於眾眾乃依阿立議耳馬齊奏實不知 上復命詳究巴琿岱等奏曰是日奉諭此事著漢大臣盡所欲言臣等見漢大臣舉出允禩遂同舉是實 上復問大學士張玉書玉書奏云會議日大學士馬齊先臣到班臣問所舉爲誰馬齊曾荅云眾議欲舉允禩 上命革馬齊職並詰責佟國維事詳馬齊傳五十一年巴琿岱扈 蹕謁孝陵 賜銀二千兩雍正元年卒 賜祭葬如例諡恪恭以第四子馬哈達降襲二等伯分一雲騎尉與長子巴隆襲

右 國史館本傳

薩弼圖

薩弼圖滿洲正白旗人姓他塔喇氏先世居扎庫穆父沙津當
太祖高皇帝時率眾來歸授佐領薩弼圖其長子也沙津卒代管
佐領 太宗文皇帝天聰八年以克副任使 子騎都尉世職尋
兼任參領崇德四年隨承政薩木什喀索海征瑚爾哈部師至黑
龍江薩弼圖俘獲丁壯百餘進攻鐸陳阿薩津二城敵兵四百逆
戰薩弼圖同佐領卓卜特等率兵九十奮擊斬五十人餘眾潰走
索倫部長博穆博果爾以兵助瑚爾哈部抗拒我師薩弼圖同副
都統伊遜等設伏掩擊斬七十人五年四月凱旋敘功加一雲騎
尉七月隨大軍圍明錦州刈其城西田禾敵由城西北隅出發槍

礮拒戰薩弼圖偕眾衝擊敵卻走逐之抵城壕復移兵設伏松山
要路擊敗敵步兵旋駐守駱駝山城敵兵二百來犯薩弼圖督兵
截擊盡殲之六年率兵薄錦州城駐營跨壕作橋敵出樵採薩弼
圖馳擊斬十人生擒九人復斬其持弓矢者五人翌日城中出兵
投火藥欲焚橋擊之遁既而步騎全集欲奪壕門薩弼圖迎斬二
人敵潰卻時明總督洪承疇據松山以馬兵來劫我紅衣礮薩弼
圖先眾擊卻復偕眾步戰破敵步兵三營敘功晉世職爲三等輕
車都尉旋擢正白旗滿洲副都統七年十月隨貝勒阿巴泰征明
由界嶺口毀邊牆入擊敗明總兵馬科轉戰至山東以雲梯攻克
平度州城 世祖章皇帝順治元年隨睿親王多爾袞入山海關

擊流賊李自成督後隊兵有功既定燕京同都統葉臣巴哈納招撫山西自成僞將陳永福踞太原薩弼圖率兵圍城屢擊敗出拒敵眾山西既平移師征陝西自成兒子錦踞延安以賊眾迎拒薩弼圖七戰皆捷復同前鋒統領錫特庫攻破自成賊寨敘功並三遇恩詔晉爵至二等男尋以年老致仕十八年卒賜祭葬如例子果里襲爵

右 國史館本傳

--	--	--	--	--	--	--	--	--	--

西喇巴雅爾

西喇巴雅爾蒙古鑲黃旗人姓布庫特氏世居扎魯特 太宗文
皇帝崇德三年西喇巴雅爾任佐領隨貝勒岳託證明入牆子嶺
趨山東明太監馮永盛以兵邀戰西喇巴雅爾與都統烏賴合兵
擊敗之明年春出邊遇三屯營步騎三千扼山路拒守我軍與相
持七晝夜西喇巴雅爾乘其懈率眾擊之皆潰遁獲軍械巨礮敘
功 子騎都尉世職 世祖章皇帝順治元年任參領隨睿親王
多爾袞入山海關以步戰擊敗流賊李自成加世職雲騎尉二年
隨饒餘郡王阿巴泰鎮守山東旋與都統準塔副都統譚布等進
征淮安連敗明兵其潰眾竄踞海中雲臺山復窺城邑西喇巴雅

爾率兵勦平之三年隨肅親王豪格征流賊張獻忠至西安聞賊將高汝礪等聚秦州階州開踞山爲寨西喇巴雅爾先眾趨擊屢挫賊鋒大軍繼至圍其山寨汝礪降遂進征四川西喇巴雅爾與都統烏賴兩擊敗獻忠拒戰兵五年還尋擢鑲黃旗蒙古副都統敘功晉三等輕車都尉世職三遇 恩詔洊晉三等子九年 上以吏部援 恩詔加世職過濫 命王大臣甄別降西喇巴雅爾降一等輕車都尉兼一雲騎尉是年八月以老疾致仕十八年卒孫卓特博襲職

右 國史館本傳

劉用楚

劉用楚字三湘湖南常甯人 國初從定南王孔有德權昭平參將事李定國陷廣西有德死之永寶衡相繼失用楚單騎至長沙哭陳於敬謹親王尼堪時都統線國安駐廣東已率師援桂林遣人趣用楚用楚招集舊部率弟用亮子選勝繼進以桂林單弱先入助守敵穴地攻城用楚計破之斬萬餘級分軍戍省會率親兵四百進討擒獲敵將次第歸心修城置戍施粥活饑民百姓安堵授平樂副將升總兵加都督僉事以病乞休經略洪承疇特疏用其子弟

右傳李元度撰

日本書紀卷之六十一

三十一

濟席哈

濟席哈滿洲正黃旗人姓富察氏佐領木科里之次子也初任佐領 太宗文皇帝崇德四年擢授護軍統領五年隨鄭親王濟爾哈朗征明錦州遇松山兵邀戰同參領布丹希爾根囊古等擊卻之尋駐義山衛我兵屯田 上誠諸將勿與敵迎戰惟固守營壘俟敵近乃禦擊會敵猝犯鑲藍旗營濟席哈越鑲紅旗營助戰以擅離汛地論罪籍家財三之一罷護軍統領旋奉 命同副都統席特庫率護軍並外藩蒙古兵征索倫部擒部長博穆博果爾並獲其家屬人眾及馬牛數百六年正月凱旋 遣官迎於北驛館賜宴勞之是年復隨鄭親王圍錦州屢擊敗松山敵兵七年授正

紅旗蒙古副都統八年兼任戶部參政 世祖章皇帝順治元年
大兵入山海關濟席哈同都統恩格圖擊敗流賊李自成追至望
都敘功授騎都尉世職二年隨端重親王博洛征浙江既下杭州
以副都統駐守時明福王朱由崧已滅其大學士馬士英總兵方
國安踞嚴州糾眾二萬餘屢犯杭州濟席哈督兵禦擊五戰皆捷
尋還京仍任工部侍郎四年考滿加一雲騎尉五年三月 命率
兵駐防東昌府尋以海賊鄭彩等寇掠福建移兵隨靖南將軍陳
泰征勦賊踞長樂連江同安平和等縣並合兵攻復之敘功晉二
等輕車都尉七年四月調刑部侍郎十二月遷本部尙書兩遇
恩詔晉爵三等男九年授正紅旗蒙古都統仍兼刑部尙書列議

政大臣十年三月解尙書任九月膠州總兵海時行叛濟席哈奉命與副都統瑚沙率兵往剿師未至時行奔宿州漕運總督沈文奎與山東總督馬光輝合兵剿擊時行窮蹙降伏誅 詔濟席哈移兵鎮守湖南十一年 召還復署刑部尙書尋仍 命專管都統事十四年四月調滿洲都統十二月 命率副都統四員護軍參領八員赴甯南大將軍宗室羅託軍前征明桂王朱由榔十五年大兵三路並進 上以征南將軍卓布泰自廣西進征貴州所部兵漸少 命濟席哈率將士助之遂進次都勻連敗僞晉王李定國等拒戰賊眾合湖南四川兩路師攻克雲南城遂由榔入緬甸十六年 頒賚有功諸將濟席哈等 賜蟒服鞍馬十七年以

勘鞫隨征將士功罪不實降世職爲一等輕車都尉停其敘功十八年山東土賊于七糾黨踞棲霞縣之距嶠山出掠郡邑 聖祖仁皇帝命濟席哈爲靖東將軍率兵圍其山寨斬賊無算于七竄入海賊平康熙元年五月班師八月卒 賜祭葬如例子阿祿襲職六十年阿祿任西安副都統上疏爲濟席哈請諡 允之追諡勇壯

右 國史館本傳

蘇魯邁 子鄂洛順

蘇魯邁滿洲正藍旗人姓嵩佳氏世居棟鄂部父遜扎哩 太祖
高皇帝時來歸授其長子蘇巴海爲佐領蘇魯邁其次子也天命
三年蘇魯邁從 上征明撫順樹雲梯攻城蘇魯邁先登克之六
年授佐領 上統大軍取瀋陽遼陽蘇魯邁並從征有功 太宗
文皇帝天聰元年隨大貝勒阿敏征朝鮮薄義州城蘇魯邁率二
十人先登諸軍繼之遂取義州俘獲無算三年從 上征明攻克
洪山口城 予騎都尉世職四年春 上統師圍永平 命副都
統阿山葉臣等率勇敢士二十四人乘夜攻城蘇魯邁與焉城上
槍礮交發蘇魯邁面中創不退乘敵礮裂自焚遂冒火樹雲梯登

城大軍繼進取永平 上遣醫診視槍傷 賜號巴圖魯 賚牲
畜布帛晉世職爲三等輕車都尉尋征明旅順口及甯遠被重傷
得 優賚崇德元年隨武英郡王阿濟格征明北京入邊時攻雕
鶚城中礮傷口因以殘疾家居順治七年九月三遇 恩詔晉爵
三等男康熙元年十一月卒 賜祭葬如典禮諡勤勇次子遜哈
襲爵仕至副都統長子蘇爾濟初任前鋒侍衛順治元年隨睿親
王多爾袞討流賊李自成同前鋒統領錫特庫擊敗賊將唐通於
一片石三年隨端重親王博洛征福建敗明總兵姜正希於汀州
敘功 予雲騎尉世職遇 恩詔晉騎都尉七年卒無子以蘇魯
邁之第三子三塔哈襲第四子鄂洛順初任二等護衛康熙十四

年隨建威將軍佛尼埒討逆藩吳三桂由陝西進四川擊敗僞總兵高定尋授護軍參領二十九年調前鋒參領隨裕親王福全征噶爾丹有功三十年任江甯副都統三十四年擢江甯將軍四十四年七月卒 子祭葬如例第五子翁鄂洛初襲兄三塔哈騎都尉世職康熙二十年隨征南大將軍賚塔討逆孽吳世璠由廣西進師僞將軍何繼祖擁眾據石門坎翁鄂洛與都統希福等擊敗之繼祖遁據黃草壩與賊將詹養王有功等合兵拒戰翁鄂洛復大敗賊眾奪其營詹養王有功俱就擒師至雲南殲賊黨胡國柄復追剿賊將馬寶巴養元等凱旋敘功晉三等輕車都尉世職尋卒以其子鄂奇襲騎都尉兼一雲騎尉世職

國史館本傳

右 國史館本傳

三

索渾

索渾滿洲鑲白旗人姓瓜爾佳氏初事太宗文皇帝以佐領兼前鋒參領崇德三年同參領沙爾虎達等率兵五十人往偵明義州擒八人歸四年上親征明錦州命索渾分兵略杏山獲牲畜無算尋以所部兵在松山遇敵退縮被奪弓矢橐鞬索渾坐約束不嚴命逮繫尋釋之五年隨睿親王多爾袞圍錦州遇敵兵於松山奮力迎戰多斬獲六年復從上親征錦州敗明馬步軍於松山斬二十九人明兵自松山宵遁追至海岸俘斬甚眾旋遇明杏山騎兵復同參領席特庫等擊敗之追斬百餘人時蒙古兵有降明者立寨山巔索渾同參領瑚里布進攻盡殲其眾七年隨

貝勒阿巴泰征明薊州敗明總督范志完兵復與都統武賴敗敵於三河敵援兵踵至索渾同都統巴哈納奮力擊敵遂潰走八年隨鄭親王濟爾哈朗征甯遠有騎兵千餘迎拒索渾率前鋒力戰卻敵既而敵軍擾我牧羣復擊卻之擒二人敘功授雲騎尉世職世祖章皇帝順治元年大兵入山海關討流賊李自成索渾擊敗僞總兵唐通於一片石復隨豫親王多鐸追勦自成師至陝州分兵先驅僞將軍張有曾糾賊騎二百餘屯踞靈寶城外索渾率二十人乘夜襲擊獲馬四十匹二年敘入關功晉世職爲騎都尉兼一雲騎尉嗣遇 恩詔晉一等輕車都尉六年七月擢護軍統領十月隨征西大將軍巽親王滿達海征叛鎮姜瓖餘黨索渾率兵

往圍平遙僞知縣已先率兵民遁走復糾賊五百人回取儲糧我軍奪門入盡殲之七年任吏部侍郎八年改授鑲白旗副都統十五年擢本旗都統十六年同內大臣達素征海賊鄭成功於福建明年勦賊廈門官軍不習水戰失利康熙元年論罷任削世職尋卒

右 國史館本傳

國朝三才圖會卷之八

三

珠瑪喇

珠瑪喇姓碧魯氏世居葉赫 太祖高皇帝時率所部虎爾哈人來歸隸滿洲鑲白旗任佐領天聰三年隨大兵入明邊至遵化擊敗敵兵閱三日 太宗文皇帝親臨遵化城明山海關兵赴援將入城珠瑪喇率哨卒十人至擊斬甚眾至燕京遇明總兵滿桂黑雲龍麻登雲孫祖壽等軍入大紅門同參領音達戶齊額駙揚古利擊卻之旋克永平復攻昌黎奮勇先登身被六創敘功授騎都尉世職尋緣事削去五年圍大凌河城明監軍道張春赴援珠瑪喇同參領鄂諾連戰破其前後隊六年從征察哈爾獲布延圖台吉於穆魯哈岱殲其從者百餘人俘其妻子以歸七年隨貝勒德

格類岳託攻旅順口率護軍十人乘船登岸擊甕城步軍統領巴奇蘭曰誰能用命先登者珠瑪喇與佐領雍舜超躍而上向敵大呼曰我珠瑪喇登城矣連被三創不少卻卒拔其城上爲嘉歎親酌金卮以賜復授騎都尉世職九年隨貝勒多鐸征明夜設雲梯攻錦州被創甚劇崇德元年征朝鮮自山巔力攻奪其寨門大兵繼之不戰而入遂取一寨又率兵征明敗其總兵海某軍取四縣師還擊敗開平兩營兵三年七月授兵部理事官十月從圍錦州率甲士四十人襲攻廣甯北峇峙山山寨收降駱駝山兵眾又與都統石廷柱招降大凌河北山四寨六年同參領禧福奉命往張家口董理互市事及還法司劾其以私財市貨物向藩部人

素馬諸罪狀論死籍沒得 旨寬宥革世職輸所市貨物入官尋
隨鄭親王濟爾哈朗圍錦州敗敵騎之來奪我紅衣礮者敵騎復
犯我軍珠瑪喇注矢射之應弦而仆敵眾退走七年與前鋒統領
沙爾虎達征松阿里江虎爾哈部落招降喀爾喀木等十屯俘丁
壯千餘及牲畜輜重以歸 命禮部官迎勞宴賚之 世祖章皇帝
順治元年珠瑪喇任參領率兵從睿親王多爾袞入山海關擊
敗流賊李自成七月授正藍旗滿洲副都統尋擢兵部侍郎明年
正月敘克明燕京破流賊及克錦州松山功復授騎都尉世職十
一月與副都統和托等駐防蘇州任右翼副都統時明福王朱由
崧之大學士馬士英竄嚴州與其總兵方國安糾眾犯餘杭珠瑪

喇率兵擊走之還距杭城三十里突遇土賊復大破其眾國安等仍聚眾數萬於江東諸山及杭州之朱橋范村所在肆掠珠瑪喇同總兵田雄副將張杰等分兵進剿賊悉平三年從征福建與護軍統領啟拜擊敗僞總兵黃某等軍四年考滿加一雲騎尉五年隨征南大將軍譚泰剿江西叛鎮金聲桓敗賊兵七萬又與都統和洛輝及沙爾虎達連敗賊兵焚其戰艦千三百餘招撫九江一府五縣七年三月遇恩詔賜敕授三等輕車都尉世襲罔替又以平江西功晉世職爲二等八年擢正白旗蒙古都統遷吏部尚書兩遇恩詔晉三等男十年冬吏部擬銓廢員房之麒爲山東驛道之麒嘗任山東按察使罷職占籍青州爲山東巡撫馮右京

列薦起用至是改歸直隸東明籍有 旨詰問吏部以直隸搢紳保結可憑覆奏會給事中許作梅劾之麒於青州置田宅朦朧就銓復奉 旨嚴飭察覈乃議之麒應革職 上以部臣於銓授時不行詳勘及詰問仍支飾 命王大臣察奏珠瑪喇坐罰鍰罷尙書任專管都統事十一年流賊張獻忠餘黨孫可望李定國自雲貴寇廣西分兵犯廣東連陷郡邑珠瑪喇奉 命爲靖南將軍同敦拜往征之 賜敕諭曰賊犯廣東故特遣爾等爾等至惟以安民爲首務嚴飭兵將恪遵紀律賊若竄入廣西可與平南靖南兩王及總督李率泰相機酌議勦撫若入雲貴則擇善地休兵奏聞候旨至遇賊對壘時爾二人居中調度毋以輕謀致敗用全我師

是時定國寇新會平南王尚可喜靖南王耿繼茂等先率兵往援至三水縣分布沿江隘口以待大軍比珠瑪喇至遂合兵進勦敗賊於珊洲斬其副將一擒賊將十餘人獲首級百五十餘既抵新會定國糾步騎四萬分據山峪列礮象拒戰珠瑪喇遵上方略指揮將士奮勇衝擊賊兵潰奔定國復出兵四千自山巔馳下迎截我師又擊敗之奪其山定國遁走十二年正月奏捷得旨嘉獎二月定國竄高州珠瑪喇與敦拜授策副都統畢力克圖鄂拜等分兵追躡敗定國於興業再敗之於橫州定國渡江焚橋驚走我師躡之三戰皆捷定國率殘兵走賓州入南甯竄安隆珠瑪喇與尚可喜等遂復高雷廉三府三州八縣及粵西二州四縣獲象

十六及馬二百餘器械無算下部議敘復 賜敕諭曰頃者逆賊李定國棲據南方頻侵兩粵二王及諸臣宣厥忠勇謀操必勝於新會等處殺賊既多復追至橫州江岸降其軍將獲其器械克定高雷廉等府州縣先後屢捷功績懋著朕甚嘉之特賜敕諭以示獎勵爾等其益勵忠勤垂名永久九月班師 上召見於南苑諭大學士馮銓等曰珠瑪喇以元戎統領大兵出征廣東捷歸今五旬矣如此年齒建立大功殆福人也 賜茶獎勞明年部臣敘功擬晉世職一等男兼一雲騎尉 上以珠瑪喇功多不應循常格議敘 特諭吏兵二部曰都統珠瑪喇等率兵擊賊李定國雪衡州桂林之忿快慰眾心朕甚嘉悅其軍功再加議敘尋議晉爵

三等子十五年十一月以年老致仕康熙元年卒年五十有八
賜祭葬諡敏次子博通鄂襲爵

右 國史館本傳

都爾瑪

都爾瑪姓西納明安氏先世居落喇沁地 太祖高皇帝時來歸
隸蒙古鑲黃旗 太宗文皇帝天聰二年五月隨貝勒岳託征明
錦州有俘獲五年八月大軍圍大凌河城城內敵兵突出都爾瑪
隨本旗都統圖爾格奮勇迎擊敗之八年八月隨內大臣額駙多
爾濟等征明大同擊敗明總兵曹文詔追至城下俘獲甚眾 賜
號巴圖魯尋授佐領崇德六年大兵圍錦州明總督洪承疇率眾
赴援列營松山我師分左右翼截擊都爾瑪先眾破敵營屢追擊
其潰眾於杏山塔山間斬級數十復隨內大臣錫翰設伏高橋襲
擊明總兵吳三桂王樸等斬獲無算遂圍松山城城中兵有潰圍

出者突入我營都爾瑪同錫翰於壕邊力戰敗之敘功 予三等
輕車都尉世職順治二年二月 世祖章皇帝以都爾瑪素荷
太宗眷顧晉爵三等男七年九月疊遇 恩詔晉爵至二等子尋
授內大臣康熙三年三月卒 賜祭葬如典禮諡忠直子沙濟仕
至內大臣孫齊什襲爵

右 國史館本傳

國朝耆獻類徵初編卷二百六十八目錄

將帥八

奇塔特徹爾貝

子鄂諾勒

覺善

子吉勒塔布

法譚

趙得勝

烏庫理

藍拜

席特庫

都敏

白爾赫圖

喀喀木

卓羅

富喀禪

子穆成額

胡有陞

國朝文獻通考卷一百一十五

一

國朝耆獻類徵初編卷二百六十八

通奉大夫前署江西巡撫江西布政使司布政使湘陰李桓輯

將帥八

奇塔特徹爾貝 子鄂諾勒

奇塔特徹爾貝姓哈爾圖特氏初爲察哈爾部宰桑天聰六年

太宗文皇帝親征察哈爾其部長林丹汗聞大兵至驚遁所部皆

潰散奇塔特徹爾貝別率四百戶駐哈瓦河 上遣使招之卽渡

河來歸 賜賚優厚隸正藍旗蒙古崇德元年 子三等子爵三

年九月隨大軍證明由青山口入邊越燕京略山東四年三月凱

旋以部下佐領額珠文等過三屯營時取敵糧爲敵所困額珠文

及甲士一人所從役一人並遇害奇塔特徹爾貝未及援罰馬如
例九月隨大軍征明甯遠以火攻其城敵出城禦戰奇塔特徹爾
貝率所部擊卻之六年大軍圍錦州明總督洪承疇集兵赴援營
於松山西北我左翼三旗會擊奇塔特徹爾貝率眾奮戰大捷既
而敵以騎兵劫我紅衣礮奇塔特徹爾貝移兵擊之潰旋復偕眾
破敵三營步兵七年敘功晉二等子 世祖章皇帝順治元年隨
睿親王多爾袞入山海關擊敗流賊李自成追至望都三年蘇尼
特部騰機思等叛奔喀爾喀奇塔特徹爾貝隨豫親王多鐸往征
之行次英噶爾察克山聞騰機思在袞噶魯台星夜疾追獲其孥
於鄂特克山時喀爾喀部土謝圖汗以眾二萬拒大軍於扎濟布

拉克奇塔特徹爾貝率所部邀擊追北三十餘里詰旦碩類汗亦以二萬眾至奇塔特徹爾貝復率兵擊之皆潰遁四年敘功晉一等子九年遇 恩詔予世襲罔替十二年奉 敕往喀爾喀部宣諭土謝圖汗車臣汗等以其遵 諭弗違誓辭還奏康熙三年四月卒 賜祭葬如例子鄂諾勒襲爵兼任佐領十八年以參領隨護軍統領莽吉圖征海賊鄭錦卒於軍 恩卹如例子索諾木襲爵

右 國史館本傳

圖書集成醫部全錄卷之八

二

覺善 子吉勒塔布

覺善姓李佳氏世居薩爾滸城父通果事 太祖高皇帝任佐領
隸滿洲正紅旗覺善襲管佐領事 太祖滅葉赫取明瀋陽遼陽
以功授騎都尉世職任參領天聰三年從 太宗文皇帝征明下
遵化昌黎灤州永平諸城既班師貝勒阿敏守永平覺善佐都統
納穆泰等守灤州未幾明兵圍灤州覺善勒眾出奮稍踰塹與參
領阿爾津佐領庫爾禪直趨敵師敵潰奔旋集眾薄城下覺善擊
卻之敵復發礮攻城壞堞堞覺善移兵禦守敵不能登凡五敗敵
眾會阿敏棄永平出關灤州乏援諸將亦突圍走覺善亦擊敗敵
兵之阻截我眾者與諸將偕還待罪 上以覺善守城力戰既出

猶能殺敵釋其縛尋晉職三等輕車都尉五年 上親統師圍大
凌河城明兵自錦州猝至小凌河岸 上遣偏師渡河迎擊軍士
不滿二百覺善入敵陣陷重圍奮戰得出時我兵別與敵遇有軍
校爲敵所獲援之歸明監軍道張春總兵吳襄率步騎四萬距大
凌河十五里駐軍覺善隨貝勒碩託以右翼兵突入張春營敵挫
衄敘功晉二等輕車都尉崇德五年授正紅旗副都統率兵駐防
義州尋隨大軍更番圍明錦州明年春以攻圍不力論統師王貝
勒及諸將罪覺善當削職籍家產半 命從寬罰鍰秋 上親征
駐軍松山杏山閒明兵謀奪我礮猝薄營覺善率所部禦擊敵敗
遁我軍圍松山掘壕立營敵乘夜來犯復戰卻之八年正月與副

都統譚布等率兵駐守錦州九月隨鄭親王濟爾哈朗征甯遠敗
明總兵吳三桂邀戰步騎進至前屯衛敵悉眾出拒我巴林喀喇
沁蒙古兵失利覺善率右翼諸佐領下兵各二突前奮擊大敗敵
兵城遂下 世祖章皇帝順治元年大軍入山海關擊流賊李自
成賊以礮來犯覺善被傷仍奮戰敗賊二年敘前戰功晉一等輕
車都尉又一雲騎尉尋隨順承郡王勒克德渾至江甯會自成餘
黨一隻虎等寇擾武昌襄陽荊州諸郡 詔移師征之三年二月
師至石首聞賊在荊州順承郡王令覺善與都統葉臣等率精銳
馳壓賊營賊方攻城悉驚潰我兵截擊俘斬略盡復分勦遠安南
漳宜昌賊眾次第就平十月凱旋 賜黃金十兩白金三百兩時

山東土賊作亂侵擾恩縣齊河平陰等邑覺善受 詔率兵赴剿
斬賊首埽地王及其黨萬餘下所司紀功五年正月江西總兵金
聲桓據南昌叛覺善隨征南大將軍譚泰都統何洛會等往討七
月師至南昌賊悉步騎七萬拒戰覺善率精銳擊卻之六年正月
大軍破南昌城聲桓中二矢投水死移師攻叛鎮李成棟於信豐
覺善督所部樹雲梯先登拔其城成棟亦溺水死師還贛州復分
兵剿滅新喻安福諸賊黨先是遇 恩詔晉三等男爵至是敘湖
廣山東江西戰功晉二等男 賜號巴圖魯七年隨睿親王多爾
袞畋於中後所坐私行射獵降一等輕車都尉兼一雲騎尉明年
上親政覺善訟鐫秩寃 恩予復爵如故擢都察院左都御史

尋解任仍專管都統事兩週 恩詔晉三等子十五年以老病乞
休許之康熙三年卒年六十有六 賜祭葬諡敏勇勒碑墓道子
六人次子噶爾圖長子薩爾圖先後襲爵三子吉勒塔布別有傳

右 國史館本傳

吉勒塔布

吉勒塔布滿洲正紅旗人姓李佳氏都統覺善第三子也初任侍
衛兼前鋒參領 聖祖仁皇帝康熙十一年擢正紅旗蒙古副都
統十三年逆藩耿精忠叛奉 命同副都統拉哈駐守江甯尋
命率師赴援浙江聽將軍拉哈達調遣及大將軍康親王傑書統
兵駐金華吉勒塔布隨甯海將軍貝子傅喇塔進師台州至嵎縣

偽都督曾養性偽總兵陳理等屯眾於黃瑞山將犯天台以斷我糧道吉勒塔布遂乘夜馳援分兩翼衝擊又遣兵循山麓疾上以烏槍旁擊之賊大潰斬偽副將陳鵬偽參將徐可先周標等進克仙居縣十四年曾養性與叛鎮祖宏勳犯台州依山結寨吉勒塔布同副都統沃申赴仙居襲賊後疾馳至半山嶺偽都督劉邦仁擁眾萬餘拒戰我兵嚴隊以進賊堅持弗退吉勒塔布率步兵奮擊賊大敗斬偽副將王仲祿參將趙明殪賊四千餘進師梁蓬隘口賊眾掘壕塹以守我兵突進攻之奪其隘馳追道遇賊伏盡殲之直趨黃巖副都統穆赫林復自前路夾攻曾養性乘夜突圍遁溫州大軍遂定黃巖吉勒塔布率兵敗賊於上塘嶺進攻溫州賊

踞險死守我軍攻之弗下十五年三月曾養性糾合平陽瑞安賊眾并福建來援之賊四萬餘水陸來犯吉勒塔布分路進擊賊以藥箭火礮焚我漢軍營又蟻聚山嶺奪我紅衣礮吉勒塔布勦處州諸賊以入閩六月過三角嶺循江岸進兵曾養性等聯百餘艘於江屯賊眾於得勝山下之古溪據險以扼我師吉勒塔布同總兵陳世凱分兩路斫賊營拔之又以礮擊賊艘沈江中賊潰走遁乃通進師溫溪渡口偽都督馬成龍等率賊眾拒戰復督兵奮擊斬千餘級降賊將馬國維鄭雄等遂會康親王軍於衢州八月同都統賚塔等勦偽都督馬九玉攻賊大溪灘營偽總兵林福拒戰吉勒塔布擊敗之踰三壕進焚木城擒偽總兵副將等十二克江

山縣馬九玉敗遁旋自江山進兵峽口擊敗僞兵部閔可孝等降
僞副將牟年義遂過仙霞嶺整師將攻關僞副將王明庫等降聞
馬九玉已遁浦城又率兵馳追殲賊甚眾抵浦城擊賊大敗奪門
入遂復其城九月同前鋒統領希福等攻建陽縣賊墮水死者無
算奪橋克城追賊至建甯府賊走延平十月隨康親王招撫延平
進抵福州耿精忠降賊黨悉解散十六年六月擊海賊鄭錦於同
安縣敗賊黨朱寅於三保谿降僞副將黃那漢十八年鄭錦僞總
統劉國軒等由峪州太平寨來犯將斷江東橋以御長泰吉勒塔
布擊賊於下坑歐溪頭追至郭坑三戰皆捷斬首二千餘級是年
調滿洲正紅旗副都統十九年二月隨都統賚塔征海澄率陸路

師先眾進勦屢敗賊眾遂抵海澄僞總兵蘇堪等降八月 詔撤
福建兵以吉勒塔布同副都統沃申駐守漳州二十一年隨拉哈
達率師旋京二十二年授護軍統領尋擢正紅旗蒙古都統二十
七年授兵部尚書列議政大臣時喀爾喀爲噶爾丹侵擾以賊偪
呼倫貝爾汎界來告 上命吉勒塔布同都統巴海等徵兵科爾
沁防禦噶爾丹尋奉 遣往蘇尼特度水草佳處爲喀爾喀遊牧
地二十九年四月同尚書阿喇尼往歸化城北及圖拉等處安設
臺站復與阿喇尼領兵會喀爾喀諸扎薩克兵由洮瀨河進勦六
月偵知噶爾丹劫掠烏珠穆沁至烏勒輝河遂分兵二隊乘夜挑
戰因喀爾喀兵違令亂陣不勝而退部議吉勒塔布輕進失利應

革職得 旨降四級調用革議政畱任佐領七月率兵駐呼魯固爾河 命與內大臣阿密達會兵偕至克勒侯裕親王福全至分軍三隊進剿吉勒塔布領首隊大敗噶爾丹於烏蘭布通三十年三月 詔移喀爾喀土謝圖汗車臣汗歸附人眾於近邊先期遣吉勒塔布同尙書馬齊班第等調至上都河額爾屯河地候 上駕親臨撫綏七月 上慮巴圖爾額爾克濟農侵掠喀爾喀 諭派鄂爾多斯烏喇特喀爾喀兵於其地備禦 遣吉勒塔布統率之偵探聲息便宜行事復授正紅旗滿洲副都統三十一年巴圖爾額爾克濟農降罷兵歸三十五年擢正紅旗滿洲都統明年正月卒 賜祭葬如例

右 國史館本傳

國史館本傳

國事書局叢刊後系刊

卷二百一十二

八

法譚

法譚滿洲正紅旗人姓他塔喇氏初以護軍校從太祖高皇帝滅葉赫取明遼陽擢任佐領天聰元年從太宗文皇帝征明甯遠敗明兵於城北山岡七年以克副任使予騎都尉世職崇德三年隨貝勒岳託征明自牆子嶺入敗密雲步兵趨山東攻克鄒城縣四年冬隨承政薩木石哈索海等征瑚爾哈部攻克雅克薩城五年春先還奏捷六年大兵圍錦州明總督洪承疇據松山以兵犯我右翼法譚隨肅親王豪格率兵擊卻之既而大兵圍松山敵復犯我前鋒汛地爲我軍所敗將奔塔山法譚復偕眾追擊明兵赴海死者無算八年隨鄭親王濟爾哈朗征甯遠攻克前屯衛

中後所二城 世祖章皇帝順治元年任參領隨睿親王多爾袞入山海關以步兵擊敗流賊李自成敘功加一雲騎尉尋兼任工部理事官二年冬隨順承郡王勒克德渾征湖廣明年李自成遣其黨一隻虎犯荊州法譚直入賊營多斬獲追擊之至宜昌自成弟李孜及偽滋侯田見秀偽義侯張耐等俱率眾降四年考滿晉三等輕車都尉五年擢右翼步軍統領三遇 恩詔晉世職至一等輕車都尉兼一雲騎尉康熙元年以病致仕三年卒 賜祭葬如典禮分世職爲二以其子鄂德襲三等輕車都尉色勒璧襲騎都尉又一雲騎尉

右 國史館本傳

趙得勝

順治十六年大師平定雲南隨地設鎮援勦總兵趙得勝劉備最
驍勇知名康熙三年貴州土酋安坤反 上命吳三桂討之諸帥
皆從時滇鎮空虛各土司潛通煽亂比聞坤負固未能猝拔備且
敗沒於是各酋猖獗李日芳叛蒙自祿昌祚叛甯州王克猷叛新
興王朔叛開化新平曾我所在騷然臨鎮總兵閆興邦與日芳戰
敗雞街僅以身免龍韜者屏酋也欲取屏城爲巢穴使其黨龍飛
揚扼海東以絕聲援三月十六日率眾來攻呼譟動地礮聲日夜
不絕紳士孫光祚謝君符倡率居民悉力拒守從城上飛矢石傷
賊甚眾賊益憤日治攻具必得城而甘心焉警至水西三桂趨得

勝赴援迺簡壯士五百人偕其將平雲艾介馬疾馳凡十日抵通
海龍韜聞救至遣趙有才伏山谷擊之以軍旅嚴整不敢近遂先
馳還報韜攻益急於四月八日試呂公車高與城平往來如飛蒙
以革矢石不能入守城者皆失色先得勝恐城陷晝夜兼行將抵
屏城尙無一知者是夜二鼓兩騎貫賊營趨城下大呼趙總兵救
至城中聞之大喜亟縋上具食食頃果見石頰坡旌旗隱隱蔽山
而下須臾得勝腰刀弁胄跨馬疾呼知賊在準提閣趨圍之我軍
置燄於垣賊從垣上抵禦得勝拔刀叱其眾踰垣而入爭相斫殺
賊大潰城中亦開門鼓譟奪馬牛器械無算韜遁走追及阿泥山
斬之俘龍袞龍圖以獻於是父老爭拜馬前曰趙公活我遂爲立

石東門外當賊酋之羣起也郡邑爲墟水西之師不能遽返臨鎮
卽已敗衄獨屏城困守彌月援無蟻子賊日滋蔓危在呼吸而提
兵三千里外旬日馳赴以五百勞勩之卒當蜂聚方張之寇出其
不意夜半驀然而至黎明遂以破賊解重圍而救急難使屏人安
全保聚以有今日者伊誰之力哉按祭法以勞定國則祀之如趙
平二公雖千秋血食我屏可矣乃河山帶礪不以銘勳而平蠻片
石又爲利數弓地者竊去志乘紀事亦不詳其姓名可傷也余爲
詢諸父老目見其事者遂追書之

右紀功碑何其偉撰

烏庫理

烏庫理姓扎庫塔氏先世居和克通吉父瑪爾圖當 太祖高皇帝
勅業時率百餘人來歸隸滿洲鑲白旗授騎都尉世職從大兵
征明圍錦州歿於陣烏庫理襲父職年十六卽效力戎行 太宗
文皇帝命管參領事崇德三年隨貝勒岳託征明至山東明太監
馮永盛率兵迎戰擊敗之大軍攻濟陽縣雲梯兵未至攀堞堞先
登揮所部兵克其城師還將出邊同步軍統領薩穆什喀殿後敵
不敢偪道經太平寨復步戰敗敵七年隨征明錦州戰於松山敵
遁走旋合潰兵據北山立營壁壘甚固烏庫理直前奮擊三戰皆
捷 世祖章皇帝順治元年四月烏庫理隨睿親王多爾袞入山

海關擊流賊李自成敗之追躡至望都九月隨都統葉臣攻太原
府率兵十騎繞城偵視城中兵突出搏戰烏庫理同參領薩璧圖
杭愛往來衝擊斬獲甚眾尋隨英親王阿濟格征陝西湖廣江西
班師至池州府偵賊黃某兵擊之獲賊船十二還京任兵部理事
官敘功加一雲騎尉三年隨肅親王豪格征流賊張獻忠於四川
擊敗賊將高汝礪驍兵獻忠收潰眾遁烏庫理追之多斬獲旋軍
賊躡我後還擊卻之五年從征大同叛鎮姜瓖圍甯武關僞巡撫
姜輝僞總兵劉惟思合兵三千赴援屢犯我營關內賊眾亦乘隙
出拒烏庫理率三旗護軍往來協擊轉戰關下及偏關西河營等
地凡七戰七勝進趨左衛賊兵萬餘列陣以待烏庫理衝擊破之

復用紅衣礮攻克其城連敗賊兵多斬殪八年二月調工部理事
官十年仍調兵部三遇 恩詔晉世職至一等輕車都尉十年同
理事官額赫理率禁旅並調江甯杭州駐防兵赴福建會勦海賊
鄭成功時海澄縣爲賊所踞大軍進征賊扼要隘列火器拒戰烏
庫理連破其營賊乃毀橋斷路烏庫理躍馬涉河賊眾驚潰大軍
畢渡賊又於海岸屯兵三千餘烏庫理步戰敗之先後與都統金
彌及額赫理等招降賊兵數千平賊寨數十敘功加一雲騎尉十
二年擢大理寺卿疏陳五事一言 國家定鼎以來滿洲士卒歲
從征討所領月餉例有定額而買馬置械一切軍裝皆所自備畱
京家口衣食維艱請 恩加賞賚一言兵荒所在民多流離目前

雖已奉 旨賑貸將來作何安輯俾自爲生計乞 敕部速議便
宜一言綠旗死事弁兵蒙 恩咸予贈卹更請推廣 皇仁飭所
司撫慰其妻孥量爲贍給一言江廣閩浙沿江濱海盜賊出沒不
常其邊口要區請 敕各督撫詳察機宜增設重兵以資防勦一
言我 朝中外一家邊遠番夷職貢之外仍通貿易而西北蒙古
若厄魯特鄂羅斯諸部尙阻聲教請 敕理藩院大臣酌議互市
條例以昭畫一疏上俱下部議行尋奉 命往視黃河決口十三
年擢漕運總督越三年考滿還京 賜鞍馬授盛京總管 聖祖
仁皇帝康熙元年改總管爲將軍仍以烏庫理任之是年疏陳所
屬兵丁宜定更番直役之例以均勞逸 詔如所請先是盛京設

戶部禮部工部侍郎等官而兵民獄訟悉隸其事於總管未設刑部至是烏庫理請增設疏下廷議始設刑部侍郎一郎中二員外郎六主事三四年四月以病卒於任 賜祭葬如例以其世職令二子分襲長子俄謨克圖襲三等輕車都尉次子佛保襲騎都尉兼雲騎尉

右 國史館本傳

臣等謹將所奏各款開列於左

一

藍拜

藍拜世居佟佳以地爲氏父噶哈 太祖高皇帝時來歸任佐領
隸滿洲鑲藍旗 太宗文皇帝天聰八年藍拜任護軍參領奉
命隨都統阿山略明錦州獲牲畜復隨前鋒統領勞薩率兵迎察
哈爾部眾之來歸者尋擢副都統崇德四年五月以不稱職解任
十一月 命承政薩穆什喀索海分統左右翼征索倫部仍以藍
拜管副都統事取道虎爾哈部攻克雅克薩城獲丁壯甚多索倫
部長博穆博果爾迎戰藍拜同索海設伏擊敗其眾敘功授騎都
尉世職分 賜貂皮及所獲人戶六年三月以隨睿親王多爾袞
圍明錦州離城遠駐議革世職籍家財半 命從寬罰鍰仍隨鄭

親王濟爾哈朗圍錦州城明兵自松山來奪我紅衣礮藍拜率兵擊卻之五月擢兵部參政八月明總督洪承疇集眾援錦州據松山列營藍拜同諸將進擊破其三營尋敵騎乘陰雨來侵我右翼營藍拜同參領遜塔等拒戰大捷十一月調禮部參政明年七月部議圍錦州時徇隱軍士失律諸將罪藍拜應罰鍰得旨寬免

世祖章皇帝順治元年隨大軍入山海關擊敗流賊李自成敘功晉世職三等輕車都尉三年上遣恭順王孔有德統師征湖南授藍拜爲鑲藍旗滿洲副都統率兵偕征是時明桂王朱由榔據武岡自成餘黨郝搖旗王進才等降附之與明巡撫何騰蛟總兵黃朝宣張先璧等抗拒我師有德至長沙擊走王進才藍拜同

副都統卓羅追擊其眾千餘殲殪過半下湘潭黃朝宣擁眾屯燕子窩藍拜同副都統佟岱乘艦至淶口督兵破其營尋隨智順王尙可喜援桂陽賊聞風竄遁遂移師征道州擊走郝搖旗旋會有德軍征沅州張先璧遣其眾自黔陽出扼要隘列五營有德令分兵擊之藍拜率先攻賊斬級七千餘遂合兵薄沅州張先璧集眾三萬拒戰悉敗潰取其城捷 聞 賜白金擢本旗都統五年九月還仍任副都統敘功 賜黃金白金晉二等輕車都尉六年九月兼任禮部侍郎八年擢都統兼工部尙書九年四月調刑部十月解尙書任專管都統事十一月奉 命同靖南將軍卓羅征廣東未定州縣尋以廣東漸定撤還屢遇 恩詔晉爵至二等男十

年十二月 命率兵鎮守湖南時流賊張獻忠餘黨孫可望劉文秀馮雙禮等亦降附朱由榔由蜀江窺武昌岳州常德諸郡藍拜督兵防禦賊不能犯十三年正月偕護軍統領蘇克薩哈等還京召見 上親勞以卮酒 諭曰爾等爲朕宣力年久矣今見爾等形貌癯瘠朕心惻然藍拜奏曰宣力效勞人臣之誼臣等有何功績致塵 聖懷今得覲 天顏臣心足矣四月以老病乞解都統任 詔允所請加太子太保康熙四年七月卒 子祭葬如典禮子都幹海襲爵

右 國史館本傳

席特庫

席特庫滿洲鑲藍旗人世居佟佳以地爲氏其父努顏自佟佳率屬來歸 太祖高皇帝使管一佐領及卒席特庫襲父官 太宗文皇帝天聰五年擢前鋒參領率兵至明錦州邊界襲擊明兵之謀者明兵尋犯耀州席特庫馳援卻敵兵七月復奉 命至大凌河偵軍事有俘獲 上聞明總兵祖大壽修築大凌河城 親統大軍攻之 指授方略令諸將固守汛地明兵出誘戰並進擊敵席特庫及正藍旗士卒徑抵城壕舍騎步戰裨將多具戰歿席特庫奮入敵陣取多具屍還九月大軍擊甯遠兵之赴援大凌河者既接戰我軍一卒陸馬席特庫領燾衝敵援之出六年與護軍參

領鼇拜等略明邊境擒三十人及降明蒙古五人以獻 詔以所
俘獲賜之八年正月與前鋒參領圖魯什等至錦州松山偵軍士
有斬獲二月齋 諭至錦州懸於十三站山坡以示祖大壽時察
哈爾部人有散入蒙古席爾哈席伯圖地者四月席特庫奉 命
同蒙古布哈塔布囊等往略席爾哈席伯圖地斬七十餘級獲其
戶口及牲畜尋同卦爾察尼堪率兵二十人往濟豐城躡明兵蹤
跡至西拉木輪河遇降明蒙古百人席特庫設伏追擊盡殲之二
人逸而奔席特庫射之殪其一 一爲我國諜者所獲是役也席特
庫以二十人殲敵百人 特賜甲冑以旌之八月隨大貝勒代善
征明略大同敗明陽和守將騎兵九百獲馬六十餘大軍自陽和

趨天城衛北席特庫設伏赤城踰月大軍趨左衛城復偕前鋒參
領吳拜設伏宣府並多斬獲十一月敘功晉世爵三等輕車都尉
九年八月隨貝勒多爾袞略地山西自平魯衛入明甯武關守將
率兵來偵席特庫迎戰斬首十餘級敵兵敗遁十一月與參領布
顏等偵明兵於錦州旋與前鋒統領勞薩等躡明兵於冷口皆在
事有功崇德二年齋 敕諭祖大壽遂白廣甯入邊擒斬十餘人
縱二人使齋 諭還錦州三年九月隨貝勒岳託征明至牆子嶺
密雲兵突出席特庫同勞薩分兵擊敗其眾會日暮收兵獲巨礮
二十餘明總督吳阿衡率兵來戰復敗之尋攻真定破明內監高
起潛兵追至運糧河三敗其軍敵兵夜犯饒藍旗營席特庫偕佐

領俄兒等奮勇力戰卻敵四年與前鋒參領沙爾虎達率將士略錦州屢敗敵兵俘獲人口及牲畜六年三月隨鄭親王濟爾哈朗等圍錦州明人自杏山赴援鄭親王率師設伏席特庫以前鋒兵誘敵來戰佯敗走敵來追伏發席特庫還擊敵兵大敗之明總督洪承疇出兵松山城拒戰席特庫復與勞薩敗敵二隊躡擊至壕而返八月大兵復圍錦州承疇以軍十三萬赴援席特庫偕前鋒八參領與戰敗大同總兵王樸等軍承疇率敗軍奔塔山連戰敗北旋奔杏山席特庫橫衝馳突敵大奔潰我師追至筆架山斬四百餘級獲馬二百四十餘大纛六松山杏山二城兵有潛遁者席特庫與前鋒參領布爾遜等屢襲擊之先後追斬數百人獲馬駝

七年二月大軍克松山城率前鋒兵駐塔山明甯遠兵千騎掩至
席特庫合八旗兵追至連山有斬獲功十月貝勒阿巴泰征明入
長城豫郡王多鐸率師往制甯遠錦州援兵席特庫從遇甯遠兵
擊卻之晝夜巡偵俘明兵十五人斬四十餘級以功晉二等輕車
都尉旋合左右翼兵從界嶺口毀邊牆入敗明大同兵之往守山
海關者既克長城明薊州總兵白騰蛟率步騎奔桃林關聞我師
將攻薊州騰蛟以師馳還與馬蘭峪總兵白廣恩合師拒戰席特
庫同前鋒參領瑚里布麾眾奮擊敗明兵數千陣擒參將一斬遊
擊三獲馬六百餘順治元年四月隨睿親王多爾袞入關破流賊
李自成僞將唐通於一片石六月都統葉臣率兵定山西九月

世祖章皇帝命席特庫往助其軍至絳州渡河沈賊船十一月抵汾州平陽偏賊營賊出戰追斬四千餘級降賊將康元勳於西山寨進兵黑龍關復降明守備三員兵三千人二年自成遁入湖廣席特庫隨大軍追至安陸府斬四百餘級收獲戰艦敘功晉一等輕車都尉三年豫親王多鐸率師討蘇尼特部叛逃蒙古騰機思我軍自土喇河西行喀爾喀土謝圖及碩雷諸蒙古各以兵遮截席特庫率眾奮擊追奔數十里斬獲無算四年敘功加一雲騎尉七年 詔錄敘舊臣晉爵三等男 予世襲九年 恩詔晉一等男康熙五年三月卒年七十 賜祭葬子塞爾古德襲

右 國史館本傳

都敏

都敏滿洲鑲紅旗人姓他塔喇氏先世居扎庫沐地曾祖阿爾布
尼天聰三年率丁三百來歸授世管佐領遞傳至都敏襲順治二
年都敏隨副都統羅璧追流賊李自成至延安府賊犯我輜重敗
之又擊卻其守城兵迎戰者是年 上遣八旗官兵分防順德濟
南德州臨清徐州潞安平陽蒲州八城都敏駐平陽旋改駐西安
三年漢中賊賀珍來犯敗之大兵之定湖廣也明鄖陽總兵王光
恩降至是以罪逮繫其弟光泰據鄖陽叛都敏隨侍郎哈哈木進
征光泰遁追至房縣斬賊千餘五年逆回米喇印丁國棟叛據甘
州都敏隨陝西總督孟喬芳勦平之六年八月叛鎮姜瓖黨僞總

督韓昭宣等陷蒲州喬芳攻復其城都敏偕總兵耿應魁追擊四十里復勦賊於南山先後斬三千餘級追趨解州敗賊渠張五党自成等九月至夏縣堡兒村斬賊將雷鳴宋蘇柴廷然等生擒洪守範等十五人攻運城克之斬昭宣十一月同參將胡進忠等於關帝嶺斬賊二千有奇追至芮城賊逆戰陣斬偽知縣薛勤王復其城又敗賊兵於北原復平陸縣八年二月敘功授雲騎尉世職兩遇 恩詔遞授騎都尉加一雲騎尉九年三月回京授吏部理事官三次考滿俱列一等十五年隨甯南靖寇大將軍洛託等征貴州明桂王朱由榔之總兵羅大順迎戰於十萬奇嶺屢敗之十六年七月授參領十八年五月授西安右翼副都統時自成餘黨

劉二虎郝搖旗袁宗第等竄據山寨爲四川患康熙二年都敏同將軍富喀禪總督李國英進巫山趨陳家坡破賊巢二虎奔天池寨偕妻妾縊死搖旗宗第遁至黃草坪追擒之復獲僞東安王朱宗漢僞部院洪有鼈等四年正月敘功加二等輕車都尉五年五月卒 賜祭葬如例子蘇敏襲世職

右 國史館本傳

165-772

白爾赫圖

白爾赫圖滿洲正白旗人姓納喇氏初由前鋒校授兵部副理事官崇德五年隨睿親王多爾袞圍明錦州敵出城犯我左翼白爾赫圖同前鋒參領鄂頤戰卻之復擊敗杏山敵騎六年同前鋒統領吳拜參領瑚密色等屢擊敗明總督洪承疇兵於松山杏山閒七年春自錦州分兵略甯遠獲牲畜八年任前鋒參領順治元年大兵入山海關討流賊李白成白爾赫圖擊敗偽總兵唐通於一片石既定燕京追賊安肅及望都並多斬獲復隨豫親王多鐸西勦自成連破賊營攻克潼關二年移師江南徇蘇州擊走明巡撫楊文驄獲其船二十餘進征杭州擊敗明大學士馬士英之眾分

兵徇湖州同前鋒侍衛安泰圖色等以雲梯克其城三年隨端重親王博洛征金華敗賊眾於八步嶺進定福建五年隨鄭親王濟爾哈朗征湖南時自成餘黨王進才馬進忠袁宗第等分踞寶慶武岡六年白爾赫圖率本旗前鋒破賊湘潭進征寶慶同副都統拜音岱擊敗迎戰賊眾克其東門賊於城外結九營將復來犯白爾赫圖擊之潰溺水死者無算尋自武岡征沅州屢敗進才進忠宗第等進定全州凱旋得優賚八年隨都統阿喇善征山東土賊至沂州攻圍蒼山賊寨斬賊首劉遜張齊又搜勦附近山寨斬賊首趙三元楊大成應科等九年改護軍參領先是敘山海關暨浙江福建軍功予世職騎都尉兼一雲騎尉及三遇恩詔存

晉一等輕車都尉十三年擢前鋒統領十五年隨信郡王多尼征貴州時明桂王朱由榔據雲南以其將李定國白文選劉正國寶名望等扼據貴州要隘大兵至安莊衛劉正國以眾迎戰白爾赫圖同護軍統領布葉錫禮擊敗其眾斬正國於響水橋導大兵渡盤江進克雲南城十六年白爾赫圖領所部進攻玉龍關白文選引遁追擊敗之獲其偽鞏昌王金印象三馬百四十擒偽總兵呂三貴大兵取永昌府渡潞江李定國設伏磨盤山我前鋒既深入伏起白爾赫圖下馬據石立連發三矢斃賊三人賊駭潰我後軍繼進合擊殲之寶名望據木柵拒守白爾赫圖率眾破賊斬名望遂取騰越州由榔定國文選皆遁追逐踰南甸而還信郡王班師

白爾赫圖同都統卓羅雷駐雲南定國既竄出邊屯孟良復圖入
犯約降將高應鳳爲內應以由榔印劄誘元江土司那嵩倡叛白
爾赫圖同卓羅率兵往勦敗賊於磨隴口進圍元江城掘壕困之
越月城乃拔那嵩自焚死擒應鳳斬於軍十七年以在滇久著勞
績 頒賜衣服白金鞍馬十八年九月隨定西將軍愛星阿勦由
榔於緬甸十一月會師木邦聞白文選屯錫箔江邊白爾赫圖同
都統果爾敏遜塔等簡精銳先發至則文選已毀橋遁乃結筏以
濟大軍次舊挽坡愛星阿令白爾赫圖率前鋒百人往蘭鳩江濱
取緬人所獻由榔及其親屬至軍中大軍凱旋康熙元年四月白
爾赫圖奉 詔同都統卓羅率前鋒軍先還京敘功晉爵一等男

六年輔政大臣蘇克薩哈爲鼉拜構陷株連族人白爾赫圖蘇克薩哈族弟也削官爵坐斬八年 上親政以白爾赫圖無罪枉坐追復原官及一等男爵以其子白爾肯襲爵十年其子一等待衛羅鐸參領塞赫等訴陳白爾赫圖征雲南功多爲鼉拜屈抑未予優敘得 旨下部議晉爵三等子並 賜祭葬如典禮諡曰忠勇

右 國史館本傳

喀喀木

喀喀木滿洲鑲黃旗人姓薩哈爾察氏先世居烏喇部父塘阿禮當太祖高皇帝時率百人來歸授佐領使轄之從征遼東有功予三等輕車都尉世職後從征瓦爾喀爲熊傷而卒喀喀木襲職太宗文皇帝崇德三年授吏部理事官五年隨承政索海征虎爾哈部敵據柵拒戰喀喀木率眾攻破其柵擊斬二百人生擒索倫兵一百三十人以歸七年隨征明松山以本旗將領失律未察舉降世職爲騎都尉八年二月擢吏部參政世祖章皇帝順治元年署副都統隨大軍入山海關督後隊兵擊敗流賊李自成敘功加一雲騎尉時改參政曰侍郎喀喀木仍任吏部四年考滿復三

等輕車都尉世職尋奉 命率兵征鄖陽先是大兵定湖廣明鄖
陽總兵王光恩迎降卽予原官畱鎮至是以罪逮繫其弟王光泰
遂叛糾眾踞鄖陽自稱明鎮武伯聯結叛賊賀珍武大定等爲應
援提督孫定遼戰歿賊勢猖獗喀喀木自河南進征將薄鄖陽光
泰乃遁喀喀木偕副將王平率兵渡河追剿至房縣斬級千餘光
泰及僞總兵李世英等竄四川喀喀木還駐鄖陽五年春總督羅
繡錦以叛鎮金聲桓自江西窺湖廣請畱喀喀木駐防荊州六年
還京七年兼任鑲黃旗副都統三遇 恩詔晉爵三等男初鄂爾
多斯部扎穆素多爾濟屯牧神木邊外害我使臣叛逃旣而扎穆
素悔罪來歸多爾濟竄匿賀蘭山屢犯邊界肆劫掠八年九月喀

喀木奉 命同都統噶達渾等率兵討之九年正月自甯夏出水驛口至賀蘭山後分兵搜剿斬多爾濟及其弟二人並部眾悉殲之俘幼弱及婦女以歸獲馬駝各數百牛千餘羊萬餘是年五月授鎮守江甯總管十年 命爲靖南將軍剿廣東賊寇時流賊張獻忠餘黨李定國自廣西掠廣東潮州總兵郝尙久應之踞城以叛喀喀木至廣州同靖南王耿繼茂進征潮州攻圍逾月以雲梯兵克城尙久投井死潮州及附近州縣悉平乃還駐江甯十六年六月海賊鄭成功陷鎮江襲踞瓜洲遂犯江甯喀喀木與總督郎廷佐提督管效忠協謀禦擊檄調蘇松總兵梁化鳳等赴援會貴州凱旋之副都統噶褚哈瑪爾賽率兵由長江而東亦使人邀之

駐守喀喀木與密議曰賊勢盛宜乘其未集先擊之簡兵逆擊賊
眾之先至者賊敗卻獲舟二十餘七月成功悉眾薄城連營八十
有三賊艘蔽江喀喀木與文武官晝夜防守俟援兵既議悉以綠
旗兵先擊賊營於儀鳳鍾阜門外梁化鳳出儀鳳管效忠出鍾阜
夾攻截擊殲賊甚眾陣擒僞總統余新及僞總兵二賊氣奪次日
喀喀木同噶褚哈瑪爾賽率兵出神策門見賊踞山列陣乃先分
兵左右仰攻而自率精銳搆其中堅陣擒僞提督甘輝及僞總兵
數人斬馘無算成功收潰眾乘船遁我水師復截擊之淹斃過半
焚其船五百餘又分水路追剿賊之在鎮江瓜洲者皆遁捷聞
下部優敘尋兵部請議前此失陷鎮江瓜洲罪上念其固守江

甯功可抵罪予免議 聖祖仁皇帝康熙元年改江甯總管爲將軍仍以喀喀木任之七年八月卒以其子喇揚阿襲一等輕車都尉兼一雲騎尉

右 國史館本傳

皇朝通志卷之三十三

三

卓羅

卓羅滿洲正白旗人姓佟佳氏三等男巴篤理第三子也天聰八年襲父爵兼任佐領崇德三年隨貝勒岳託征明燕京明太監馮永盛率兵拒戰卓羅以三百人擊敗之進征山東屢敗敵眾四年略錦州入其郭擒守備一人六年大軍圍錦州明總督洪承疇率眾赴援駐松山卓羅隨武英郡王阿濟格擊敗之七年復破松山兵於山北八年授刑部參政順治元年從入山海關擊敗流賊李自成二年敘功晉一等男任正白旗副都統三年隨順承郡王勒克德渾征湖廣敗自成餘黨一隻虎於荊州凱旋 賚黃金十兩白金三百兩先是明桂王朱由榔據武岡以總兵王進才等分踞

長沙衡州寶慶 上命恭順王孔有德統師征之至是 遣卓羅
同副都統藍拜赴有德軍協謀進剿四年自岳州趨長沙進才聞
大兵至遁走卓羅同藍拜追擊敗之遂與智順王尚可喜擊敗僞
總兵徐松節軍統舟師還長沙遣參領張國柱扎蘇藍等敗僞總
兵楊國棟於天心湖卓羅會合孔有德軍趨祁陽由熊巖嶺入城
斬僞總兵副將各一進攻武岡州擊敗僞安國公劉承允於夕陽
橋承允降由榔遁桂林遂取武岡五年師還復 賚黃金十兩白
金三百兩六年考滿加一雲騎尉旋擢禮部尙書列議政大臣七
年調都察院左都御史八年二月兼鑲白旗滿洲都統閏二月
上甄別部院大臣以卓羅緘默曠官罷左都御史專任都統九月

擢吏部尚書三遇 恩詔晉爵至一等子兼一雲騎尉九年十一月授靖南將軍率兵征廣東旋以廣東漸平 召還十一年復任吏部尚書十二年八月 命同都統阿爾津率兵駐防荊州初朱由榔僭號於粵孫可望李定國白文選等皆以張獻忠餘黨附由榔竊王號至是踞辰州十三年八月卓羅同阿爾津白澧州常德進征辰州可望焚舟夜遁卓羅與副都統泰什哈護軍統領費雅思喀等率兵渡江攻之發其伏追擊至瀘溪屢戰破之偽參將段文科及守備四員來降復辰州十四年可望率所部赴長沙歸順定國文選等隨由榔竄入雲南十五年甯南大將軍宗室羅託自湖南定貴州軍貴陽 上命平西王吳三桂由四川進征南將軍

卓布泰由廣西進而卓羅隨信郡王多尼以師會之規取雲南十
六年正月合攻雲南城下之屢敗文選定國兵遂克永昌騰越追
勦至南甸乃還 詔留卓羅及都統伊爾德分八旗兵駐守雲南
賚蟒服鞍馬時由榔奔緬甸定國竄踞孟良復謀入犯約降將高
應鳳爲內應以由榔印劄誘元江土司那嵩倡叛十月卓羅同前
鋒統領白爾赫圖參將穆克爾等擊敗賊眾於磨隴口賊將馬秉
忠孫應斗馬忠君皆敗卻進師盤壕困之以雲梯克其城斬應鳳
於軍那嵩自焚死殲其黨無算十八年定西將軍愛星阿同吳三
桂征由榔於緬甸 詔卓羅駐守雲南是年十二月緬人執由榔
以獻雲南平康熙元年四月奉 詔率兵駐守雲南八旗兵還京

敘功晉爵一等伯世襲七年卒 子祭葬如典禮諡忠襄以其孫
赫特赫襲

右 國史館本傳

富喀禪 子穆成額

富喀禪滿洲鑲紅旗人姓那木都魯氏父翁格尼一等輕車都尉
綽和諾之兄也綽和諾無子翁格尼襲其職管佐領事富喀禪初
任護軍校 太宗文皇帝天聰三年從征明敗敵大安口射殪二
人五年從征大凌河擊明監軍道張春總兵吳襄等衝入敵陣中
創墮馬乃裹創步戰敵蘇有護軍校瑤奎者臨陣墜馬富喀禪
奮力直前援以歸八年從征明大同復中創仍偕眾奮進攻克敵
寨是年因翁格尼不勝佐領任 命富喀禪代之卽以世職 子
襲崇德元年從征朝鮮有斬獲三年授工部理事官兼參領隨豫
親王多鐸征明甯遠敗敵中後所城西山岡 世祖章皇帝順治

元年隨大軍入山海關擊走流賊李自成敘功加一雲騎尉三年
擢任西安駐防總管時流賊劉文炳郭君鎮等劫掠延安慶陽四
年三月富喀禪督兵征剿遇賊二千於邠州奮擊敗賊追蹙之三
水縣斬郭君鎮別遣游擊胡來觀守備徐國崇等追擒劉文炳於
宜君縣之藍莊溝俘斬其黨略盡獲馬騾牛無算五年逆回米喇
印丁國棟等據河州作亂富喀禪同總督孟喬芳遣兵攻圍逆回
皆受撫而米喇印復叛據甘州富喀禪率兵進攻不下深溝高壘
以困之賊出城來犯擊卻之斬級二百並殲其採樵者四百餘人
旋令雲梯兵攻克其城米喇印潛遁爲我軍躡跡斬於陣丁國棟
復與纏頭賊土倫泰等踞肅州亦爲副將馬甯張勇相繼剿除六

年叛鎮姜瓖踞大同其黨連陷郡邑富喀禪遣協領根特參領都敏赴援敗賊於猗氏縣擒僞監軍道衛登方七年復遣兵勦賊於合水縣斬賊渠劉宏才先後奏捷並得 旨嘉獎三遇 恩詔晉爵至一等男 聖祖仁皇帝卽位改西安總管爲將軍富喀禪任事如故初李自成竄死其黨散處楚蜀至是餘孽劉二虎郝搖旗袁宗第等猶聚匿歸州興山閒康熙二年富喀禪同總督李國英副都統都敏等於十二月二十三日師次陳家坡奮勇勦殺賊遁入天地寨富喀禪等統兵追勦劉二虎勢窮自縊郝搖旗袁宗第夜遁復追至黃草坪大敗賊眾擒郝搖旗並僞東安王朱宗漢等敘功晉三等子八年卒子穆成額襲爵別有傳

右 國史館本傳

公諱富喀禪滿洲人雄毅多大略自幼以樹勳立名自任崇德閒
筮仕爲壯大旋襲父職授一等阿達哈哈番兼佐領未幾出理部
務爲工部理事官復調戶部及 世祖章皇帝命將入關驅除流
寇公身履戎行有勦寇功加一拖沙喇哈番順治三年以才品擢
授鎮守西安等處將軍屢遇 覃恩歷晉一等阿思哈哈番五年
回寇據邊境煽亂甘肅兩鎮同日被陷勢猖獗莫能禦公親提軍
馳擊賊渠郭真君劉文秉以騎步兵二千迎敵大敗之斬真君於
軍生擒文秉時賊軍猶踞甘州城公率大軍圍城數日以待其自
困久之賊潛引兵欲突圍出遮擊之兩戰兩克遂拔甘州嗣圍河

州城賊以騎兵二千餘閒道來援公馳斬其將王大宏餘黨奔潰
河州就撫并招納涼州一路降眾由是西甯一路帖然無邊燧之
警矣 今上御極之二年以西山賊首郝搖旗等歲久負固三省
會師合勦公以宿將指麾諸軍口授方略一鼓而進盡殲賊巢生
擒搖旗及袁宗第等招降僞將七千餘人房竹遂定以功超拜三
等精奇尼哈番鎮西安如故康熙七年具疏自陳老疾 上篤念
將軍勞苦俯俞其請越明年三月二十七日竟以病逝年六十有
三訃聞於 朝特遣大鴻臚臨喪諭祭蓋異數也嗚呼公之在行
間者三十餘年而鎮關中者二十有三年從來大將專閫建旄之
久未有若斯之盛者也而躬冒矢石戰必勝攻必克奇勳偉伐屢

見疊書且刁斗嚴明市肆安堵師行所至民不知兵還朝之日
秦人扶老攜幼垂涕遮道以送公者不啻千百計古稱制軍之道
曰仁曰勇公實備之嗚呼豈非所謂鷹揚虎旅之才應國家景運
而奮興者乎以將軍非常之烈膺三朝不次倚用之恩亦真可
以無愧也矣余特詮次大略勒石墓道庶幾後之觀者知所景仰
其詳具在國史不能縷述也

右墓碑張玉書撰

穆成額

穆成額富喀禪子康熙十三年二月耿精忠叛應吳三桂江西甯
都廣信各屬騷動聖祖仁皇帝命康親王傑書爲大將軍往征

福建復 命定南將軍希爾根偕副將軍哈勒哈齊平定江西六月令穆成額署副都統事與副都統倭赫率大兵赴希爾根軍前未至而精忠陷石城犯甯都穆成額奉 諭兼程速赴江西希爾根等方統兵援撫州穆成額遂分兵守南昌九月吳三桂自長沙遣賊將犯袁州 詔穆成額率所部往與總兵趙應奎併力固守以俟大軍會剿 遣將軍尼雅翰率駐防江甯兵及副都統碩塔等援之十月僞總兵黃乃忠等合賊眾數萬自萍鄉來犯袁州穆成額與副都統幹都海倭赫等敗賊於西村斬殺萬餘復登山奮擊賊穴挫衄旋追斬五千餘級復與趙應奎分兵二路疾趨萬載縣環城攻擊賊出拒戰奮擊敗之陣斬賊渠邱以祥擒僞官童聖

功收獲俘殪無算復其城十一月僞總兵張泰竊據安福縣穆成額偕參領色埒等分路進剿殺賊五千餘復安福縣時耿逆未平叛賊劉進忠等陰連鄭錦寇瀕海郡邑平南王尙可喜與總兵黃芳泰連疏請發大兵至潮州上命尼雅翰與鎮南將軍侍郎舒恕率兵赴廣東穆成額參贊軍務十四年大兵恢復南雄始興守備李光明通賊陷城穆成額與總兵張星耀統眾攻剿陣斬賊將郭梓擒光明及所署僞官等復始興縣城明年五月尙之信叛韶州南雄應之穆成額隨舒恕等退保南安贛州十月與江西巡撫佟國禎合兵剿滅贛州附近諸賊復萬安縣復與副都統額赫納等屢敗逆賊於南康縣之固鎮堡十六年三月詔舒恕等鎮守

贛州而以副都統莽吉圖爲鎮南將軍征廣東仍 敕穆成額與
額赫納參贊軍務駐兵韶州莽吉圖聞賊黨劉進忠寇潮州乃畱
穆成額守韶州而自率兵赴廣州七月三桂遣賊犯韶州穆成額
與副都統赫勒布督兵急擊卻之及廣韶悉定仍與莽吉圖進兵
廣西十七年三月吳逆僞將分犯潯梧桂林平樂等郡有 旨諭
莽吉圖鎮梧州令穆成額與將軍額楚都統勒貝巡撫傅宏烈統
兵協勦七月兵至鬱林戰失利退保藤縣十二月藤縣失守 上
復遣平南王尙之信及將軍舒恕率師赴援賊乃遁走二十二年
議政王大臣等以穆成額藤縣失機不能禦賊且不收陣亡士卒
骸骨應視職籍沒編入內務府佐領得 旨免其編隸尋以其弟

新柱襲世爵

右 國史館本傳

胡有陞

胡有陞錦州人 太宗文皇帝崇德元年睿親王多爾袞豫親王多鐸征明錦州道人崔應時與民人張紹禎門世文門世科秦永福等五十人謀以城降使有陞持書詣我軍期爲內應豫親王與書齋還明將覺之執應時等數十人置諸獄有陞同紹禎世文世科永福乘閒脫走來歸各 賜冠服鞍馬妻室奴僕授世職有差有陞得授三等男隸鑲黃旗漢軍七年隨貝勒阿巴泰征明薊州越燕京趨山東敗明總督范志完兵於渾河八年隨鄭親王濟爾哈朗征甯遠攻克前屯衛中後所二城敘功晉二等男 世祖章皇帝順治四年授南贛總兵五年總兵金聲桓偕副將王得仁據

南昌叛糾眾犯贛州先以書招左協副將高進庫進庫不從勒兵出戰爲賊先鋒劉一鵬所敗乃收兵爲固守計巡撫劉武元巡道張鳳儀分守城東西有陞率健卒沿城策應賊穴城將置火具仰攻有陞以石塞所穴竇賊計遂沮閱三月城中糧匱有陞督兵出戰敗賊卻數里聲桓聞大軍由九江直擣南昌蒼黃引眾北走有陞追擊之斬馘無算未幾廣東叛鎮李成棟犯贛州有陞率諸將乘賊方鑿壕分兵東西南三門出擊大破賊成棟僅以數騎遁先是南贛總兵柯永盛遷湖廣總督請以南贛鎮兵二千自隨部議如所請有陞疏言贛地當江湖關鍵俗尙好武輕生姦宄易作控馭宜嚴且金逆未平正資勦禦以固疆圉廣東賊寇尙多鎮兵久

習水土熟知地利便於征勦不宜移去奏入乃 詔前所議移兵
仍畱贛鎮而令永盛另募新兵明年聲桓成棟等相繼翦滅大軍
凱旋土賊仍未靖上猶劉飛龍南葉芝南石城鄒華零都彭順慶
瑞金陳其綸皆負固抗逆有陞同武元檄將分勦先後蕩平敘功
加左都督 賜紫貂冠服甲冑佩刀鞍馬三遇 恩詔晉爵至三
等子十年四月平南王尙可喜靖南王耿繼茂疏述有陞深算老
謀同巡撫劉武元堅守南贛與粵東唇齒相依功宜錄敘部臣以
有陞業已晉銜都督寢議 上特詔曰胡有陞同劉武元堅守巖
城屢挫金王二逆及廣東叛鎮李成棟犯贛又能出奇制勝以寡
擊眾大敗賊兵四省咽喉遂得安堵忠誠可嘉勞績茂著雖已晉

國朝通志卷之三十一
三十一
銜未足酬功朕加意封疆不吝爵賞其再議優敘於是加太子少保十三年二月入覲 賜冠服鞍馬十七年以年老解任回旗聖祖仁皇帝康熙三年劉武元之子瀆疏請追敘守顛功既加騎都尉世職有陞援例以請部臣議加雲騎尉得 旨胡有陞守顛州全城敗賊之功不下於巡撫劉武元亦予騎都尉世職遂合所有世爵爲一等子八年九月卒祀江南名宦祠子啟泰襲爵後改隸鑲白旗

右 國史館本傳

國朝耆獻類徵初編卷二百六十九目錄

將帥九

科爾崑

劉之源 子光

王國光 子永譽

劉官統

郎賽

梁化鳳

費雅思哈 子素丹

巴特瑪

齊爾格申

遏必隆 子音德
曾孫特清額

巴山 子舒恕

馬惟興

國朝耆獻類徵初編卷二百六十九

通奉大夫前署江西巡撫江西布政使司布政使湘陰李桓輯
將帥九

科爾崑

科爾崑滿洲正藍旗人姓阿顏覺羅氏世居瓦瑚木父碩色任佐
領科爾崑初爲貝勒阿巴泰護衛天聰六年從 太宗文皇帝征
察哈爾崇德元年從征朝鮮皆有功授前鋒護衛五年隨鄭親王
濟爾哈朗攻明錦州明師數萬據松山科爾崑同佐領索渾前鋒
參領瑚里布誘敵步戰敗之明總督洪承疇總兵祖大壽合兵十
餘萬迎戰科爾崑同索渾等衝入敵陣俘斬無算六年隨英親王

阿濟格駐師杏山甯遠敵數千來犯科爾崑先眾馳擊敗敵追至連山馬中流矢仆科爾崑躍起斃敵甲騎奪馬而還尋隨英親王閱視甯遠長壕敵騎猝至索渾陷重圍科爾崑單騎翼以出沙河所數千騎犯我牧地科爾崑率前鋒迎擊敗敵躡追之與明援兵相遇射殪一人七年隨貝勒阿巴泰征明白薊州入邊次豐潤遇明總督范志完軍奮擊破之又同前鋒參領鄂碩敗敵援兵至河西務以數十騎偵敵見我軍遁走科爾崑追及一騎手搏之敵與馬俱墜水擒以歸八年授佐領兼兵部理事官 世祖章皇帝順治元年四月隨睿親王多爾袞討流賊李自成擊敗敵兵於山海關追至望都六月隨都統葉臣征山西進攻太原賊兵突出城拒

戰科爾崑擊敗之設伏以待夜半賊果至伏發盡殲焉又隨英親王追李自成於湖廣連破賊營敘功授世職騎都尉兼一雲騎尉三年隨肅親王豪格征流賊張獻忠過漢中擊敗叛鎮賀珍兵進擊獻忠於西充之鳳凰山大破之獻忠既殪復分剿其餘黨斬獲甚眾五年凱旋晉三等輕車都尉遇恩詔晉二等輕車都尉六年任前鋒參領隨鄭親王濟爾哈朗征湖廣是時明桂王朱由榔以其眾據湘潭科爾崑與前鋒統領席特庫努山等先薄城破其西門遂取湘潭下寶慶武岡分兵趨沅州偕前鋒參領白爾赫圖以數十騎擊賊白爾赫圖陷圍矢馬科爾崑奪敵馬掖之上並馬突圍出復縱騎奮擊大敗賊進克沅州又克道州龍虎關復遇

恩詔晉一等輕車都尉兼一雲騎尉九年隨敬謹親王尼堪征衡
州僞晉王李定國列象陣抗拒科爾崑對陣射之貫象鼻象奔大
破賊兵又敗僞秦王孫可望於寶慶時敬謹親王自衡州進兵遇
賊伏歿於陣貝勒屯齊遣學士碩岱同科爾崑先還奏捷不言王
陣歿狀既而事聞下議政王貝勒大臣會勅科爾崑應禡職籍
沒上從寬僅革世職十三年擢護軍統領十四年孫可望與李
定國相攻不勝攜妻子來降定國同僞鞏昌王白文選擁由榔據
雲南詔大兵三路進取貴州甯南大將軍宗室羅託自沅州進
科爾崑率兵從既取貴陽羅託駐守令科爾崑率兵五千取黃平
州以副都統瑪爾賽副之科爾崑聞白文選方踞七星關議以瑪

爾賽分兵二千由大道緩進誘文選出戰且戰且卻而自統兵三千由閒道疾趨乘其後瑪爾賽至萬奇嶺文選果率眾迎戰瑪爾賽佯敗退走數十里文選躡追科爾崑突出其背呼譟縱擊文選後軍亂瑪爾賽還師夾攻賊潰遁遂取黃平明年還京初李自成死其黨散處湖廣大兵既定湖南貴州乃竄伏歸州興山閒

聖祖仁皇帝康熙二年 命都統穆里瑪爲靖西將軍都統圖海爲定西將軍統八旗兵赴荊州會合湖廣陝西四川兵剿賊科爾崑領護軍以隨時賊渠李來亨踞茅麓山兩將軍議分道進討圖海出歸州穆里瑪出宜昌科爾崑率兵五千與前鋒統領賴塔先驅遇賊搏戰三戰皆捷再奪賊壘直抵茅麓山已而賊黨郝永忠黨

守素來援眾且數萬來亨亦悉眾迎戰科爾崑與穆里瑪登高以望伺賊稍怠下令縱擊大敗賊眾日夕密傳令設伏夜半來亨果率萬餘眾襲我營伏發敗之明日賊黨數千以大刀藤牌列陣我兵分兩翼緩進科爾崑擣其中堅賊敗潰時賊倚譚家砦故巢屯糧爲持久計科爾崑復分兵東絕賊運道師抵石坪賊阻險拒守科爾崑偕總兵徐治都于大海鮑敬等三路攻拔其柵進至譚家砦僞侯李嗣名率眾拒戰中流矢死餘賊遁入砦科爾崑以兵扼其衝斷賊汲道未二旬賊渠高必正黨守素等率僞侯三人僞官屬一百六十人詣軍門降科爾崑旋師與穆里瑪合而圖海亦滅劉汝魁諸賊會師茅麓山令綠旗兵作長圍滿洲兵分守衝要賊

頻犯我軍奮擊之殲殪殆盡來亨自經死餘黨悉降乃班師敘功授雲騎尉世職八年十一月卒 賜祭葬如典禮子莫洛洪襲

右 國史館本傳

玉書承乏總修 國史歷觀 本朝勦業以來英賢佐命事不絕書自配食 廟庭數公外其豐功偉伐彪炳史策者較往代爲獨盛其有身歷四朝戰績輝赫而始終一節勁挺不撓者如護軍統領科公眞卓然名臣之冠冕也公諱科爾崑其先建州靈椿里人高祖業世曾祖德錫在勝國時皆以都督同知總領建州等衛祖翰於 國初歸命累官侍從大臣父紹茲以佐領爲大貝勒府總管公生有異相目光若朗星聲如虓虎年始訖躡健異常兒

太祖高皇帝見而異之卽命侍從出入禁闈者數年爲大貝勒三等護衛武力絕倫能開十餘石弓太宗皇帝定蒙古平朝鮮入大同公皆在行閒多所擒馘以功授前鋒護衛睿親王鄭親王更番圍明錦州公從鄭親王軍以設伏屢敗敵兵松山之戰洪承疇祖大壽合兵十餘萬悉銳迎擊公身先陷陣連斃敵數十騎復大破之從英郡王駐杏山敵騎數千自甯遠擊我哨騎公追殺至連山馬傷徒步奪敵馬乘之遂敗敵兵從饒餘郡王觀兵於明北畿山東一路歷有敗敵功河西務之戰敵將恃勇持滿向公公發矢貫其肘意欲生得之於馬背相持久忽馬逸俱墮潞河敵長身猛力扼公兜鍪事幾殆而公於水中曳其足竟就擒師還以功授佐

領兼兵部職方郎中順治甲申春攝政王統師入山海關與流賊
兵二十萬遇於一片石公在軍中偕蘇公爾度率所轄兵協力破
賊既定燕京復從英親王軍追賊於慶都又偕葉公臣克太原偕
蘇公拜哈公甯阿連破賊二營賊軍潰亂遂大破之以功授世襲
拜他喇布勒哈番加一拖沙喇哈番仍辦部務未幾從肅親王入
漢中與賀珍兵數萬遇公同覺羅巴公哈納超乘而入大破珍漢
中既平從入川擊獻賊至西充之鳳皇坡與獻忠兵遇同巴公及
阿公爾眞蘇公拜擊殺獻殲其餘黨全蜀底定加授三等阿達哈
哈番旋解部務爲前鋒參領兼佐領 太祖配天禮成以勳舊累
勞進二等阿達哈哈番公之未還軍也公父總管公卒既還始聞

之公痛不欲生徒跣至墓次血淚交迸廬於墓所者百餘日復從
鄭親王平楚公力疾行兩月甫愈既至楚湖南北賊多奔竄惟衡
寶辰沅未下尙書阿公哈尼堪以別將赴沅公爲前鋒破武岡賊
兵八千人斬其總兵一人時前鋒參領白爾赫圖馬傷陷敵身被
數創公突入奪賊騎與乘以身翼之左右射敵不敢近所向披靡
有永歷督師何騰蛟者方據湘潭移師攻之忽聞敵兵夜遁公偵
之疑有伏兵俟大軍畢至自率三十騎先入而伏兵盡發矢如飛
蝗公下馬拔民舍門柵爲盾鼓勇急擊大軍繼之遂拔湘潭獲騰
蛟又從順承郡王自道州赴龍虎關破敵數萬以功進一等阿達
哈哈番兼官如故嗣以 慈闈尊號禮成又兼一拖沙喇哈番世

襲不替順治九年李定國方據衡州爲亂公復從敬謹郡王征衡
州定國列巨象爲陣象背坐健卒數人執火器淬鋒以毒中者立
斃公與前鋒參領西伯臣遇敵於隘象連尾而至公曰象非矢石
可摧惟鼻稍脆吾當與公協力射之西公矢先發象躑躅悲鳴仍
復前進公後發直洞其鼻象負痛遂走御者不能止賊眾遂亂大
軍繼進破之追奔數十里時王統中軍聞前鋒勝遂輕騎疾行全
軍皆後而賊兵伏深箐中伺王至猝發王遂中傷而斃公出入重
圍者三求王遺骸獲焉奉還衡州祭殮如禮是時眾軍銜痛次骨
公偕貝勒羅託都統圖賴等激厲諸將士疾趨寶慶遇孫可望於
岔口賊兵號數十萬我師僅成列然人皆殊死戰可望據山巔遙

謂公曰勇則勇矣柰眾寡不敵何公奮呼直入聲震巖谷可望懼而退賊兵大潰湖南遂平貝勒羅託等具疏奏凱學士邵泰親齎以行而以盜賊充斥令公偕前鋒十六人爲衛疏中諱王戰歿事未聞於公也比至京師學士入奏入之始 召公入公第云王薨事已載本內臣所知與學士同及師將還 世祖皇帝悉聞王陣歿始末怒師行之辱國而奏辭之多誑也 詔貝勒以下皆逮問命議政王貝勒大臣會勘於午門 世祖御樓臨決焉時鄭親王詰責公辭甚嚴厲公言衡州之役以先鋒前驅王之致陷初未目覩及王旣薨乃透重圍求王體骨捷書所載絕不與聞及學士入內未經同奏故云所知與學士同今諸臣具在可其質也豈敢自

蹈誑 君之咎王曰人言靈柩里人行僞而言詐誠然公大恚捽縲
索於地鬚髯畢張厲聲言曰臣自齟齬侍 太祖高皇帝稍長事
太宗文皇帝俱以氣節自厲效死行陣者二十餘年今奏事不明
死自吾分王奈何以蟻語坐人罪因指邵泰等曰爾等竟結舌無
一語耶時 世祖察公詞氣憤激謂左右曰陷此黑面參領者端
由邵泰耳遂命侍衛羣擊邵泰幾殆及具獄議公革職籍沒爲
官奴 詔止奪世職仍畱原官居久之護軍統領缺人廷推章三
上未允一日 駕幸南海子 召諸議政王大臣齊集傳 旨護
軍統領朝廷重臣舊制悉下廷議蓋慎之也茲屢舉不及科爾崑
豈以其不工俯仰故耶朕深知其人可膺此職於是諸王大臣咸

引咎遂以 特旨授公閱歲餘復 命爲參贊大臣從 王師取黔
中師至鎮遠聞雲南賊中內亂馬進忠獨守貴州兼程急入進忠
望風走遂平貴陽而賊將白文選出七星關踞黃平州信郡王方
戒期入滇待命公將騎兵五千人與副都統馬爾賽偕擊之公以
黃平居萬山中未易猝拔乃分遣爾賽誘賊甫接戰卽佯敗走俟
文選兵大出繞其後擊之遂拔黃平文選竄走而全黔底定師還
深被 獎遇未幾扈從房山步獵忽以中熱眩暈而仆 駕馳至
仆所用諸老臣言以徑尺冰置胷次移時熱氣勃發始甦 聖心
大慰公從昏曠中間 天語亟強起謝固止之令肩輿還旬餘疾
愈詣南苑謝 世祖嘉勞良久顧左右曰忠勇篤誠如科爾崑者

始可以爲大臣矣前奪世職非其罪也比歲暮有旨許冤抑者所在具陳意屬公乃甫及獻歲聞宮車旋晏駕矣不果行方世廟大漸時公露處宮門外者數日比及上賓號痛不欲生遂成痼疾自是常臥病不視事盛京以東都山紅螺山宿有巨寇義州佃甲有亡命走兩山以圖自活者將軍請剿除之朝命公往公力疾行次甯遠謂監軍等曰甯遠爲兩京衝要賊無一騎掘守何言狂逞耶儻遽進剿恐濫及無辜於是選精甲數百結小隊偃旗衷甲乘夜趨義州收捕佃甲皆束手就縛訊之皆迫於所司侵漁依伐木丁壯自保無他謀也分別奏聞付之司寇全活以數千計既歸復稱疾不出詔遣醫診視久之疾漸平而湖廣興房閒有

茅麓山賊爲亂賊固流寇之餘黨所謂十三家者是也自闖獻潰敗其黨先後入滇依永歷而賊一隻虎李來亨賀珍袁宗第諸人從其將堵允錫奔走於楚粵間迨楚粵滇黔先後蕩定永歷已亡乃復挾明宗室朱盛蒞者招集無賴日事抄掠竄入興房諸縣依茅麓山爲巢穴而推李來亨爲盜魁楚督臣董學禮等屢戰敗績康熙二年朝命會師合朔廷推都統慕禮裏爲將軍而公與都統大學士圖海副之公等既至荊州則川湖河南督撫提鎮各遣所屬健將勁旅來會遂從夷陵進師分軍七道以一軍護輜重以兩軍遏外援以左右翼兩軍傍抄絕而公自率五千人爲前隊慕公將中軍前鋒統領賴公塔則爲遊騎往來馳擊前隊始發賊巨萬

從深僻出中軍及兩翼兵掩擊破之進至茅麓山慕公乘勝直入
公力止不從爲賊所襲慕公大悔公曰當爲將軍解之部署諸將
分守汎地自以二千五百人登山據險賊出過半遊騎兵衝擊大
敗之陣斬賀珍等四人時李來亨獨前軍先道公曰此賊老於行
陣恐夜襲我不備乃聲言縱馬擇水草休息密下令軍中候進止
日暮置兵伏谿谷間偵賊至夜半來亨果率眾萬餘襲總督李國
英營伏發大敗之越數日築營上望坪以斷賊路登茅麓山絕頂
奪賊壘以駐我師賊兵數千列火器礮石拒戰公統兵徐進嘗敵
別遣賴塔等繞賊後擊敗其軍又於石坪新寨南峯山屢有斬馘
偪至譚家寨賊眾萬餘人迎敵流矢傷僞侯李嗣名賊將金騰雲

關大敗不敢復出公曰語云困獸猶鬪況賊尙萬餘偏之賊殊死
出我所傷多矣曷若深溝高壘斷其餉道扼其要衝不出旬月可
不勞而坐收賊眾於是賊糧盡拔絕賊首李來亨自經死賊將高
必正等百餘人自縛率萬餘眾詣軍門乞降公簡閱降人得勁卒
數百屬分隸各營其老弱子女數萬令各齎輜重散處各州郡悉
縱爲民師還以功授拖沙喇哈番世襲罔替公復引疾居於家聞
上幸永平 詔諸王等並從公蹶然起趨政府請從 許之同賴
公塔總領圍事有王府護衛誤入圍中者言者謂諸王慢玩所致
公同賴公奏違例入圍舊有常罰諸王隨圍先行護衛等誤入王
等不及知乞寬諸王之罰控御不嚴咎在臣等時皆以公言爲得

大體云比還 賜天閑良馬二十四匹本旗都統缺人當軸者意屬
公公峻拒之而止家人力諫公曰不爲身計獨不爲子孫計耶公
曰是乃所以爲子孫計也越歲而當軸者敗乃服公先見云康熙
七年 皇上躬親大政公奮志欲矢報效而困臥不能視事八年
十一月二十日遂以疾終訃聞 朝廷震悼 賜祭葬如例公孝
友一庶弟親愛倍至二兄子視若所生故公歿終身悲慕焉元配
耿氏繼佛氏學士納山女 贈封俱一品夫人生子二人長卽盛
京刑部侍郎巢可託次莫洛洪襲世職官護衛女一人適一等侍
衛雷戚孫四人長爾滿次丕次幼其年十二月朔葬廣渠門外迤
東五里 賜地

右神道碑張玉書撰

大清有佐命禦侮之臣曰科爾崑公歷事 四朝底定中夏宣力
行陣書功太常公之子盛京刑部侍郎巢可託公績學力行見稱
中朝以名德世其家手狀公行事戰功之詳以授士禎謂其言可
以徵信宜書神道之碑士禎不敢辭按狀公之先建州靈椿里人
也高祖業世曾祖德錫皆明都督同知總自在等州祖翰 國初
歸命爲侍從大臣父紹茲昂邦貝勒府總管兼佐領公生有異稟
顧盼雄偉神采毅然挽強超距勇冠諸將未及冠 太祖高皇帝
一見奇之拔置侍從從 太宗文皇帝定蒙古服朝鮮入雲中以
功補前鋒護衛旣冠從鄭親王攻錦州爲前鋒明師數萬壁松山

公偕索渾下馬誘擊敗之明總制洪承疇總兵官祖大壽合兵十餘萬悉銳來戰公偕索渾身先陷陣連斃驍騎數十遂大破之從英王駐師杏山甯遠敵騎數千挑戰公先前鋒八參領馳突格殺數十騎追至連山馬中流矢公躍起斃其甲騎奪馬破敵而還從英王閱視甯遠長壕敵騎數萬風雨至公偕索渾奮身先入塵戰良久索渾陷重圍公戰酣顧視矢索渾瞑目大呼單騎馳西北翼出之萬眾無敢當者沙河所騎數千來犯芻牧公率前鋒逆擊敗之追北與策應兵遇公一矢斃其首將眾乘之盡覆其軍從饒餘郡王觀兵畿輔山東師次豐潤與經略范志完軍遇眾號十萬公偕胡密子先登破之至河西務同前鋒參領鄂苟以數十騎往偵

國朝通志卷之二十一
敵敵將引滿向公公覺之先發矢貫其臂失弓矢落荒走公欲生
得之縱騎追及於馬上手搏馬逸俱墜水敵將長大木僅及肩以
兩手持公兜鍪抑入水公下踈其足踏卒禽之總督趙光抃軍數
萬至復偕鄂苟等擊破之又與吳總兵軍遇公偕索渾先登射吳
中肩以功授佐領兼兵部職方郎中順治元年從攝政王入關賊
渠李自成眾二十萬屯山海西公偕蘇爾度以鐵騎橫擊大破之
世祖章皇帝定鼎京師以職方郎中從英王追李自成及於慶都
擊敗之從都統葉臣進攻太原賊兵突出公堅壁不戰賊稍近以
連弩射之卻未幾賊復合公從壁後繞出旁擊敗之命速具食乃
釋甲絀馬示罷因狀而空壁設伏以待夜半賊果大至伏發盡殲

之又從英王追李自成同蘇拜破其第一營同哈甯阿蹂其第二營賊大亂夜走保塘復與蘇拜禽其哨騎偵知自成所在追及大破之以功授世襲拜他喇布勒哈番加一拖沙喇哈番兼官如故無何從肅親王取漢中與巴哈納破賊賀珍兵數萬遂定漢中進擊賊渠張獻忠於四川戰西充之鳳皇山獻忠中流矢死餘黨列柵逆戰公從護國公岳洛尙書巴哈納奮擊大破之蜀平以功晉三等阿達哈哈番授前鋒參領兼佐領 太祖高皇帝配天禮成晉二等阿達哈哈番奉 命從鄭親王平湖廣都統尙書阿哈尼堪別將徇沅州公爲前鋒與白爾赫圖以四十騎破楊總兵八萬眾斬楊會白爾赫圖失馬陷圍中身被數創公馳突奪敵騎掖之

上並馬左右射敵不敢近矢盡握短刀力戰潰圍出督師何騰蛟駐湘潭進攻之公先率三十騎薄城忽樓櫓甲士林立發矢射之城上寂無人聲偪視皆束茅爲之而城門不閉疑有伏馳報都統大軍而以三十騎先入城中伏兵起矢石如雨公下馬步鬪大軍繼之遂拔湘潭從順承郡王駐沅州焦璉所部三總兵以數萬眾來犯偕鄂芍擊走之從順承郡王出道州攻龍虎關督師堵允錫率兩總兵眾十萬扼險破之以功晉一等阿達哈哈番兼官如故於是南服略定上 聖母皇太后徽號禮成晉一等阿達哈哈番兼一拖沙喇哈番兼官如故 大婚禮成上 皇太后尊號俾以前職世襲罔替尋從敬謹郡王下衡州李定國擁眾數萬巨象數

十爲前驅人坐象背以毒藥傅矢射人馬立斃公偕西伯臣爲前
鋒相與謀曰南人所恃者象象革堅紉矢石不能入惟鼻瑕可攻
吾與公首射之中其鼻象必奔因其亂以甲騎蹙之破敵必矣矢
再發果皆洞鼻象奔轍亂旗靡急擊遂大破之王在中軍聞前鋒
破敵追北輕騎進中伏王被殊創薨公戰勝還聞之大驚身突重
圍者三得王骸骨入衡州參贊貝勒羅託都統圖賴率諸將進兵
寶慶與孫可望五路軍遇時新失元帥人思復仇皆殊死戰殺傷
相當可望卓龍旗據山巔督戰公顧部曲曰獲餘眾萬人不如得
一可望建功雪恥在斯舉矣賈勇先登大軍呼譟繼之聲振厓谷
可望遁走我師獲全勝諸參贊以捷聞而諱王戰歿狀師還遂

逮貝勒以下 命議政王貝勒大臣會勘公牽連奪職沒爲官奴
獄上 世廟惜公忠勇僅褫世職餘如故未幾 特旨遷護軍統
領居歲餘 命爲參贊大臣帥師下偏沅進取貴州次鎮遠會雲
南內亂兼程日夜進貴陽守將馬進忠棄城走遂定黔中信郡王
大軍來會戒期入滇而白文選眾數萬出七星關黃平州失守平
越獯苗悉震動王命公別將五千人往援以副都統馬爾賽副之
公謂之曰黃平在萬山中城堅不易拔千里饋糧而頓師堅城下
此危道也公將騎二千由大道緩進文選素輕窺知兵少必親出
出則公佯退走吾倍道進乘其後破之如發蒙振落耳前軍次於
萬奇嶺文選果率眾萬人出邀我師馬爾賽佯敗退走文選追躡

數十里公由閒道疾驅出其背呼譟縱擊後軍亂馬爾賽遣師夾擊文選大敗自相踐蹋死者亡算遂棄黃平走黔中復平師旋命下兵部議敘公益讓諸將口不言功大司馬歎美之將特疏聞於朝公又力辭一日從世祖章皇帝獵房山倉卒避疾車駕臨視命侍衛護歸京師覆命言公負狀世廟嘉歎翌日特賜內帑千金黑貂金龍朝服元狐裘帽各一上駟苑良馬二順治十八年正月世廟升遐公涕泣嘔血臥病不起盛京將軍以榮國長公主及諸王大臣仙甲在義州者交通都山紅螺山巨寇思不逞眾且數萬疏聞廷推大將上特以命公賜良馬三乘馬十龍袞寶刀各一公力疾出關次甯遠謂監軍賴撻曰國家

全勝之際區區佃甲何敢逆顏行紅都卽爲盜藪不過一二遁逃
及木客所募諸無賴而已敢遽狂逞哉甯遠兩京要衝今不扼此
又無候騎事可知矣造次以兵壓之恐玉石俱焚濫及無辜吾意
以精甲數百結爲小隊隊纔四五人偃旗裹甲先後行若常數往
來者夜趨錦州黎明抵義州收縛佃甲若賊眾有備賊佯北吾建
旗鼓殿而誘之公率大軍伏木葉山賊至邀擊必獲全勝若諭以
禍福甘出就縛直執訊奏白之耳至則受縛乃分別奏 聞請付
司敗所全活踰千人初李自成旣走死其黨無所歸先後入滇降
號忠貞營諸將皆積功闕至公侯自郴州之敗氣不復振 王師
旣定雲南乃竄入興歸西山以李來亨爲渠魁號十三家夔路爲

梗康熙二年湖廣提督總兵官董學禮疏請川湖會師進剿 上
特出禁旅命議政王公大臣廷推大將以鑲黃旗都統慕禮裏爲
靖西將軍公爲左副將軍正黃旗都統大學士圖海爲右副將軍
上御保和殿宴餞 手賜法酒者三 賜御弓矢韞箘龍袞寶刀
天廢良馬將護驍騎萬人發京師其豫楚巴蜀督撫提鎮各率其
屬隸麾下會師荊州既至荆議分道進討圖海率參佐出歸房公
偕慕禮裏率參佐出夷陵次長樂嶺分軍七道以參贊巴爾部護
輜重副都統赫葉偕湖廣提督董學禮副都統霍卜梭偕四川提
督鄭蛟麟分道設伏以絕外援副都統柯耀爾圖護軍統領根特
巴圖魯爲左右翼而公身率滿漢軍五千人爲前茅慕禮裏率五

千人爲中堅前鋒總管賴塔率前鋒爲游騎來往搏擊兵未交護軍參領哈克山超眾突擊賊錯愕諸軍呼躍從之賊大潰奔逸追北數里忽有賊萬眾自深箐出中軍左右翼合擊破之奪其壘次虎跑崖來亨子某據險捶扼堅壁不戰公分遣將士迭擾之賊不能忍乃出戰前軍壓之賊大敗再奪其壘直抵茅麓山賊盛列蘭石渠蒼以老我師公方病臥帳中慕禮裒就詢方略公謂之曰山路嶮嶇篁竹幽翳我師未諳地利宜令大軍設伏別遣輕騎覘形勢賊至則誘至伏所殲之否則周覽動靜審其扼塞出沒之地而後從事動出萬全不亦可乎慕禮裒不能從列陳而進賊眾萬餘逆戰我師屢勝氣驕爭前進賊退走入壁羣賊乘銳空壁出迎火

器弩矢憑高競發我師稍挫已見壁左巖下有深壑可暫避趨之而傳令徐退眾既退勢不能止賊悉銳來追我師敗績亡副都統一人將校十四人甲騎又數百人慕禮裹愧公言不用以致此敗也亟詣公謝公慰之曰收之桑榆未爲晚也請爲公一洒之時公偵知大軍左次巖下有閒道可繞出賊後自率選鋒三千人銜枚夜發使賴塔偕總兵官于大海入巖防賊衝突馬爾賽伏谿谷閒爲賴塔聲援賊至則發賊眾盛則更互接戰以退哈克山率五百人強弓勁弩伏山下公力疾登山命諸軍分據要害以五百人出遺骸賊酋登天保將數千人出禦賴塔馬爾賽疊邀擊之天保敗走公出遺骸畢徐令退軍居無何郝永忠黨守素等外援至眾且

數萬來亨亦悉其眾萬餘出迎內外夾攻軍容甚盛公堅壁不動簡滿漢突騎二萬四千人爲十二路以賴塔根特霍卜梭柯耀爾圖赫葉馬爾賽董學禮鄭蛟麟徐治都于大海鮑敬等分統之部署既定下令堙井夷竈公與慕禮裏登壁觀伺賊勢稍息諸將縱擊大破之斬賊酋賀珍等四人賊氣奪日夕大會諸將飲帳中酒旣行密傳令赫葉等勒兵伏壁外溪谷以俟夜半李來亨果率眾萬餘襲川陝總督李國英營伏發敗之上望坪爲諸賊帥往來孔道常出此擾我樵牧公自率千人往相度爲校聯以斷賊衝令賴塔柯耀爾圖各將一千五百人據險以防衝突來亨悉銳來爭賴塔等擊敗之又以一千二百人由茅麓山後攀緣絕壁襲奪賊壘

賊虞勢偪遣僞總兵四人率敢死士數千徒跣仗大刀藤牌挑戰狀若鬼神公令柯耀爾圖諾莫分兵兩翼緩進而自建旗鼓當賊別遣賴塔霍卜梭繞出賊後合擊大敗之賊始懼退保諸砦資譚家砦故巢屯糧爲持久計公乃以左副將軍別將眾八千東絕餉道師抵石坪僞總兵四人阻險拒守公命于大海等三路攻拔其柵連破新寨子南峯山進至譚家砦僞侯李嗣名高必正率眾萬餘拒戰公分滿漢兵四千人爲正兵以柯耀爾圖賴塔統之直前破敵二千人爲奇兵以諾木哈克山統之以防不虞戰始交嗣名中流矢死必正亟遣其梟將金騰雲以二千人躡我後諾莫等逆擊斬騰雲賊大敗潰走入砦不復出公謂諸將曰以國家威靈

諸公忠壯旦夕破賊語云困獸猶鬪今偪之必殊死戰不如深溝
高壘扼其吭斷其樵汲不出旬日賊必面縛出降可折箠而定也
諸將皆曰善乃使賴塔等扼其衝鮑敬等斷其汲道公自駐石坪
未二旬高必正黨守素等僞侯三人僞官屬百六十人詣軍門降
公簡其丁壯得勁卒數千分隸諸將其老弱又數萬則護出荆襄
界上俾有司給牛種悉縱爲民旋師與靖西將軍合而右副將軍
歸房一軍亦滅劉汝魁禽郝搖旗諸賊會師茅麓山乃命漢兵作
長圍滿兵分七軍守衝要有急則首尾相應亡何賊夜犯根特于
大海長圍公下令敢譁者斬使護軍參領杜爾佳率左翼護軍千
人往援銜枚疾驅根特等開壁應之殲賊幾盡糧盡援絕賊渠李

來亨自經死餘眾悉降於是西山平夔路復通班師以功授拖沙喇哈番世襲罔替公結髮從戎行由偏裨至大將大小數百戰常爲軍鋒之冠電擊霆震未嘗挫衄軍中號飛將軍而平西山賊功最大既歸京師見輔政內大臣鼐拜恣肆日甚復引疾家居會鼐拜請 幸永平大獵以諸王從公聞之亟詣政府自請扈 蹕許之 命同賴塔爲御圍提控使既而有王府護衛三人誤入圍中鼐拜欲假此震讐諸王奏請考覓其事公語賴塔曰夫已氏隨扈久矣今又睥睨諸王離閒骨肉漸不可長我與公職總禁旅當自引咎以白其事乃與賴塔上疏引罪而請寬貸諸王以示親親之義三上乃許鼐拜素憚公剛直至是益側目焉獵罷 賜天廐

良馬二十復引疾公與鼈拜既不協且屢沮其謀家人以爲言公
笑曰夫已氏以勳閔得與 顧命未諳大體不小心寅畏而顧身
爲姦宄釀成禍基驂乘之萌其端已見不暇自穀豈能禍人越歲
果敗公雖以武功顯而潔廉奉公不畏權要嫉惡遠勢若將浼焉
蓋有古大臣之風康熙八年疾亟以身所遺佐領畀其弟以世職
與次子莫洛洪而告之曰吾歷事 四朝洊被 國恩汝輩無橫
草之功皆獲通籍當厲志節期樹立以圖報稱勿近權勢勿厭澹
泊守吾家法言訖而瞑語不及私十一月二十日也訃聞 上震
悼賜葬祭如令甲公生於天命二年丁巳終於康熙八年己酉得
年五十有三元配耿氏 誥贈一品夫人繼佛氏 誥封一品大

人子男子二人長巢可託官盛京刑部侍郎次莫洛洪襲世職官
護衛佛出也孫三人某某以其年十二月朔葬廣渠門外迤東五
里之原系之銘曰

長白之陽鳴綠東天開草昧占飛龍龍飛在天雲則從爰生佐命
爰羣雄長劍大佩相琰瑤或力諸原或折衝桓桓虎臣有科公目
如電光氣如虹早傍日月依穹窿結髮百戰身從戎摧堅破陣爲
軍鋒巨寇張李稱元凶搏桑一出陰霾空名王帥師萬熊熊前茅
慮無首戰攻遂下湖湘蹙黔中屹然銅柱銘元功晚爲特將披蠶
叢郎房以西山龍從指揮諸將開蒙茸賊如顛當閉厭封窮魚投
釜烏就籠上牢下牢夔路通黃牛白狗無鳴弓振旅飲至明光宮

武功拜爵酬勳庸雲臺圖畫耿與馮英衛襄鄂將無同避遠權勢
臥蒿蓬鳴皋焉能嚇冥鴻大星夜竇當空桐志在馬革身考終豕
象祁連最屢崇令名萬古無終窮

右神道碑銘王士禎撰

劉之源 子光

劉之源漢軍鑲黃旗人 太宗文皇帝天聰九年三月授參領崇德五年五月從 上征明錦州距城東五里以紅衣礮攻克其臺復列礮城北攻克晾馬臺擊斃六人降其卒十三人是年鑲黃旗漢軍都統馬光遠因疾解任以之源代之六年八月隨睿親王多爾袞圍松山以礮攻克近城四臺斬守備二都司一擒副將王希賢參將崔定國都司楊重鎮等明兵尋自松山遁高橋迤南三臺之源率前隊兵攻克之多斬馘七年四月隨鄭親王濟爾哈朗圍塔山列礮城西擊毀城垣二十餘丈殲其守城兵眾進克杏山城北一臺復擊毀杏山城城中人驚懼悉降敘功 子二等輕車都

烏世職時分設八旗漢軍都統授之源鑲黃旗漢軍都統八年十月隨鄭親王攻明中後所拔其城斬遊擊吳良弼都司王國安等進征前屯衛復以礮攻克其城敘功晉一等輕車都尉世職

世祖章皇帝順治元年大兵定燕京 命之源同都統李國翰勦平畿南餘賊時流賊李自成遁陝西僞伯陳永福等竊據太原之源同都統葉臣等攻克其城又同都統巴哈納自汾州勦賊至平陽斬馘四千餘山西州縣悉就招撫師還得 優賚二年隨順承郡王勒克德渾征流賊至湖廣同李國翰殲賊應山縣時僞總兵馬進忠降而復叛之源同都統金礪擊敗之武昌奪賊艘六十餘復追敗餘黨於湖北四年敘功加一等雲騎尉五年 命爲定南將

軍率左翼漢軍隨鄭親王征湖廣六年進攻湘潭明總督何騰蛟分兵三隊出城拒敵我軍分擊大敗之克其城生擒騰蛟乘夜率兵追剿馬進忠平明薄其營奮力衝擊遂克寶慶并破南山坡九營陣斬總兵馬有志胡進玉等進忠僅以身免又破賊渠袁宗第營於洪江駐師沅州僞總兵王永強來犯之源敗之於便水驛斬僞副將三人賊眾七百餘級累遇 恩詔晉世職至一等男又一雲騎尉八年同都統金礪駐防杭州時僞大學士張肯堂僞蕩湖侯阮進僞定西侯張名振等擁明魯王朱以海踞舟山之源與總督陳錦總兵田雄會師進剿由甯波之定關出海阮進集戰艦以拒我師敗之於橫水洋生擒進復分兵擊剿三戰皆捷遂至舟山

之螺頭門肯堂集城中兵六千堅守十餘日我兵用雲梯破城肯
堂及僞尙書李向中吳鍾巒僞侍郎朱永佑等縱火自焚死名振
擁魯王遁三盤島之源遣總兵馬進賢等率兵追克之焚其積聚
復敗之於沙埕收各嶼戶口八千五百餘悉令歸農因與陳錦金
礪奏設陸兵一千爲中營水兵二千爲左右營駐守舟山增設弁
備統以副將敘功晉三等子世襲罔替十六年八月授鎮海大將
軍駐防鎮江疏言京口要地百川匯流所以通江南半壁之財賦
輓運北輪近因海賊鄭成功狡逞糾逆黨聯舩入江來犯幾至橫
截運道臣思賊之所長在水宜先練習水師以資防禦夫防海之
策有三出海會哨勿使入江上策也循塘拒敵勿使登陸中策也

列陣備兵勿使近城斯下矣顧水師必先償造船隻今礮火器具水手舵工百無一備何以禦賊乞 敕總督郎廷佐速爲製備下兵部速議行之十七年七月疏陳三事一沿海民向有雙桅沙船一名捕魚亦名立功自明時因引倭人入寇久經飭禁至今未盡革除奸民多夤緣汎官買口私出因臣申嚴海禁始開報船戶花名投營效力此等船隻造作堅固其人皆熟於洋面水道若徒許令投營不爲安插得所日久必仍販載禁貨出洋或且爲海賊耳目今令京口水師造船二百招募水手舵工八千餘名一時正難精當莫若悉將兩項船隻查驗堪用者量給價值各船戶照例給以糧餉既可省鳩庀製造之費亦可杜私通海逆之弊一汎防向

設戰船分散各營船式低小猝遇海賊大艘勢難向抵臣思京口水師既造船隻旌旗舳艫煥然改色江南亦有沙號各船備用則此等小船除狼山福山吳淞各口酌留數號以備傳遞哨探之用其餘不必槩行修補以省無益之費一邊海汛地緊要凡礮臺烽墩橋路宜修葺高廣預備不虞臣已屢飭沿海州縣至今玩誤不行請 敕督撫嚴行申飭疏下兵部並從其言 詔江南督撫提鎮實心奉行無得因循怠玩是年緝獲海賊鄭成功所遣僞兵部黃徵明得交結蘇松提督馬逢知及逢知受賄關通狀奏入 特命刑部侍郎尼滿赴江南會同之源審擬事俱實逢知伏誅 聖祖仁皇帝康熙元年十二月招降僞肇敏將軍陳文達僞總兵羅

永德等三年四月以疾乞休 召還京仍任都統四年七月復乞
休得 旨劉之源自 太宗時委任勤勞年久著以原銜加太子
太保致仕旋以其子副都統劉光代爲都統八年內大臣鼈拜獲
罪拘禁之源與光並坐黨附革職任擬立斬籍沒 上命從寬俱
免死之源尋卒二十年妻胡氏叩 闕訴之源功可抵罪 詔復
原銜並 予三等子爵以光襲

右 國史館本傳

世系一書
分類不系
一系二二三

王國光 子永譽

王國光漢軍正紅旗人先是爲滿洲姓完顏氏父王一屏初爲明千總 太祖高皇帝天命四年征明取開原城一屏率所屬來歸賜人口馬駝銀幣授佐領 太宗文皇帝天聰八年 予三等輕車都尉世職國光初任佐領兼戶部理事官崇德七年襲父職擢正紅旗漢軍副都統兼戶部參政八年隨鄭親王濟爾哈朗征明攻克前屯衛中後所二城 世祖章皇帝順治元年敘功晉世職二等輕車都尉是年改六部參政曰侍郎國光仍任戶部侍郎兼副都統三年隨定西大將軍和洛輝禦賊西安國光率兵擊卻之又擊敗賊黨歐文炳等以雲梯拔其寨獲馬騾器械無算五年考

滿晉一等輕車都尉是年十月遷本旗都統六年隨英親王阿濟格征大同叛鎮姜瓖攻克左衛朔州汾州太谷四城八年正月敘功晉三等男尋遇 恩詔加一等男四月河間佐領碩爾對訐告給餉不均等事戶部諸臣降革有差國光以前任侍郎降一等輕車都尉九年遇 恩詔加一雲騎尉十年正月 上以前此戶部諸臣處分過重令覈議寬減復國光一等男二月隨定遠大將軍貝勒屯齊征湖廣擊敗僞晉王李定國於永州又敗僞秦王孫可望於岔路口多所斬獲十二年海賊鄭成功張名振等合犯浙江國光同甯海大將軍伊勒德率師往征之敗賊於舟山十三年二月授兩廣總督 賜蟒服鞍馬並 諭獎其才品優良足勝委任

加太子太保十五年大兵三路分剿明桂王朱由榔征南將軍卓
卜特由廣西柳州慶遠一路進征國光疏言大兵取道柳慶恐黔
滇諸賊由西甯來犯因遣參將張榮周貴率兵赴梧潯等處協力
堵禦疏入報 聞六月以疾解任還京十八年 聖祖仁皇帝御
極授鎮海將軍統兵駐防潮州康熙三年同平南王尚可喜會師
剿碣石叛鎮蘇利至海豐偵賊設伏要路欲奪我大礮隨分兵擊
敗其眾遂進師鐙籠山蘇利乘我軍未及成列率眾萬餘突來搏
戰我軍左右夾擊賊眾潰遁追薄碣石衛城四面環攻拔之擒斬
蘇利及偽總兵陳英偽副將李慧等餘黨竄匿各寨國光督兵由
惠來分剿連破賊寨偽總兵陳義鄭盛率眾扼險抗拒我兵奮勇

掩擊鄭盛勢窮自縊死陳義中創僅以身免四年因病乞休 溫
旨慰留之明年 詔率所屬還京仍任本旗都統八年以老致仕
九年正月卒 賜祭葬如典禮諡襄壯子王永譽襲爵康熙十三
年正月授河南提督四月河北總兵蔡祿叛應逆藩吳三桂內大
臣阿密達率兵往剿擒斬之永譽奉 詔赴懷慶拊循士卒因請
暫駐其地防守九月 上以安慶爲兩江重地令設提督調永譽
任之時逆藩耿精忠遣僞都督宋標等陷江西饒州遂犯徽州十
四年永譽督兵駐建德令參將傅爾學進剿賊眾千餘於沿山扼
險我兵分隊擊之斬級無算俘宋標磔於市尋以簡親王喇布疏
請增兵永譽率所屬移守徽州十二月征南將軍穆占以吳逆堅

守衡州乞調永譽助征 上以徽州要地未便調遣不允十七年
江西平裁安慶提督改永譽爲江南提督移駐松江十九年遷廣
東將軍二十年疏言粵東濱海地宜修理戰艦移兵防守請改陸
路兩鎮各一營爲水師以供調遣部議如所請二十二年王大臣
議以兩鎮官兵歸總督統攝分撥各汛地防守永譽疏言海疆重
地省城尤爲扼要應畱兵四千駐防 上允所請二十七年授本
旗漢軍都統三十年三月 命定北將軍瓦岱領兵赴張家口偵
防噶爾丹永譽同都統喀岱等參贊軍務三十五年 上親征噶
爾丹分漢軍爲四營永譽統領正黃正紅兩旗由中路進噶爾丹
聞大兵至不戰而遁永譽同平北將軍馬斯喀督兵追躡偵賊遠

國朝通志卷之二十一
三
竄乃還三十六年隨 駕幸甯夏 命督運軍糧畱貯黃河西岸
要地監守之及大將軍費揚古奏報噶爾丹竄死凱旋兵出境乃
還京四十三年二月卒祀河南名宦子王興武改襲一等輕車都
尉兼一雲騎尉 今上乾隆十八年二月王興武之子福山及族
人並得 旨改隸滿洲正紅鑲白二旗

右 國史館本傳

劉官統

劉官統字宇一河南夏邑人生而赤面豐軀慷慨有大略涉獵書傳頗能屬辭謂丈夫生逢盛世當以功名顯中康熙庚戌進士佐父超鳳之詔安任會耿逆作難父抗節不屈死官統奉母北歸數年謁選授河閒府守備屢升陝西波羅營副將乙亥上命振武將軍征厄魯特以官統爲先鋒將戰軍糧不給官統立馬與部卒約且曰男兒死王事死有餘榮因整軍前進擒其上將追殺三十里捷聞給拖沙喇哈番尋升登州總兵官調甯夏入覲奏蓬萊民隱辭甚惻上爲減賦三分之一邑人口祝之甯夏士俗強悍官統至更定部曲爲分合營恩威並著所部帖然又擢立義

學免山澤及內外互易之稅邊人待若慈父母繼升西安副都統
卒於官弟官亮考選主簿辭職養母以孝行稱

右傳查岐昌撰

郎賽

郎賽漢軍正紅旗人本姓劉世居鐵嶺初爲驍騎校崇德七年分設漢軍佐領令管壯丁二百名隸正紅旗八年九月隨鄭親王濟爾哈朗征明甯遠取中後所及前屯衛敘功 子雲騎尉世職十二年二月隨征黑龍江俘獲甚眾順治元年四月睿親王多爾袞討流賊李自成郎賽率兵前驅敗僞總兵唐通於一片石十月隨豫親王多鐸追剿流賊至陝西二年隨征江南攻克揚州及崑山常熟嘉興等縣預有功晉世職騎都尉七年任兵部郎中兼參領三遇恩詔晉世職至一等輕車都尉是年遷正紅旗漢軍副都統十二年閏五月擢本旗漢軍都統六月以海賊鄭成功猖獗 命掛甯

海將軍印駐防福建十四年攻閩安鎮克其城十七年同都統索
渾護軍統領賴塔等剿賊廈門以官軍不習水戰失利罷任逮問
革世職康熙十年六月卒子阿爾泰初由廕生授吏部員外郎順
治七年遷郎中十二年授佐領尋兼參領康熙三年出任湖廣辰
常總兵七年調浙江黃巖總兵十三年八月逆藩耿精忠叛黨曾
養性祖宏勳等由溫州驅賊眾陷黃巖提督塞白理時駐甯波疏
言臣與黃巖總兵阿爾泰久爲婚媾素以忠義相勸前聞叛黨祖
宏勳陷溫州議與合兵討賊彼亦以不負 國恩自許故一聞黃
巖內變臣謂阿爾泰必死乃九月初六日據陷賊逃回之臣標千
總高興言黃巖城破係城守參將武灝先行通賊受僞總兵職致

拒賊兵丁陣亡者三百總兵阿爾泰亦已割辨從賊受僞將軍職
臣思阿爾泰世受國恩不能死節忍受僞職狗彘不食其餘阿
爾泰之女舊與臣長子銓德爲媳臣欲逐去又無家可歸去畱生
殺悉候 聖裁疏下王大臣議以塞白理之媳係阿爾泰舊日出
嫁之女應仍畱塞白理家阿爾泰之長子佐領劉紹烈駐防京口
見調往杭州應就近收禁十四年康親王傑書統師駐金華疏阿
爾泰不肖從逆爲賊縊死兵部奏釋劉紹烈仍以佐領赴貝子傅
拉塔軍前效力十五年八月署參領勦賊處州戰石塘嶺歿於陣
十六年三月福建巡撫楊熙疏陳阿爾泰權宜詐降以圖恢復爲
賊伺知十三年十一月拘至福州十四年正月耿精忠使人縊死

南門通衢部議贈右都督予卹廕 詔以恩卹忠節關係大典合
 再確察情節部臣奏阿爾泰先經康親王疏稱不肖從賊今巡撫
 楊熙復察實被賊戕害應照例贈卹得 旨不准加贈仍 賜祭
 葬如例二十五年 賜劉紹烈卹銀 子雲騎尉世職以阿爾泰
 之次子劉紹韜襲四十年劉紹韜因疾罷以其子伊理布襲雍正
 七年阿爾泰劉紹烈並入昭忠祠

右 國史館本傳

梁化鳳

梁化鳳陝西長安人順治三年武進士四年授山西高山衛守備五年大同總兵姜瓖叛化鳳從英親王阿濟格攻克陽和城賊將郭二用就擒敘功升大同掌印都司時大同左衛渾源太原汾澤諸郡邑賊衆蜂起六年化鳳破大同北窰溝生擒賊將李義張豹二月攻渾源州克三堡破賈莊城擒賊帥王平進攻左衛下之論功加都督僉事以副將推用五月攻太原賊悉衆殊死戰化鳳身被重創督攻益力執其僞巡撫姜建勳六月攻汾州進薄孝義縣穴地置火藥藥發城圮拔其北關賊帥沈海襲大營化鳳破走之遂下曹家記古善信諸寨堡介休平遙祁縣望風悉降十月攻太

原延安皆下進偪沈海於九臺火其寨海降遂乘勝進定澤州七年復殲餘寇於牛鼻寨晉地悉平八年授江南蕪永營參將勦石皿鷺鷥二湖盜十二年升浙江甯波副將海寇張名振犯崇明之平洋沙總督馬國柱委化鳳署蘇松總兵事至則遣都司談忠出戰名振復圍高橋化鳳親馳援勦擊敗其眾十三年三月實授蘇松總兵化鳳以平洋沙懸隔海中爲賊占聚因沿海築壩長十餘里引平洋沙入內地且灌田千頃俾斥鹵盡爲膏腴時海寇鄭成功率眾號百萬先犯崇明化鳳擒聞謀督兵逆戰獲賊渠餘眾潰遁十六年七月成功以大艦陷鎮江瓜洲直犯江甯南北中梗化鳳率所部兵三千人疾抵江甯登高審視見賊精銳盡屯江干遂

借駐防都統喀喀木副都統噶褚哈分儀鳳鍾阜二門身先搏戰
拔賊巨燾毀其木寨命勇士踞高發巨礮飛火鏃乘勢奮擊擒僞
總兵余自新等賊眾奔潰是夜僞帥連營屯白土山岡化鳳由陸
路進兵賊列陣迎師化鳳督諸軍自下仰攻生擒僞提督甘輝等
賊大敗奔北化鳳追斬甚眾別遣部將燒賊船五百餘艘賊眾自
相蹂躪溺死者無算江南遂通成功敗遁揚帆入海化鳳遣將防
崇明賊果薄城下適化鳳兵自江甯回聲勢相應括民舟出白茆
港絕流迅擊賊復大敗成功僅以身免八月授輕車都尉世職
賜金甲貂裘十七年擢蘇松提督加太子太保左都督化鳳疏言
蘇松濱海要地延袤八百餘里原設標兵僅二千餘名請酌調省

兵三千八百名立爲中左右前後城守六營以資捍禦下部議行
十八年七月 上特詔曰海寇入犯江甯時梁化鳳擊敗其眾繼
援崇明保全孤城功亦不小應再敘捷功加授世職以示鼓勵遂
晉爵三等男准襲八次八月以病乞休 溫旨慰留之九月裁江
安盧鳳提督缺以化鳳爲江南全省提督時議者以海寇初平遊
氛未靖欲立界遷沿海居民於內地化鳳曰沿海設兵以所棄地
畝賦之則國旣足兵民無廢業遷界何爲奏上 詔從其言康熙
元年丁父憂令在任終制十年十一月卒於官 賜祭葬如典禮
贈少保謚敏壯以其孫作長襲爵四十二年 聖祖仁皇帝巡幸
西安府遣官奠其墓子簡另有傳

右 國史館本傳

康熙十四年明桂王遣使自雲南航海晉封鄭成功延平郡王招討大將軍成功分所部爲七十二鎮設六官理事假明永厯號便宜封拜遂議大舉入寇戈船之士十七萬以五萬習水戰以五萬習騎射五萬習步擊以萬人來往策應又以鐵人萬披鐵甲繪朱碧彪文峙陣前專斫馬足矢銃不能入時張名振已死張煌言代領其軍爲嚮導抵浙陷溫州台州師次羊山颶發碎巨艦數十乃旋師嗣聞王師三路攻永厯於雲貴乃大舉內犯江南以圖牽制十六年六月由崇明入江時蘇松提督駐松江江甯提督駐福山分守要害圖山及譚家洲皆設大礮金焦二山皆鐵鎖橫江煌言

屢卻不前令人泅水斷鐵索遂乘風潮以十七舟徑進沿江木城俱潰破瓜洲獲提督管效忠圍鎮江五路疊壘而陣周麾傳礮聲沸江水攻北固山士卒皆下馬死戰官兵退入城成功軍逐之而入遂陷鎮江屬邑皆下部將甘輝請取揚州斷山東之師據京口斷兩浙之漕嚴扼咽喉號召各郡南畿可不戰自困成功不聽七月直薄金陵謁孝陵而煌言別領所部由蕪湖進取徽甯諸路時江甯重兵移征雲貴大半西上城內守備空虛松江提督馬進寶改名不赴援陰通於寇擁兵觀望成功移檄遠近太平甯國池州徽州廣德無爲和州等四府三州二十四縣望風納款維揚常蘇旦夕待變東南大震軍報阻絕世祖幸南苑集六師議親征兩

江總督卽廷佐佯使人通款以緩其攻成功信之按兵儀鳳門外依山爲營連亙數里巡撫蔣國柱崇明總兵梁化鳳皆赴援化鳳登高望敵見敵營不整樵蘇四出軍士浮後湖而嬉乃率勁騎五百夜出神策門先擣白土山破其一營以作士氣次日大出師由儀鳳鍾阜二門以三路攻其前而騎兵繞出山後夾攻成功令甘輝守營而自出江上調舟師諸營見山上麾蓋不動不敢退又未奉號令不暇相救遂大潰甘輝被執死化鳳復遣兵燒海艘五百餘成功遂以餘艦揚帆出海攻崇明不下冬十月還島而煌言軍遇我征貫州凱旋兵浮江下亦戰敗走徽甯山中出錢塘入海是役也梁化鳳首功 詔先圖其形以進十七年擢蘇松提督十八

原身者... 卷三... 三

年裁江安廬鳳提督以化鳳為江南全省提督

右記魏源撰

費雅思哈 子素丹

費雅思哈滿洲正黃旗人姓富察氏佐領木科里之第三子也初任護軍校天聰六年 太宗文皇帝親征察哈爾分兵略明大同至朔州城中兵出戰費雅思哈與參領道喇等奮擊敗之崇德三年署護軍參領隨貝勒岳託征明入牆子嶺敗密雲步兵五年大軍圍錦州明兵至松山杏山赴援費雅思哈禦戰皆捷六年復圍錦州同參領哈甯阿擊敵城下射殪二人明總督洪承疇以步隊自松山來犯費雅思哈力戰卻敵 世祖章皇帝順治元年隨睿親王多爾袞入山海關敗流賊李自成又追敗之於望都是年冬授護軍參領隨英親王阿濟格勦自成明年春次榆林賊乘夜襲

我營費雅思哈同護軍統領車爾布等擊之走窮追自成至武昌連破賊營復率舟師敗賊於富池口獲賊船三十三年隨肅親王豪格征流賊張獻忠過西安分兵勦賊邠州賊渠胡敬德率眾千餘踞三水縣西北山岡費雅思哈同護軍統領噶達渾破賊寨復同都統巴哈納擊敗叛鎮賀珍於雞頭關進師四川屢與獻忠賊黨戰斬獲無算正藍旗官軍爲賊所困同噶達渾趨援賊敗遁先是敘入關功 予世職騎都尉及獻忠滅加一雲騎尉六年隨英親王討大同叛鎮姜瓖掘壕圍城僞總兵楊振威率步騎萬餘來犯費雅思哈先眾迎戰卻賊入城時賊黨分踞左衛復陷汾州窺太原費雅思哈先後率護軍勦賊所至克捷尋復會大軍圍大同

賊勢蹙振威斬瓌首出降乃班師三遇 恩詔晉世職一等輕車
都尉十三年擢護軍統領列議政大臣尋率兵赴湖南駐防時獻
忠餘黨孫可望踞辰州費雅思哈同都統卓羅副都統泰什哈等
由澧州常德進征賊棄城遁縱火焚其船以阻我軍費雅思哈取
其未及焚者以濟師攻發賊伏躡擊至瀘溪殲賊甚眾十八年隨
定西將軍愛星阿勦明桂王朱由榔於緬甸緬人執由榔以獻
聖祖仁皇帝康熙元年凱旋敘功晉爵三等男十一年五月卒
賜祭葬如典禮謚僖恪子素丹襲爵別有傳

右 國史館本傳

素丹

素丹滿洲正黃旗人姓富察氏三等男費雅思哈之子也 聖祖
仁皇帝康熙十一年素丹襲父爵授護軍參領二十九年隨裕親
王福全擊敗噶爾丹於烏蘭布通中箭傷三十一年奉 命隨安
北將軍郎坦勘視甯夏延綏西甯邊界明年擢護軍統領 詔同
都統希福統師駐大同預備征調三十三年郎坦擒獲哈密回人
之輸稅厄魯特者訊知噶爾丹所在請發兵進剿 上命素丹赴
軍前會議尋奏言噶爾丹自烏蘭布通敗遁馬畜亡失部眾貧乏
遷徙靡常以得所遊牧爲幸必不敢復擾我邊疆可暫緩進剿其
納稅厄魯特之哈密回人並請釋歸曉諭其酋以示懷畏意尋又
以甘涼二府乏糧請移駐防兵於甯夏蘭州奏入皆 從之三十

五年二月 上親征噶爾丹由中路進師 詔素丹率增發兵赴西路與撫遠大將軍費揚古刻期並進尋 召赴行在統前鋒兵爲嚮導視沿途所鑿井五月 上至克魯倫河素丹上言噶爾丹懾我軍威勢將奔竄請 上稍緩進征俟西路軍夾擊 上從之噶爾丹果遁走爲西路軍擊敗師還以扈從勞 賜內廄馬一三十七年改授前鋒統領四十年以疾解任 世宗憲皇帝雍正元年六月 賞銀一千兩仍 命以原銜往甘肅軍營效力時青海羅卜藏丹津逞逆 詔撫遠大將軍年羹堯帥師討之素丹參贊軍事二年正月西甯東北郭隆寺喇嘛爲羅卜藏丹津所誘聚眾叛素丹與提督岳鍾琪統兵進剿賊眾於哈拉濟滿我軍奮擊斬

國朝通志卷之二十一
三十一
賊三千燬寨十乘夜追擊發賊山谷伏兵三千盡殪之四月授正
黃旗蒙古都統兼署固原提督十一月授甯夏將軍三年改正紅
旗滿洲都統列議政大臣駐守陝西七年四月大軍征準噶爾素
丹奉 詔率西安滿洲兵一千赴涼州策應七月卒於軍年七十
有二 賜祭葬如典禮諡勤僖先是康熙四十年素丹有疾所襲
父爵以長子素圖襲及雍正五年敘平青海功授素丹三等輕車
都尉世職以次子素章阿襲素圖自有傳

右 國史館本傳

巴特瑪

巴特瑪姓博爾濟吉特氏世居克爾倫蒙古貝子伊蘇特之孫也
太宗文皇帝時隨伯父宰桑古英率族屬來歸隸滿洲鑲藍旗分
屬貝勒濟爾哈朗下尋授侍衛兼任佐領 太宗諭之曰爾雖分
隸貝勒然朝夕侍朕朕必加恩崇德三年宰桑古英授爵三等男
賜達爾漢和碩齊號巴特瑪授三等輕車都尉世職擢任蒙古都
統是年十月隨貝勒岳託征明由牆子嶺入密雲明兵於邊城東
小門平坦處拒戰巴特瑪擊敗之於是大軍並進連克城邑略山
東明年凱旋 優賚牲畜金幣五年睿親王多爾袞圍明錦州巴
特瑪同都統葉克舒設伏松山斬獲無算敵乘夜犯我後營巴特

瑪復與貝子羅託等擊卻敵眾明年三月部議圍錦州時巴特瑪聽從睿親王離營遠駐且私遣兵丁還家應革職籍沒 詔從寬罰鍰是年秋隨大軍擊敗明總督洪承疇於松山復同都統譚泰等移師圍錦州七年明總兵祖大壽以錦州降部臣追論統師王貝勒於禦戰錦州城壞之後審察功罪弗當巴特瑪徇情附和應罰鍰 上以王貝勒大臣等圍城日久勞苦有功槩免罪 召集誠諭之尋 命巴特瑪同輔國公博和託等駐守錦州八年隨貝勒阿巴泰征明至山東屢擊敗明兵之拒戰者旋師攻克新河棗強二城俘獲甚眾 世祖章皇帝順治元年隨睿親王入山海關討流賊李自成遇賊將唐通兵數百巴特瑪爲前驅擊敗之追破

自成於望都二年敘功晉一等輕車都尉兼一雲騎尉三年隨肅親王豪格征流賊張獻忠於四川賊踞西充縣界抗拒巴特瑪同護軍統領鼇拜率師奮擊陣殪獻忠大破其眾方合戰時護軍統領哈甯阿被圍參領希爾根未赴援及師還與護軍統領阿爾津等爭功部訊得實以巴特瑪在軍中不能勘定功罪致啟爭冒應罰鍰得旨寬免五年貝子屯齊等訐鄭親王濟爾哈朗過誤坐巴特瑪弗規諫罪削所管人戶之半尋三遇恩詔晉爵一等男洵擢一等侍衛散秩大臣復進列內大臣十六年內大臣公額爾克戴青之僕陳保等毆侍衛阿拉那於市巴特瑪之僕亦助毆法司鞠訊聽陳保等誣詞坐阿拉那持刀擊人應革職折贖上鑒

其誣下王貝勒覆勘得實額爾克戴青坐徇縱罷任削職降巴特瑪世職爲一等輕車都尉兼一雲騎尉康熙十一年六月卒子班達爾沙襲

右 國史館本傳

齊爾格申

齊爾格申世居甯古塔以地爲氏 太祖高皇帝時隨其兄納林
率丁壯百餘來歸卽以納林管之授爲佐領隸滿洲鑲白旗納林
卒齊爾格申仍其任率所部鎮達卜遜木城明人來攻耀州齊爾
格申往援敗之淤泥河還駐平山見海濱鹽徒千人具舟將竄乘
夜襲之殪其衆明錦州守將來犯齊爾格申擊之面被創奮勇力
戰卒敗敵 太宗文皇帝天聰六年修蓋州城移人戶以實之
命齊爾格申同副都統石國柱參領雅什塔等率兵駐守八年以
克副任使授騎都尉世職是時明邊將數誘我新附之衆往歸齊
爾格申常率兵於沿海緝捕逃亡有七人將渡海明人以舟迎之

既離岸矣齊爾格申涉水追射殪其執烏槍者一人及倡逃者一人遂躍入其舟生擒明備禦一及邏卒十三人旋復率兵扼北新渡口偵知敵舟五十餘泊島卽設伏以待果有二十餘人入島伐木伏發盡獲之海中敵舟有二人遙呼曰我逃人也誰敢逐我者齊爾格申擊小舟應聲碎至擒其一斬其一敵舟驚潰崇德元年四月分別駐防年滿各官功罪以齊爾格申捕獲逃人甚眾駐守稱職賜良馬五月隨武英郡王阿濟格證明宣府薄大同戰城下兩敗敵眾出延慶州俘人戶牲畜以還世祖章皇帝時嘗任福陵總管順治七年遇恩詔加一雲騎尉世職先是齊爾格申之從弟多尼喀於崇德七年隨貝勒阿巴泰證明至山東攻萊陽

縣先登克其城 賜號巴圖魯投騎都尉又一雲騎尉世職至是
卒 命齊爾格申併襲爲一等輕車都尉復兩遇 恩詔晉爵三
等男康熙十二年三月卒 賜祭葬如例孫石清襲爵

右 國史館本傳

國朝三行廣類卷之二十一

四

遏必隆

子音德

曾孫特清額

遏必隆滿洲鑲黃旗人姓鈕祜祿氏額亦都第十六子也母和碩公主天聰八年 太宗文皇帝賜敕命遏必隆襲其父一等子爵任侍衛九年 詔免功臣徭役遏必隆與焉並給人戶使管佐領事貝勒尼堪福晉遏必隆兄都統圖爾格之女也無子謀取僕婦女作爲己生尼堪入奏 命刑部承政索海等會鞫之遏必隆告於鄭親王濟爾哈朗曰索海與尼堪爲媼戚恐左袒宜勿與訊及會勘福晉謀作子事實遏必隆坐徇庇欺誑削爵崇德六年從上證明移營松山濬壕環守明總兵曹變蛟率乳峯山步騎欲棄寨突圍出屢犯兩黃旗營遏必隆連擊敗之夜三鼓變蛟集敗兵

突犯 御營遏必隆與侍衛坤巴圖魯巴什塔及大臣錫翰等堅
守後營門壘力戰殲十餘人變蛟負創以其眾遁走 詔守衛不
嚴諸臣輸罰緩分賚禦敵將士遏必隆得 優賞七年隨饒餘貝
勒阿巴泰等征明入長城克薊州進兵山東抵克州攻夏津先登
克其城授騎都尉世職順治二年流賊李自成遺孽李錦與賊黨
郝搖旗等竄聚湖廣爲亂荆襄武漢道路多梗遏必隆隨順承郡
王勒克德渾往討師次武昌賊據守要隘遏必隆先眾攻擊大軍
繼進斬獲無算遂拔鐵門關敘功晉二等輕車都尉五年兄子公
爵科普索訐其與白旗諸王有隙設兵護門事論死籍沒得 旨
免死革世職及佐領籍家產之半八年 世祖章皇帝既親政遏

必隆訟削職冤 詔復職明年科普索獲罪以所襲圖爾格之二等公爵令遏必隆併襲爲一等公有護軍擺思哈喇者當 太宗上賓時託疾不守門至是已授騎都尉又一雲騎尉遏必隆舉劾其前罪下部鞠實置之法籍其家以與遏必隆旋任議政大臣三月掌鑾儀衛事十月擢領侍衛內大臣十四年加少保兼太子太保尋加少傅兼太子太傅十八年受 遺詔與索尼蘇克薩哈鼐拜同爲輔政大臣康熙六年三月御史張惟赤疏請 聖祖仁皇帝親政於是索尼等以歸政請遏必隆亦懇請再三是歲七月上躬親大政 諭部加恩輔臣以示酬庸之典 詔從部議 加賜遏必隆一等公爵復以其長子法喀襲原授之一等公遏必隆

奏辭不允 賜帶雙眼孔雀翎明年加太師尋乞罷輔政 溫諭
慰畱又明年再請乃許先是輔政時索尼老病鼇拜多專政與蘇
克薩哈不相能遏必隆不能自異及鼇拜倡圖易旗地之令中外
大臣皆謂爲不便遏必隆欲停止窺鼇拜意在必行遂弗與爭既
而鼇拜矯旨誅大學士蘇納海等復族誅蘇克薩哈遏必隆皆不
爲阻止亦不入奏八年鼇拜獲罪 上以遏必隆同列輔政明知
其惡而緘口不語 詔法司并逮問論死 上復念其結黨無實
宥之削太師銜及後 賜之一等公九年 諭兵部曰前以輔政
大臣遏必隆知鼇拜樹黨亂政不豫行糾劾故坐之罪今念其爲
皇考顧命大臣且勳臣子其咎止於因循瞻顧實未嘗躬負重愆

特爲寬宥仍以公爵宿衛內廷遇必隆遂以一等公品級入朝
侍直十二年十二月疾篤上臨視慰問及卒賜祭葬諡恪慎
勒石墓道碑文稱其賦性敬慎制行端方懇誠報國著有勤勞云
尋以冊立孝章仁皇后推恩所生特旨令立家廟賜
御製碑文復御書策名金石四字以額其祠五十一年上念
遇必隆曾襲其父世爵緣事削除未襲特命以其第四子音德
襲一等子世爵子五人法喀音德阿靈阿皆別有傳

右 國史館本傳

音德

音德滿洲鑲黃旗人姓鈕祜祿氏祖額亦都一等內大臣追封

宏毅公父遏必隆輔政大臣 封一等公謚恪僖有傳遏必隆子
五音德其第四子康熙二十四年由佐領授三等侍衛兼善撲長
三十五年從 上親征噶爾丹三十六年復扈 蹕視師甯夏三
十八年改王府長史尋授一等侍衛先是遏必隆襲額亦都所遺
一等子緣事削及輔政別 封公爵其子爵未議襲五十一年
特命音德襲之六十一年十一月 世宗憲皇帝御極擢散秩大
臣署鑲白旗護軍統領十二月授正藍旗滿洲都統雍正元年
命兼任蒙古漢軍都統二年襲其伯父圖爾格二等公其一等子
爵卽以圖爾格孫豐阿達襲是年授領侍衛內大臣三年兼議政
大臣五年以病乞休 特遣內大臣慰問遂以原品致仕十一月

卒 賜祭葬如例諡愨敬十年十月 諭曰原任領侍衛內大臣
音德乃額亦都之孫居心謹厚行己端方朕所悉知似應入賢良
祠著詢問九卿具奏尋覆請入賢良祠 允之乾隆元年加 贈
一等公子五人策楞訥親愛必達阿里袞皆別有傳

右 國史館本傳

音德姓鈕鈞祿氏滿洲鑲黃旗人其先居英嶠地祖額亦都有功
太祖朝爲開國五大臣之一晉爵至二等公卒諡宏毅父遏必隆
嗣爵卒諡恪僖音德初以侍衛再從征噶爾丹康熙五十二年
聖祖以額亦都功予音德爵一等子世襲音德貌魁梧嫻騎射而
恭謹誠樸宿衛左右十餘年未嘗有過凡所任使必竭其心力

世宗深知之擢散秩大臣兼鑲白旗護軍統領晉正監旗滿洲都
統旋兼掌蒙古漢軍都統事以勤勞致疾屢奉 旨令擇地攝養
賜資不絕病有閒入謝 許乘馬出入紫禁城二年襲爵二等公
授領侍衛內大臣預議政事聽以所得子爵授其從子豐阿達五
年疾作乞休 詔以次子訥親襲公爵他所兼職皆暫罷比病篤
世宗召其族孫侍衛占布出內府錦幣俾收貯爲殮具仍 諭勿
令音德知十月卒甚悼惜之 賜金三千兩以治喪 予祭葬如
典禮音德雖家居臥病朔望必攝衣冠北面叩頭歲入祿米悉分
諸宗族之貧者曰 國家之洪恩祖宗之遺澤當與族眾共之其
天性謹厚蓋如此六年追諡曰愨敬乾隆元年加 封一等公

右 國史賢良小傳

特清額

特清額鈕祜祿氏鑲黃旗滿洲人曾祖邁必隆輔政大臣祖音德
領侍衛內大臣父策楞內大臣兼定西將軍俱有傳特清額於乾
隆二十九年由官學生挑補上虞備用處拜唐阿三十三年升藍
翎侍衛四十年補鑾儀衛治儀正四十五年選直隸張家口都司
五十年遷易州營遊擊五十四年擢保定營參將五十六年升河
屯協副將九月調直隸督標中軍副將六十年授秦甯總兵兼總
管內務府大臣嘉慶四年六月升古北口提督五年五月因直隸
調赴豫省防堵之兵技藝生疏不能得力經河南巡撫吳熊光入

奏 上以特清額訓練不力嚴飭之尋交部議處部議降一級留
任六年三月借督臣顏檢奏直隸省試用武職旗員人數壅滯待
缺需時查本省沿邊旗員缺向由京揀放近奉新例各處駐防保
薦人員俱以旗缺升用直隸省沿邊共計四十三缺可否援照駐
防保薦人員升用旗缺之例遇沿邊將備缺出准以直隸試用旗
員暫時通融題補計二三年後可以用完仍復舊制得 旨允行
七月奉 命赴天津察看水勢時漕船停待多時漕運總督鐵保
奏請護送前進 諭令會同特清額悉心籌辦又天津一帶賑務
浩繁特清額奏請將該處所留漕糧二十萬石先支十之二三以
資撫恤 上是之如所請行八年四月借督臣顏檢奏請將龍泉

關茨溝營守備移駐趙州趙州千總改駐茨溝下部議行六月調
補甘肅提督時青海野番屢次搶劫蒙古牲畜陝甘總督惠齡等
分路進兵特清額奉命馳往七月由莊浪協調兵帶赴西甯策
應野番畏懼乞降特清額卽由丹噶爾等處宣布恩意仍回本
任十年三月西甯辦事大臣都爾嘉辦理沙衝寺喇嘛控回民馬
喀桑占地蓋房一案上以都爾嘉必有偏聽任性情事特命
特清額前往會同西甯道慶炆審辦卽命署理西甯辦事大臣
將都爾嘉歸案審訊四月究出都爾嘉疎縱屬下收受賊銀筆帖
式與安捏詞稟報等款諭令將都爾嘉革職拏問特清額等隨
卽定擬奏入諭曰所訊尙未確實銀數是否相符不但入己不

入己輕重懸殊卽入己亦有枉法不枉法之分滿貫不滿貫之別特清額等摺內含混不明似乎從嚴又似開脫若稍不確實恐汝等不免徇庇之咎慎之尋特清額等以續行究出原任西甯道福永分受羊販贓並起獲原任參將何守林寄頓都爾嘉贓私具奏上以其據實辦理毫無瞻徇認真可嘉並賞給香袋扇套以示優獎仍嗣將都爾嘉案內各犯定擬覆奏懲治如律十一年二月部議特清額前承審都爾嘉之案筆帖式興安事後分贓罪錯擬絞候請降三級調用上加恩改爲降三級畱任六月授成都將軍時甯陝叛匪滋事九月奉命帶兵會合領侍衛內大臣德楞泰一路進剿遂偕提督豐紳等由棧道翻山前進並會同陝甘總

督倭什布等從襲城畱壩一帶自南而北乘勢殲擊復添兵由鳳
縣迎勦大軍克捷後其投誠叛匪內有曾充兵丁者德楞泰許其
仍歸原營操防 諭以德楞泰所辦壞法養奸特清額何以束手
旁觀傳旨申飭特清額自請交部議處部議降三級調用 上加
恩改爲降四級畱任十一月 上命四川總督勒保帶兵馳往甯
陝軍營特清額署理四川總督十二年正月達州兵叛特清額卽
遣副將桂涵等往勦生擒逆首王得先黃明榜等餘俱全數殲除
諭特清額駐省彈壓尋奏請派令臬司姚令儀赴西定隨勒保查
審叛賊 上是之二月卸督篆三月川省有謀命奪產控案 特
命據實嚴辦讞擬如律六月長壽縣土匪滋擾 上命西安將軍

德楞泰帶兵往剿特清額借四川總督勒保駐省籌辦糧餉各事
宜十一月裏塘頭人竹馬策登戕害正土司希落工部特清額派
兵掩捕格殺多名首犯旋就擒獲遵 旨嚴辦如律十三年二月

命恭齋賞賜達賴喇嘛呼畢勒罕物件抵藏宣示閏五月馬邊
廳野番滋事總督勒保馳往督辦特清額自藏起程未至 上命
兼程赴省彈壓十月再署四川督篆十五年給事中胡大成奏川
省有蜀都賦歌謠指訐督藩款蹟 上命工部尙書託津光祿寺
少卿盧蔭溥前往查辦查明歌謠起於十四年正二月閒 上以
特清額係將軍大員又兩署督篆隱庇並不奏及咎更難辭著交
部議處部議降二級調用得 旨改爲降三級畱任十六年卒子

與林見任工部主事

右 國史館本傳

國史館本傳

九

國朝通志卷之九

卷之九

九

巴山 子舒恕

巴山滿洲鑲黃旗人姓瓜爾佳氏世居哈達祖巴岱 國初時率眾來歸授佐領再傳至巴山仍其任天聰五年從 太宗文皇帝證明圍大凌河城明兵出城誘戰副都統屯布祿戰歿巴山衝入敵陣得其屍以出復擊退敵兵取佐領郎格等二人屍歸明年大兵征察哈爾其部眾有竄入明大同邊境者往索取之師旋明兵追襲巴山與承政圖爾格殿後設伏邀擊斬馘甚眾八年以克副任使授騎都尉世職尋任參領崇德元年從 上征朝鮮同參領屯泰等先眾破敵陣三年七月兼任工部理事官八月隨貝勒岳託證明自牆子嶺入邊薄燕京擊敗明太監馮永盛兵進攻鉅鹿

縣率所部樹雲梯先登克其城敘功加一雲騎尉五年同承政薩
穆什喀索海等征虎爾哈部攻卦喇爾屯有斬獲七年奉 命隨
奉國將軍巴布泰率師駐防錦州 世祖章皇帝順治元年睿親
王多爾袞統大兵入山海關巴山率所部步戰擊敗流賊李自成
尋擢工部侍郎敘功晉三等輕車都尉二年十一月授鎮守江甯
副都統三年 命總管江甯駐防滿洲兵時江北山寨賊寇未靖
江甯城中奸徒謀爲內應巴山偵得之捕斬逆黨三十人未幾僞
潞安王朱誼石糾眾二萬餘分三路來犯巴山與副都統康喀賴
等破走之賊復屯聚城北之攝山我軍進剿斬其渠數人餘黨悉
潰竄四年明故官侯峒曾之子侯元瀨遣其黨謝堯文潛通明僞

王朱以海於海島取僞敕及僞鎮黃斌卿致招撫大學士洪承疇書以歸爲柘林遊擊陳可所獲有內伏承疇殺巴張二將語蓋指巴三與提督張大猷也事聞上以逆書所云乃反閒計特宣諭慰承疇而諭獎巴山張大猷曰爾等嚴察亂萌具見公忠盡職六年江南總督馬國柱勦六安州山賊巴山以兵會之陣斬賊渠張福寰諸賊寨俱翦平兩遇恩詔晉爵三等男九年還京十一年以久鎮江甯平賊寇功晉二等男康熙十二年卒賜祭葬如例以其子舒恕襲爵十五年舒恕隨大學士圖海征叛鎮王輔臣師至平涼北城虎山城輔臣以眾萬餘拒敵敗之是年復隨都統穆占征逆藩吳三桂破賊眾三千於湖北松滋縣二十年進

圍雲南城擊敗賊將胡國柄劉玘龍黃明等又蹙賊將馬寶巴養元等於烏木山二十五年敘功晉一等男後以年老乞休尋卒子長清改襲一等輕車都尉

右 國史館本傳

馬惟興

馬惟興者馬寶兄也嘗爲雲南總兵移鎮福建其人不諳文墨然時有發言合禮者順治之季特賜諸將三代贈封惟興久之不上撫臣問之愀然對曰下官少爲寇虜相從作賊今幸際風雲之末寶不識父何名母何氏若私撰以上之不惟欺君亦誣其先人也願明公以此語上聞但恩榮及身而已一時皆是其言嗚呼李德林俊人也尙妄加其父官爵以招罪戾豈但侯景哉不謂惟興之草竊所見卓然直可爲後世法惟興死於癸丑之前不豫其弟之變由其所言觀之固當賢於弟也

右記事全祖望撰

K820.49

2

165-908

圖書分類法
卷二

三

--	--	--	--	--	--	--	--	--	--

165-908



21101000160762